


G. AXMEDOVA,  
O.B. MAMATQULOV,  
I. XOLBAYEV

# ATOM FIZIKASI



# KIMYOVİY ELEMENTLAR DAVRIY JADVALI

Davrılar	Qatorlar	ELEMENTLER												Energetik onalar	
		I	II	III	IV	V	VI	VII	VIII						
1	I							H 1 VODOROD 1,008						He 2 GELİY 4,003	
2	2	Li 3 LITİY 6,941	Be 4 BERİLLİY 9,012	B 5 BOH 10,811	C 6 UGLEROD 12,011	N 7 AZOT 14,00	O 8 KISLOROD 15,995	F 9 FTOR 18,998						Ne 10 NEON 20,179	
3	3	Na 11 NATRIY 22,990	Mg 12 MAGNİY 24,306	Al 13 ALYUMINİY 26,981	Si 14 KREMNIY 28,085	P 15 FOSFOR 30,974	S 16 OLTINGUGURT 32,064	Cl 17 XLOR 35,453						Ar 18 ARGON 39,948	
4	4	K 19 KALİY 39,098	Ca 20 KALSIY 40,08	Sc 21 SCANDİY 44,956	Ti 22 TİTAN 47,90	V 23 VANADIY 50,941	Cr 24 HRON 51,996	Mn 25 MARGANETS 54,938	Fe 26 TEMİR 55,847	Co 27 KOBALT 58,933	Ni 28 NIKEL 58,70				NMLK
5	5	Cu 29 MİZ 63,546	Zn 30 RUX 65,38	Ga 31 GALLİY 69,723	Ge 32 GERMANY 72,59	As 33 MİSHYAK 74,922	Se 34 SELEN 78,9	Br 35 BROM 79,904						Kr 36 KRİPTON 83,80	
6	6	Rb 37 RUBIDIY 85,468	Sr 38 STRONSIY 87,62	Y 39 ITTRİY 88,906	Zr 40 SIRKONİY 91,224	Nb 41 NIÖBIY 92,906	Mo 42 MOLİBDEN 95,94	Tc 43 TEXNETSIY 97,907	Ru 44 RUTENİY 101,07	Rh 45 RODİY 102,905	Pd 46 FALLADİY 106,4				ONMLK
7	7	Ag 47 KUMUSH 107,868	Cd 48 KADMİY 112,41	In 49 INDİY 114,82	Sn 50 QALAY 118,69	Sb 51 SURMA 121,75	Te 52 TELLUR 127,60	I 53 YOD 126,904						Xe 54 KSENON 131,10	
8	8	Cs 55 SEZİY 132,905	Ba 56 BARIY 137,33	La* 57 LANTAN 138,905	Hf 72 GAFNİY 178,49	Ta 73 TANTAL 180,94	W 74 VOLFRAM 182,85	Re 75 RENİY 186,207	Os 76 OSMİY 190,2	Ir 77 IRIDIY 192,22	Pt 78 PLATINA 195,09				PONMLK
9	9	Au 79 OLTIN 196,966	Hg 80 SIMOV 200,59	Tl 81 TALİY 204,37	Pb 82 QORGOSHİN 207,2	Bi 83 VISMUT 208,980	Po 84 POLONİY [209]	At 85 ASTAT [210]						Rn 86 RADON [222]	
7	10	Fr 87 FRANSİY 223,0197	Ra 88 RADİY 226,025	Ac** 89 AKTİNY 227,0278	Rf 104 REZERFORDİY [261]	Db 105 DUBNIY [262]	Sg 106 SIBORGİY [263]	Bh 107 BORİY [264]	Hs 108 XASSİY [265]	Mt 109 MEYTNERİY [266]					QONMLK

## LAN TAN O I D L A R 5 8 - 7 1

Ce 58 2 SERİY 140,12	Pr 59 2 FRAZEODİM 140,908	Nd 60 2 NEODİM 144,24	Pm 61 2 PROMETİY 145	Sm 62 2 SAMARIY 150,4	Eu 63 2 YEVRİTY 151,96	Gd 64 2 GADOLİNİY 157,25	Tb 65 2 TERİY 158,925	Dy 66 2 DISPROZİY 162,50	Ho 67 2 GOLMIY 164,930	Er 68 2 ERBİY 167,26	Tm 69 2 TULİY 168,934	Yb 70 2 ITTERİY 173,04	Lu 71 2 LYUTETİY 174,967
-------------------------	------------------------------	--------------------------	-------------------------	--------------------------	---------------------------	-----------------------------	--------------------------	-----------------------------	---------------------------	-------------------------	--------------------------	---------------------------	-----------------------------

## \*\* A K T I N O I D L A R 9 0 - 1 0 3

Th 90 2 TORİY 232,038	Pa 91 2 PROTAKTİNY 231,036	U 92 2 URAN 238,029	Np 93 2 NEPTUNİY 237,048	Pu 94 2 PLUTONİY 244	Am 95 2 AMERİTSİY 243	Cm 96 2 KYURİY 247	Bk 97 2 BERKLİY 247	Cf 98 2 KALİFORNIY 251	Es 99 2 EYNŞTEYNEY 254	Fm 100 2 FERMIY 257	Md 101 2 MENDELEYEVİY 258	(No) 102 2 NOBELİY 259	(Lr) 103 2 LOURENSİY 260
--------------------------	-------------------------------	------------------------	-----------------------------	-------------------------	--------------------------	-----------------------	------------------------	---------------------------	---------------------------	------------------------	------------------------------	---------------------------	-----------------------------

— s-ELEMENTLAR    — p-ELEMENTLAR    — d-ELEMENTLAR    — f-ELEMENTLAR

**O'ZBEKISTON RESPUBLIKASI OLIY VA O'RTA MAXSUS  
TA'LIM VAZIRLIGI**

---

**G. AXMEDOVA, O. B. MAMATQULOV,  
I. XOLBAYEV**

# **ATOM FIZIKASI**

*Oliy o'quv yurtlarining 5140200 – fizik-bakalavr ta'lif yo'nalishi  
uchun o'quv qo'llanma*

**«ISTIQLOL»  
Toshkent – 2013**

UDK: 539.18(075)

KBK: 22.36ya73

A 98

**Mas'ul muharrir:**

**T.M. Mo'minov — O'zbekiston Milliy universiteti qoshidagi  
Amaliy fizika ilmiy tekshirish instituti direktori,  
O'zFA akademigi, fizika-matematika fanlari doktori, professor**

**Taqrizchilar:**

**M.M. Musaxonov — O'zR FA akademigi, fizika-matematika fanlari doktori,  
O'zbekiston Milliy universiteti yadro va nazariy fizika kafedrasи professori,**

**R.M. Ibodov — Samarqand davlat universiteti atom va yadro fizikasi kafedrasи  
mudiri, fizika-matematika fanlari doktori, professor.**

**22.36**

**A 98**

**Axmedova, G.**

**Atom fizikasi:** o'quv qo'llanma / G.Axmedova, O.B.Mamatqulov, I.Xolbayev; O'zbekiston Respublikasi Oliy va o'rta maxsus ta'limgazirligi. — Toshkent: Istiqlol, 2013. — 416 b.

Ushbu o'quv qo'llanma O'zbekiston Respublikasi Vazirlar Mahkamasining «Uzluksiz ta'limgazirligini darslik va o'quv adabiyotlari bilan ta'minlashni takomillashtirish to'g'risida»gi 2009-yil 5-yanvar 4-son qaroriga muvofiq O'zbekiston Respublikasi Oliy va o'rta maxsus ta'limgazirligi tomonidan 23-avgust 2008-yilda tasdiqlangan fizik-bakalavr yo'nalishlari uchun tuzilgan atom fizikasi dasturi asosida tayyorlandi. O'quv qo'llanma oliy o'quv yurtlarining fizik-bakalavr mutaxassisligi bo'yicha ta'limgazirligini olayotgan talabalarga, umuman, fizik mutaxassislarga mo'ljallangan.

Ushbu o'quv qo'llanmada atom fizikasi fanining taraqqiyot bosqichlari, yutuqlari, issiqlik nurlanishi, elektromagnit nurlanishning korpuskulyar xususiyatlari, zarralar va to'lqinlar, vodorod atomining Bor nazariyasi, kvant mexanikasining asoslari, bir elektronli va ko'p elektronli atomlar, rentgen spektrlari, atom tashqi kuchlar maydonida, molekulalar xususiyatlari va qattiq jismrlarga oid ma'lumotlar bayon qilingan.

O'quv qo'llanmadan oliy o'quv yurtlarini fizik-bakalavrulari, magistrantlar, tadqiqotchilar, o'qituvchilar hamda akademik litseylar, kasb-hunar kollejlari talabalari, umuman, atom fizikasi faniga qiziquvchilar foydalanishlari mumkin.

**UDK: 539.18(075)**

**KBK: 22.36ya73**

ISBN 978-9943-308-84-8

© «Istiqlol nashriyoti», 2013



## **SO‘ZBOSHI**

Hozirgi kunda Respublikamiz universitetlarida bakalavr kadrlar tayyorlanmoqda. Shuning uchun ham bakalavrlar o‘quv dasturlari asosida yozilgan zarur o‘quv adabiyotlari yaratish Respublikamiz Kadrlar tayyorlash Milliy dasturini amalga oshirishdagi muhim chora-tadbirlardan biri hisoblanadi.

Zamonaviy fizika kursining asosiy bo‘limlaridan biri bo‘lgan atom fizikasidan bugungi kungacha fizik-bakalavrlar o‘quv dasturi va Davlat ta’lim standarti asosida Davlat tilida yozilgan va dastur bo‘limlarini to‘laligicha qamragan o‘quv adabiyotlari mavjud emas deyish mumkin. Atom fizikasidan Davlat tilida yozilgan adabiyotlar juda kam bo‘lib, kursning u yoki bu bo‘limlariga tegishli yoxud xorijiy tillarda yozilgan. Bakalavrlar uchun davlat tilida yozilgan, dastur bo‘limlarini to‘liq qamragan darsliklar, o‘quv qo‘llanmalar tayyorlash ularning ushbu fanni puxta o‘zlashtirishlariga imkon yaratishi mumkin. Shundan kelib chiqib, mualliflar O‘zbekiston Respublikasi Oliy va o‘rta maxsus ta’lim vazirligi tomonidan fizik-bakalavr yo‘nalishi uchun atom fizikasidan tasdiqlangan dastur asosida atom fizikasi kursidan mavjud bo‘lgan davlat tilida va xorijiy tillarda yozilgan adabiyotlardan foydalangan holda hamda Samarqand davlat universiteti fizika fakulteti talabalariga ko‘p yillar o‘qigan ma‘ruzalari, ish tajribalari asosida ushbu o‘quv qo‘llanmani yozishga qaror qildilar. Mualliflar o‘quv qo‘llanmada har bir mavzuni imkonni boricha tajribalar sxemalari, grafiklari orqali oddiy tushunarli tilda yoritishga harakat qildilar. O‘quv qo‘llanmada mikrodunyoda fizik kattaliklarning o‘lchov birliklari, talabalarning mustaqil ishlashlari uchun har bobning oxirida nazorat savollari, masalalar, test savollari va javoblari keltirilgan.

Albatta, mazkur o‘quv qo‘llanma birinchi marta chop etilmoqda. Shuning uchun ayrim kamchilik va noaniqliklarga ega bo‘lishi mumkin. Mualliflar kitobxonlarning kamchiliklarni tuzatish, o‘quv qo‘llanmani takomillashtirish to‘g‘risidagi bildirgan fikr va mulohazalarini mammuniyat bilan qabul qiladilar.

## KIRISH

**Atom tuzilishi to‘g‘risidagi tasavvurlarning rivojlanishi.** Atom fizikasi hozirgi zamон umumiy fizika kursining asosiy bo‘limlaridan biri hisoblanadi. Atom fizikasi moddaning eng kichik zarrasi bo‘lgan atom elektron qobiqlarining tuzilishini, ularning xususiyatlarini va ulardagi jarayonlar tufayli yuz beradigan hodisalarni o‘rganadigar fandir.

Atom fizikasi XIX asr oxiri va XX asr boshlarida yuzaga keldi. Lekin bu davrgacha, ya’ni atom fizikasi alohida fan sifatida yuzaga kelganiga qadar moddalar tuzilishi, materianing cheksiz bo‘linishlar va atom nazariyasi to‘g‘risida qadimgi yunon faylasuflari tomonidan turli fikrlar ilgari surildi, ko‘pgina olimlar tomonidan tajribalar o’tkazilib, fizik hodisalar kashf qilindi. Tajribalaradan to‘plangar fizik hodisalarni, kashfiyotlarni ilmiy jihatdan asoslash, ularni tushuntirish atom fizikasini rivojlantirishni talab qilar edi. Bu esa atom fizikasining taraqqiy etishiga, alohida fan sifatida yuzaga kelishiga olib keldi.

Qadimgi yunon faylasufi Anaksagor (eramizdan avvalg 500–428-yy.) fikricha materiya asosida juda kichik bo‘lgan zarralari moddaning urug‘lari turadi, ularning sifatlari ham cheksizdir det hisobladi. Anaksagorning aytishicha, hamma narsada, hamma narsaning ulushi bor, qaysi narsaning ulushi ko‘p bo‘lsa, har bi alohida narsa o’sha narsaga ko‘proq o‘xshaydi. Tabiatdagi haq qanday o‘zgarish abadiy va doimiy bo‘lgan modda urug‘lar munosabatining o‘zgarishi natijasidir.

Atomistik materializm asoschilari bo‘lgan qadimgi yunon faylasuflari Levkipp (eramizgacha V asr) va Demokritlar (eramizdan avvalgi 460–370-yy.) atom nazariyasini ilgari surdilar. Bu nazariyaga ko‘ra, har bir modda bo‘linmaydigan mayda zarralardan, ya’ni atomlardan tuzilgan. ularning fikricha, atomlar mutlaq bo‘lib, ularda

bo'shliq yo'q. Ular cheksiz fazoda bir-biridan alohida ajratilgan bo'lib, tashqi shakli, o'lchami, holati, tartibi bilan farq qiladi.

Atomlar ma'lum vaqtarda turg'un birikmalarga birlashib turli jismlarni hosil qiladi. Demokritning atomistik qarashlari Epikur (eramizdan avvalgi 341–270-yy.) tomonidan rivojlantirildi. Uning fikricha, atomlar bir-biridan massalari bilan ham farq qiladi, atomlarning qismlari mavjud. Epikur tabiatda har xil shakldagi atomlar soni cheksiz, shakllar soni esa chekli deb tushuntirdi. Qadimgi yunon atomistlari tushunchalarining kuchsiz tomonlari Aristotel (eramizdan avvalgi 384–322-yy) tomonidan butun atomizm konsepsiyasining tanqid qilinishiga sabab bo'ldi. Aristotel fikri va atomistlarning farazlari, atomlarning mutlaq o'zgarmas ekanligi, deformatsiya, siqiluvchanlik, jismlarning issiqlikdan kengayishi, ularning o'zaro ta'siri kabi hodisalarning mavjudligini tushunishga imkon bermaydi.

O'rta asrlarda atom to'g'risidagi ta'limotlar sezilarli rivojlanmadi. Keyinchalik atom to'g'risidagi Levkipp, Demokrit, Epikurlarning atom to'g'risidagi tasavvurlari fransuz faylasuf materialisti P.Gassendi (1592–1655) tomonidan rivojlantirildi. Uning faoliyati I.Nyutonga (1643–1727) va R.Boylga (1627–1691) ta'sir ko'rsatdi. I.Nyuton o'z ishlarida materiya g'ovak bo'lib, bo'shliqqa joylashtilgan alohida zarralardan iborat, degan fikrni bayon qildi. Nyuton qattiq jismlar o'zaro ta'sirining tabiatini qarab chiqib, shunday xulosaga keldi: zarralarning birlashishi ularning qandaydir kuch bilan tortishishidir, zarralar bir-biriga tekkanda, bu kuchlar katta qiyamatga ega bo'ladi.

Bu davrda issiqlik hodisalarini tushuntirishda ikki xil tushuncha paydo bo'ldi: birinchisining asosida atomlarning harakati haqidagi tasavvurlar yotadi, ikkinchisida esa teplorod tushunchasi yotadi. R.Broyl va uning shogirdi R.Guk (1635–1703) issiqlik, bu modda zarralarning mexanik harakati natijasidir, degan fikrni aytdilar. Bu fikr D.Bernulli (1700–1782) tomonidan quvvatlandi. D.Bernulli gazlar bosimi gaz molekulalarining idish devoriga urilishlari ta'siri natijasidir, deb tushuntirdi. Lekin keyinchalik J.Blek (1728–1799) ishlari asosida teplorod tushunchasi keng tarqaldi. XIX asr boshlarida atom nazariyasi Dalton va M.Lomonosovning (1711–1765) buyuk xizmatlari tufayli muhim ahamiyat kasb eta boshladi. M.Lomonosov

teplorod nazariyasiga qarshi chiqdi. U o‘zining tekshirishlari asosida issiqlik modda zarralarining aylanma harakati natijasidir degan xulosaga keldi. Bu nazariyadan XIX asrda gazlar kinetik nazariyasini tuzishda G.Devi (1778–1829) va J.Joul (1818–1889) foydalandilar.

Dalton turli elementlarni o‘zaro ta’sir qildirib kimyoviy birikmalar hosil qilish usullarini kuzatdi. U har bir element atomlardan tuzilgan, atom esa moddaning bo‘linmas birligidir, deb tushuntirdi. Uning fikricha, bir xil kimyoviy element atomlari boshqa xil kimyoviy element atomlaridan farq qiladi. Hozirgi vaqt达 yuzdan ortiq kimyoviy element bor, Dalton nazariyasiga ko‘ra esa elementar zarralar soni ham shuncha bo‘lishi kerak, lekin buni to‘g‘ri deb bo‘lmaydi. 1816-yilda Prout ilgari surgan nazariyaga asosan barcha element atomlari aynan bir turdag‘i atomlardan, chunonchi vodorod atomlaridan tuzilgan, bu esa qadimgi yunonlarning birlamchi materiyasiga to‘g‘ri keladi. Prout hamma elementlarni atom og‘irliklari butun sondan iborat bo‘lib, vodorod atom og‘irligiga qoldiqsiz bo‘linadi, degan fikrda bo‘lgan. Atom og‘irliklarini o‘lchashda shu fikrga suyanilgan. Tajribalarning ko‘rsatishicha, atom og‘irliklari kasr sonlar bilan ham ifodalanadi, masalan, Cl (35,457); Cu (63,54). Ma’lum vaqtadan so‘ng Prout nazariyasi ham noto‘g‘ri bo‘lib chiqdi. Lekin 100 yildan so‘ng bu nazariya o‘zgartirilgan holda yana tiklandi. Uning tiklanishiga radioaktiv hodisalarning ochilishi va atomning bo‘linuvchanligi haqidagi fikrlar sabab bo‘ldi. Bu davrda kimyoviy moddalar atomlari orasidagi ta’sir kuchlarining tabiatini qanday, degan savollar paydo bo‘ldi. Elektroliz hodisasini birinchi bo‘lib kuzatgan olim Devi atomlar orasidagi ta’sir kuchlari, bu elektrostatik kuchlar ekanligini ko‘rsatdi. 1833–34-yillarda Devining ishlarini davom ettirgan Faradey elektroliz hodisasining miqdoriy qonunlarini kashf qildi. Faradey o‘z tajribalari asosida ma’lum sharoitlarda atom elektr zaryadiga ega bo‘lishini ko‘rsatdi. Lekin o‘sha davr fizikasi bunday hodisalarni tushuntirishga qodir emas edi.

Atom haqidagi tasavvurlarning rivojlanishi davomida atomistlar materialistik nuqtayi-nazarda turdilar. Jumladan, Anaksagor fikricha, dunyodagi harakatlarni aql boshqaradi. Atomistik tasavvurlarga qarshi chiqqan R.Dekart (1596–1650) idealistik tasavvurlarni rivojlantirdi. E.Max (1838–1926) va V.Ostvold (1853–

1932) lar atom va molekulalarning mavjudligini inkor qildilar, ular falsafadagi energetizm yo‘nalishi tarafdorlari edilar.

Atomistik tasavvurlarning rivojlanishida 1869-yilda D.Mendeleyev tomonidan kimyoviy elementlar davriy sistemasining kashf etilishi muhim o‘rin tutdi. D.Mendeleev davriy qonuni asosida hali ma’lum bo‘lmagan yangi elementlarning mavjudligini, ularning fizik va kimyoviy xossalari oldindan ayta oldi. Lekin bu tizim ham ko‘p yillar davomida ilmiy jihatdan tushuntirilmadi. XIX asr oxirida moddalar tuzilishi haqidagi fikrlarni tasdiqlovchi bir qator hodisalar, tajribalar ma’lum bo‘ldi. Yorug‘likning elektromagnit xossalari kashf qilindi, ayrim gazlar spektrida empirik qonunlar ixtiro qilindi va moddalar atomlardan tuzilgan degan nazariya to‘g‘ri ekanligi asoslandi. Atomlar eng kichik zarralardan tuzilganligi ko‘rsatildi. Vakuum texnikasida past bosimlarni hosil qilish usullari kashf etildi. Past bosimli gazlarda elektr razryadlarini kuzatishga imkoniyat tug‘ildi. Past bosimli gazlardan elektr tokining o‘tishini o‘rganish bo‘yicha Goldshteyn, Krukslar tadqiqot ishlarini olib bordilar. J.Tomson (1856–1940) tomonidan katod nurlari va uning xossalari o‘rganildi. Tomson tomonidan o‘tkazilgan tadqiqotlar jarayonida atomdan ham bir necha marta kichik bo‘lgan elektron mavjudligi aniqlandi. Elektron massasi vodorod atomi massasidan 1837 marta kichikligi va uning elektr zaryadi mavjud bo‘lgan elektr zaryadlardan juda kichikligi ko‘rsatildi. Elektronning zaryadi va massasi o‘zgarmasligi aniqlandi. Elektron emissiyasi hosil bo‘ladigan uch xil hodisa aniqlandi. Birinchisi, fotoelektrik effekt, bu hodisa metallarni ultrabinafsha nurlar bilan nurlantirganda hosil bo‘ladi. Ikkinchisi, termoelektron emissiya, bu hodisa agar metall tola yuqori temperaturada qizdirilsa, undan elektronlar ajralib chiqqa boshlaydi. Uchinchisi, radioaktiv elementlarning o‘z-o‘zicha beta-nurlar (elektronlar) chiqarishidir. Elektronlar qaysi usulda hosil qilinishidan qat’iy nazar, ularning barchasi bir xil xossaga, bir xil miqdordagi elektr zaryadiga va massaga ega. Elektronlar maydalanmaydigan elementar qism deb qaraladi, ular manfiy zaryadlangan. Atomlar esa normal holatda neytral bo‘ladi. Atomlarning o‘ziga xos chastotali yorug‘likni chiqarish yoki yutish xossalari ularda elektr zardlarining borligini ko‘rsatadi. Siyraklashtirilgan gaz va qizigan metall bug‘larining atomlari turli rangdagi chiziqlardan iborat spektrni

beradi. Shuning uchun, bu spektrlar chiziqli spektrlar deyiladi. Atom spektrini o‘rganish atom tuzilishini bilihda muhimdir. Atom spektridagi chiziqlar tartibsiz joylashmay, balki chiziqlar seriyasi deb ataluvchi guruhlarga ma’lum bir qonuniyatlar asosida birlashishi aniqlandi.

XX asr boshlarida atom tuzilishining turli modellari taklif qilindi. 1897-yilda elektronni kashf etgan J.Tomson 1903-yilda atom tuzilishining dastlabki modelini taklif qildi. Tomson modeliga asosan atom musbat zaryadlangan shar bo‘lib, manfiy zaryadlangan elektronlar shu sharda taqsimlangan. Shardagi musbat zaryad miqdori elektronlar zaryadi yig‘indisiga teng va atom neytral hisoblanadi. Elektronlarning o‘z muvozanati atrofida kichik tebranishlari natijasida atom yorug‘lik chiqaradi. Lekin keyinchalik bu modelning asossizligi aniqlandi. Shunday bo‘lsada, bu model Lorens tomonidan tajriba bilan to‘g‘ri keladigan ko‘pgina nazariyalarning yaratilishiga asos bo‘ldi. Lorens elektromagnit to‘lqinlarning moddalar bilan o‘zaro ta’siri, harakatdagi muhit elektrodinamikasi nazariyalarini qarab chiqdi. Shu bilan u A.Eynshteynning (1879—1955) nisbiylik nazariyasiga zamin yaratdi. 1905-yilda A.Eynshteynning nisbiylik nazariyasi, 1926-yilda kvant mexanikasi yuzaga keldi. Kvant mexanikasining rivojlanishi murakkab va davomli bo‘ldi. 1900-yilda M.Plank ishlarida mikrodunyoning birinchi asosiy postulati — fizik kattaliklarning kvantlanishi prinsipi asoslandi. Plank tomonidan absolut qora jism muvozanatlari nurlanishi spektrida energiyaning taqsimlanishi haqidagi qonunini ifodalaydigan formulani chiqarishda nurlanishning modda bilan o‘zaro ta’siri haqidagi klassik fizika tasavvurlariga zid bo‘lgan gipoteza aytildi: chastotasi  $\omega$  bo‘lgan yorug‘lik to‘lqini bilan ta’sirlashadigan moddaning atomi yoki molekulasi energiyaning istalgan porsiyasini chiqarmaydi ham yutmaydi ham, balki energiyaning butun sondagi elementar  $h\omega$  porsiyalarini chiqaradi yoki yutadi. Bu bilan Plank atom yoki molekula chiqaradigan yoki yutadigan energiya kvantlanganligini ko‘rsatdi. Bunda proporsionallik doimiysi Plank doimiyligi deb nomlandi. Uning tajribada aniqlangan qiymati  $\hbar = 1,054 \cdot 10^{-34}$  J·s. Kvantlash g‘oyasining keyingi rivojlanishi Eynshteyn (1905) tomonidan davom ettirildi. Eynshteyn gipotezasiga asosan yorug‘likni to‘lqin sifatida

emas, balki har birining energiyasi  $E = \hbar\omega$  va  $P = \hbar\omega / c$  bo'lgan kvantlar (fotonlar) oqimi sifatida qaraladi. Bu gipoteza mikrodunyo fizikasining korpuskulyar-to'lqin dualizmi haqidagi ikkinchi asosiy prinsipini tasdiqladi.

Bundan esa Plank doimiyligi  $\hbar$  kvantlash prinsipi va korpuskulyar-to'lqin dualizmi bilan bog'liq ekanligi ko'rindi. Bunday fakt mikrodunyo fizikasida ikki fundamental prinsiplarning ichki birligini ko'rsatadi.

1913-yilda daniyalik fizik olim N.Bor energiyaning kvantlanishini atomning yadroviy modeliga tatbiq qildi. Bor elektronlarning atomdagi harakatini xarakterlaydigan kvant postulatlarini taklif qildi. Bor nazariyasi klassik elektrodinamika qonunlarini atomning ichidagi hodisalarga tatbiq etish mumkin emasligini, ikkinchi tomondan esa mikrodunyo fizikasida fizik kattaliklarning kvantlanganligini ko'rsatdi. Bor nazariyasi atom tuzilishi nazariyasining rivojlanishida yirik yutuq hisoblanadi. Lekin rentgen spektrlarini, ishqoriy metallar spektrlarini vodorod atomi spektrining nozik strukturasi, Shtark va Zeeman effektlarini tushuntirishdagi muvaffaqiyatlar Bor nazariyasining chegaralanganligini ko'rsatdi. Yangi kvant prinsiplarining ochilishi va rivojlanishi murakkab davrlardan o'tdi va nihoyat, 1926-yilda kvant mexanikasi yaratilishi bilan mikrodunyoning nazariyasi yuzaga keldi. Atom tuzilishining ikkinchi modeli atomning planetar modeli bo'lib, bu model to'g'risidagi dastlabki tushunchalar 1903-yilda Kelvin va X.Nagaoka tomonidan aytilgan edi. Atomning planetar modeliga asosan atomning markazida musbat zaryad joylashgan bo'lib, elektronlar uning atrofida yopiq orbitalarda harakatlanadi. Ammo atom tuzilishini tushuntirishda bu ikki model ham ma'lum qiyinchiliklarga uchradi. Atom tuzilishini tushuntirish uchun tajribalar o'tkazish talab qilinad edi. Bunday tajribalar 1911-yilda Rezerford tomonidan o'tkazildi. U alfa zarralarning yupqa metall folgalarda sochilishi ustida bir qator tajribalar o'tkazdi. Rezerford o'tkazgan tajribalari asosida atom tuzilishining planetar modelini taklif qildi. Atomning planetar modeliga asosan atom quyidagicha tuzilgan: atom musbat zaryadlangan yadro va uni o'rabi olgan manfiy zaryadli elektronlar qobig'idan iborat. Elektronlar yadro atrofida doiraviy orbitalar bo'ylab harakatlanadi.

Elektronlarning to'liq manfiy zaryadi yadroning musbat zaryadi miqdoriga teng bo'lib, atom neytral holatda bo'ladi. Yadroning o'lchami  $10^{-13} - 10^{-12}$  sm, atomning o'lchami esa  $10^{-8} - 10^{-7}$  sm dir. Atomning asosiy massasi (99,95%) yadroda joylashgan. Atomning planetar modelini matematik tahlil qilish, unda ma'lum qarama-qarshiliklar borligini ko'rsatdi. Yadro atrofida elektronlarning orbitalardagi harakatida elektromagnit to'lqinlar chiqarilishi kerak. Bunda elektronning energiyasi kamaya borib, oxiri elektron yadroga tushib qolishi mumkin. Demak, atomning Rezerford taklif qilgan modeli birinchidan, atomlarning barqarorligini, ikkinchidan, atom spektrlarining chiziqlilagini va undagi qonuniyatlarni tushuntira olmadi. Bu qiyinchiliklarni bartaraf etishda 1913-yilda daniyalik fizik N.Bor klassik nazariyaga zid bo'lgan farazlarni ilgari surdi. Bu farazlar Borning kvant postulatlari deb yuritildi. Borning ikki postulatida atomda energetik sathlarining mavjudligi, ularning diskretligi va elektronning yuqori energetik sathdan pastki energetik sathga o'tganida atom energiya chiqarishi ko'rsatildi.

Bor nazariyasi vodoroddan keyingi element geliy atomi spektridagi qonuniyatlarni mutlaqo tushuntira olmadi. Bor nazariyasi yarim klassik va yarim kvant nazariya edi. Lekin Bor nazariyasi fan rivojlanishida muhim o'rinni tutdi, mikrodunyo hodisalariga klassik fizika qonunlarini qo'llash mumkin emasligini ko'rsatdi. 1905-yilda A. Eynstejn tomonidan elektromagnit nurlanishlarning kvantlanishi kiritildi. 1924-yilda Lui de-Broyl elektron va boshqa zarralarning to'lqin xossasiga ega ekanligi to'g'risida o'z gipotezasini taklif qildi. 1926-yilda esa E.Shredinger de-Broyl gipotezasi asosida to'lqin mexanikasini rivojlantirdi va o'zining to'lqin tenglamasini taklif qildi. Bu tenglama *Shredinger tenglamasi* deb ataldi. To'lqin mexanikasi mikrodunyo hodisalarini klassik nuqtayi nazardan tushuntirib bo'lmagligini ko'rsatdi. To'lqin mexanikasi bilan parallel ravishda V.Geyzenberg tomonidan kvant mexanikasi matritsa shaklida rivojlantirildi. Shredinger bu ikki shaklning ham ekvivalentligini isbotladi. Kvant mexanikasi atom to'g'risidagi tasavvurlarni chuqurlashtirdi, va hozirgi zamonda atom tushunchalariga yaqinlash-tirdi.

Atom to'g'risidagi tasavvurlar 1928-yilda P. Dirak tomonidan to'lqin tenglamasini relyativistik umumlashtirishi natijasida yanada

rivojlandi. Dirak nazariyasi *musbat elektron* – pozitronning mavjudligini ko'rsatdi. Pozitron 1932-yilda K. Anderson tomonidan kashf qilindi.

Dirak nazariyasidan vodorod atomi uchun kelib chiqadigan xulosalarining tajribada tekshirilishi nazariya bilan tajriba natijalari orasida oz bo'lsada farq borligini ko'rsatdi. Bu farq 1947-yilda U.Lemb va E.Rezerford tomonidan o'lchandi va unga *Lemb siljishi* deb nom berildi. Lemb siljishi 1947-yilda G.Bete tomonidan tushuntirildi. Atom to'g'risidagi tasavvurlarning rivojlanishi bilan birga atomni tashkil qilgan zarralar elektron, neytron, proton xossalari ham o'rghanila bordi. Yangi elementar zarralar tizimi ochildi.

Atom tuzilishini va uning xossalari o'rghanishda hozirgi zamon fizikasi katta muvaffaqiyatlarga erishdi. Bu muvaffaqiyatlar atom elektrostansiyalarining, zarralar tezlatkichlarining, lazerlarning yaratilishiga va boshqa ko'pgina fan olamidagi muvaffaqiyatlarga olib keldi. Atom fizikasi hozirgi kunda elementar zarralarning tuzilishi va xossalari o'rghanish asosida jadal qadamlar bilan rivojlanmoqda.

### ***Nazorat savollari***

1. Atom fizikasi fani qaysi asrlarda va qanday yuzaga keldi?
2. Atom fizikasi nimalarni o'rghanadi?
3. Atomistik nazariya qanday nazariya va uning asoschilari kimlar edi?
4. Atom og'irliliklari o'lchanganda kimning nazariyasiga tayanildi?
5. Atom fizikasining rivojlanishida qaysi hodisalar asos bo'ldi?
6. Atom tuzilishining planetar modeli qanday va u qaysi olim tomonidan taklif qilindi?
7. Atomning energiya nurlashi qanday va uni qaysi olim tushuntirdi?
8. Atom energetik sathlarining kvantlanishi qaysi olim tomonidan tushuntirildi?
9. De-Broyl gipotezasining mohiyati nimada?
10. Shredinger tenglamasida zarranining qaysi xossasi hisobga olingan?
11. Dirak nazariyasi nimalarni tushuntiradi?
12. Atom tuzilishini, uning xususiyatlarini o'rghanishdagi muvaffaqiyatlar qanday natijalarga olib keldi?

## **I BOB** **ISSIQLIK NURLANISHI**

---

### **1.1-§. Issiqlik nurlanishi. Muvozanatli nurlanish**

Elektromagnit nurlanishlarning tabiatda eng ko‘p tarqalgan turi issiqlik nurlanishi hisoblanadi. Issiqlik nurlanishi jism atom va molekulalarining issiqlik harakati tufayli, ya’ni jismning ichki energiyasi hisobiga hosil bo‘ladi. Shuning uchun ham issiqlik nurlanishi nurlanayotgan jismning sovushiga olib keladi. Nurlanish hamma jismlarga xos bo‘lib, temperaturasi absolut noldan farq qiladigan jismlar barcha temperaturalarda issiqlik nurlanishi nurlaydi. Yuqori temperaturagacha qizdirilgan jismlar yorug‘lana boshlaydi, bunda ular ko‘zga ko‘rinadigan va ultrabinafsha sohalarda issiqlik nurlanishi chiqaradi. Jismlar past temperaturalarda yorug‘lanmaydi, lekin ular ko‘zga ko‘rinmaydigan sohada infraqizil nurlar sifatida issiqlik nurlanishi chiqaradi.

Jismlar issiqlik nurlanishi chiqarishi bilan birga, o‘zlarini ham atrofdagi jismlar chiqqargan nurlanish energiyasining ma’lum qismini yutadi. Bunday jarayon jismlarning nur yutishi deyiladi. Jismlarning nur yutishi ularning qizishiga olib keladi. Jism va nurlanish orasidagi o‘zaro ta’sir tahlil qilinganda, ular orasidagi termodinamik muvozanatning qandayligini bilish talab qilinadi. Termodinamik muvozanat mavjud bo‘lgan sharoitda jismning temperaturasi doimiy bo‘ladi. Bunday holda jism birlik vaqtida bir xil nurlanish energiyasini yutadi va chiqaradi, ya’ni qancha miqdorda energiya yutsa, shuncha miqdorda energiya chiqaradi. Bunda jism bilan nurlanish orasida termodinamik muvozanat vujudga keladi. Bunday sharoitda jism bilan muvozanatda bo‘lgan nurlanish muvozanatli issiqlik nurlanishi deyiladi. Issiqlik muvozanati holatidagi temperatura issiqlik muvozanati temperaturasi deyiladi. Nurlanish muvozanati holati jismlarda o‘z-o‘zidan hosil bo‘ladigan oddiy holat hisoblanadi.

Nurlanayotgan jism bilan nurlanishning muvozanatda bo‘lishini quyida ko‘rish mumkin.  $T$  temperaturadagi nurlanayotgan jism


nurlanishni to'liq qaytaruvchi va issiqlik o'tkazmaydigan ideal jismdan tayyorlangan qobiq bilan o'rالgan bo'lsin. Qobiq ichidan havosi so'rib olinadi (1.1-rasm). Jism chiqargan nurlanish qobiq ichki devorlari sirtiga tushib, undan bir necha marta qaytadi va yana jismga tushadi. Jism bu nurlanishni qisman yoki to'liq yutadi. Jism nurlanish

energiyasining bir qismini yutsa, qolgan qismini qaytaradi. Bunda jism va qobiq ichidagi nurlanish orasida energiya almashinovi sodir bo'ladi va bu jarayon davom etib turadi. Jism o'zining birlik yuzasidan birlik vaqtida nurlanish sifatida qancha energiya chiqarsa, nurlanishni yutish jarayonida xuddi shuncha energiyani qabul qiladi. Bunda jism – nurlanish sistemasida muvozanatli holat vujudga keladi, nurlanish va jismda temperatura bir xil bo'ladi. Bunday holat muvozanatli holat deyiladi. Shunday qilib, muvozanatli holatda vaqt birligi ichida jismning chiqargan issiqlik energiyasi uning yutgan energiyasiga teng bo'lib, nurlanish zichligi ham shu temperaturaga to'g'ri keladigan aniq bir qiymatga ega bo'ladi.

Tajribalar ko'rsatadiki, nurlanish chiqaradigan jism bilan chiqarilgan nurlanishning muvozanatda bo'lishi faqatgina issiqlik nurlanishi hosil bo'ladigan hollardagina kuzatiladi. Shuning uchun issiqlik nurlanishi ba'zan muvozanatli nurlanish deb ataladi. Issiqlik nurlanishining nurlanayotgan jismlar bilan muvozanatda bo'lishiga temperatura ortganda jismning nurlanish intensivligining ortishi sabab bo'ladi.

Jismlarning nur chiqarish va nur yutish qobiliyatini miqdoriy baholash uchun quyidagi kattaliklar kiritiladi. Nurlanayotgan jism sirtining  $1 \text{ m}^2$  yuzasidan 1 sekundda chiqariladigan issiqlik energiyasi *Jismning to'la nur chiqarish qobiliyati* deyiladi va *E* harfi bilan belgilanadi. Nur chiqarish (nurlanish) qobiliyati  $\text{W/m}^2$  yoki  $\text{J/s}\cdot\text{m}^2$  birliliklarda o'lchanadi. Jismga tushayotgan nurlanish energiyasining jismda yutilib qolib issiqlikka aylangan ulushi *jismning nur yutish qobiliyati* deyiladi va *A* harfi bilan belgilanadi. *A* – o'lchamsiz kattalikdir.

Tajriba natijalaridan ko'rinadiki, jism tomonidan chiqariladigan yoki yutiladigan energiya har xil to'lqin uzunliklar uchun har xil



1.1-rasm

qiymatga ega. Shuning uchun spektral nur chiqarish  $E_\lambda$  va spektral nur yutish qobiliyati  $A_\lambda$  degan tushunchalar kiritiladi. Jismning spektral nurlanish qobiliyati deb, to'lqin uzunligining  $\Delta\lambda$  ( $\lambda - \frac{\Delta\lambda}{2}$  dan  $\lambda + \frac{\Delta\lambda}{2}$  gacha) kichik intervali uchun hisoblab chiqarilgan nur chiqarish qobiliyatiga aytildi. Jismning spektral nur yutish qobiliyati ham xuddi shunday to'lqin uzunligining kichik intervali  $\Delta\lambda$  uchun hisoblanadi.

## 1.2-§. Absolut qora jism modeli

Har qanday jism o'ziga tushayotgan nurlanishning bir qismini yutsa, qolgan qismini qaytaradi. Jismlarning bir-biridan farqi shundaki, ba'zi jismlar tushgan nurlanishning ko'proq qismini yutsa, boshqa jismlar kamroq qismini yutadi. Shuning uchun birinchi xil jismlarni ikkinchilariga nisbatan qoraroq deyish mumkin bo'ladi. Barcha real jismlarning nur yutish qibiliyati 1 dan kichik. Masalan, spektrning ko'rinaldigan qismi uchun alyuminiyning nur yutish qibiliyati 0,1, mis uchun 0,5, suv uchun 0,67 ga tengdir. Jism o'ziga tushayotgan nurlanishning ko'proq qismini qaytarsa, bunday jismlar qoraroq jismlar hisoblanadi. Bunday jismning nur yutish qobiliyatining qiymati birga yaqin bo'ladi. Tushayotgan nurlanishning ko'proq qismini qaytaradigan jism kul rang jismlar hisoblanadi, bunday jismlarning nur yutish qobiliyatining qiymati birdan kichik qiymatga teng ( $A < 1$ ). Tushayotgan nurlanishni to'liq ravishda yutadigan jism *qora jism* hisoblanadi, bunday jismning to'la nur yutish qobiliyatining qiymati birga teng ( $A = 1$ ). Tushayotgan nurlanishni to'liq ravishda qaytaradigan jism *oq jism* deyiladi.

Nemis olimi G.R. Kirxgof umumiy termodinamika tasavvurlarga asoslanib, issiqlik nurlanishining spektrini tushuntirishni oddiy-lashtirish maqsadida ideallashtirilgan nazariy tushuncha «Absolut qora jism» tushunchasini taklif qildi. Istalgan to'lqin uzunklikda va temperaturada o'ziga tushayotgan nurlanish energiyasini to'liq yutadigan jism absolut qora jism deyiladi. Bunday jismning nur


yutish qobiliyati barcha alohida to'lqin uzunliklar uchun bir xil bo'llib, uning qiymati birga teng ( $A = 1$ ).

Lekin tabiatda absolut qora jism ham, oq jism ham yo'q. **Tublatdu xossasi** absolut qora jism xossasiga yaqin bo'lgan qora **jism bu – qora kuyadir**. Qora kuyaning ko'zga ko'rindigan yorug'lik ( $\lambda = (0,40-0,75)$  mkm) sohasida nur yutish qobiliyati 0,99 ga yaqin. Lekin qora kuya infraqizil nurlarni kamroq yutadi. Absolut qora **jism hawqilik** nurlanishini tarqatuvchi eng effektiv jismdir. Absolut **qora jism** tushunchasining ishlatalishi issiqlik nurlanishining nurlanayotgan qattiq jismning xususiyatlariga bog'liq emasligini ko'rsatadi. Boshqa jismlardan farq qilish uchun absolut qora jismning nur yutish qobiliyati  $A_{\lambda T}$  nur chiqarish qobiliyati  $E_{\lambda T}$  bilan belgilanadi.

Amalda absolut qora jism issiqlik nur-lanishini hosil qilishda o'zining xususiyati **billan** absolut qora jismga yaqin bo'lgan modeldan foydalaniadi. Bunday model juda **kichik** tirkishga ega bo'lgan berk kovak **Idinxundun** iborat qurilmadir. Kovak idishning **Ichki sirti** qoraga bo'yalgan (1.2-rasm). Kovak **Idinxu** devoridagi kichik tirkish absolut qora **Jismning** amaldagi modeli sifatida qaraladi. Kovak idish tirkishidan **Idinxu** ichiga kirib qolgan nurlanish idishning ichki devorlaridan ko'p martu qaytadi. Har bir qaytish jarayonida nur energiyasining ma'lum **bir qismi** idish devorlarida yutila boradi va amalda to'liq yutiladi. **Absolut qora jism** tushgan nurlanish energiyasini to'liq yutishi bilan **birga** o'zi ham nurlanadi. Past temperaturada tirkish qoradek **ko'rindi**. Idish ichkarisi yuqori temperaturagacha qizdirilsa, tirkish **sirti** oydinlashib yorug'lanadi va nurlana boshlaydi. Tirkish sirti **absolut qora jism** sifatida qaraladi. Tirkishdan chiqayotgan nurlanish **muvozanatlari** issiqlik nurlanishidir. Tirkishdan chiqayotgan energiya **absolut qora jism** nurlanishi energiyasiga yaqindir.

Amalda absolut qora jismga ko'z qorachig'i, Marten pechlarining **ichidagi** olovni kuzatadigan tirkish misol bo'ladi.

Klassik tasavvurlarga asosan kovak idish ichki devorlari materialining atomlari klassik ossillyatorlar to'plami sifatida modellashtiladi, ossillyatorlar kovak idish ichidagi (bo'shlig'ida) nurlanish



1.2-rasm

bilan energiya almashadi. Muvozanat sharoitida idish ichidagi nurlanish turg'un to'lqinlar to'plami sifatida qaraladi. U vaqtida absolut qora jismning nurlanishi ossillyator tebranishi natijasi deb tushuniladi. Kovak idish ichidagi turg'un to'lqinlarning har biri tebranish modasi deyiladi. Modalar soni esa tebranishlarning erkinlik darajasi soniga teng bo'lib, ular idish ichidagi nurlanishni hosil qiladi.

Bir erkinlik darajasiga to'g'ri keladigan nurlanishning o'rtacha energiyasi  $\bar{E}$  bo'lsa, u vaqtida kovak idish ichidagi (bo'shlig'idagi) nurlanish energiyasining zichligi quyidagi formula orqali aniqlanadi:

$$\rho_v(T) = \frac{8\pi v^2}{c^3} \cdot \bar{E}. \quad (1.1)$$

(1.1) formuladan ko'rindiki, muvozanatli nurlanish energiyasining spektr bo'yicha taqsimlanishini topish uchun bir erkinlik darajasiga to'g'ri keladigan nurlanishning o'rtacha energiyasi –  $\bar{E}$  ni aniqlash kerak bo'ladi. (1.1) formula qulaylik uchun chastota orqali yozilgan bo'lib, bu formulani to'lqin uzunlik  $\lambda$  orqali ham ifodalash mumkin.

### 1.3-§. Kirxgof qonuni

Kirxgof muvozanatli issiqlik nurlanishi xossalariini nazariy ravishda tekshirdi. Kirxgof termodinamik yo'l bilan doimiy temperaturada nurlanish energiyasining spektral zichligi  $\rho_v$  nurlanayotgan jismning fizikaviy xossalariغا bog'liq emasligini ko'rsatdi, jismning nur chiqarish va nur yutish qobiliyatini orasidagi muhim bog'lanishni aniqladi.

Bunday bog'lanishni ko'rib chiqish uchun quyidagi tizimni qarab chiqaylik. Ikki jismdan iborat izolyatsiyalangan tizim bo'lsin. Jismlarning temperaturalari turlicha bo'lib, ular faqat nur chiqarish yoki nur yutish bilan energiya almashadilar. Ma'lum vaqt o'tgandan so'ng bunday sistemada issiqlik nurlanishi muvozanati vujudga keladi. Har ikki jismning nur chiqarish qobiliyatini  $E$ ,  $E'$  nur yutish qobiliyatini esa  $A'$ ,  $A''$  bo'lsin. Faraz qilaylik, birinchi jism  $1 \text{ m}^2$

yuzadan 1 sekundda ikkinchi jismga qaraganda  $n$  marta ko'proq energiya chiqarsin:

$$E' = nE \quad (1.2)$$

U vaqtida birinchi jism ikkinchi jismga qaraganda  $n$  marta ko'proq energiyani yutishi ham kerak, ya'ni:

$$A' = nA \quad (1.3)$$

Bunga teskari holda birinchi jism, ikkinchi jism hisobiga qiziy boshlaydi (yoki soviy boshlaydi), uning temperaturasi o'zgaradi. Bu esa issiqlik muvozanati shartiga ziddir. (1.2) va (1.3) tengliklardan quyidagi ifodani yozish mumkin.

$$\frac{E'}{A'} = \frac{E''}{A''}. \quad (1.4)$$

Agar izolyatsiyalangan tizim nur chiqarish qobiliyati  $E'$ ,  $E''$ ,  $E'''$ , ... va nur yutish qobiliyati  $A'$ ,  $A''$ ,  $A'''$ , ... bo'lgan ko'p sondagi jismlardan iborat bo'lsa va bu jismlardan biri absolut qora jism bo'lsa, yuqoridagi mulohazalarga asosan quyidagi ifodani yozish mumkin bo'ladi:

$$\frac{E'}{A'} = \frac{E''}{A''} = \frac{E'''}{A'''} = \dots = \varepsilon. \quad (1.5)$$

(1.5) da  $\varepsilon$  – absolut qora jismning nur chiqarish qibiliyati (absolut qora jismning nur yutish qibiliyati birga teng, shuning uchun (1.5) da  $\varepsilon$  ning mahrajiga yozilmagan). (1.5) munosabat *Kirxgof qonunini* ifodalaydi, bu munosabatga asosan Kirxgof qonuni quyidagicha ta'riflanadi: berilgan temperaturada har qanday jismning nur chiqarish qibiliyatining nur yutish qibiliyatiga bo'lgan nisbati o'zgarmas kattalik bo'lib, absolut qora jismning shu temperaturadagi nur chiqarish qibiliyatiga tengdir. Bu qonun jismlarning spektral nur chiqarish qobiliyati  $E_\lambda$  va spektral nur yutish qobiliyati  $A_\lambda$  uchun ham to'g'ri bo'ladi, ya'ni:



$$\frac{E_\lambda}{A_\lambda} = \frac{E_\lambda}{A_\lambda} = \frac{E_\lambda}{A_\lambda} = \dots = \varepsilon_\lambda. \quad (1.6)$$

(1.5) da  $\varepsilon_\lambda$  – absolut qora jismning spektral nur chiqarish qobiliyatidir. Kirxgof qonunidan quyidagi uchta muhim natija kelib chiqadi:

1. Berilgan temperaturada har qanday jismning nur chiqarish qobiliyatining yutish qobiliyatining shu temperaturada absolut qora jism nur chiqarish qobiliyatiga bo‘lgan ko‘paytmasiga teng, ya’ni

$$\begin{aligned} E &= A\varepsilon, \\ E_\lambda &= A_\lambda\varepsilon_\lambda, \end{aligned} \quad (1.7)$$

bu yerda:  $E$  va  $A$  – har qanday jismning nur chiqarish va nur yutish qobiliyati;  $E_\lambda$  va  $A_\lambda$  – jismning spektral nur chiqarish va spektral nur yutish qibiliyati;  $\varepsilon$  – absolut qora jismning nur chiqarish qobiliyati.

2. Berilgan temperaturada har qanday jismning nur chiqarish qobiliyati shu temperaturada absolut qora jismning nur chiqarish qobiliyatidan kichik ( $E = A \cdot \varepsilon$ , lekin  $A < 1$ , shuning uchun  $E = \varepsilon$ ).

3. Agar jism qandaydir biror to‘lqin uzunlikdagi nurni yutmasa, shu to‘lqin uzunlikdagi nurni chiqarmaydi ham ( $E_\lambda = A_\lambda \cdot \varepsilon_\lambda$ , shuning uchun  $A_\lambda = 0$  bo‘lganda  $E_\lambda = 0$  bo‘ladi).

Agar jismning nur yutish qobiliyati  $A$  va absolut qora jism nur chiqarish qibiliyati  $\varepsilon$  ma’lum bo‘lsa, (1.6) ifoda har qanday jismning nur chiqarish qobiliyatini aniqlashga imkon beradi.

#### **1.4-§. Issiqlik nurlanishining qonunlari**

Absolut qora jism issiqlik nurlanishi energiyasining spektrda taqsimlanishini o‘rganish borasida XIX asr oxirlarida bir qator olimlar tajribalar o‘tkazdilar. O‘tkazilgan tajribalar, izlanishlar asosida kashf qilingan asosiy qonunlar quyidagilar:

**Stefan-Bolsman qonuni.** Absolut qora jismning to‘la nur chiqarish qobiliyatining temperaturaga bog‘liqligi Stefan-Bolsman

qonuni bilan ifodalanadi. Qonun quyidagicha ta'riflanadi: absolut qora jismning to'la nur chiqarish qobiliyati uning absolut temperaturining to'rtinchi darajasiga proporsional:

$$E_{\lambda T} = \sigma T^4, \quad (1.8)$$


bu formulada  $\sigma$  – Stefan-Bolsman doimiyligi bo'lib, uning tajribada aniqlangan son qiymati quyidagicha:

$$\sigma = 5,67 \cdot 10^{-8} \text{ Vt} \cdot \text{m}^{-2} \cdot \text{K}^{-4},$$

yoki

$$\sigma = 5,67 \cdot 10^{-8} \text{ J} \cdot \text{m}^{-2} \cdot \text{s}^{-1} \cdot \text{K}^{-4},$$

bu yerda  $\sigma$  – nurlanayotgan jismning xossalariga bog'liq emas.  $\sigma$  – berilgan temperaturada nurlanayotgan jismning  $1 \text{ m}^2$  sirtidan bir sekundda chiqarilgan issiqlik miqdorini bildiradi. (1.7) formula bilan ifodalangan Stefan-Bolsman qonuni 1879-yilda avstriyalik fizik Stefan tomonidan tajribada aniqlangan, 1884-yil Bolsman tomonidan nazariy asoslangan. Stefan-Bolsman qonuni ko'rsatadiki, absolut qora jismning to'la nur chiqarish qobiliyati faqat uning temperaturasiga bog'liq bo'lib, nurlanayotgan sirtning fizik xossa-



lariga bog'liq emas. Yuqorida absolut qora jism modeli sifatida qaralgan kovak idish tirkishi sirtidan chiqayotgan nurlanish energiyasini tajribada tekshirishlar Stefan-Bolsman qonunini to'liq ravishda tasdiqladi.

Absolut qora jismning to'la nur chiqarish qobiliyatining to'lqin uzunlikka bog'liqligi turli temperaturalar ( $T_1 < T_2 < T_3$ ) uchun 1.3-rasmda keltirilgan. Rasmdagagi egri chiziqlar turli temperaturalarda tajribada aniqlangan bo'lib, ulardan quyidagi xulosalar chiqadi:

1. Absolut qora jism issiqlik nurlanishining spektri uzlusizdir.
2. Temperatura ortishi bilan absolut qora jismning to'la nur chiqarish qobiliyati ortadi, nur chiqarish qobiliyatining maksimumiga to'g'ri keladigan to'lqin uzunligi qisqa to'lqinlar tomonga (chap tomonga) siljiydi.
3. Grafikdagagi egri chiziqlar turli temperaturalarda absolut qora jism nurlanish energiyasining to'lqin uzunliklar bo'yicha taqsimlanishini ifodalaydi. Egri chiziqlarda maksimum mavjud bo'lib, bu maksimum nur chiqarish qobiliyatining maksimumiga to'g'ri keladi.
4. Har bir temperaturada taqsimlanish egri chizig'i va absissa o'qi orasidagi yuza, shu temperaturada absolut qora jismning nur chiqarish qobiliyatini bildiradi.

**Vin qonuni.** Muvozanatlari issiqlik nurlanishi energiyasining to'lqin uzunliklar bo'yicha taqsimlanishini nemis fizigi V. Vin 1893-yilda nazariy jihatdan o'rgandi. Vin o'z izlanishlari natijalari asosida quyidagi xulosaga keldi: absolut qora jism issiqlik nurlanishi energiyasining to'lqin uzunliklar bo'yicha taqsimlanishi zichligida maksimum mavjud bo'lib, bu maksimum  $\lambda_{\max}$  to'lqin uzunligiga to'g'ri keladi va quyidagi munosabat orqali aniqlanadi:

$$\lambda_{\max} \cdot T = b, \quad (1.9)$$

bu formulada  $\lambda_{\max}$  – absolut qora jism nurlanishi energiyasining maksimumidagi to'lqin uzunligidir,  $T$  – absolut qora jismning absolut temperaturasi,  $b$  – o'zgarmas kattalik bo'lib, Vin doimiyligi deyiladi,  $b$  ning tajribalar asosida aniqlangan qiymati  $b = 2,9 \cdot 10^{-3} \text{ m} \cdot \text{K}$ .

(1.9) formuladan ko'rindiki, qora jismning temperaturasi –  $T$  qanchu yuqori bo'lsa,  $\lambda_{\max}$  shuncha kichikroq qiymatga ega bo'ladi. **Vin qonuni siljish qonuni ham deyiladi va bu qonun tajribalarda tundlqlangan.** Vin qonunini yana quyidagicha ta'riflash mumkin: ~~absolut~~ qora jism nurlanish spektrida maksimal energiyaga to'g'ri keladigan to'lqin uzunligi absolut temperaturaga teskari proporsionaldir.

Vin qonuni asosida qizigan jismlarning (metallar, erituvchi pechlur, atom portlashidan hosil bo'ladigan bulutlar va boshq.) spektriga qarab ularning temperaturasini aniqlashning optik pirometriya usuli ishlab chiqilgan. Shu usuldan foydalanib birinchi marta Quyosh sirti temperaturasi o'lchangan. Yer sirtiga keladigan Quyosh nurlari energiyasining maksimumi to'lqin uzunligi  $\lambda_{\max} = 0,47 \text{ mkm}$  bo'lган **ko'zga** ko'rindigan sohaga to'g'ri keladi. Vin qonuniga asosan Quyosh sirtining absolut temperaturasi quyidagi formula asosida hisoblab topilgan:

$$T = \frac{b}{\lambda} = \frac{0,29}{0,47 \cdot 10^{-4}} \approx 6160 \text{ K}.$$

**Reley-Jins formulasi.** Issiqlik nurlanishining spektrida energiya taqsimlanishining zichligi tebranishlar modasining o'rtacha energiyasi

$\bar{E}$  ma'lum bo'lganda, (1.1) formula yordamida hisoblanadi. ni topish uchun klassik fizikada nazariyadagi erkinlik darajalari bo'yicha energiyaning teng taqsimlanishi teoremasidan foydalanish mumkin. Klassik statistik tizimda har bir erkinlik darajasiga  $1/2 kT$  energiya to'g'ri keladi. Garmonik ossillyatorning o'rtacha kinetik energiyasi, o'rtacha potensial energiyasiga teng. Shuning uchun ossillyatorning o'rtacha energiyasi  $kT$  ga teng. Qaralayotgan statistik tizimga kovak bo'shiligidagi nurlanish va kovak devorlari ossillyatorlari kiradi, bu esa kovak bo'shiligidagi ida bir tebranish modasiga (turg'un to'lqingga) to'g'ri keladigan o'rtacha energiya  $\bar{E} = kT$  ga teng bo'lishini ko'rsatadi, ya'ni

$$\bar{E} = kT. \quad (1.10)$$

(1.10) formuladan  $\bar{E}$  ning ifodasini (1.1) formulaga qo'yilganda quyidagi formula hosil bo'ladi:

$$\rho_v = \frac{8\pi v^2}{c^3} kT, \quad (1.11)$$

bu yerda  $\rho_v$  – issiqlik nurlanish spektrida energiya taqsimlanishining zichligi;  $v$  – issiqlik energiyasi chastotasi;  $k$  – Bolsman doimiyligi bo‘lib, uning son qiymati  $k=1,38 \cdot 10^{-23}$  J/gr;  $T$  – issiqlik nurlanishi chiqarayotgan jismning absolut temperaturasasi;  $c$  – vakuumda yorug‘lik tezligi,  $c=3 \cdot 10^8$  m/s;  $h$  – Plank doimiyligi bo‘lib, uning son qiymati  $h = 6,62 \cdot 10^{-34}$  J · s.

(1.11) formula *Reley – Jins formulasi* deyiladi. Bu formula 1900-yilda D.U. Reley tomonidan taklif qilindi va D.D. Jins tomonidan batafsil asoslandi. Reley-Jins formulasi issiqlik nurlanishi spektrida energiya taqsimlanishining zichligini ifodalaydi. (1.11) formula bo‘yicha hisoblangan  $\rho_v$  ning qiymatlari (1.4-rasmda punktir chiziq) nurlanish spektrining kichik chastotalar sohasida tajriba natijalariga mos keladi. Katta chastotalar sohasida  $\rho_v$  ning (1.11) formula bilan hisoblangan qiymati tajribada aniqlangan qiymatidan keskin farq qiladi. Rasmida tajriba egri chizig‘i  $v \rightarrow \infty$  bo‘lganda,  $\rho_v \rightarrow \infty$  munosabat hosil bo‘ladi. Bundan tashqari, nurlanish energiyasining to‘liq hajmiy zichligi ham cheksiz katta qiymatga ega bo‘ladi:

$$\rho_v = \int_0^\infty \rho_\infty dv = \infty. \quad (1.12)$$

Bunday hol bo‘lishi mumkin emas. Tajribada  $\rho_v$  katta chastotalar sohasida (ultrabinafsha sohada) nolgacha kamayib boradi. Bunday holni kvant mexanikasi asoschilaridan biri P.Erenfest «ultrabinafsha halokat» deb atadi.  $\rho_v$  ning cheksiz katta qiymatga ega bo‘lishi jism va uning nurlanishi orasidagi muvozanatga faqat absolut nolda erishilishi mumkin degan xulosaga olib keladi. Bunday xulosa tajriba natijalariga ziddir, chunki aslida har qanday temperaturada jism – nurlanish sistemasi muvozanatda bo‘lishi mumkin.

Shunday qilib, klassik fizika asosida chiqarilgan Reley-Jins formulasi absolut qora jism issiqlik nurlanishi spektrining yuqori chastotalar sohasini tushuntira olmadi.

**Vin formulasi.** 1896-yilda nemis olimi Vin har bir tebranish modusini (kovak bo'shilig'idagi turg'un to'lqinlar)  $E(v)$  — energiyani tushuvchidir degan g'oyani taklif qildi. Lekin berilgan chastotada hamma modalar uyg'otilmagan. Uyg'otilgan modalarning nisbiy soni  $\Delta N/N$  Bolsman taqsimoti qonuni orgali aniqlanadi:

$$\frac{\Delta N}{N} = e^{-E/kT}. \quad (1.13)$$

Bundan esa chastotasi  $v$  bo'lgan modaga to'g'ri keladigan o'rtacha energiya quyidagicha ifodalanadi:

$$\bar{E} = E(v)\Delta N / N = E(v) \cdot e^{-E/kT}. \quad (1.14)$$

Vin umumiy termodinamik mulohazalardan shunday xulosaga keldiki, har bir moda energiyasi chastotaga proporsional bo'ladi:

$$E(v) = hv. \quad (1.15)$$

(1.15) formulada  $h$  — proporsionallik koefitsienti bo'lib, hali u davrda Plank doimisi ekanligi aniqlanmagan edi. U vaqtda (1.14) formulani hisobga olgan holda (1.1) formulani quyidagicha yozish mumkin bo'ladi:

$$\rho_v \frac{8\pi hv^3}{c^3} = e^{-hv/kT}. \quad (1.16)$$

(1.16) formula *Vin formulasi* deyiladi.  $\rho_v$  ning Vin formulasi asosida hisoblangan qiymatlari issiqlik nurlanishi spektrining yuqori chastotalar sohasida tajribadan olingan natijalar bilan mos keladi (1.4-rasmda tutash chiziq). Kichik chastotalar sohasida Vin formulasi asosida hisoblangan  $\rho_v$  ning qiymatlari tajribadan olingan qiymatlardan kichikroq qiymatlarni beradi.

Shunday qilib, Vin formulasi issiqlik nurlanishi spektrining yuqori chastotalar sohasida tajriba natijalari bilan mos keladigan to'g'ri natijalarni beradi. Reley-Jins formulasi esa spektrning kichik chastotalar sohasida tajriba natijalari bilan mos keladigan to'g'ri natijalarni beradi.

Lekin har ikkala formula ham spektrning o'rta qismini yoki to'liq spektrni tushuntira olmadi. Bunday hol issiqlik nurlanishi

nazariyasini klassik fizika qonunlari asosida tushuntirib bo'lmasligini ko'rsatadi.

### 1.5-§. Plank formulasi

Klassik fizika nazariy tushunchalari asosida absolut qora jism issiqlik nurlanishining to'liq spektrini tushuntirishga bo'lgan urinishlar muvaffaqiyatsiz chiqdi.

Bunday urinishlardagi qiyinchiliklarni bartaraf etish uchun Maks Plank 1900-yili issiqlik nurlanishining to'liq spektrida energiyaning taqsimlanishini izohlash maqsadida o'zining quyidagi gipotezasini ilgari surdi:

1. Absolut qora jism ossillyatorlari uzlusiz ravishda energiya nurlamaydi. Nurlanish faqat ossillyatorlar tebranishi amplitudasining o'zgarganida sodir bo'ladi, ya'ni ossillyator yuqori amplitudali tebranishdan kichik amplitudali tebranishga o'tganda nurlanish chiqaradi yoki aksincha, past amplitudali tebranishdan yuqori amplitudali tebranishga o'tganda ossillyator energiya yutadi. Tebranish amplitudasi yuqori holatdan kichik holatga o'tganda ossillyator energiya nurlaydi, amplituda kichik holatdan yuqori holatga o'tganda ossillyator energiya yutadi.

2. Ossillyator istalgan energiya qiymatiga ega bo'la olmaydi, balki faqat diskret energiyalar to'plamiga ega bo'ladi. Ossillyator energiyani alohida-alohida ulushlar (kvantlar) sifatida chiqaradi yoki yutadi. Bu ulushlarning (kvantlarning) har birining energiyasi diskret bo'lib,

$$E = \hbar\nu, \quad (1.17)$$

kattalikka teng. U vaqtida ossillyator nurlanishining energiyasi bu kattalikka karrali bo'lishi kerak, ya'ni ossillyator energiyasi energiyaning diskret to'plamiga teng:

$$E_n = nh\nu \quad (n = 0, 1, 2, 3, \dots). \quad (1.18)$$


Bunda ossillyatorning o'rtacha energiyasi

$$\bar{E} = \frac{\hbar\nu}{e^{\frac{\hbar\nu}{kT}} - 1}. \quad (1.19)$$

Plank o‘z gipotezasi asosida absolut qora jism issiqlik nurlanishining to‘liq spektrida energiya taqsimlanishining zichligini ifodalarydigan interpolatsion formulani taklif qildi:

$$\rho_v = \frac{8\pi h v^3}{c^3} \cdot \frac{1}{e^{\frac{hv}{kT}} - 1}. \quad (1.20)$$

(1.20) formula *Plank formulasi* deyiladi. (1.20)da  $h$  – Plank doimisi bo‘lib,  $h = 6,62 \cdot 10^{-34}$  J·s.  $v$  – ossillyator tebranishining chastotasi.  $hv \ll kT$  bo‘lganda (kichik chastotalarda) Plank formulasi Reley – Jins formulasiga,  $hv \gg kT$  bo‘lganda (yuqori chastotalarda) Vin formulasiga aylanadi. Plank formulasi tajriba natijalari bilan mos keladi, ya’ni Plank formulasidan hosil qilingan nazariy natijalar asosida chizilgan spektr egri chiziqlari tajriba natijalari asosida chizilgan spektr egri chiziqlariga mos keladi (1.4-rasm). Plank formulasi absolut qora jism issiqlik nurlanishining to‘liq spektrida energiya taqsimlanishini to‘g‘ri tushuntira oldi.



Kovak devorlari materialining atomlari ossillyatorlar deb modellashtirilganligi sababli quyidagi xulosalarga kelish mumkin: atomlarning ichki energiyasi uzlusiz o‘zgara olmaydi, balki sakrab o‘zgaradi, ya’ni atom faqat diskret energiya qiymatlarigagina ega bo‘ladi yoki buni quyidagicha ifodalash mumkin: atom energiyasi kvantlanadi, agar atom holati uning energiyasi bilan xarakterlansa, atom holatini diskret deb aytish mumkin.

Shunday qilib, Plank gipotezasiga asosan nurlanish jism bilan o'zaro ta'sirlashganda, nurlanish energiyasining jismda yutilishi uzlusiz bo'lmasdan, balki energiyasi  $h\nu$  bo'lgan kvantlar shaklida yutiladi (porsiya-porsiya shaklida) yoki qizigan jismlar issiqlik nurlanishini kvantlar shaklida chiqaradi.

Plank tomonidan kiritilgan kvantlar tushunchasi energiyaning diskret porsiyalari bo'lib, har bir porsiya energiyasi  $E=h\nu$  formula bilan aniqlanadi.

### **1.6-§. Kvant o'tishlar**

Atomning har bir diskret holati o'z energiyasi bilan xarakterlanadi. Atom bunday holatda ma'lum vaqt bo'la oladi, bunday holat statsionar holat deyiladi. Atom energiyasi yuqori bo'lgan holatdan energiyasi kichik bo'lgan boshqa holatga o'tganda holatlar orasidagi energiya farqi  $\Delta E$  ni yorug'lik kvanti sifatida chiqaradi. Bunda chiqarilgan energiya chastotasi

$$\nu = \frac{\Delta E}{h}$$

ko'rinishda aniqlanadi.

Xuddi shunday, atom energiyasi kichik bo'lgan statsionar holatdan energiyasi yuqori bo'lgan statsionar holatga o'tishi mumkin. Lekin buning uchun atomga tashqaridan  $\Delta E$  energiya berish kerak. Bunda atom chastotasi  $\nu = \frac{\Delta E}{h}$  bo'lgan yorug'lik kvantini yutadi.

**Spontan va majburiy o'tishlar.** Atomning energiyani yutish yoki chiqarish orqali bir statsionar holatdan boshqa statsionar holatga o'tishi haqidagi tasavvurlardan foydalanib, Eynshteyn taklif qilgan usul yordamida absolut qora jism nurlanishi uchun Plank formulasini chiqarish mumkin.

Devorlari ma'lum bir  $T$  temperaturagacha qizdirilgan yopiq bo'shliq (idish) bo'lsin. Bu idish devorlari fotonlarni ham yutadi, ham nurlaydi (chiqaradi). Fotonni nurlaganda atom yuqori energetik sathdan pastki energetik sathga o'tadi, fotonni yutishida esa pastki energetik sathdan yuqorisiga o'tadi.

Shunday qilib, atom pastki energetik holatdan yuqori energetik holatga o'tishi uchun fotonni yutishi kerak. Bunday o'tish majburiy o'tish bo'ladi. Majburiy o'tishda atomga nurlanish maydoni ta'sir qilishi kerak (ya'ni atomga tashqaridan energiya berilishi kerak). Atomga tashqi nurlanish maydoni ta'sir qilmaganda, atom o'z-o'zidan yoki spontan ravishda pastki energetik sathdan yuqori energetik sathga o'tmaydi, chunki bu energiyaning saqlanish qonuniga ziddir. Atomning yuqori energetik sathdan pastki energetik sathga o'tishi ikki xil bo'lishi mumkin: birinchisi, majburiy o'tish, bu o'tish atomga nisbatan tashqi sabablar ta'sirida bo'ladi; ikkinchisi, spontan o'tish, bu o'tish atomdagи ichki sabablar ta'sirida bo'ladi.

### ***Nazorat savollari***

1. *Issiqlik nurlanishining hosil bo'lishini tushuntiring.*
2. *Jism nurlanish sistemasida muvozanatli holat qaysi vaqtida bo'ladi?*
3. *Absolut qora jism deb qanday jismga aytildi?*
4. *Absolut qora jismning amaldagi modeli qanday?*
5. *Issiqlik nurlanishining spektri qanday ko'rinishda va undagi egri chiziqlar nimani ifodalaydi?*
6. *Kirxgof qonuni qaysi kattaliklar orasidagi bog'lanishni ifodalaydi?*
7. *Absolut qora jism to'la nur chiqarish qobiliyati bilan absolut temperatura orasida qanday bog'lanish bor?*
8. *Vin qonuni qaysi kattaliklar orasidagi bog'lanishni ifodalaydi?*
9. *Plank formulasining mohiyati qanday?*
10. *Reley-Jins formulasining issiqlik nurlanishi spektrining qaysi sohasida tajriba natijalari bilan mos keladi?*
11. *Vin formulasining nurlanish spektrining qaysi sohasini tushuntira oladi?*
12. *Issiqlik nurlanishi to'g'risida Plank g'oyasi qanday?*
13. *Plank formulasining qanday ifodalanadi, uning mohiyatini tushuntiring.*

**II BOB**  
**ELEKTROMAGNIT NURLANISHNING**  
**KORPUSKULYAR XUSUSIYATLARI**


---

**2.1-§. Tutash rentgen spektrining qisqa  
to'lqinli chegarasi**

Rentgen trubkasida hosil qilingan rentgen nurlanishi ikki xil – tormozlanish va xarakteristik rentgen nurlanishlaridan iboratligi aniqlangan.

Rentgen trubkasida katod va anod orasiga qo'yilgan tezlatuvchi elektr maydon ta'sirida tezlanish bilan harakatlanayotgan elektron atrofidagi davriy ravishda o'zgarib turadigan elektr maydoni davriy ravishda o'zgarib turadigan magnit maydonini yuzaga keltiradi, bu maydon o'z navbatida yana o'zgaruvchan elektr maydonini hosil qiladi va h.k. Shu tariqa tezlanish bilan harakatlanayotgan elektron atrofida elektromagnit to'lqinlar hosil bo'ladi. Elektromagnit to'lqin energiyasi fazoning har bir nuqtasida vaqt o'tishi bilan davriy ravishda o'zgaradi. Elektronning tormozlanishi deganda, uning atrofidagi elektr va magnit maydonlarining o'zgarishi tushuniladi. Elektr va magnit maydonlarining o'zgarishi esa elektromagnit to'lqin nurlanishini hosil qiladi. Shu nurlanish tormozlanish rentgen nurlanishidir. Tormozlanish rentgen nurlanishining spektri tutash bo'lib, u to'lqin uzunligining minimal qiymati  $\lambda_{\min}$  bilan chegaralangan bo'ladi.

Rentgen trubkasida anod va katod orasidagi potensiallar farqining bir necha qiymatlarida ( $U_1=30$  kV,  $U_2=40$  kV,  $U_3=50$  kV) hosil bo'ladigan tormozlanish rentgen nurlanishining tutash spektri 2.1-rasmda keltirilgan. Katod va anod orasidagi potensiallar farqi  $U=U_1$  bo'lganda spektr to'lqin uzunligining qandaydir  $\lambda=\lambda_{\min 1}$  qiymatidan boshlanadi: katod va anod orasidagi potensiallar farqi  $U=U_2$  bo'lganda, spektrning qisqa to'lqinli chegarasi chap tomonga siljiydi, spektrning intensivligi esa ortadi, bu vaqtida spektr qisqa to'lqin uzunliklar sohasida  $\lambda_{\min 2}$  bilan chegaralangan bo'ladi. U yana oshirilib  $U=U_3$  bo'lganda spektr  $\lambda=\lambda_{\min 3}$  bilan chegaralanadi. Tormozlanish rentgen nurlanishi spektrining tutash bo'lishini va



2. I-rasm

qisqa to'lqinlar uzunliklari sohasida  $\lambda_{\min}$  bilan chegaralanishi quyidagicha izohlash mumkin. Katod va anod orasidagi tezlatuvchi elektron maydoni ta'sirida elektron  $E_i = eU$  energiyaga erishadi va anod materialida tormozlanib to'xtaydi. Bunda elektron energiyasining  $E_2$  qismi anod materialini qizdirishga sarf bo'ladi. Energianing qolgan qismi esa tormozlanish rentgen nurlanishining energiyasi, ya'ni rentgen kvanti energiyasi sifatida ajralib chiqadi. Demak, tormozlanish rentgen nurlanishi kvantining energiyasi  $h\nu = E - E_2$ , kattalikka teng bo'ladi, bunda  $\nu$  – rentgen kvantining chastotasi,  $\lambda$  esa uning to'lqin uzunligi.  $E_2 = E_1$  bo'lganda elektron energiyasi faqat anodni qizdirishga sarflanadi,  $E_2 = 0$  bo'lganda esa elektron energiyasi butunlay rentgen kvanti energiyasiga aylanadi.  $E_2$  ning qiymati  $E_1$  dan 0 gacha bo'lgan oraliqda o'zgarishi mumkin. Elektron energiyasining anodni qizdirishga sarflanadigan qismi  $E_2$  har xil kattalikda bo'lishi mumkinligi uchun har xil energiyali rentgen kvantlari nurlanadi.

Bu esa tormozlanish rentgen nurlanishining spektri tutash bo'lishini ko'rsatadi. Har bir nurlanish kvantining energiyasi anodga urilayotgan tez elektronlar energiyasidan katta bo'la olmaydi, ya'ni

$$eU - h\nu_{\max}, \quad (2.1)$$

yoki

$$eU = \frac{hc}{\lambda_{\min}}, \quad (2.2)$$

$$\lambda_{\min} = \frac{hc}{eU}. \quad (2.3)$$

(2.3) formulada  $\lambda_{\min}$  – tutash rentgen spektrning qisqa to'lqinli chegarasini ifodalaydi,  $c$  – yorug'lik tezligi,  $h$  – Plank doimiysi,  $e$  – elektronning zaryadi,  $U$  – rentgen trubkasidagi potensiallar farqi.

Rentgen trubkasidagi  $U$  – potensiallar farqi kilovoltlarda o'lchan-ganda

$$\lambda_{\min} = \frac{hc}{eU} = \frac{12,40}{U} \text{ Å}. \quad (2.4)$$

Spektrning qisqa to'lqinli chegarasi antikatod materialiga bog'liq bo'lmaydi, balki faqat trubkadagi potensiallar farqiga bog'liq bo'ladi. (2.3) formuladan ko'rindan, potensiallar farqi ortishi bilan tutash spektrni chegaralovchi to'lqin uzunligi qisqarib boradi, bunda spektrning intensivligi ortadi. (2.3) formuladan foydalanib Plank doimiyligi  $h$  ni aniqlash mumkin.

## 2.2-§. Fotoeffekt

Elektromagnit nurlar ta'sirida moddadan elektronlarning ajralib chiqishiga *fotoeffekt hodisasi* deyiladi. Fotoeffekt hodisasini birinchi marta 1887-yilda G. Gers kuzatgan. Gers razryadli ochiq konturda elektr tebranishlarini uyg'otish orqali elektromagnit to'lqinlar generatsiyasini hosil qilishda katodni ultrabinafsha nurlar bilan yoritilganda, razryadnikning metall elektrodlari orasida uchqunning uzunligi ortishini kuzatgan yoki boshqacha aytganda, metall elektrodga tushayotgan ultrabinafsha nurlar katod va anod orasida hosil bo'ladiyan uchqunning uzunligini orttiradi. Kuzatilgan bunday hodisaning mohiyati V. Galvaks, A. Stoletov, P. Lenard va boshqa olimlarning bu borada o'tkazgan tajribalarida tushuntirildi.

Gers kuzatgan hodisaning mohiyati shundan iboratki, manfiy zaryadlangan katodni ultrabinafsha nurlar bilan yoritilganda katod manfiy zaryadini yo'qotishi kuzatilgan. Musbat zaryadli anod

yoritilganda zaryad yo‘qotilishi kuzatilmagan. 1897-yilda Dj. Tomson elektronni kashf qildi. 1898-yilda Tomson va Lenardlar o‘tkazgan tajribalarida modda yoritilganda undan ajralib chiqayotgan zarralarning magnit maydonida og‘ishiga asoslanib, ularning solishtirma zaryadini ( $e/m$  kattalikni) aniqladilar. Bu bilan yorug‘lik ta’sirida katoddan ajralib chiqadigan zarralar manfiy zaryadli elektronlar ekanligi aniqlandi. Yorug‘lik ta’sirida (ultrabinafsha, ko‘zga ko‘rinadigan, infraqizil va boshq.) metalldan elektronlarning ajralib chiqishi *fotoelektrik effekt* yoki *fotoeffekt* deb ataldi. Yorug‘lik ta’sirida metalldan ajralib chiqqan elektronlar fotoelektronlar deyildi.

Stoletov o‘z tajribalari asosida fotoeffekt hodisasini o‘rganish usullarini va asosiy miqdoriy qonunlarini ishlab chiqdi. Lenard katodga tushayotgan ultrabinafsha nurlar katod materialidan elektronlarni urib chiqarishini isbotladi.

Fotoeffekt hodisasi yorug‘lik kvantlari metall atomlaridagi bog‘langan elektronlar bilan ta’sirlashganda yuz beradi. Elektronning atomda bog‘lanish energiyasi qancha katta bo‘lsa, fotoeffekt hodisasi sodir bo‘lishining ehtimoliyati shuncha katta bo‘ladi. Bu ehtimollik  $\sigma_f$  – element zaryadi  $Z$  ga kuchli bog‘liq, ya’ni  $\sigma_f \sim Z^2$ . Bundan tashqi fotoeffekt hodisasi yorug‘lik tushayotgan metallning kimyoviy xossasiga, sirtining silliqligi va tozalik darajasiga bog‘liqligi tajribada aniqlandi. Fotoeffekt hodisasi yuzaga kelishining zaruriy sharti yoritilayotgan metall ustki qatlamiciga tushayotgan yorug‘likning sezilarli darajada yutilishidir. Fotoeffekt hodisasi metallar, dielektriklar, yarimo‘tkazgichlar, elektritolitlarda yuzaga keladi. Ishqoriy metallar – litiy, natriy, kaliy, rubidiy, seziy fotoelektrik ta’siriga juda sezgir, ko‘zga ko‘rinadigan nurlar ta’sirida ham fotoeffekt hodisasi hosil bo‘ladi. Erkin elektronlarda fotoeffekt hodisasi yuz bermaydi, chunki erkin elektronlar prinsipi ravishda yorug‘likni yuta olmaydi.

Fotoeffekt tashqi va ichki fotoeffektlarga ajraladi. Agar yoritilayotgan modda sirtqi qatlamidan elektronlar butunlay ajralib chiqib, boshqa muhitga o‘tsa (masalan, vakuumga) bunday hodisa tashqi fotoeffekt deyiladi. Tashqi fotoeffekt hodisasi 1887-yilda G.Gershomonidan kashf qilingan.


Agar elektronlar faqat o‘z atomi bilan bog‘lanishni «uzib» chiqib yoritilayotgan modda ichida «erkin elektron»ga aylanib qolsa, bunday

hodisa ichki fotoeffekt deyiladi. Ichki fotoeffekt hodisasi 1873-yilda U.Smit tomonidan kashf qilingan.

Ichki fotoeffektda tushayotgan yorug'lik ta'sirida valent energetik zonadagi elektronlarning bir qismi o'tkazuvchanlik zonesiga o'tadi. Bunda yarimo'tkazgichda tok tashuvchilar konsentratsiyasi ortadi va fotoo'tkazuvchanlik yuzaga keladi. Ya'ni yorug'lik ta'sirida yarimo'tkazgichning elektr o'tkazuvchanligi ortadi. Elektronlarning turli energetik holatlarda qayta taqsimlanishi yarimo'tkazgichda ichki elektr maydonining o'zgarishiga olib keladi. Bundan esa yoritilayotgan ikki turli yarimo'tkazgichlar chegarasida elektr yurituvchi kuch (foto-EYuK) paydo bo'ladi yoki yoritilayotgan yarimo'tkazgich va metall chegarasida ham foto-EYuK yuzaga keladi. Chegara yaqinida o'tish qatlami paydo bo'ladi. Bu qatlam tokni faqat bir yo'nalishda o'tkazadi, ya'ni bu qatlam ventil xossalariga ega bo'ladi.

Tashqi fotoeffekt metallarda kuzatiladi. Masalan, elektroskopga ulangan manfiy zaryadlangan rux plastinkasi ultrabinafsha nurlar bilan yoritilganda elektroskop tezda zaryadsizlanadi, agar plastinka musbat zaryadlangan bo'lganda zaryadsizlanish kuzatilmas edi. Bundan ultrabinafsha nurlar metall plastinkadan (katoddan) manfiy zaryadlangan zarralarni ajratib chiqishini ko'rish mumkin.

Tashqi fotoeffekt hodisasi kuzatiladigan qurilma sxemasi 2.2-rasmda keltirilgan. Havosi so'rib olinib yuqori darajada vakuum hosil qilingan shisha idish ichiga anod — A va katod — K joylashtirilgan bo'lib, ular orasida V — voltmetr bilan o'lchanadigan potensiallar farqi qo'yilgan. Elektr zanjirida hosil bo'ladigan elektr toki G — galvanometr bilan o'lchanadi. Idish devoriga kvars «darcha» F qo'yilgan. Darchadan tushgan yorug'lik nurlari bilan katod yoritilganda elektr zanjirida tok paydo bo'ladi.



2.2-rasm

Bu tokni yorug'lik ta'sirida katod sirtidan ajralib anodga tomon harakatlanayotgan manfiy zaryadli elektronlar hosil qiladi. Bunday hosil qilingan tok *fototok* deyiladi. Agar katod yoritilmasa elektr zanjirida fototok hosil bo'lmaydi.


Yorug'lik intensivligi va chastota doimiy bo'lganda yorug'lik intensivligi  $S_1$  va  $S_2$  bo'lgan hollar uchun fototokning katod va anod orasiga qo'yilgan potensiallar farqiga bog'liqligini ifodalovchi egri chiziqlar 2.3-rasmda keltirilgan.

Katod va anod orasidagi maydon tezlatuvchi maydon bo'lganda (katodda manfiy va anoddha musbat) fototokning qiymati potensiallar farqi  $U$ ga proporsional ravishda rasmda keltirilgandek ortib boradi.

Potensiallar farqining biror qiymatidan boshlab fototok o'zgarmay qoladi.

Rasmda egri chiziq gorizontal to'g'ri chiziqqa o'tadi. Bu chiziq maksimal tok kuchiga to'g'ri keladi. Tok kuchining bunday maksimal qiymati to'ynish toki deyiladi. Yorug'lik ta'sirida katod sirtidan ajralgan fotoelektronlarning hammasi anodga kelib tushganda to'ynish toki hosil bo'ladi. Potensiallar farqining bundan keyingi ortishi to'ynish fototok kuchini o'zgartirmaydi. To'ynish fototok kuchi yorug'lik ta'sirida katoddan har sekundda chiqadigan elektronlar soni bilan aniqlanadi.

Lekin katodga tushayotgan yorug'lik intensivligi o'zgarganda, to'ynish tokining qiymati ham o'zgaradi. Buni 2.3-rasmdagi grafiklardan ko'rish mumkin. Grafiklarda  $I_{t1} < I_{t2}$ , chunki  $S_1 < S_2$ , rasmdan ko'rinishicha, katod va anod orasidagi potensiallar farqi nolga teng ( $U=0$ ) yoki  $U<0$  bo'lgan hollarda ham fototok yo'qolmaydi, ya'ni  $U=0$  bo'lganda ham katoddan anodga tomon harakatlanayotgan elektronlar soni mavjudligi kuzatiladi. Bunday



2.3-rasm

hol katod sirtidan qandaydir boshlang'ich tezlik bilan ajralib chiqayotgan elektronlar soni mavjudligini va ular anodga yetib bora olishini ko'rsatadi. Bu elektronlarni to'xtatish va fototokni yo'qotish uchun katod va anod orasiga tormozlovchi potensiallar farqi ( $U = -U_T$ ) qo'yish zarur. Tormozlovchi potensiallar farqi yorug'lik intensivligiga bog'liq bo'lmaydi. Tormozlovchi potensiallar katod sirtidan chiqayotgan elektronlar kinetik energiyasining ko'rsatgichidir. Katoddan chiqayotgan elektronlardan tezligi, ya'ni kinetik energiyasi eng katta bo'lgan elektronlargina anodga yetib boradi. Tormozlovchi potensial  $U_T$  qo'yilganda katod sirtidan maksimal tezlik  $\vartheta_{\max}$  bilan ajralgan elektronlar bu tezligini to'liq ravishda yo'qotadi, bunda fototok ham yo'qoladi. U vaqtida energiyaning saqlanish qonuniga asosan quyidagi munosabatni yozish mumkin:


$$eU_T = \frac{1}{2} m_e \vartheta_{\max}^2. \quad (2.5)$$

Bu formulada:  $m_e$  – elektronning massasi,  $e$  – uning tezligi,  $\vartheta_{\max}$  – elektronning maksimal tezligi,  $U_T$  – tormozlovchi potensial.

Tormozlovchi potensiallar farqining qiymatlarini tajribada o'lchab, elektronlarning bu qiymatlarga to'g'ri keladigan kinetik energiyalarini (2.5) formula yordamida hisoblash mumkin.

2.3-rasmdagi grafiklarda ko'rsatilgan to'yinish fototokining mavjudligi va to'yinish fototoki kuchining  $I$ , yorug'lik intensivligiga to'g'ri proporsionalligi, katod sirtidan vaqt birligida urib chiqarilgan elektronlar soni yorug'lik intensivligiga proporsionalligini ko'rsatadi. Bunday bog'lanish Stoletov tomonidan tajribada aniqlangan.

2.4-rasmda yorug'lik chastotasi va tormozlovchi potensiallar farqi orasidagi bog'lanishni ifodalovchi grafik tasvirlangan. Bu grafik tajriba natijalari asosida chizilgan. Rasmdan ko'rinishicha, tormozlovchi potensiallar farqi  $U_T$  ning qiymati (ya'ni fotoelektronlarning maksimal tezligi) va yorug'lik chastotasi orasida chiziqli bog'lanish mavjud. Chastotaning biror  $n_q$  qiymatida fotoelektronlarning tezligi nolga teng bo'ladi. Chastotaning bu qiymati chegara hisoblanadi. Bu shunday chegaraviy chastotaki, bu chastotadan past chastotalarda fotoeffekt kuzatilmaydi.  $v_q$  –



2.4-rasm

fotoeffekt sodir bo'lishining chegaraviy chastotasi yoki fotoeffektning «qizil» chegarasi deyiladi, ya'ni  $v_{ch} = v$  bo'ladi.  $v < v_{ch}$  chastotali yorug'lik fotoeffekt hodisasini yuzaga keltirmaydi. Fotoeffekt  $v < v_{ch}$  chastotali yorug'lik ta'sirida kuzatiladi. Chegaraviy chastota ( $v_{ch}$ )ga mos bo'lgan to'lqin uzunligi  $\lambda_q$  ham fotoeffektning *qizil chegarasi* deb aytildi, ya'ni

$$\lambda_q = \frac{c}{v_{ch}}, \quad (2.6)$$

Stoletov va boshqa olimlar tomonidan fotoeffekt hodisasini o'rGANISHDA O'tkazilgan tajribalar natijalari asosida tashqi fotoeffekt uchun quyidagi asosiy qonunlar aniqlandi:

1. Yorug'lik katod sirtidan vaqt birligida urib chiqargan electronlar soni katod sirtiga tushayotgan yorug'lik intensivligiga to'g'ri proporsionaldir.

2. Katod sirtidan chiqayotgan elektronlarning kinetik energiyasi noldan boshlab maksimal  $\frac{1}{2}mv_{max}^2$  qiymatgacha bo'ladi. Bu energiya yorug'lik intensivligiga bog'liq emas, katodga tushayotgan yorug'lik chastotasiga chiziqli bog'lanishda bo'ladi.

3. Har bir fotokatod materiali uchun biror chegaraviy chastota  $v_{ch}$  mavjudki, bu chastotadan past chastotalarda fotoeffekt hodisasi vujudga kelmaydi.  $v_{ch}$  ning qiymati yorug'lik intensivligiga va katodni yoritish vaqtiga bog'liq bo'lmaydi.


Quyidagi jadvalda ba'zi bir metallar uchun chiqish ishi  $A$  (elektron-voltlarda) va shu metallar uchun fotoeffektning qizil chegarasi  $\lambda_0$  (mikronlarda) qiymatlari keltirilgan.

Metall	(mk)	A(eV)
Platina	0,235	5,29
Volfram	0,276	4,50
Rux	0,290	4,19
Toriy	0,364	3,41
Natriy	0,552	2,25
Seziy	0,620	1,89
Volframga surtilgan seziyli plynoka	0,913	1,36

2.1-jadvaldan ko‘rinadiki, volfram ustidagi seziyli plynokada infraqizil nurlar ta’sirida ham fotoeffekt hosil bo‘ladi, natriyda fotoeffekt ko‘zga ko‘rinadigan va ultrabinafsha nurlar ta’sirida, ruxda esa ultrabinafsha nurlar ta’sirida hosil bo‘ladi.

**Fotoeffekt hodisasidan amaliyotda foydalanish sohalari.** Tashqi fotoeffekt hodisasiga asoslanib vakuumli fotoelementlar yasalgan (2.5-rasm). 2.5-rasmda vakuumli fotoelement sxemasi keltirilgan. Vakuum hosil qilingan shisha ballonning *B* ichki sirtiga metall qatlami surtilgan bo‘lib, bu qatlam *K* – katod vazifasini bajaradi. *A* – anod metall halqa shaklida bo‘lib, ballonning markaziy qismiga joylashtirilgan. *G* – galvanometr fotoelementda hosil bo‘ladigan fototokni o‘lchaydi.

Zamonaviy fotoelementlarda ko‘p vaqtarda *K* – katod sifatida surmali-seziyli yoki kislородли-seziyli katodlar ishlatalidi. Bunday katodlarning fotosezgirligi yuqoridir. Kislородли-seziyli fotoele-




2.5-rasm

mentlarda infraqizil va ko'zga ko'rinarigan yorug'liklar ta'sirida fotoeffekt hosil bo'ladi. Bunday fotoelementning yorug'likka fotosezgirlingi  $20\text{--}80 \text{ mA/lm}$ . Surmali-seziyli  $K$  – katodli fotoelementlarda ko'zga ko'rinarigan va ultrabinafsha yorug'liklar ta'sirida fotoeffekt yuzaga keladi. Bunday fotoelementlarning fotosezgirlingi  $50\text{--}150 \text{ mA/lm}$ .

Ayrim hollarda fotoelementlarning yorug'likka sezgirlingini oshirish uchun uni  $10^{-2} \text{ mmNg}$  bosimda argon gazi bilan to'ldiradilar. Bunday fotoelementlarda fotoelektronlarning argon atomlari bilan to'qnashib, argon gazini ionlashtirishi natijasida fototok kuchayadi. Gaz to'ldirilgan bunday fotoelementlarning fotosezgirlingi  $1000 \text{ mA/lm}$  atrofida bo'ladi.


Ichki fotoeffekt yarimo'tkazgichlarda va dielektriklarda kuzatiladi. Ichki fotoeffekt kuzatish sxemasi 2.6-rasmda keltirilgan. Yarimo'tkazgich  $P$  – plastinka  $G$  – galvanometr bilan ketma-ket ravishda batareyaning qutblariga ulangan. Yarimo'tkazgichning qarshiligi katta bo'lganligi uchun zanjirda tok juda kichik. Lekin  $P$  – plastinka yoritilishi bilan tok keskin ortib ketadi. Buning sababi quyidagicha, yorug'lik yarimo'tkazgich atomlaridan elektronlarni ajratib chiqaradi, bu elektronlar yarimo'tkazgich ichida qolib, uning elektr o'tkazuvchanligini oshiradi (qarshiligi kamayadi).

Ichki fotoeffekt hodisasiga asoslangan fotoelementlar yarimo'tkazgichli fotoelementlar yoki fotoqarshiliklar deyiladi. Bunday fotoelementlarni tayyorlashda qo'rg'oshinli selen ( $\text{PbSe}$ ), oltingugurtli qo'rg'oshin ( $\text{PbS}$ ), oltingugurtli kadmiy ( $\text{CdS}$ ) va boshqa yarimo'tkazgichlardan foydalaniladi. Yarimo'tkazgichli fotoelementlarning sezgirlingi vakuumli fotoelementlar sezgirligidan 100 lab marta ortiq bo'ladi. Yarimo'tkazgichli fotoelementlarning kamchiligi shuki, fototokning o'zgarishi fotoelement yoritilishining o'zgarishiga nisbatan kechikadi. Shuning uchun yarimo'tkazgichli fotoelementlar tez o'zgaruvchan yorug'lik oqimlarini qayd qilishga yaramaydi. Yarimo'tkazgichlardan yasalgan fotoqarshiliklar



2.6-rasm

infraqizil nurlanish detektorlari sifatida foydalaniladi, ularning termoelektrik bolometrlarga nisbatan ustunlik tomonlari ancha ko'pdir.



2.7-rasm

Ichki fotoeffekt asosida tayyorlanadigan fotoelementlardan yana bir turi yopuvchi qatlamlar yarimo'tkazgichli fotoelement yoki ventil fotoelementdir. Ventil fotoelement sxemasi 2.7-rasmda keltirilgan. Bunda *M* – metall plastinka bo'lib, ustiga yupqa *P* – yarimo'tkazgich qatlami surtilgan va *G* – galvanometrli tashqi elektr zanjiriga

ulangan. Yarimo'tkazgich va metallning kontakt zonasida yopuvchi qatlam *B* yuzaga keladi. Bu qatlam ventil o'tkazuvchanlikka ega bo'ladi, ya'ni u elektronlarni faqat yarimo'tkazgichdan metallga tomon yo'nalishda o'tkazadi. Yarimo'tkazgich qatlami yoritilganda unda ichki fotoeffekt asosida erkin elektronlar hosil bo'ladi. Yopuvchi qatlam orqali metallga o'tgan elektronlar orqa tomonga harakat qila olmasdan metallda ortiqcha manfiy zaryadni hosil qiladi. O'z elektronlarining bir qismini yo'qotgan yarimo'tkazgich musbat zaryadga ega bo'ladi. Yarimo'tkazgich va metall orasida hosil bo'lgan potensiallar ayirmasi fotoelement zanjirida elektr tokini hosil qiladi. Shunday qilib, ventil fotoelement yorug'lik energiyasini elektr energiyasiga aylantiruvchi tok generatori sifatida ishlaydi. Ventil fotoelementlarda selen, oltingugurtli galliy, germaniy, kremniy yarimo'tkazgichlaridan foydalaniladi. Ventil fotoelementlarning fotosezgirligi 2000–30000 mA/lm oraliqda bo'ladi. Quyosh yorug'ligi bilan yoritiladigan kremniyli fotoelementlarning foydali ish koeffitsienti 12–13%dir. Nazariy hisoblashlar bu koeffitsientni 22% gacha ko'tarish mumkinligini ko'rsatdi.

Fotoelementlarda hosil bo'ladigan fototok yorug'lik oqimiga proporsional bo'lgani uchun fotoelementlardan fotometrik asboblar sifatida foydalaniladi. Masalan, bunday asboblarga yoritilganlikni o'lchaydigan asbob lyuksmetr misol bo'lishi mumkin. Fotoelement yorug'lik oqimi tebranishlarining fototok tebranishlariga aylantirishga imkon beradi. Bu esa texnikada tovushli kinolarda, televi-deniyeda keng ishlatiladi. Fotoelementlarning ishlab chiqarish jarayonlarini telemexanizatsiyalashda, avtomatlashtirishda ahamiyati

kattadir. Elektron kuchaytirgichlar va rele bilan birgalikda fotoelementlar avtomatlashtirish qurilmalarining asosiy qismi hisoblanadi. Bunda fotoelementlar yorug'lik signallarini sezishi bilan turli ishlab chiqarish va qishloq xo'jalik qurilmalarining, transport mexanizmlarining ishlashida muhim ahamiyatga egadir.

Ventilli fotoelementlardan amaliyotda elektr energiyasi generatori sifatida foydalaniladi. Quyosh batareyasi deb yuritilayotgan kremlniyli fotoelementlar batareyasi kosmik kemalarda, raketalarda radioapparaturlar ishlashida tok manbayi sifatida foydalaniladi. Quyosh batareyalarining foydali ish koeffitsienti 20–22% bo'lganda, ular ishlab chiqarish hamda maishiy zaruratlarda elektr energiyasi manbayi sifatida birinchi o'rinda turadi.

### 2.3-§. Fotoeffekt nazariyasি

Fotoeffektning faqatgina birinchi qonunini to'lqin nazariyasi asosida tushuntirish mumkin. Ammo to'lqin nazariyasi fotoeffektning ikkinchi va uchinchi qonunlarini tushuntira olmaydi.

Haqiqatdan ham to'lqin nazariyaga asosan fotokatodga tushayotgan ixtiyoriy to'lqin uzunlikka ega bo'lgan yorug'likning intensivligi ortgan sari ajralib chiqayotgan fotoelektronlarning energiyalari ham ortishi kerak edi. Ammo tajribalarning ko'rsatlshicha, fotoelektronlarning energiyasi yorug'lik intensivligiga mutlaqo bog'liq emas.

To'lqin nazariyasiga asosan, elektron metalldan ajralib chiqishi uchun kerakli energiyani har qanday yorug'likdan olishi mumkin, ya'ni yorug'lik to'lqin uzunligining ahamiyati yo'q. Faqat yorug'lik intensivligi yetarlicha katta bo'lishi lozim. Vaholanki, to'lqin uzunligi *qizil chegaradan* katta bo'lgan yorug'likning intensivligi har qancha katta bo'lsa ham, fotoeffekt hodisasi yuz bermaydi. Aksincha, to'lqin uzunligi *qizil chegaradan* kichik bo'lgan yorug'lik intensivligi nihoyat kuchsiz bo'lsa ham, fotoeffekt hodisasi kuzatiladi. Bundan tushqari, nihoyatda kuchsiz intensivlikdagi yorug'lik tushayotgan taqqirda, to'lqin nazariyasiga asosan, yorug'lik to'lqinlar tashib kelgan energiyalar evaziga metalldagi elektron ma'lum miqdordagi energiyani to'plab olishi kerak. Bu energiya elektronning metalldan chiqishi uchun yetarli bo'lgan holda fotoeffekt sodir bo'lishi kerak.

Hisoblashlarning ko'rsatishicha, intensivligi juda kam bo'lgan yorug'likdan  $A_{ch}$  ga yetarli energiyani elektron to'plab olishi uchun soatlab, hattoki kunlab vaqt o'tishi lozim ekan. Tajribalarda esa metallga yorug'likning tushishi va fotoelektronlarning vujudga kelishi orasida  $10^{-9}$  sekundlar chamasi vaqt o'tadi, xolos.

Demak, yorug'likning to'lqin nazariysi va fotoeffekt hodisasi o'rtasida ma'lum nomuvofoqliklar mavjud. Shuning uchun yorug'-likni uzluksiz elektromagnit to'lqin jarayoni deb tasavvur qilish yorug'lik tabiatini to'la aks ettira olmaydi. Bu fikr 1905-yilda A.Eynshteynni yorug'likning kvant nazariyasini yaratishiga olib keldi. Eynshteyn Plank gipotezasini rivojlantirib, yorug'lik ulushlar shaklida chiqarilgani kabi xuddi shunday ulushlar shaklida yutiladi deb hisoblansa, fotoeffekt qonunlarini tushuntirish mumkin deb ko'rsatadi. Eynshteynning fikricha, yorug'lik to'lqinlari energiyasining oqimi uzluksiz bo'lmasdan, balki energiyaning diskret ulushlari oqimi bo'lib, ularni *kvantlar* yoki *fotonlar* deyiladi. U holda chastotasi  $v$  bo'lgan har bir yorug'lik fotonining energiyasi quyidagicha bo'ladi:

$$E = hv, \quad (2.7)$$

bunda  $h$  – Plank doimiysi,  $h = 6,62 \cdot 10^{-34}$  J·s. Bu g'oyaga asosan, metall sirtiga tushayotgan yorug'lik oqimini fotonlar oqimi deb tasavvur qilish mumkin. Eynshteyn fotoeffekt hodisasiga energiyaning saqlanish qonunini qo'lladi.

Metallga tushgan yorug'lik fotoni elektron bilan to'qnashib, o'zining  $hv$  energiyasini to'liq ravishda elektronga beradi. Foton erkin elektronlar bilan to'qnashganda energiyasini to'liq ravishda erkin elektronlarga berishi mumkin bo'lmaydi. Metallda elektr o'tka-zuvchanlikni ta'minlaydigan elektronlar erkin elektronlar deyiladi. Lekin elektronlar o'zaro va metall panjaraning boshqa zaryadlari bilan ta'sirlashadi. Shuning uchun ular dinamik ma'noda bog'langan elektronlar bo'lib, foton energiyasini to'liq yuta oladi. Agar foton energiyasi yetarlicha katta qiymatda bo'lsa, elektron uni metallda ushlab turgan kuchlarni yengib metalldan ajralib chiqadi. Eynshteynning tasavvurlariga muvofiq, yorug'lik fotonining  $hv$  energiyasi elektronni metalldan uzib chiqarish uchun ketgan  $A$  chiqish ishini bajarishga va unga kinetik energiya berishga sarflanadi. Bunday

jarayonda energiyaning saqlanish qonuni amal qiladi, buni quyidagi ko'rinishda yozish mumkin:

$$hv = A + \frac{m_e g_{\max}^2}{2}, \quad (2.8)$$

bu tenglamada  $hv$  – yorug'lik fotonining energiyasi,

$\frac{m_e g^2}{2}$  – elektronning metalldan chiqqandan keyingi maksimal

kinetik energiyasi,  $m_e$  – elektronning massasi,  $A$  – chiqish ishi. Chiqish ishi deb, elektronni metallda ushlab turgan kuchlarni yengib, metalldan chiqishi uchun sarflangan energiyaga aytildi. Chiqish ishi metallning turiga va metall sirtining holatiga bog'liq.

(2.8) tenglamaga asosan fotoelektronning kinetik energiyasi faqat uni uzib chiqargan yorug'lik fotonining energiyasiga bog'liq bo'lib, intensivlikka bog'liq bo'lmaydi.

(2.8) tenglama tashqi fotoeffekt uchun Eynshteyn tenglamasi deyiladi. *Tashqi fotoeffekt* deyishimizga sabab shundaki, yuqorida keltirilgan hollarda fotoelektronlar moddadan tashqariga ajralib chiqadi. Ba'zi moddalarda esa, masalan yarimo'tkazgichlarda fotonlar ta'sirida valent zonadagi elektron bo'sh zonadagi energetik sathlarga ko'chadi. Bu jarayon tufayli elektron modda tashqarisiga chiqmasdan, uning ichida qoladi. Shuning uchun fotoeffektning bu turi *ichki fotoeffekt* deb ataladi.

Eynshteyn tenglamasi fotoeffektning barcha qonunlarini to'liq tushuntira oladi. Xususan, (2.8) tenglamadan ko'rinishdiki, tushayotgan yorug'lik fotonining energiyasi elektronning metalldan chiqish ishidan kichik bo'lganda, ya'ni  $hv < A$  fotoeffekt sodir bo'lmaydi. Bu esa fotoeffekt yuz berishi uchun qizil chegaraning mavjudligini ko'rsatadi. Fotoeffekt amalga oshishi uchun lozim bo'ladigan foton energiyasining eng kichik qiymati, (2.8) ifodaga asosan, elektronning metalldan chiqish ishining qiymatiga teng bo'lishi kerak:

$$hv_q = A. \quad (2.9)$$

Bu tenglikdan fotoeffektning *qizil chegarasi* –  $v_q$  aniqlanadi, ya'ni  $v_q = A/h$ . Chegaraviy chastota –  $v_{ch}$  tajribada o'lchanadi, chiqish ishi  $A$  esa  $g_{\max} = 0$  bo'lganda, (2.8) tenglama yordamida hisoblanadi.

Eynshteyn tenglamasidan foydalanib, Plank doimiysi  $h$  ni aniqlash mumkin. Buning uchun yorug'likning  $v$  chastotasini,  $A$  chiqish ishini tajribada topish va fotoelektronlarning kinetik energiyasini o'lchan lozim. Bunday o'lchan va hisoblashlardan Plank doimiysi uchun  $h=6,63 \cdot 10^{-34}$  J·s qiymat hosil qilingan. (2.9) ifodaga asosan, *qizil chegara* tushayotgan yorug'lik intensivligiga mutlaqo bog'liq emas, chunki yorug'lik intensivligi undagi fotonlar sonini xarakterlaydi. Foton energiyasi esa faqat chastotaga bog'liqdir. Chiqish ishi turli metallar uchun turlicha bo'ladi va bir necha elektron voltini tashkil qiladi. Kaliy, natriy va mis metallarida fotoeffektning qizil chegarasi (to'lqin uzunliklarda) mos ravishda 551; 543 va 277 nm ga teng bo'lganda chiqish ishi mos ravishda 2,25; 2,28 va 4,48 eV ni tashkil qiladi.

Eynshteyn tenglamasining asosida elektron faqat bitta fotonni yutadi degan tasavvur yotadi. Lekin intensivligi juda katta bo'lgan yorug'liklar uchun fotoeffekt qonunlari o'z kuchini yo'qotadi. Haqiqatdan ham, intensivligi juda katta bo'lgan yorug'lik bilan tajriba olib borilayotgan bo'lsa, metalldagi elektronga bir vaqtning o'zida ikkita foton tushishi mumkin. Bu holda elektron yutgan energiya ikkala foton energiyalarining yig'indisiga teng. Bunda sodir bo'ladigan fotoeffektni *ko'p fotonli fotoeffekt* deb ataladi. Tabiiyki, ko'p fotonli fotoeffektning qizil chegarasi kichik chastotalar (katta to'lqin uzunliklar) sohasiga siljiydi.

Fotoeffektning kvant nazariyasining muvaffiqiyati yorug'likning kvant tabiatini namoyon qiluvchi isbotlardan biridir. Keyinchalik yorug'likning kvant tabiatini ko'pgina tajribalarda ham tasdiqlandi.

## 2.4-§. Fotonlar

Foton – yorug'likning *elementar zarrasi* deb tasavvur qilinadi. Issiqlik nurlanishi, fotoeffekt hodisalari foton tushunchasi asosida tushuntiriladi. Bu hodisalarni tushuntirishda yorug'lik energiyasi (ya'ni, elektromagnit energiya) fotonlarda mujassamlangan, yorug'-lik energiyasi fotonlar ko'rinishida tarqaladi degan fikr asos qilib olingan. Foton energiyasi va tebranish chastotasi orasidagi bog'lanish  $E=h\nu$  munosabat bilan aniqlanadi. Energiya va massaning ekvivalentlik qonuni

$$E = mc^2 \quad (2.10)$$

ifodadan foydalanilgan holda foton massasini aniqlash mumkin:

$$\begin{aligned} mc^2 &= h\nu, \\ m_f &= h\nu/c^2. \end{aligned} \quad (2.11)$$

Ikkinchi tomondan, har qanday zarraning massasi uning tezligi bilan nisbiylik nazariyasida quyidagicha bog'langan:

$$m = \frac{m_0}{\sqrt{1 - \beta^2 / c^2}}. \quad (2.12)$$


Bu formuladan ko'rindiki, zarra harakatsiz (ya'ni,  $\beta=0$ ) holda bo'lqanda, uning massasi  $m_0$  ga teng, demak,  $m_0$  – zarraning tinch holatdagi massasidir. Tajribalarda tinch holatdagi massa  $m_0$  o'lchanadi, chunki aksariyat hollarda  $\beta < < c$  (2.12) munosabat esa katta tezliklar bilan harakatlanayotgan zarralar uchun to'g'ri bo'ladi. U holda yorug'lik fotoni uchun (2.12) ifoda qanday bo'lishini ko'raylik. (2.8) dan

$$m_0 = m \sqrt{1 - \beta^2 / c^2}. \quad (2.13)$$

Yorug'lik fotoni uchun  $\beta=c$ . (2.11) formuladan  $m$ , ning qiymati chekli kattalik ekanligi ko'rindi. Shuning uchun (2.13) ifoda asosida yorug'lik fotonining tinch holdagi massasi  $m_0$  ning qiymati nolga teng bo'lishi kerak, degan xulosa chiqadi. Yoki boshqacha aytganda, yorug'lik fotoni «to'xtab qolsa», uning barcha xususiyatlari yo'qoldi, ya'ni massasi ham, energiyasi ham nolga teng bo'ladi. Fotonning «to'xtashi» deganda, uning biror jism tomonidan yutilishi tu'shuniladi. To'xtash jarayonida fotonning energiyasi (unga ekvivalent bo'lgan massasi) yutuvchi jismga o'tadi. Natijada yutuvchi jismning energiyasi (massasi) mos ravishda ortadi. Demak, yorug'lik fotonining boshqa zarralardan (masalan, elektron, proton, neytron, atom, molekula va h.k.)dan farqi shundaki, foton tinch holdagi massasiga ega bo'lmaydi, ya'ni uning tinch holatdagi massasi nolga teng. Foton faqat harakatlanish jarayonida mavjud bo'lib, uning tezligi yorug'lik tezligiga teng. Demak, foton harakatlanish jarayonida mavjud bo'lib, u energiya, massa va impulsga ega bo'ladi, ya'ni:

energiyasi  $E = h\nu$ ;  
massasi  $m_f = h\nu/c^2$ ;  
impulsi  $R_f = h\nu/c$ .

B



2.8-rasm

Fotonlarning mavjudligi bir qator tajribalarda tasdiqlandi. Bu tajribalardan biri 1922-yilda A.F. Ioffe va N.I. Dobronravovlar tomonidan o'tkazilgan tajribadir. Tajriba quydagicha: yassi kondensatorning A va B qoplamlari orasida zaryadlangan vismut (Vi) zarrasi «muallaq» vaziyatda turadi (2.8-rasm), ya'ni zarraning og'irlik kuchi zarraga teskari yo'nali shida ta'sir etuvchi elektr kuchi bilan muvozanatlashgan bo'ladi. Kondensator qoplamlaridan biri rentgen trubkasining anodi

vazifasini bajaradi. Kichik intensivlikdagi elektronlar oqimi A anodga kelib urilgach, unda tormozlanadi. Natijada A dan bir sekundda mingga yaqin rentgen impulslari chiqariladi.


Bu rentgen nurlari ta'sirida vismut zarrasi 30 minutlar davomida bir marta titrab muvozanatdan chiqqan. Hisoblarning ko'rsatishicha, shuncha vaqt (30 minut) ichida zarra yo'nali shida bitta rentgen kvanti nurlanar ekan. Bu rentgen kvanti zarra bilan to'qnashgach, fotoeffekt hodisasi yuz beradi, ya'ni zarradan elektron ajralib chiqadi. Elektron ajralib chiqqani uchun zarraning zaryadi o'zgaradi va u muvozanat vaziyatidan chiqadi.

Bunday tajribani shunday tushuntirish mumkin. Bu tajriba rentgen nurlarining jism bilan ta'sirlashuvi kvant xarakterga ega ekanligini tasdiqlaydi. Agar rentgen nurlari to'lqin tarzida tarqaladi deb qaralsa, zarradan elektronning ajralib chiqishi uchun kerak bo'ladigan energiya elektronning chiqish ishi qiymatiga yetguncha yig'ilishi kerak. Tajribada foydalanilgan rentgen nurlarining intensivligi kichik bo'lganligi uchun, bunday energiya har qancha vaqt o'tsa ham yig'ilmas ekan, buni hisoblashlar ko'rsatadi. V.I. Vavilovning fikriga ko'ra, yorug'lik oqimi ayrim fotonlarning yig'indisidan iborat bo'lsa, statistik fizika qonunlariga asosan fotonlarning fluktuatsiyasi kuzatilishi kerak. Bu fikr 1933–1942-yillarda o'tkazilgan tajribalarda tasdiqlandi. Bu esa yorug'likning foton tabiatiga ega ekanligini isbotlovchi yana bir dalildir.

## 2.5-§. Kompton effekti

Mikrozarralarning korpuskulyar xususiyatga ega ekanligini tasdiqlaydigan hodisalardan biri 1923-yilda amerikalik fizik A.X. Kompton tomonidan kashf etildi va uning nomi bilan Kompton effekti deb ataldi. *Kompton effekti* hodisasi rentgen nurlarining sochilishi ustida Kompton tomonidan o'tkazilgan tajribalarda aniqlandi. Kompton tajribasi rentgen nurlarining yadro bilan elektronlari kuchsiz bog'langan moddalarda (grafit, parafin va b.) sochilishini kuzatish orqali amalga oshirildi.

Tajriba sxemasi 2.9 a-rasmda tasvirlangan.  $T$  rentgen trubkasida hosil qilingan rentgen nurlanishlari  $F$  filtr va  $D$  diafragma yordamida ingichka monoxromatik dasta shakliga keltirilgan holda sochuvchi modda kristall  $P$  ga tushadi.  $K$  kristallda ma'lum  $\theta$  burchak ostida sochilgan rentgen nurlanishining to'lqin uzunligi  $SP$  spektrograf yordamida aniqlanadi. Tajriba natijalari asosida Kompton sochilgan rentgen nurlari dastasida ikkita to'lqin uzunligi mavjudligini aniqladi: dastlabki rentgen nurlari to'lqin uzunligi  $-\lambda$  va qo'shimcha to'lqin uzunligi  $-\lambda'$ .  $\lambda'$  to'lqin uzunlik  $\lambda$  to'lqin uzunlikka qaraganda katta ( $\lambda' > \lambda$ ).  $\lambda'$  ning qiymati sochilish burchagi  $\theta$  ga bog'liq bo'lib, sochuvchi modda tabiatiga bog'liq emas ( $\theta$  – dastlabki va sochilgan rentgen nurlari dastalari yo'nalishlari orasidagi burchak). Tushayotgan dastlabki va sochilgan rentgen nurlari to'lqin uzunliklari farqi ( $\Delta\lambda = \lambda' - \lambda$ ) ning sochilish burchagiga bog'liqligi quyidagi munosabat orqali aniqlanadi:



2.9-rasm

$$\Delta\lambda = \lambda' - \lambda = 2K \sin^2 \frac{\theta}{2}, \quad (2.14)$$

bunda  $K$  – Kompton doimiysi.

Kompton 1923-yilda Dj.Djensining matematik hisoblashlariga asoslanib, rentgen nurlari haqida quyidagi g‘oyani ilgari surdi: rentgen nurlari fotonlar oqimidan iborat bo‘lib, boshqa zarralar kabi aniq impulsga ega. Fotonlarning elektronlarda sochilishi foton bilan elektron orasidagi elastik to‘qnashuvdir (foton – tinchlikdagi massasi nolga teng bo‘lgan zarra). Fotonlarning elektronlarda elastik sochilishi natijasida fotonlar to‘lqin uzunligining o‘zgarishi hodisasiga *Kompton effekti* deyiladi.

Elektronga tushayotgan rentgen nurlarining energiyasi elektronning atomdagи bog‘lanish energiyasidan katta bo‘lganda *Kompton effekti* kuzatiladi. Bunday holda elektron erkin deb hisoblanishi mumkin. Rentgen nurlari elektron bilan elastik to‘qnashganda o‘z energiyasi va impulsining ma’lum qismini elektronga beradi. Kompton sochilishining energetik va burchak xarakteristikalari elastik to‘qnashuv uchun energiya va impulsning saqlanish qonunlari orqali aniqlanadi.

Energiyasi  $h\nu$  bo‘lgan rentgen fotoni elektron bilan elastik to‘qnashib energiyasining bir qismini elektronga berganda, energiyasi  $h\nu'$  ga kamayadi, to‘lqin uzunligi esa  $\lambda'$  ga ortadi, harakat yo‘nalishi ham o‘zgaradi. Bunday hodisani klassik to‘lqin nazariyasi asosida tushuntirib bo‘lmaydi. Agar foton kvant mexanikasi nuqtai nazaridan

impulsi  $P = \frac{h}{\lambda}$  bo‘lgan zarra deb va uning elektron bilan ta’sirlashuvi

elastik to‘qnashuv qonunlari asosida qaralsa, Kompton effekti to‘g‘ri tushuntiriladi. Foton tinch holatdagi erkin elektronda elastik sochilayotgan bo‘lsin. Bunday to‘qnashuv sxemasi 2.9 b-rasmda keltirilgan. Fotonning elektron bilan to‘qnashuvgacha energiyasi

$E_f = h\nu$  va impulsi  $P_f = \frac{h\nu}{c}$  bo‘lsin. Tinch holatdagi elektronning

to‘qnashuvgacha energiyasi  $E_e = m_0 c^2$  va impulsi  $P_e = 0$  bo‘lsin. To‘qnashuvda foton o‘z energiyasining ma’lum qismini elektronga

beradi. Natijada to'qnashuvdan so'ng elektron  $E'_f$  energiyaga va  $P = m\vartheta$  impulsga ega bo'ladi (bu formulalarda  $m = \sqrt{\frac{m_0}{1 - \frac{v^2}{c^2}}}$ ).

To'qnashuvdan so'ng foton  $E'_f = h\nu'$  energiyaga va  $P'_f = \frac{h\nu'}{c}$

impulsga ega bo'ladi. Bunda sochilgan foton energiyasi va impulsi dastlab tushayotgan foton energiyasi va impulsidan kichik bo'ladi, to'lqin uzunligi esa katta bo'ladi.

Foton va tinch holatdagi erkin elektronning elastik to'qnashuvi tufayli vujudga kelgan to'lqin uzunligining o'zgarishi  $\Delta\lambda$  ni aniqlash uchun energiya va impulsning saqlanish qonunlarini quyidagicha yozish mumkin:

$$E_f + E_e = E'_f + E'_e, \quad (2.15)$$

$$P_f = P'_f + P'_e. \quad (2.16)$$

(2.15) va (2.16) tenglamalar birlashtirilganda yechilganda fotonning elektron bilan elastik to'qnashuvida foton to'lqin uzunligining o'zgarishi  $\Delta\lambda$  ni aniqlaydigan formula hosil bo'ladi:

$$\Delta\lambda = 2 \frac{h}{m_0 c} \sin^2 \frac{\theta}{2}. \quad (2.17)$$

(2.14) va (2.17) formulalar taqqoslanganda  $K = \frac{h}{m_0 c}$  ekanligi

ko'rindi.  $K$  – elektronning Kompton to'lqin uzunligi deyiladi. Kompton o'tkazgan tajribalarida elektronning to'lqin uzunligi bo'lgan kattalikni o'lchashga muvaffaq bo'ldi.  $K$  ning tajribada aniqlangan qiymati  $K=2,43 \cdot 10^{-10}$  m. Tajribalarda elektronning Kompton to'lqin uzunligi  $K$  rentgen nurlanishi to'lqin uzunligidan kichikligi ko'rsatildi. (2.17) formula orqali hisoblangan natijalar tajriba natijalari bilan mos keladi. Bu esa elektromagnit to'lqlarning korpuskulyar xususiyatga ega ekanligi haqidagi tasavvurlarning to'g'riligini isbotlaydi.


## 2.6-§. Oje elektronlari

Rentgen nurlari moddadan o'tganda modda atomlarining elektronlari bilan o'zaro ta'sirlashadi. Bunday o'zaro ta'sirning ehtimoliyati rentgen nurlarining sochilishida, fotoelektrik yutilishida katta bo'ladi. Fotoeffekt hodisasida fotoelektron va ichki elektron qobig'ida bo'sh o'rinni hosil bo'lgan atom vujudga keladi. Bo'sh o'rinni yuqorigi elektron qobiqlardan o'tgan elektron bilan to'ldiriladi. Bunday o'tishlarda ma'lum energiyaga ega bo'lgan xarakteristik rentgen nurlanishi chiqadi yoki bu nurlanish energiyasi atomning tashqi qobiqdagi elektroniga beriladi. Energiya olgan tashqi qobiqdagi elektron atomdan ajralib chiqadi. Bunday jarayon *Oje effekti* deyiladi. Atomdan ajralgan elektronlar esa *Oje elektronlari* deyiladi. Oje elektronlari fotoeffekt tufayli uyg'ongan atomlarning sezilarli darajadagi energiyasini olib ketadi. Oje effekti, ayniqsa elektromagnit o'tishlar man qilingan hollarda, masalan, O—O o'tishlarda kuchli namoyon bo'ladi.

Oje effektida oddiy ionlashgan atom o'rniga ikki marta ionlashgan atom hosil bo'ladi.  $K$  qobiqda bo'sh qolgan o'ringa  $L$  qobiqdan elektron o'tishida hosil bo'lgan rentgen nurlanishi kvantining energiyasi  $h\nu = E_K - E_L$  bo'ladi.  $L$  qobiqdagi bo'sh o'ringa  $M$  qobiqdan elektron o'tishi mumkin. U vaqtida hosil bo'lgan rentgen nurlanishi kvantining energiyasi  $h\nu = E_L - E_M$  bo'ladi.

2.10-rasmda fotoeffekt natijasida  $K$  qobiq elektroni yo'qotilgan atomda rentgen kvantlari va Oje elektronlarining hosil bo'lishi ko'rsatilgan. 2.10 a-rasmida elektronning  $L$  qobiqdan  $K$  qobiqdagi bo'sh o'ringa o'tishida energiyasi  $h\nu = E_K - E_L$  bo'lgan rentgen kvantining hosil bo'lishi tasvirlangan. Agar  $L$  qobiqda bo'sh o'rinni bo'lsa, bu o'ringa  $M$  qobiqdan elektron o'tishida energiyasi  $h\nu = E_L - E_M$  bo'lgan rentgen kvanti hosil bo'ladi (2.10 b-rasm). Lekin rentgen kvanti hosil bo'lishi o'rniga  $L$  qobiqdagi bo'sh o'ringa  $M$  qobiq elektroni o'tadi, ortiqcha energiya esa rentgen kvanti sifatida chiqarilmasdan, balki  $N$  qobiq elektroniga beriladi va bu elektron atomdan ajraladi (2.10 c-rasm). Bu elektron *Oje elektroni* bo'lib, uning energiyasi quydagicha aniqlanadi:

$$E = E_L - E_M - E_N$$



2.10-rasm

Demak, rentgen nurlarining fotoeffekt hodisasini hosil qilishida bir marta va ikki marta ionlashgan atomlar, xarakteristik rentgen nurlari va Oje elektronlari hosil bo'ladi.

### Nazorat savollari

1. Tormozlanish rentgen nurlanishining hosil bo'lishini tushuntiring.
2. Tormozlanish rentgen nurlanishining spektri qanday ko'rinishda va spektrdagи egri chiziq nimani ifodalaydi?
3. Tormozlanishdagi rentgen spektrining  $\lambda_{min}$  qisqa to'lqinli chegarasi va tezlatuvchi kuchlanish U orasidagi bog'lanish qanday formula orqali ifodalangan?
4. Qisqa to'lqinli chegaraning mavjudligi nurlanishning qanday xossasidan kelib chiqadi?
5. Issiqlik nurlanishi spektridagi egri chiziq maksimumi qaysi vaqtda qisqa to'lqin uzunliklar tomon siljiydi?
6. Fotoeffekt hodisasi qanday hodisa va u kim tomonidan ochilgan?
7. Stoletov qonunlarini tushuntiring.
8. Fotoeffekt qizil chegarasining formulasi qanday va uning mohiyati nimadan iborat?
9. Eynshteyn formulasini yozing va uni izohlab bering.
10. Fotoeffekt hodisasi qanday elektronlarda hosil bo'ladi?
11. Kompton effekti qanday hodisa hamda bu hodisani kim va qachon kuzatgan?
12. Kompton effekti qanday elektronlarda sodir bo'ladi?
13. Kompton sochilishda energiya va impuls saqlanish qonunlarini yozing va tushuntiring.
14. Kompton sochilishda to'lqin uzunligining o'zgarishi qaysi formula orqali ifodalanadi?
15. Xarakteristik rentgen nurlari qanday hosil bo'ladi va ularning tabiatini qanday?
16. Oje elektronlarining hosil bo'lishini tushuntiring.
17. Fotoeffekt hodisasidan amalda qanday foydalilanildi?

### **III BOB** **ZARRALAR VA TO'LQINLAR**

---

#### **3.1-§. Mikro va makrozarralarning to'lqin xususiyatlari**

Kvant mexanikasida o'rganiladigan namunalarning (mikrozarralar – elektron, proton, neytron, yadro, atom va boshq.) chiziqli o'lchami  $10^{-8} \div 10^{-15}$  m tartibidadir. Agar zarra  $9 < c$  tezlik bilan harakatlansa, norelyativistik kvant mexanikasi bilan ish ko'rildi. Mikrozarralar ustida o'tkazilgan tajribalar shuni ko'rsatadi, mikrozarralar ham to'lqin, ham zarra xossasiga ega. To'lqin xossasi ularning tarqalish jarayonida (interferensiya, difraksiya hodisalari), zarra xossasi esa zarralarning o'zaro ta'sirida (fotoeffekt, kompton effekti va boshqalarda) namoyon bo'ladi. Oddiy ko'z bilan ko'rish mumkin bo'lgan zarralar *makrozarralar* deyiladi. Mikro va makrozarralar orasida muhim farq yo'q. Zarralarda to'lqin xossalari namoyon bo'lishi uchun zarralar tarqalishi jarayonida paydo bo'ladigan to'lqin uzunligi zarralar sochiladigan namunaning o'lchamidan katta bo'lishi kerak, ya'ni  $\lambda \gg d$  bo'lishi talab qilinadi. Bunda  $d$  – namunaning o'lchami,  $\lambda$  – tarqalayotgan zarranining to'lqin uzunligi.  $\lambda \gg d$  bo'lgan hollarda zarranining tarqalish jarayonida uning to'lqin xossasi namoyon bo'ladi va bunda kvant mexanikasi qonunlarini tatbiq qilish lozim.  $d \gg \lambda$  bo'lgan hollarda zarranining to'lqin xossasi namoyon bo'lmaydi, bu holda kvant mexanikasini tatbiq qilish talab qilinmaydi. Makrozarralar harakatidagi to'lqin uzunligi juda kichik bo'lib, uni hisobga olmaslik mumkin. Mikrozarralarning to'lqin xossasiga ega ekanligini aniqlash maqsadida Devidson va Jermerlar tomonidan o'tkazilgan tajribalarda electronlarning de-Broyl to'lqin uzunligi  $\lambda = 1\text{\AA}$  tartibda bo'lgan. Elektronlar kristall panjara tugunlaridagi atomlarda sochiladi. Kristall panjara tugunlari orasidagi masofa  $d \geq 1\text{\AA}$ . tartibidadir Shuning uchun ham Devidson va Jermer tajribalarida elektronlar difraksiyasi yaqqol namoyon bo'ladi. Zarralarning energiyasi oshirilganda, ularning to'lqin uzunligi kamayadi. Energiyasi 1 GeV gacha tezlatilgan

elektronlarning to‘lqin uzunligi  $\lambda = 10^{-13}$  sm tartibda bo‘ladi. Bunday elektronlarning kristallarda sochilishida to‘lqin xossalari kuzatilmaydi, chunki kristall panjara tugunlari orasidagi masofa  $d=1\text{ \AA}=10^{-8}$  sm, ya’ni  $d \gg \lambda$ . Lekin agar shu elektronlar o‘lchami  $d=10^{-13}$  cm bo‘lgan namunalardan sochilsa, ularning to‘lqin xossalari namoyon bo‘ladi. Shuning uchun ham o‘lchami  $R=10^{-13}$  sm bo‘lgan yadrolar va nuklonlar tuzilishini o‘rganishda elektronlar energiyasi 1 GeV dan ortiq energiyagacha tezlashtiriladi.

Massasi 1 mg va tezligi 1 mk/s bo‘lgan makrozarraning (masalan, chang zarrasining) to‘lqin uzunligini hisoblash mumkin:

$$\lambda = \frac{2\pi\hbar}{m\vartheta} = \frac{6,6 \cdot 10^{-27}}{10^{-3} \cdot 10^{-4}} \approx 6,6 \cdot 10^{-20} \text{ sm} .$$

Bundan makrozarralarning to‘lqin uzunligi hisobga olmaslik darajada kichik ekanligini ko‘rish mumkin. Bunday makrozarralarning to‘lqin xususiyati namoyon bo‘lmaydi.

### 3.2-§. De-Broyl gipotezasi

Yorug‘likning interferensiya va difraksiya hodisalarini hosil qilishi, uning to‘lqin xususiyatiga ega ekanligini tasdiqlaydi. Yorug‘likning fotoeffekt, kompton effekti hodisalarda ko‘rinishi esa uning korpuskulyar (zarra) xususiyatga ega ekanligini ko‘rsatadi. Shunday qilib, yorug‘likning bir vaqtda ham to‘lqin ham korpuskulyar xususiyatlarga, ya’ni to‘lqin-zarra dualizm xususiyatiga ega ekanligi aniqlangan. Bu xususiyatlar bir-birini istisno qilmaydi, balki bir-birini to‘ldiradi. Yorug‘likning ham to‘lqin ham korpuskulyar xususiyatga ega bo‘lishligi uzoq vaqtlargacha sezilarli bo‘lmadi. Elektromagnit to‘lqinlarning korpuskulyar xususiyatga ega ekanligi aniqlangandan so‘ng moddiy zarralar ham to‘lqin xususiyatiga egami, degan savol tug‘iladi. Bu savolga kvant mexanikasi nazariyasining asoschilaridan biri fransuz fizigi Lui de-Broyl javob berdi. De-Broyl dualizm faqat optik hodisalarga xos xususiyat bo‘lmay, balki universal ahamiyatga ega, degan fikrni ilgari surdi.

De-Broyl 1924-yilda barcha moddiy zarralar korpuskulyar xususiyatga ega bo‘lishi bilan birga to‘lqin xususiyatga ham ega, degan o‘z gipotezasini taklif qildi. Endi zarraning korpuskulyar va

to'lqin xususiyatlarini bog'lovchi munosabatlarni chiqarish kerak edi. De-Broyl to'lqin va korpuskulyar manzaralarning biridan ikkinchisiga o'tish qoidalarini moddiy zarralar holiga tatbiq etdi. Erkin fazoda  $\vartheta$  doimiy tezlik bilan harakatlanayotgan  $m$  massali moddiy zarra (masalan, elektron) mavjud bo'lsin. Korpuskulyar manzarada zarra  $E$  energiya va  $P$  impuls bilan xarakterlanadi, to'lqin manzarada  $v$  chastota va  $\lambda$  to'lqin uzunligi bilan aniqlanadi. Agar to'lqin va zarra manzaralar bitta namunaning turli jihatlari bo'lsa, u holda ularni xarakterlovchi kattaliklar orasidagi bog'lanish quyidagi munosabatlar orqali ifodalanadi:

$$E = \hbar v, \quad (3.1)$$

$$P = \frac{\hbar}{\lambda}, \quad (3.2)$$

yoki

$$E = \hbar \omega, \quad (3.3)$$

$$P = \hbar k. \quad (3.4)$$

Bu formulalarda:  $\hbar$  – Plank doimiysi,  $\hbar=6,62 \cdot 10^{-34} \text{ J} \cdot \text{s}$  yoki

$$\hbar = \frac{h}{2\pi} = 1,05 \cdot 10^{-34} \text{ J} \cdot \text{s},$$

$P$  – zarra impulsi,  $E$  – zarra energiyasi,  $\omega$  – doiraviy (siklik) chastota,  $\omega = 2\pi\nu$ ;  $v$  – chiziqli chastota,  $\lambda$  – de-Broyl to'lqin uzunligi,  $k$  – to'lqin vektori.  $k$  ning absolut qiymati:

$$|k| = \frac{1}{\lambda}. \quad (3.4a)$$

(3.2) ifodadan:

$$\lambda = \frac{\hbar}{P}; \quad P = \hbar k. \quad (3.4b)$$

Tinch holatdagi massasi nolga teng bo'lmagan zarralar uchun  $P=m\vartheta$ , kichik tezliklar uchun  $m$  o'zgarmasdir. Yorug'lik tezligi bilan taqqoslanuvchi tezliklar uchun relyativistik massa

$$m = \frac{m_0}{\sqrt{1 - \beta^2}} \text{ yoki } m = \frac{m_0}{\sqrt{1 - \frac{g^2}{c^2}}} \quad (3.5)$$

formula orqali tezlikka bog'liq bo'ladi. (3.5) formulada:  $m$  – zarraning harakat jarayonidagi massasi,  $m_0$  – zarraning tinch holatdagi massasi,  $g$  – zarra tezligi,  $c$  – yorug'lik tezligi. Tinchlikdagi massasi nolga teng bo'lmasdan zarralar uchun de-Broyl to'lqin uzunligi

$$\lambda = \frac{\hbar}{m\vartheta}. \quad (3.6)$$

Shunday qilib, de-Broyl gipotezasini quyidagicha ta'riflash mumkin: *m massa va E energiyaga ega bo'lgan moddiy zarra korpuskulyar xususiyatga ega bo'lishi bilan birga to'lqin xususiyatiga ham egadir.* Zarralarning korpuskulyar va to'lqin xususiyatlarni bog'lovchi (3.1), (3.2) yoki (3.3), (3.4) tenglamalar de-Broyl tenglamalari deyiladi.

### 3.3-§. De-Broyl to'lqinlarining xususiyatlari

Mikrozarralarning harakati to'lqinlar bilan ifodalanganda, ularning tarqalishi amalga oshadi. Fotonlarning tarqalishi, ya'ni yorug'-likning  $\omega$  burchak chastotasi va  $k$  to'lqin vektori bilan tarqalishi yassi to'lqin bilan ifodalanadi:

$$\psi(r, t) = Ae^{-i(\omega t - kr)}, \quad (3.7)$$

(3.7) formulada  $\omega$  va  $k$  ni (3.3) va (3.4) formulalar asosida energiya  $E$  va impuls  $P$  bilan almashtirilganda, (3.7)ni quyidagicha yozish mumkin:

$$\psi(r, t) = Ae^{\frac{i}{\hbar}(Et - Pr)}, \quad (3.8)$$

(3.8)da  $i = \sqrt{-1}$  kompleks son,  $A$  – to'lqin amplitudasi,  $E$  – zarraning energiyasi,  $P$  – zarraning impulsi.


(3.8) formulada keltirilgan fotonning to'lqin funksiyasi yorug'lik to'lqinidir. Zarralar uchun esa (3.8) ifoda de-Broyl yassi to'lqini deyiladi. Kvant mexanikasida to'lqin funksiyasini «psi funksiya»

deb ataladi. De-Broyl to'lqinlari tarqaladi, interferensiya va difraksiya hodisalarini hosil qiladi.

**De-Broyl to'lqinlarining ehtimollik xususiyati.** Zarralarning to'lqin xususiyati ularning bir vaqtida birdaniga ko'p sonda bo'lib, harakat qilishida namoyon bo'ladi, degan fikr tug'ilishi mumkin. Lekin bunday emas. Biberman, Sushkin va Fabrikant kabi olimlar tomonidan o'tkazilgan tajribalarda elektronlar sochuvchi yupqa metall plastinka orqali o'tkazilgan va har bir sochilgan elektron fotoplastinkada qayd qilingan. Elektronlar fotoplastinkaning turli nuqtalariga tushgan, bиринчи qarashda elektronlar butun fotoplastinkaga bo'ylab tartibsiz taqsimlangandek ko'rindi. Lekin ko'p sondagi elektronlar sochilishidan aniqlandiki, fotoplastinkaga tushgan elektronlar tasodifan taqsimlangan bo'lmasdan, balki intensivliklarning maksimum va minimumlarini hosil qildi (3.1 b-rasm), ularning holati difraksion formulalar bilan hisoblanishi mumkin. Har bir alohida elektronning harakati difraksion manzara bilan aniqlanishi kuzatildi. De-Broyl to'lqinlari va foton orasidagi, yorug'lik to'lqini va foton orasidagi bog'lanishni qanday tushunish mumkin degan savol tug'iladi. Bor (3.8) ifodadagi de-Broyl to'lqini



a)



b)

3.1-rasm

amplitudasi  $A$  ni fazoning ma'lum bir joyida zarraning topilish ehtimoliyati amplitudasi deb qarashni taklif qildi. Ehtimollik amplitudasi degan iborani shunday ma'noda tushunish kerakki, bunda zarraning topilish ehtimoliyati to'lqin amplitudasi  $A$  bilan emas, balki amplituda moduli kvadrati  $|A|^2$  bilan aniqlanadi.

De-Broyl to'lqinlarining ehtimolli xossasi intensivligi kichik bo'lgan elektronlar dastasining difraksiyasida ham namoyon bo'ladi. Har bir alohida elektronlarning harakati difraksion manzara bilan aniqlanadi, lekin bu aniqlanishga ehtimollik bilan qaraladi. Alohida elektronning fotoplastinkaga tushish joyini oldindan aytish mumkin emas. Lekin sochilayotgan elektronlar sonining ortishi bilan ularning taqsimlanish ehtimolligining taqsimlanish qonunidan, ya'ni  $|A|^2$  dan oz farq qiladi.  $\psi$  funksiyaning ehtimollikli ma'nosini ba'zan noto'g'ri tushuniladi. Klassik fizika bo'yicha mikrozarra doim bir joyda

bo'ladi, lekin bu joy bizga ma'lum emas, to'lqin funksiyasi esa mikrozarraning fazoning turli nuqtalarida topilish ehtimolligini ko'rsatadi, deb qarash mumkin. Bunday hol gazlarning klassik kinetik nazariyasida kuzatiladi. Bu nazariyada ma'lum vaqtida har bir zarranining o'z o'rni bor, lekin zarralar soni ko'p, hammasini kuzatish mumkin emas, shuning uchun ularning faqat taqsimlanish ehtimolligi hisoblash mumkin. Bunday nuqtai nazar esa interferensiya hodisasiga qarama-qarshidir. Zarra turgan nuqtadan kelayotgan to'lqinlarning Gyugens prinsipiga asosan bir-birining ustiga tushishini qarash ma'noga ega emas. Interferencion hisoblar hamma nuqtalarning to'liq teng huquqligini yoki tajribada har ikkala tirkishning tengligini nazarda tutadi. Kvant fizikasida model tasavvurlari klassik fizikadagidek rol o'ynamaydi. Lekin, agar model tasavvurlari jihatidan qaralsa,  $\psi$  funksiya amplitudasi asosida elektronni fazoga *bo'yagan* deb tasavvur qilish mumkin. Agar elektron modda bilan ta'sirlashsa, u xuddi bir nuqtaga «to'planib» bir butunligicha ta'sirlashadi. Ta'sirlashgandan so'ng elektron dastlabki  $\psi$  funksiya bilan ifodalanmaydi. Endi uning taqsimlanishi juda kichik bo'lib, fotoplastinkaning qoraygan qismlarida noldan farqli bo'ladi.

Bunday *bo'yalish* nima uchun klassik obyektlarda kuzatilmaydi? Nima uchun elektron ikkita tirkishdan o'tadi, futbol to'pi esa birdaniga ikkita darvozada bo'la olmaydi? Bu savollarga quyidagicha javob berish mumkin: to'pning harakatini ifodalovchi de-Broyl to'lqin uzunligi to'pning o'z o'lchamidan juda kichik. Shuning uchun to'pni *bo'yagan* deb qarab bo'lmaydi va difraksiya hodisasini kuzatish mumkin emas.

Klassik mexanikada zarranining trayektoriyaga ega bo'lishi uning asosiy xossalardan biridir. Zarra ma'lum bir joyda bo'lgan vaqtida boshqa joylarda bo'la olmaydi. Klassik to'lqin optikasida, aksincha, to'lqin bir vaqtida fazoning ko'p joylarida bo'la oladi. Kvant nazariyasi tasavvurlariga asosan barcha mikrozarralar to'lqin singari bir vaqtida fazoning ko'p nuqtalarida bo'la oladi. Shuning uchun ham mikrozarralar (elektron, proton, foton va boshqalar) trayektoriyaga ega bo'la olmaydi. Lekin mikrozarralarda klassik zarralarning xarakteristikalari bo'lgan zaryad, massa va energiya tushunchalari saqlanadi.

**Tajribaning mikrozarra holatiga ta'siri.** Elektronlar difraksiyasi ustida o'tkazilgan tajribada tirdishdan o'tgan har bir elektron fotoplastinkada qayd qilinadi va fotoplastinkada kumush bromidning biror kristalini qoraytiradi. Bu elektronlardan istalgani kumush bilan ta'sirlashganicha difraksion manzara ko'rinishida fazoda *bo'yagan* bo'ladi. Ta'sirlashgandan keyin u endi *bo'yalmagan*, balki plastinkaning aniq bir nuqtasida bo'ladi. Demak, elektronning  $\psi$  funksiyasi ta'sirlashish natijasida o'zgardi. Tajribalar har doim mikrozarralar holatini o'zgartiradi. U vaqtida zarraning tajribadan oldingi holati emas, balki tajribadan keyingi holati aniqlanadi. Kumushning qorayishini aniqlash orqali elektronning plastinka bilan ta'sirlashgandan keyin uning qayerda bo'lish joyini bila olish mumkin. Ta'sirlashishgacha zarraning holati murakkab difraksion manzara bilan ifodalangan *bo'lsada*, bu tajribada uni aniqlab *bo'lmaydi*. Buni tirdishdan o'tkazilgan katta sondagi elektronlarning taqsimlanishini kuzatgandan so'ng bilish mumkin bo'ladi. Mikrozarralar fizikasida har qanday tajriba, zarralar to'g'risida biror yangilikni bilishga urinish mikrozarralar holatini, ularning to'lqin funksiyasini o'zgartiradi. Makrodunyoda o'chov qurollarining tekshiriladigan namunaga ta'siri juda kichik bo'lib, klassik fizikada bu ta'sirni hisobga olmaslik mumkin. Mikrodunyoda esa bu ta'sir katta bo'lib, ko'pincha aniq bir ahamiyatga ega bo'ladi.

**Yassi to'lqinlar va fazaviy tezlik.** Optika kursidan ma'lumki,  $\omega$  – doiraviy chastota va  $k$  – to'lqin vektoriga ega bo'lgan yassi to'lqin kompleks ko'rinishda quyidagi funksiya orqali ifodalanadi:

$$\psi(r, t) = Ae^{-i(\omega t - kr)},$$

bu formulada  $A$  – to'lqin amplitudasi.

Agar de-Broyl tenglamalari  $E = \hbar\omega$  va  $P = \hbar k$  hisobga olinsa,  $P$  impuls va  $E$  energiyaga ega bo'lgan mikrozarraning to'lqin xususiyati quyidagi yassi to'lqin funksiyasi bilan aniqlanadi:

$$\psi(r, t) = Ae^{-\frac{i}{\hbar}(Et - Pr)}. \quad (3.9)$$

*To'lqinning fazaviy tezligi deb, to'lqinning barcha nuqtalari doimiy faza bilan harakat qilgandagi tezligiga aytildi.* Agar  $x$  o'qi  $P$  vektor bo'yicha yo'nalgan bo'lsa, fazaning doimiylik sharti:

$$Et - Px = \text{const} \quad (3.10)$$

bo'ladi. De-Broyl to'lqinlarining fazaviy tezligi (3.10) tenglamani vaqt bo'yicha differensiallash orqali hisoblanadi:

$$E - P \frac{dx}{dt} = 0. \quad (3.10a)$$

(3.10a)dan

$$\frac{dx}{dt} = g_f = \frac{E}{P} = \frac{mc^2}{m\vartheta} = c \frac{c}{\vartheta},$$

yoki

$$g_f = \frac{c^2}{\vartheta}. \quad (3.11)$$

(3.11) formulada  $\vartheta$  – zarraning tezligi,  $c$  – yorug'lik tezligi.  $\vartheta < c$  bo'lganligi sababli de-Broyl to'lqinlarining fazaviy tezligi yorug'lik tezligidan katta bo'ladi. Lekin bunday natija yorug'lik tezligidan katta tezlik bo'lishini taqiqlaydigan nisbiylik nazariyasi tushunchalari bilan qarama-qarshi bo'la olmaydi. Chunki nisbiylik nazariyasi harakat tezligi orqali massa va energiya ko'chiriladigan jarayonlar uchun to'g'ridir. Fazaviy tezlik esa zarraning massasi va energiyasining ko'chirilish tezligi bilan bog'liq bo'limgan tezlikdir. Fazaviy tezlik kuzatilmaydigan tezlikdir. Massa va energiyaning ko'chirilishi zarraning o'z tezligi bilan xarakterlanadi. Zarraning o'z tezligi de-Broyl to'lqinlarining guruhiy tezligi bilan aniqlanadi.


**To'lqin paket va guruhiy tezlik.** Yassi to'lqinlardan to'lqinlar guruhini tuzish mumkin, ya'ni to'lqin soni  $k$  kichik oraliqda bo'lgan to'lqinlar to'plamini tuzish mumkin. Boshlang'ich holda zarraning holati bir-birining ustiga tushgan ko'p sondagi yassi monoxromatik to'lqinlar bilan ifodalanadi. Bu to'lqinlarning har biri o'z tezligi bilan harakat qiladi. Chastotasi har xil bo'lgan yassi to'lqinlar qo'shilishidan hosil bo'lgan va aniq bir maksimum amplitudaga ega bo'lgan to'lqinlar guruhi to'lqin paket deyiladi. *To'lqin paket shunday tuzilmaki, vaqtning ma'lum bir qiymatida fazoning kichik bir sohasida to'lqinlar bir-birini kuchaytiradi. Bu sohadan tashqarida esa to'lqin maydoni nolga teng bo'ladi. Bunday to'lqin paket zarraning o'zidir.* To'lqin paketni chastotasi  $\omega_0$  va amplitudasi  $A(k)$  bo'lgan bitta to'lqin

deb qarash mumkin. To'lqin paket guruhiy tezlik bilan harakatlanadi. To'lqin paketni, ya'ni to'lqinlar guruhini quyidagi to'lqin funksiyasi orqali ifodalash mumkin:

$$\psi(x, t) = \frac{1}{2\pi} \int_{-\infty}^{\infty} A(k) e^{-i[\omega(k)t - kx]} dk. \quad (3.12)$$

Amplituda  $A(k)$  to'lqin sonlarining tor oralig'i ( $k_0 - \varepsilon, k_0 + \varepsilon$ )da noldan farq qiladi, (3.12) ifodada  $1/2\pi$  ko'paytma Fure integrallarida qabul qilingan belgilashlar bilan mos keltirish uchun yozilgan.

Vaqt o'tishi bilan to'lqin paketining shakli va o'lchami o'zgaradi. Fure o'zgartirishlaridan kelib chiqqan holda fazoda to'lqin paketining uzunligi uchun quyidagicha xulosa qilish mumkin: (3.12) formulada amplituda  $A(k)$  to'lqin sonining qanchalik kichik intervalida noldan farq qilsa, shunchalik to'lqin paketning fazoviy o'lchami katta bo'ladi. 3.2-rasmida  $t=0$  bo'lgan vaqtida to'lqin paket tasvirlangan. Punktir chizig'i to'lqin amplitudasining  $x$  koordinataga bog'liqligini ifodalaydi. Rasmdan ko'rindan, to'lqin paket  $x$  o'qning kichik qismida quyuqlashgan. To'lqin paket bir joyda turmaydi, balki uning har bir maksimumi (qalin egri chizig'i bilan ko'rsatilgan)  $x$  o'qi bo'ylab guruhiy tezlik bilan harakatlanadi. Har bir maksimumning balandligi doimiy emas, ularning  $x$  o'qi bo'yicha harakatiga bog'liq ravishda biri ortib borsa, ikkinchisi kamayib boradi.



3.2-rasm

Guruhiy tezlikni hisoblash uchun (3.12) ifodani  $t = 0$  bo‘lgan hol uchun yozamiz:

$$\psi(x, 0) = \frac{1}{2\pi} \int_{-\infty}^{\infty} A(k) e^{ikx} dk, \quad (3.13)$$

hunda  $\psi(x, 0)$  boshlang‘ich  $t=0$  bo‘lgan vaqtida fazoda to‘lqin paketni ifodalaydi.

(3.13) formuladan

$$\frac{1}{2\pi} \int_{-\infty}^{\infty} A(k) \exp \left[ ik \left( x - \frac{d\omega_0}{dk_0} t \right) \right] dk = \psi \left( x - \frac{d\omega_0}{dk_0} t, 0 \right).$$

U vaqtida:

$$\psi(x, t) = \psi \left( x - \frac{d\omega_0}{dk_0} t, 0 \right) \exp \left[ -i \left( \omega_0 - k_0 \frac{d\omega_0}{dk_0} \right) t \right]. \quad (3.14)$$

Bu to‘lqin paketning amplitudasi quyidgicha:

$$|\psi(x, t)| = \left| \psi \left( x - \frac{d\omega_0}{dk_0} t, 0 \right) \right|. \quad (3.15)$$

Demak, birinchi yaqinlashishda to‘lqin o‘z shaklini o‘zgartirmasdan harakatlanadi. To‘lqin paketning tezligi (3.15) ifodaning o‘ng tomonini  $t$  bo‘yicha differensiallash bilan aniqlanadi:

$$\frac{d}{dt} \left( x - \frac{d\omega_0}{dk_0} t \right) = 0. \quad (3.16)$$

Bu kattalik to‘lqin paketning *guruhiy tezligi* deyiladi va quyidagi ifodaga teng bo‘ladi:

$$\vartheta_{guruhiy} = \frac{d\omega}{dk} \Big|_{k=k_0}. \quad (3.17)$$

De-Broyl to‘lqinlari uchun guruhiy tezlik:

$$\vartheta_{guruhiy} = \frac{d\omega}{dk} = \frac{dE}{dP} \quad (3.18)$$

formula bilan aniqlanadi. Agar energiya uchun

$$E = c\sqrt{P^2 + m_0^2c^2}$$

ifoda hisobga olinsa, guruhiy tezlik:

$$\vartheta_{guruh} = \frac{cP}{\sqrt{P^2 + m_0^2 c^2}} = \frac{c^2 P}{E} = \frac{c^2 m \vartheta}{(mc^2)} = \vartheta, \quad (3.18a)$$

yoki

$$\vartheta_{guruh} = \vartheta. \quad (3.19)$$

Demak, de-Broyl to'lqinlarining guruhiy tezligi xossasi shu to'lqinlar bilan aniqlanadigan zarra tezligiga teng. (3.11) va (3.19) formulalar taqqoslanganda, de-Broyl to'lqinlarining fazaviy va guruhiy tezliklari orasidagi muhim bog'lanish kelib chiqadi, ya'ni:

$$\vartheta_g = \vartheta_f = c^2. \quad (3.20)$$

(3.18a) formula zarrani to'lqin paket sifatida tasavvur qilish mumkin degan fikrni tug'dirsada, lekin bu mumkin emas.

**To'lqin paket gipotezasining kamchiligi.** To'lqin paket gipotezasining to'g'ri emasligining sababi quyidagicha: zarra turg'un hosila hisoblanadi. U o'z harakati davomida o'zgarmaydi, o'z holida qoladi. Zarrani ifodalaydigan to'lqin paket ham vaqt o'tishi bilan o'z harakati davomida o'zining fazoviy shaklini, kengligini saqlashi kerak. Lekin to'lqin paket bunday xossaga ega emas, u faqat birinchi yaqinlashishdagina o'zining shakli va kengligini saqlaydi. Vaqt o'tishi bilan esa to'lqin paket yoyilib ketadi, o'z shakli va kengligini saqlamaydi. Buning sababi paketni hosil qilgan to'lqinlarning fazaviy tezliklarining dispersiyasidir. Natijada tezroq harakatlanayotgan to'lqinlar ilgarilab ketadi, sekin harakatlanyotganlari esa o'rtacha tezlikli to'lqinlardan orqada qoladi. Shuning uchun zarrani to'lqin paket deb tasavvur qilish to'g'ri bo'lmaydi. Lekin bunday xulosa chiziqli tenlamalar bilan ifodalanadigan to'lqinlarga to'g'ri keladi. Chiziqlimas to'lqinlar uchun esa ahvol boshqacha, to'lqinlar qo'shilgan bo'lishi mumkin, bunday to'lqinlar fazoning kichik sohasida to'plangan bo'lib, shakli va o'lchamini o'zgartirmasdan harakatlanadi.

**Kvantlash qoidasi.** De-Broyl bir elektronli atom uchun Borning kvantlash qoidasi bo'lgan  $L = n\hbar$  ifodani tushuntirishda fazaviy to'lqinlar haqidagi tasavvurlardan foydalandi. De-Broyl doiraviy orbita bo'ylab yadro atrofida harakatlanayotgan fazaviy to'lqinni ko'rib chiqdi. Agar orbita uzunligiga butun sondagi to'lqin uzunliklari joylashsa, u vaqtida yadroni aylanayotgan to'lqin har safar dastlabki

fazasi va amplitudasi bilan oldingi holatiga qaytadi. Doiraviy orbitaning har bir nuqtasida doimiy tebranish hosil bo'ladi (3.3-rasm), bunda holda nurlanish bo'lmaydi. Bunday orbita statsionar bo'ladi. Agar yuqorida aytilan shart bajarilmasa, yadro atrofini aylanayotgan to'lqinning fazasi va amplitudasi dastlabki qiymatini ola olmaydi, statsionar holat hosil bo'lmaydi. Ushbu mulohazalarga asosan de-Broyl orbitalarning statsionar bo'lishi shartini yoki kvantlash qoidasini quyidagicha ifodaladi:

$$2\pi R/\lambda = n \text{ yoki } 2\pi R = n\lambda, \quad (3.21)$$


bunda:  $R$  – doiraviy orbita radiusi,  $n$  – butun son (bosh kvant soni).  $\lambda = h/P = 2\pi\hbar/P$  ekanligi va elektronning harakat miqdori momenti  $L = RP$  ( $P = m\mathbf{v}$ ) hisobga olinsa,

$$L = n\hbar \quad (3.22)$$

ifoda hosil bo'ladi. (3.22) ifoda elektron orbitalarining statsionarlik sharti yoki kvantlash qoidasi deyiladi. Bu ifoda Borning kvantlash sharti bilan mos keladi. Shunday qilib, (3.21) ifodaga asosan elektron orbitasi uzunligiga butun sondagi to'lqin uzunliklari joylashsa, de-Broyl statsionar orbitalari hosil bo'ladi va nurlanish bo'lmaydi.

De-Broyl mulohazalarida to'lqin fazoda tarqalmaydi, balki elektronning statsionar orbitasi uzunligi bo'ylab tarqaladi Bunday ideallashtirish geometrik optikaga to'g'ri keladi. Bu yaqinlashish to'lqin uzunligi elektron orbitasi radiusiga nisbatan kichik bo'lган hollarda, ya'ni  $n$  kvant sonining katta qiymatlarida to'g'ri bo'ladi. Bu holda kvantlash masalasi asosiy bo'lmay qoladi. Bunday holda kvantlash masalasini hal qilish uchun geometrik optikani to'lqin bilan almashtirish kerak bo'ladi. Bu vazifani Shredinger bajardi.

**Mikrozarralarning De-Broyl to'lqin uzunliklari.** U potensiallar farqi bilan tezlashtirilgan elektronlar uchun impuls  $P = \sqrt{2m_e e U}$  formula orqali aniqlanadi. U holda elektron uchun de-Broyl to'lqin uzunligi  $\lambda_c$ ,  $\lambda = h/P$  formulaga asosan quyidagicha aniqlanadi:



3.3-rasm

$$\lambda_e = h / \sqrt{2m_e e U}, \quad (3.23)$$

yoki

$$\lambda_e = \frac{2\pi\hbar c}{\sqrt{2m_e c^2 e U}}, \quad (3.23a)$$

bunda  $m_e c^2 = 511003$  eV,  $hc = 1,2399 \cdot 10^{-4}$  eV · sm. U vaqtida elektron uchun de-Broyl to'lqin uzunligini hisoblashning quyidagi amaliy formulasi hosil bo'ladi:

$$\lambda_e = \sqrt{\frac{150,42}{U_{(B)}}} \cdot 10^{-8} \text{sm} = \frac{1,2264}{\sqrt{U_{(B)}}} \text{nm}. \quad (3.24)$$

(3.23a) formulaga son qiymatlarini qo'yib,  $\lambda_e$  hisoblash mumkin:

$$\begin{aligned} \lambda_e &= \frac{2 \cdot 3,14 \cdot 1,05 \cdot 10^{-27} \text{erg} \cdot \text{s} \cdot 3 \cdot 10^{10} \text{sm} \cdot \text{s}^{-1}}{\sqrt{2 \cdot 5 \cdot 10^5 \text{eV} \cdot 50 \text{eV} \cdot 1,6 \cdot 10^{-12} \text{erg} \cdot \text{eV}^{-1}}} = \\ &= 1,6 \cdot 10^{-8} \text{sm} = 1,6 \text{\AA} = 0,16 \text{nm} \end{aligned}$$

Proton uchun de-Broyl to'lqin uzunligini hisoblash formulasi:

$$\lambda_e = \frac{0,02862}{\sqrt{U_{(B)}}} \text{nm}. \quad (3.25)$$

Geliy atomi uchun de-Broyl to'lqin uzunligini hisoblash formulasi:

$$\lambda_{He} = \frac{1,26}{\sqrt{T}} \text{nm}, \quad (3.26)$$

bunda  $T$  – absolut temperatura ( $m_{He} = 6,7 \cdot 10^{-24}$  g.).

Issiq neytronlar uchun de-Broyl to'lqin uzunligi:

$$\lambda_e = \frac{2,52}{\sqrt{T}} \text{nm}. \quad (3.27)$$

Vodorod molekulasi uchun de-Broyl to'lqin uzunligini hisoblash formulasi:

$$\lambda_{H_2} = \frac{1,78}{\sqrt{T}} \text{nm}. \quad (3.27a)$$

Bu formulalardan ko‘rinadiki,  $100\text{--}10000 V$  potensialgacha tezlashtirilgan elektronlar va uy temperaturasidagi geliy atomi, vodorod molekulasi, issiq neytronlar va boshqa yengil zarralar uchun de-Broyl to‘lqin uzunligi tartibi, yumshoq rentgen nurlari to‘lqin uzunligi tartibidadir.

### 3.4-§. De-Broyl gipotezasining tajribada tasdiqlanishi

Zarralarning de-Broyl to‘lqin uzunligi juda kichikdir. Energiyasи bir necha elektronvolt bo‘lgan elektronlar uchun de-Broyl to‘lqin uzunligi  $1 nm$  ga teng. Bu esa kristallarda atomlar orasidagi masofa bilan bir xildir. Shuning uchun elektronlarning to‘lqin xossasini ularning kristallarda difraksiya, interferensiya hodisalarini hosil qilishlarida kuzatish mumkin. De-Broyl gipotezasi bunday tajribalar orqali tez orada tasdiqlandi. 1927-yilda Nyu-Yorkda K.Devidson va L.Jermer, Aberdinda (Shotlandiya) P.Tomson va Rossiyada P.S. Tartakovskiylar tomonidan bir vaqtida tajribalar o‘tkazildi. Bunday tajribalar 1949-yilda V.Fabrikant, L.Biberman va N.Sushkinlar tomonidan ham o‘tkazildi. O‘tkazilgan tajribalar faqat elektronlarga emas, balki har qanday moddiy zarralar, ya’ni atomlar, molekulalar, proton, neytronlar ham to‘lqin xossasiga ega ekanligini ko‘rsatdi.

Zaryadi  $e$  va massassi  $m$  bo‘lgan tinch holatdagi zarra  $U$  potensiallar farqini o‘tganda,  $\theta$  tezlikka ega bo‘ladi.  $\theta$  tezlikni morelyativistik  $\theta \ll c$  holat uchun energiyaning saqlanish qonuni usosida quyidagi ifodadan aniqlash mumkin:

$$\frac{1}{2}m\theta^2 = eU.$$

Bundan


$$\theta = \sqrt{\frac{2eU}{m}}.$$

De-Broyl to‘lqin uzunligi

$$\lambda = \frac{2\pi\hbar}{\sqrt{2emU}},$$

Bu formulalarda elektronning zaryadi  $e = 1,6 \cdot 10^{-19}$  KI, massasi  $m = 9,11 \cdot 10^{-31}$  kg,  $\lambda = \sqrt{\frac{150}{U}} \cdot 10^{-10}$  m =  $\frac{1,2}{\sqrt{U}}$  nm. Bu formuladan ko‘rinadiki, elektron energiyasi bir necha elektron-volt bo‘lganda de-Broyl to‘lqin uzunligi 1 nm tartibda bo‘ladi. Shuning uchun bunday energiyali elektronlarning to‘lqin xossasini ularning kristallarda difraksiyasini kuzatish tajribalarida aniqlash mumkin.


### 3.4.1. Devisson va Jermer tajribalari



3.4-rasm

Zarralarning to‘lqin xususiyati yaqqol namoyon bo‘ladigan tajribalar Devisson va Jermer tomonidan o‘tkazilgan. Bu tajribalarda nikel monokristallidan qaytgan elektronlar dastasining difraksiyasi kuatilgan. Devisson va Jermer tajribalari sxemasi 3.4-rasmda keltirilgan. Elektron pushkada qizdirilgan A simdan chiqayotgan elektronlar dastasi A va B elektrodlar orasiga qo‘yilgan U potensiallar farqida tezlatiladi. B elektrod tirkishidan o‘tgan elektronlar C nikel monokristalliga tushadi va unda sochiladi. Sochilgan elektronlarning intensivligi G galvanometr yordamida o‘lchanadi. Birinchi tajribada nikel monokristalliga energiyasi bir necha o‘n elektronvolt bo‘lgan elektronlar yo‘naltiriladi, so‘ng elektronlarning kristall sirtiga tushish burchagini o‘zgartirib, kristalldan qaytgan elektronlar dastasi intensivligining o‘zgarishi qayd qilinadi. Qaytgan elektronlar dastasi intensivligining sirpanish burchagi  $\alpha$  ga bog‘liqligi 3.5-rasmda tasvirlangan. Rasmdagi diagrammada qaytgan elektronlar

larning intensivligi  $G$  galvanometr yordamida o‘lchanadi. Birinchi tajribada nikel monokristalliga energiyasi bir necha o‘n elektronvolt bo‘lgan elektronlar yo‘naltiriladi, so‘ng elektronlarning kristall sirtiga tushish burchagini o‘zgartirib, kristalldan qaytgan elektronlar dastasi intensivligining o‘zgarishi qayd qilinadi. Qaytgan elektronlar dastasi intensivligining sirpanish burchagi  $\alpha$  ga bog‘liqligi 3.5-rasmda tasvirlangan. Rasmdagi diagrammada qaytgan elektronlar



3.5-rasm


intensivligining maksimumi  $\alpha_0$  burchakka to‘g‘ri kelishi ko‘rsatilgan (elektronlar parallel tekisliklardan qaytganda sirpanish burchagi).

$\alpha = \frac{\pi}{2} - \theta$  ifodaga teng bo‘ladi,  $\theta$  – elektronlarning kristall sirtiga tushish burchagi).

Ikkinci tajribada elektronlarning nikel monokristalli sirtiga tushish burchagini o‘zgartirmasdan kristalldan qaytgan elektronlar dastasi intensivligi tushayotgan elektronlar energiyasiga (ya’ni tezlatuvchi potensiallar farqini o‘zgartirib turgan holda) bog‘liq ravishda o‘lchandi. Kristalldan qaytgan elektronlar dastasining intensivligi galvanometr ko‘rsatgan tok kuchiga qarab o‘lchangan. Tajriba natijalari 3.6-rasmida diagrammada keltirilgan. Bu diagrammada egri chiziqlar elektronlarning sochilishida intensivliklarining taqsimlanishini ko‘rsatadi. Absissa o‘qiga ning qiymatlari, ordinata o‘qiga sochilgan elektronlarning nisbiy intensivliklari qiymatlari qo‘yilgan.

Devisson va Jermer tomonidan 1927-yilda o‘tkazilgan bunday tajribalar natijalari elektronlar to‘lqin xossalaringin namoyon bo‘lishi sisatida tushuntirildi va bu natijalar de-Broly formulasining to‘g‘riligini miqdoriy tasdiqladi.

Elektron to‘lqinlarining difraksiyasini nazariy tahlil qilinganda, elektronlar difraksiyasini rentgen nurlarining difraksiyasini bilan mos kelishi aniqlangan. Devisson va Jermer tajribalarida elektron-to‘lqinlar difraksiyasini Bregg usulidan foydalanib kuzatilgan.



3.6-rasm

## Kristalldan qaytgan elektronlarning to'lqin uzunligi

$$\lambda = \frac{2\pi\hbar}{\sqrt{2meU}} \quad (3.28)$$

formula orqali hisoblanadi. Bu formulada  $m = 9,11 \cdot 10^{-31}$  kg – elektron massasi,  $e=1,6 \cdot 10^{-19}$  Kulon – elektron zaryadi,

$\hbar = \frac{\hbar}{2\pi} = 1,05 \cdot 10^{-34}$  J·s,  $U$  – elektronlarni tezlatuvchi potensiallar farqi. Bunday kattaliklarni (3.28) formulaga qo'yib hisoblaganda, formula quyidagi ko'rinishda yozilishi mumkin:

$$\lambda = \left( \frac{1,226}{\sqrt{U}} \right) \text{nm.} \quad (3.28a)$$

Kristalldan qaytgan elektronlar dastasi intensivligining maksimumi kuzatiladigan burchak Vulf-Bregg formulasidan aniqlanadi. Formuladan aniqlangan burchakni tajribada maksimum kuzatilgan  $\alpha_0$  burchak qiymati bilan taqqoslash de-Broyl formulasini tajriba natijalari bilan taqqoslashga imkon beradi. De-Broyl formulasini tajriba natijalarida to'liq tasdiqlangan.

Yuqorida qaralgan ikkinchi tajribada siljish burchagi  $\alpha$  o'zgarmas bo'lganda qaytgan elektronlar intensivliklari maksimumlari:

$$n\lambda = 2ds\sin\alpha \quad (n=1,2,3,\dots), \quad (3.29)$$

shart bajarilganda kuzatiladi. (3.29) formulada  $\alpha$  – siljish burchagi,  $d$  – kristallda atom tekisliklari orasidagi masofa,  $n$  – kristalldan qaytgan elektronlar intensivliklari maksimumlarining tartib raqami,  $\lambda$  – qaytgan elektronlar dastasining de-Broyl to'lqin uzunligi. Nikel kristalli uchun  $d$  ning qiymati rentgen nurlarining difraksiyasini kuzatish tajribalaridan aniqlanadi. (3.28) formula hisobga olinganda (3.29) dan potensiallar farqi uchun quyidagi ifodani yozish mumkin bo'ladi:

$$\sqrt{U} = \left( \frac{n\pi}{d\sin\alpha} \right) \frac{1}{\sqrt{2em}} \cdot n = \text{const} \cdot n. \quad (3.30)$$

(3.30) formuladan ko'rindiki, qaytgan elektronlar intensivliklarining maksimumlari bir-biridan potensiallar farqining bir xil  $\sqrt{U}$  qiymatlarida hosil bo'ladi, ya'ni maksimumlar oralig'i bir xil bo'lib,

$\sqrt{U}$  ga teng. Maksimumlarning bir xil oraliqda hosil bo'lishi elektronlarning sochilib qaytishini to'lqin manzarasi to'g'ri ifodalashini ko'rsatadi. (3.30) formuladagi bog'lanish tajribada tasdiqlanadi. 3.6-rasmda keltirilgan diagrammada (3.30) formula orqali nazariy hisoblashlardan hosil qilingan maksimumlar vaziyati strelkalar bilan ko'rsatilgan, tajribada hosil qilingan maksimumlar vaziyati esa to'lqin manzaradagi maksimumlar shaklida tasvirlangan. Nazariy hisoblashlardan hosil qilingan maksimumlarning vaziyati  $n$  ning katta qiymatlarida ( $n = 6, 7, 8, \dots$ ) tajribada kuzatilgan maksimumlar vaziyatiga mos keladi.  $n$  ning kichik qiymatlarida esa nazariy va tajribaviy maksimumlar vaziyatlari bir-biridan farq qiladi. Lekin elektronlar energiyasi ortib borishi bilan bu farq kamayib boradi. Tajribaviy va nazariy maksimumlar orasidagi farqning sababi Bete tomonidan tushuntirildi.

Bete kristallarda de-Broyl elektron to'lqinlari uchun sindirish ko'rsatgichini hisobga olish kerakligini ko'rsatdi. Buni quyidagicha tushuntirdi. Metallning kristall panjarasidagi musbat zaryadli ionlar va manfiy zaryadli elektronlar oralig'i fazaviy mos kelmaydi. Shuning uchun metallda elektr maydoni mavjud bo'lib, uning potensiali davriy ravishda o'zgarib turadi. Butun fazo uchun bu potensialning o'rtachasini  $U_0$  bilan belgilash mumkin. Bunday o'rtacha potensial metallning ichki potensiali deyiladi.

Agar tashqi fazo potensiali nolga teng deb qaralsa, elektronlar metall ichkarisida ushlanib turishi uchun  $U_0$  kattalik musbat bo'lishi kerak. Haqiqatdan ham bunday holda metall ichkarisida elektronning potensial energiyasi manfiy bo'ladi, bunda elektron xuddi chuqurligi  $U_0$  bo'lgan potensial chuqurlikda bo'lgandek bo'ladi. Shunday qilib, tezlatilgan elektronning vakuumdan metallga o'tishida sindirish ko'rsatgichining ortishi ichki potensialning mavjudligi orqali tushun-tiriladi. Elektron tashqaridan metallga tushayotgan bo'lsin. Agar elektronni tezlatayotgan potensial  $U$  bo'lsa, elektronning tezligi

$\propto \sqrt{U}$  bo'ladi. Metall ichkarisida elektronning tezligi metallning ichki potensiali  $U_0$  ning ta'sirida ortadi, ya'ni  $\vartheta_2 \sim \sqrt{U + U_0}$  bo'ladi. Shuning uchun metallga kirishda elektronning trayektoriyasi va u'llan bog'liq bo'lgan de-Broyl to'lqinlari sinadi. Bunday jarayon

uchun metallning nisbiy sindirish ko'rsatgichi quyidagicha ifodalanadi:

$$n_{21} = \frac{\vartheta_2}{\vartheta_1} = \sqrt{1 + \frac{U_0}{U}}, \quad (3.30a)$$

bunda  $\vartheta_2$  – elektronning metalldagi tezligi,  $\vartheta_1$  – elektronning vakuumdagi tezligi,  $n_{21}$  – elektron to'lqinlarining sindirish ko'rsatgichi.  $n_{21}=n$  deb belgilab olamiz. De-Broyl elektron to'lqinlarining metall sirtiga tushishida sinishini hisobga olgan holda Vulf-Bregg formulasi (3.29) quyidagi ko'rinishda yozilishi mumkin:

$$2dn \cos \varphi = m\lambda. \quad (3.30b)$$

(3.30b) formulada  $\varphi$  – sinish burchagi,  $\lambda$  – elektronlarning metalldan tashqaridagi to'lqin uzunligi,  $m$  – butun son ( $m=1,2,3,\dots$ ) maksimumlar tartibi.

$$\cos \varphi = \sqrt{1 - \sin^2 \varphi} = \sqrt{1 - \sin^2 \frac{\theta}{n^2}}$$

ekanligini hisobga olgan holda (3.30b) formulani tushish burchagi  $\theta$  orqali ifodalash mumkin, ya'ni

$$2d\sqrt{n^2 - \sin^2 \theta} = m\lambda, \quad (3.30d)$$

$\sin \theta = \cos \alpha$  ( $\alpha$  – siljish burchagi) bo'lganligi uchun (3.30d) shartni quyidagi ko'rinishda yozish mumkin:

$$2d\sqrt{n^2 - \cos^2 \alpha} = m\lambda. \quad (3.30e)$$

Bayon qilingan tushunchalarning to'g'riligi hisoblashlar orqali tasdiqlangan. Tajribada siljish burchagi  $\alpha$  ning ma'lum qiymatida tezlatuvchi potensiallar farqining  $m=3,4,5$  tartibdagи maksimumlar hosil bo'ladigan qiymati o'lchanadi. (3.28a) formula orqali bu maksimumlarga to'g'ri keladigan de-Broyl to'lqin uzunliklari hisoblanadi. (3.30 e) formuladan foydalaniib,  $n$  – sindirish ko'rsatgichi topiladi, (3.30a) formula orqali metallning ichki potensiali  $U_0$  aniqlanadi.  $U_0$  faqat metall tabiatiga bog'liqligi aniqlangan. Nikel metalli uchun  $U_0 \approx 5$  V. Boshqa metallar uchun ham ichki potensial shu qiymat atrofida ekanligi ko'satilgan.

### 3.4.2. Tomson va Tartakovskiy tajribalari


Elektronlar difraksiyasini kuzatish uchun Tomson va Tarta-kovskiylar Debay-Sherer usulidan foydalandilar. Bunda elektronlar dastasi polikristall metall plastinkadan o'tkazilganda sochilgan elektronlar fotoplastinkada difraksion xalqalarini hosil qilishi kerak.

Tomson va Tarta-kovskiy tajribalarida haqiqatdan ham difraksion xalqalar tizimi kuzatildi. 1927-yilda D.P.Tomson tajribani o'tkazishda energiyasi ( $17,5 - 56,5$ ) keV bo'lgan tez elektronlardan foydalandi. Tomson tajribasi sxemasi 3.7-rasmda keltirilgan. Energiyasi  $10^4$  eV bo'lgan elektronlarning parallel dastasi qalinligi  $10^{-3}$  sm bo'lgan oltin folgaga yo'naltirildi. Bunda Tomson ekranda bir qator difraksion xalqalar hosil bo'lishini kuzatadi. Elektronlarning sochilish burchaklari  $\theta_1, \theta_2, \theta_3$  yorug'lik nurlari difraksiyasining tenglamasi


$$n\lambda = ds \sin \theta, \quad (n = 1, 2, 3, \dots) \quad (3.31)$$

orqali aniqlanadigan burchaklarga to'g'ri keladi.  $\theta$  – tushayotgan elektronlar dastasi bilan difraksiyalangan elektronlar dastasi yo'nalishlari orasidagi burchak. Tomson tajribasida elektronlarning kuzatilgan difraksiyasi, ularning to'lqin yossasiga ega ekanligini tasdiqladi.

P.S. Tartakovskiy energiyasi  $1,7$  keV gacha bo'lgan sekin elektronlar bilan tajriba o'tkazdi. Tartakovskiy tajribasining sxemasi 3.8-rasmda tasvirlangan. Elektronlar dastasi 1 yupqa polikristall metall varag'iga 2 yo'naltiriladi. Difraksiyalangan elektronlar dastalari 3 fotoplastinkada o'z izarini qoldiradi. Bunda hosil bo'lgan elektronogramma 3.9-rasmda keltirilgan. Elektronogrammada ma'lum qonuniyat asosida navbat bilan joylashgan konsentrik aylanalarni ko'rish mumkin.



3.7-rasm



3.8-rasm



3.9-rasm

Elektronlar dastasi kuchli qaytadi. Tajriba sharoitida  $d$  va  $\lambda$  lar doimiy bo'lib, elektronlar qaytishi (3.31) shartni qanoatlantirgan  $\theta$  burchakda bo'ladi. Difraksiyon halqalarning har bir nuqtasiga bir xil sondagi elektronlar kelib tushadi. Har bir halqa, halqa uzunligi bo'yicha o'z intensivligiga ega. Elektronogrammada difraksiyon halqlar hosil bo'lishi, halqlar joylashishini tahlil qilish de-Broyl gipotezasining to'g'riligini tasdiqladi.

De-Broyl gipotezasi elektronlardan tashqari, neytronlar, protonlar, atom va molekulalar uchun ham to'g'ri bo'ladi. 1929-yilda Shtern va Frishlar tomonidan geliy atomlari (difraksiyasi kuzatildi), 1931-yilda Jonson tomonidan molekulalar difraksiyalari kuzatildi. 1936-yilda magniy monokristalida neytronlar difraksiyasi hosil qilindi. Shunday qilib, ko'pchilik olimlar tomonidan o'tkazilgan tajribalarda de-Broyl gipotezasi tasdiqlandi. Shu bilan birga bu gipotezaning barcha moddiy zarralar ( $e$ ,  $p$ ,  $n$ , atom, molekula) uchun to'g'ri ekanligi isbotlandi.

### 3.5-§. De-Broyl to'lqinlarining statistik talqini

Ma'lumki, zarralarni to'lqin paketlar sifatida tekshirish muvafiqiyatsizlikka duch kelgan edi. Paketlar yoyiladi va yo'qolib ketadi, *zarralar* bunday xossaga ega emas. Mikroskopik zarralarni to'lqin paketlar sifatida qarash mumkin emasligini bildiruvchi mulohazalar ham mavjud. Elementar zarralarning zaruriy belgisi ularning bo'linmasligidir.

Manfiy elektr elektronlardan iborat deb qaralishining sababi zaryadlanish va razryadlanish jarayonida bir elektron yoki bir nechta elektron zaryadiga teng elektr miqdori uzatilishi mumkin. Xuddi shunday fotoeffekt qonunlarini tahlil qilish fotonlarning mavjudligini ko'rsatadi, chunki  $v$  chastotali monoxromatik yorug'lik energiyasi fotonlarning ulushlari shaklida emas, balki faqat energiyasi  $hv$  bo'lgan butun fotonlar sifatida tashishi va yorug'lik energiyasining yutilishida ham  $hv$  energiyali butun fotonlar shaklida yutilishi ma'lum. Bunday hol zarralarning bo'linmasligini ko'rsatadi.


To'lqinlar bunday bo'linmaslik xossasiga ega emas. To'lqin turli fazaviy tezlikli ikki muhit chegarasida qaytgan va singan to'lqinlarga ajraladi, kristall orqali o'tganda esa qator difraksiyon dastalarga ajraladi.

Agar elektronni to'lqinlar to'plami deb qaraganimizda edi, u holda, masalan, elektronlar kristall orqali birin-ketin o'tadigan juda kuchsiz dastaning difraksiyasida har bir difraksion dasta faqat elektron bo'lagini olib yurishi kerak edi, haqiqatda esa bunday bo'lmaydi.

Agar qaytish, sinish, difraksiya kabi jarayonlarda zarralarning butunligi saqlansa, u holda ikki muhitning chegara sirtiga tushgan surʼa qaytadi yoki ikkinchi muhitga o'tadi. Ammo bunday holda to'lqinlar va zarralar orasidagi bog'lanish faqat statistik ravishda quyidagicha talqin qilinadi: to'lqin intensivligining o'chovi bo'lgan amplituda kvadratining ma'lum bir joydagi qiymati zarraning shu joyda topilish ehtimolyatining o'chovi bo'ladi.

Buni tushuntirish uchun quyidagi interferension tajribani ko'rib chiqish mumkin.  $S_1$  va  $S_2$  ikkita tirkishli tiniqmas /ekranga yassi to'lqin tushadi (3.10-rasm). Bunday holda yetarlicha uzoqdagi sezgir II ekranda yorug' va qorong'i yo'llar ketma-ketligidan iborat interferension manzara hosil bo'ladi. Bunday manzara to'lqin nuqtai nazaridan tushuntirilishi kerak: chapdan ekran I ga yassi to'lqin tushishini tasavvur qilish kerak,  $S_1$  va  $S_2$  tirkishlar bu holda ekrandan o'ng tomonda

turqaluvchi va o'zaro interferensiyalanuvchi ikkita sferik Gyugens to'lqinlarining markazlari bo'lib qoladi. Ekran II (fotoplastinka)ning bu to'lqinlar yo'llari farqi ( $r_2 - r_1$ ) nolga yoki just sondagi yarim to'lqin uzunlikka teng bo'ladigan joyida ampli-tudaning maksimumi, yu'ni yorug' yo'llar maksimumi hosil bo'ladi. To'lqinlar yo'llari farqi ( $r_2 - r_1$ ) toq sondagi yarim to'lqin uzunlikka teng bo'lgan joyda to'lqinlar interferensiyalashganda bir-birini so'ndiradi, amplituda nolga teng bo'lib, qorong'i yo'llar hosil bo'ladi. Elektronlar bo'linmas zarralar deb qaralganda, bu yorug' yo'llar hosil bo'lishini qanday tushunish mumkin? Tushadigan elektronlar dastasi juda zaif deb tasavvur qilinsa, tajriba natijalari interferension manzara xarakterining intensivlikka bog'liq bo'lmasligini ko'rsatadi. Fotoplastinka yurim elektronlar tushishini qayd qiladi, deb faraz qilinganda,



3.10-rasm

elektronlarning zaif dastasi / ekran orqali o'tganda fotoplastinkada dastlab tartibsiz joylashgan ayrim qorong'i nuqtalar — elektronlarning urilish izlari paydo bo'lishi kerak. Elektronlar urilishi sonining interferension manzara maksimumlari bo'ladigan joylarda ko'proq bo'lishligini payqash mumkin. Tajriba uzoq vaqt davom ettirilganda, bu ayrim izlar interferension yo'llarni tashkil qilishi kerak. Shunday qilib, yorug' interferension yo'llar — elektronlar ko'proq tushadigan joylardir, qorong'i yo'llar esa elektronlar umuman tushmaydigan joylardir.

Endi ko'p sondagi elektronlar to'dasi emas, balki ayrim elektronlar qaralsa, u holda elektronning topilish ehtimolligi to'lqin maydoni amplitudasi maksimum bo'lgan joyda maksimal bo'ladi, amplituda nolga teng bo'lgan joyda ehtimoliyat ham nolga teng bo'ladi. Ammo amplitudaning musbat ham, manfiy ham bo'la olishligi, ehtimollikning esa hamma vaqt musbat son bo'lishligi sababli ehtimollik amplituda kvadrati orqali ifodalanadi. De-Broyl to'lqinlarini shunday statistik talqin qilib, to'lqin paketlarni qulay tahlil usuli sifatida saqlash mumkin. Fazoning elektron biror muayyan paytda turgan joyini egallaydigan to'lqin paket tuzib, uni o'z holiga qo'yish mumkin. Paketning biror keyingi  $t$  paytdagi shakli topilsa, u yoki bu joydagи uning amplitudasi kvadrati elektronni shu joyda  $t$  vaqtda topilish ehtimolligiga proporsional bo'ladi.

Demak, zarralar ayrim hodisalarda to'lqin xususiyatini, ayrim hodisalarda esa zarra xususiyatini namoyon qiladigan materiyadir. Lekin klassik ma'noda to'lqin ham emas, zarra ham emas.

### **3.6-§. Noaniqlik munosabatlari**

De-Broyl to'lqinlarining yuqorida qarab chiqilgan statistik talqini nazariy yo'l bilan olingen natijalarni tajribada olingen ma'lumotlar bilan bog'lashga imkon beradi. Bu yerda asosiy masala tajribadan olingen natijalarni tushuntirish uchun goh zarralar manzarasidan, goh to'lqinlar manzarasidan foydalanishga to'g'ri kelishidadir. Bir xil namunalarning o'zi Vilson kamerasi bilan o'tkazilgan tajribada keskin chegarali izlar qoldiradi, ya'ni o'zlarini trayektoriyalar bo'yicha harakatlanuvchi snaryadlar singari tutadi, kristall varaqlari orqali o'tish tajribalarida esa ekranda yorug' va qorong'i halqlar

hosil qilib, interferensiya manzarasini beradi, ya'ni o'zlarini superpozitsiya prinsipiiga bo'yсинувчи то'lqinlar кabi tutadi. Biroq zarralar va to'lqinlarning xossalari bir-biridan keskin farq qiladi. Lekin elektronlar o'ziga xos yagona tabiatli bo'lganligi uchun ular zarra ham emas, to'lqin ham emas. Ularni ayrim hollarda to'lqin va ayrim hollarda zarralar manzarasi deb qaraladi. Shuning uchun klassik mexanikaning makrozarralarni xarakterlovchi tushunchalarini mikrozarralarga tatbiq qilishda qandaydir cheklashlar kiritilishi kerak.

Klassik mexanikada makrozarralar quyidagi asosiy xossalarga ega: har qanday zarra vaqtning istalgan paytida fazoda aniq joyni egallaydi va ma'lum impulsiga ega bo'ladi. Zarralar tizimining holati barcha koordinatalar va ularga mos barcha impulslar to'plami orqali xarakterlanadi. Mikrozarralarda to'lqin xossalaring mavjud bo'lishi mikrozarralar tizimi holatini bunday aniqlanish imkoniyatini cheklaydi. Bu cheklayarlarni ko'rib chiqaylik.

Faraz qilaylik, mikrozarraning  $x$  o'qidagi vaziyati biror  $Dx$  noaniqlik bilan ma'lum bo'lsin, binobarin, zarra qayerdadir  $x_0$  va  $x_0 + \Delta x$  oraliq'ida turadi deyish mumkin. Zarraning vaziyati biror  $Dx$  noaniqlik bilan ma'lum degan faktni to'lqin manzarada ko'rish mumkin. To'lqin funksiya amplitudasi taxminan  $\Delta x$  ga teng kesmadagina noldan farq qiladi deb qaraladi. Bunday funksiyani garmonik to'lqinlarni qo'shish yo'li bilan tuzish mumkin, lekin hosil bo'lgan to'lqin garmonik bo'lmaydi. Shuning uchun bu to'lqinni chastota  $v$  va to'lqin vektori  $k$  orqali ifodalab bo'lmaydi. Fazoda cheklangan to'lqin funksiya to'lqin paketdan iborat bo'lib, uni sinusoidal to'lqinlarni qo'shish yo'li bilan tuzish uchun qiymatlari  $\Delta k$  oraliqda uzlusiz o'zgaradigan to'lqin vektori  $k$  bo'lgan to'lqinlarni qo'shish lozim. To'lqin paketning  $\Delta x$  kengligi va  $\Delta k$  oraliq o'rtasida munosabat quyidagi shart bilan ifodalanadi:

$$\Delta x \cdot \Delta k \geq 1. \quad (3.35)$$

Bu tengsizliklikning ikkala tomonini Plank doimiysi  $h$  ga ko'paytirilsa va de-Broyl postulatiga asosan  $h k_x = P_x$  ekanligi hisobga olinsa

$$\Delta x \cdot \Delta P_x \geq h \quad (3.36)$$

ifoda hosil bo'ladi.  $\Delta x$  – zarra koordinatasini aniqlashdagi noaniqlik,  $\Delta P$  – zarra impulsini aniqlashdagi noaniqlik. (3.36) munosabat

*koordinata va impuls uchun Geyzenbergning noaniqlik munosabati deyiladi.* Klassik mexanika nuqtai nazaridan bu munosabat zarra holatini, ya’ni zarraning koordinatasi  $x$  va impulsi  $P$  ni aniqlashda mumkin bo’lgan  $\Delta x$  va  $\Delta P$  noaniqliklar chegarasini bildiradi. (3.36) ifoda mikrozarralar korpuskulyar xossasi bilan birga to’lqin xossasiga ham ega bo’lishligining matematik ifodasıdir. (3.36) ifoda mikrozarraning koordinatasi va impulsi bir vaqtida aniq qiymatlarga ega bo’la olmasligini ko’rsatadi, ya’ni  $\Delta x$  va  $\Delta P$  kattaliklar bir vaqtida nolga teng bo’la olmaydi.

Zarraning koordinatasi  $x$  qancha yuqori aniqlikda belgilangan bo’lsa, uning impulsi  $P_x$  shunchalik past aniqlikda belgilanadi va aksincha, ya’ni  $\Delta x=0$  bo’lganda  $\Delta P \rightarrow \infty$  va aksincha.

Zarraning koordinatasi  $x$  va impulsi  $P$  bir vaqtida yuqori aniqlikda aniqlanadigan holati tabiatda yo‘q. Noaniqlik munosabatlari 1927-yilda Geyzenberg tomonidan aniqlangan bo’lib, mikroolam qonuniyatlarini tushunishda va kvant mexanikasi yaratilishida muhim qadam bo’ldi.

Uch o’lchamli holatda klassik nuqtai nazardan zarra uchta koordinatalar  $x$ ,  $y$ ,  $z$  va ularga tegishli  $P_x$ ,  $P_y$ ,  $P_z$  impulslar bilan xarakterlanadi. Bunday holatda Geyzenberg noaniqlik munosabatlari koordinatadagi noaniqlik va impulsning shu koordinata o’qiga proyeksiyasidagi noaniqlik orasidagi bog’lanishni ifodalaydi, ya’ni:

$$\Delta x \cdot \Delta P_x \geq h; \quad \Delta y \cdot \Delta P_y \geq h; \quad \Delta z \cdot \Delta P_z \geq h. \quad (3.37)$$

Tajribalar ko’rsatadiki, kvant fizikasi sohasida olib boriladigan o’lchashlar klassik fizikadagi o’lchashlardan farq qiladi. Lekin har ikkala holatda ham o’lchash xatolari bo’ladi. Klassik fizika o’lchash usulini, texnikasini takomillashtirish bilan o’lchash xatolarini eng kichik qiymatga keltirish mumkin deb hisoblaydi. Aksincha, kvant fizikasiga asosan, o’lchash aniqligining muhim chegarasi bo’lishi kerak. Buni esa o’lchash usulining texnikasini takomillashtirish, yaxshilash bilan yo’qotib bo’lmaydi. Geyzenbergning noaniqlik munosabatlari esa ana shu aniqlik chegaralarini ko’rsatadi. Noaniqlik munosabatlaridan ayrim xulosalar kelib chiqadi:

1. Zarra to’liq ravishda tinch bo’ladigan holat bo’lishi mumkin emas. Klassik fizikada zarra impulsi  $P=m\mathbf{v}$  formula bilan aniqlanadi. Tezlik  $v$  ni topish uchun qiymatlari yaqin bo’lgan  $t_1$  va  $t_2$  vaqtlar

oraliqlarida zarraning  $x_1$  va  $x_2$  koordinatalari o'lchanadi va  $(x_1 - x_2)/(t - t_2)$  kattalik topiladi, chegaraviy o'tish  $t_1 \rightarrow t_2$  bajariladi. Bunday usulni mikrozarraning oniy tezligini aniqlashga qo'llash mumkin emas. Haqiqatdan ham, chegaraviy o'tish  $x_1$  va  $x_2$  larni aniq o'lchashni talab qiladi. Koordinatalarni aniq o'lchash esa zarralarning impulsini sezilarli darajada o'zgartiradi. Shuning uchun chegaraviy o'tish orqali zarraning biror holatida ham uning oniy tezligini topish mumkin emas.  $t_1$  va  $t_2$  vaqt oraliqlari ( $t_2 - t_1$ ) kattaroq qiymatda olinganda va  $x_1$  hamda  $x_2$  lar past oraliqda o'lchanganda, zarraning oniy tezligini topish mumkin bo'ladi. Bunday holda o'lchash xatolari zarra tezligining aniqlanishiga va  $(x_2 - x_1)/(t_2 - t_1)$  kasr qiymatiga kamroq ta'sir qiladi. Bunday yo'l bilan zarra tezligining haqiqiy qiymati aniqlanmay, balki uning  $(t_2 - t_1)$  vaqt oraliq'idagi o'rtacha qiymati topiladi. Mikrozarraning impulsini zarraning kinetik energiyasi orqali (masalan, elektr maydonida o'tadigan potensiallar farqi orqali) yoki difraksion qurilmada o'lchangan de-Broyl to'lqin uzunligi orqali aniqlash mumkin.

2. Kvant mexanikasida to'liq energiya  $E$  ning kinetik va potensial energiyalarga bo'linishi o'z ma'nosini yo'qotadi. Haqiqatdan ham, bu kattaliklardan biri impulsiga, ikkinchisi esa koordinataga bog'liq. Noaniqlik munosbatlariga asosan bunday o'zgaruvchi kattaliklar bir vaqtda aniq qiymatlarga ega bo'la olmaydi. To'liq energiya  $E$  kinetik va potensial energiyalarga bo'linmasdan, balki to'liq energiya sifatida o'lchanishi va aniqlanishi kerak.

3. Klassik nazariyada atom o'lchamini aniqlaydigan parametr yo'q edi. Aniqsizlik munosabatlari esa bunday parametrni aniqlashga imkon beradi. Misol tariqasida yadro zaryadi  $Ze$  bo'lgan vodorodsimon atomni qarash mumkin. Klassik nazariyaga asosan energiya suqlanish qonuni tenglamasi quyidagicha:

$$\frac{P^2}{2m} - \frac{Ze^2}{r} = \text{const.} \quad (3.38)$$

Agar elektron dastlab cheksizlikda tinch holatda bo'lsa, u vaqtida  $\text{const} = 0$ . Bu bilan  $P^2$  aniqlanadi, u vaqtda (3.38)dan:

$$P^2 r^2 = 2mZe^2 r. \quad (3.39)$$

Aniqsizlik munosabatlari quyidagi ko'rinishda yoziladi:

$$\bar{\Delta}x^2 \bar{\Delta}P^2 \geq h^2 / 4. \quad (3.40)$$

Har qanday holda ham  $\Delta r < r$ ,  $\Delta P < P$ , u vaqtida (3.40) ifodadan

$$P^2 r^2 > h^2 / 4. \quad (3.41)$$

(3.41)ni hisobga olgan holda (3.39)ni quyidagicha yozish mumkin:

$$2mZe^2 r > h^2 / 4, \quad (3.42)$$

bu ifodadan esa

$$r > \frac{1}{Z} \frac{h^2}{8me^2} = \frac{1}{Z} \cdot 0,66 \cdot 10^{-9} \text{ sm}. \quad (3.43)$$

(3.43) formula atom o'lchami tartibini to'g'ri aniqlaydi. Lekin aniqlashda koeffitsientning  $se^2$  qiymatiga ahamiyat bermaslik karak, chunki (3.43) formula faqat atom o'lchamini baholay oladi. Baholash shuni ko'rsatadiki, yadroning Kulon maydonida elektronning yadroga tushishi mumkin emas. Agar bunday baholashni atom yadrosi o'lchamini aniqlashga tatbiq qilinsa (3.43) formuladan  $m_e$  o'rniqa proton massasini qo'yish kerak. U vaqtida yadro radiusi uchun (3.43) ifodadagi qiymatdan 2000 marta kichik bo'lgan kattalik hosil bo'ladi (yadro o'lchami  $10^{-13}$  sm), bu esa yadro hosil bo'lishi uchun Kulon kuchlari yetarli bo'lmasligini ko'rsatadi. Yadro ichida kuchliroq bo'lgan yadro kuchlari ta'sir qilishi kerak, bu kuchlar Kulon kuchlaridan taqriban 2 tartibga kattadir.

(3.35) ifodadagi munosabatlar kabi to'lqin nazariyasida chastota va vaqt noaniqligi uchun

$$\Delta t \cdot \Delta \omega \geq 2\pi \quad (3.44)$$

munosabat chiqariladi. (3.44)ning ma'nosi shundan iboratki, vaqt bilan chegaralangan to'lqiniy jarayon monoxromatik bo'la olmaydi. Agar to'lqiniy jarayon  $\Delta t$  vaqtga cho'zilsa, chastota chetlanishi  $\Delta\omega$  (3.44) ifodani qanoatlantiradi. Shuning uchun monoxromatik jarayonni kuzatishga kichik  $\Delta t$  vaqt ajratilsa, jarayonning chastotasi (3.44) ifodani qanoatlantiradigan xato bilan topiladi. Agar chastota  $\omega$  ni  $\varepsilon = \hbar\omega$  formula orqali aniqlanadigan energiya bilan taqqoslansa, u vaqtida (3.44) formula quyidagi ko'rinishga keladi:

$$\Delta t \cdot \Delta \varepsilon \geq 2\pi\hbar = h. \quad (3.45)$$

(3.45) formula zarra energiyasi va energiyani o'lhash vaqt uchun Geyzenberg noaniqlik munosabatlari deyiladi. (3.45) munosabat zarra energiyasini  $\Delta E$  aniqlikda o'lhash uchun kamida  $\Delta t \sim \hbar / \Delta E$  vaqt o'tishini ko'rsatadi. Yoki boshqacha aytganda, agar tizim o'lhash jarayonida  $\Delta t$  vaqt davomida biror holatda mavjud bo'lsa, uning bu holatdagi energiyasi  $\Delta E \sim \hbar / \Delta t$  noaniqlik bilan o'lchanadi. (3.45) munosabatga asosan energiyani o'lhash uchun ketgan vaqt  $\Delta t$  kichik bo'lsa, energiyani o'lhashdagi noaniqlik  $\Delta E$  katta bo'ladi va aksincha.

Shunday qilib, ushbu bobda mikrozarralar tabiatini haqida bayon qilingan mulohazalardan quyidagicha xulosalar qilish mumkin:

1. Mikrozarraning holati de-Broyl yassi to'lqin funksiyasi ( $\psi$ -funksiya) bilan ifodalanadi. To'lqin funksiyasi amplitudasi modulining kvadrati  $|A|^2$  fazoning berilgan joyida zarraning topilish ehtimoliyatini ifodalaydi.
2. Mikrozarralar fazo bo'ylab «bo'yagan» deb tasavvur qilinadi.
3. Mikrozarralar aniq trayektoriyaga (klassik tushunchadagi) ega bo'lmaydi. Mikrozarralarda klassik zarralarning xarakteristikalari bo'lgan massa, zaryad, energiya tushunchalari saqlanadi.
4. Mikrodunyoning o'ziga xos xususiyati shundan iboratki, bunda tajriba yangicha tushuniladi. Mikrozarralar ustida o'tkazilgan tajriba mikrozarraning holatini o'zgartiradi. Zarraning tajriba o'tkazishgacha bo'lgan to'lqin funksiyasi, uning tajribadan keyingi to'lqin funksiyasidan farq qiladi.
5. Mikrozarraning  $\vartheta$  tezligi zarra holatini aniqlaydigan to'lqin-larning guruhiy tezligi  $\vartheta_g$  tezligi bilan mos keladi:  $\vartheta = \vartheta_g$ .
6. Mikrozarra bir vaqtning o'zida ham zarra, ham to'lqin xususiyatlarini mujassamlantirgan maxsus tabiatga ega bo'lgan materiyadir.
7. Mikrozarra klassik tasavvurlardagi zarraga ham, to'lqinga ham o'xshamaydi. Lekin ayrim hodisalarda (fotoeffekt, kompton effekti) zarra xususiyatini namoyon qiladi, ayrim hodisalarda esa (difraksiya, interferensiya) to'lqin xususiyatini namoyon qiladi.

8. Noaniqlik munosabatlari klassik mexanikadagi makrozarralar ni xarakterlaydigan tushunchalarni mikrozarralarga tatbiq qilish chegaralarini bildiradi.

9. Mikrozarraning impulsi va koordinatasini bir vaqtning o‘zida ixtiyoriy aniqlik bilan o‘lchash mumkin emas, mikrozarraning koordinatasi aniqroq o‘lchansa, uning impulsini kichikroq aniqlikda o‘lchash mumkin bo‘ladi. Bunda Plank doimiysi barcha fizik o‘lchamlarda chegaraviy faktor sifatida bo‘ladi.

### **Nazorat savollari**

1. Mikrozarralar holati qanday to‘qin funksiyasi bilan ifodalanadi?
2. De-Broyl gipotezasining mohiyati nima?
3. Mikrozarralarda klassik zarraning qaysi xarakteristikalari saqlanadi?
4. De-Broyl tenglamalarini tushuntiring.
5. Fazoning berilgan joyida mikrozarraning topilish ehtimoliyati qaysi kattalik bilan aniqlanadi?
6. Mikrozza qanday tezlik bilan harakatlanadi?
7. De-Broyl gipotezasi tasdiglanadigan tajribalarni tushuntiring?
8. Elektron, proton uchun de-Broyl to‘qin uzunliklari formulalarini yozing va tushuntiring.
9. Noaniqlik munosabati nima sababdan kiritilgan va uning mohiyati nima?
10. Impuls va koordinata uchun noaniqlik munosabati qaysi formula bilan ifodalanadi?
11. Energiya uchun noaniqlik munosabatini yozing va izohlang.

## **IV BOB** **ATOM TUZILISHINING MODELLARI.** **VODOROD ATOMINING BOR NAZARIYASI**

---

### **4.1-§. Atom tuzilishining modellari**

Qadimgi yunon faylasuflari Levkipp va Demokritlarning ta'limotiga asosan, atom – moddaning bo'linmas zarrasi bo'lib, sezgi organlar seza olmaydigan darajada kichik o'lchamga ega degan tasavvurlar fanda uzoq vaqtgacha hukm surdi. «Atom» so'zi grekcha «atomos» so'zidan olingan bo'lib, «bo'linmas» degan ma'noni bildiradi.


XIX asrning oxirlarida o'tkazilgan bir qator olamshumul tajribalar natijalari atomning murakkab tuzilishga ega ekanligi to'g'risidagi sikrlarni oydinlashtirdi.

XX asr boshlarida atomlarning mavjudligi, ularning o'lchami  $10^{-8}$  sm tartibda bo'lgan murakkab elektr tizimidan iboratligi, atomda musbat va manfiy zaryadlar mavjudligi, manfiy zaryadlarni tashuvchilar elektronlar ekanligi aniqlangan edi. Lekin musbat zaryadlarni tashuvchilar (protonlar) hali noaniq, musbat ionlar mavjudligi esa ma'lum edi. Kun tartibida atom tuzilishini aniqlash vazifasi turar edi. Atom tarkibidagi musbat va manfiy zaryadlar o'zaro kompensatsiyalanishi sababli atom bir butun holda neytraldir. Atom tuzilishining ikkita nazariy modeli mavjud edi. Birinchisi 1901-yilda J.Tomson tomonidan taklif qilingan. Bu modelga asosan atom musbat zaryadlangan sfera bo'lib, manfiy zaryadli elektronlar sfera hajmi bo'ylab taqsimlangan. Elektronlar musbat zaryadlangan sfera elementi bilan Kulon qonuni bo'yicha o'zaro ta'sirlashadi. Elektronlar o'z muvozanati atrofida tebranishida atom energiya nurlaydi. Ikkinci modelga asosan atom Quyosh tizimi tuzilishi singari tuzilgan. Bu atom tuzilishining planetar modeli edi. Planetar model to'g'risidagi dastlabki tasavvurlar 1903-yilda Kelvin va X. Nagaoka tomonidan aytildi. Bu modelga asosan atomning markazida musbat zaryadlangan yadro joylashgan bo'lib, uning atrofida elektronlar planetalar singari harakatlanadi. Elektronlar yadroning Kulon tortishish kuchlari orqali ushlab turiladi. Atomning turg'unligini

tushuntirishda bu har ikki nazariy model ham ma'lum qiyinchiliklarga uchradi. Atom tuzilishi haqiqatan ham qanday ekanligini bilish uchun tajribalar o'tkazish talab qilindi. Bunday tajribalar 1911-yilda ingлиз fizigi E. Rezerford tomonidan o'tkazildi. Atom tuzilishi to'g'risidagi tajribalarga batafsilroq to'xtaymiz.

#### 4.2-§. Atom tuzilishining Tomson modeli

1897-yilda J. Tomson tomonidan elektron kashf qilindi. 1901-yilda esa Tomson atom tuzilishining birinchi modelini taklif qildi. Tomson modeliga asosan atom musbat zaryadlangan sfera bo'lib, unda manfiy zaryadlangan elektronlar taqsimlangan. Sferaning yig'indi musbat zaryadi elektronlarning yig'indi manfiy zaryadiga teng bo'lib, atom sistemasi bir butun holda neytraldir.



4.1-rasm

Musbat zaryadlangan sferaning o'lchами butun atomning radiusi tartibida, ya'ni  $10^{-10} \text{ m}$ . Atomning nurlanishi elektronlarning muvozanat holatlari atrofida kichik tebranishlari natijasida hosil bo'ladi. Tomson modelida atomga tushgan  $\alpha$ -zarra juda kichik burchakka og'adi (4.1-rasm). Bu esa Tomson atomi ichkarisida elektr maydonining kuchsiz ekanligini ko'rsatadi. Bir tekis zaryadlangan sfera ichidagi maydon kuchlanganligi quyidagi formula orqali aniqlanadi:

$$E(r) = \frac{e}{R^3} r \quad (0 \leq r \leq R). \quad (4.1)$$

Bu formulada  $e$  – sfera zaryadi,  $R$  – uning radiusi,  $r$  – elektronning muvozanat holatdan chetlanishi. Muvozanat holatdan (sfera markazidan)  $r$  oraliqda turgan elektronga ta'sir etadigan kvazielastik kuch quyidagicha ifodalanadi:

$$f = (-e)E = -\frac{e^2}{R^3} r = -kr. \quad (4.2)$$

Biror yo'l bilan muvozanat holatdan chiqarilgan elektron

$$\omega = \sqrt{\frac{k}{m}} = \sqrt{\frac{e^2}{mR^3}} \quad (4.3)$$

chastota bilan tebranadi. (4.3) formulada  $m$  – elektron massasi,  $R$  – atom radiusi,  $e$  – elektron zaryadi. Tomson modelidan foydalanib, atom radiusi (o'lchami) aniqlangan. (4.3) formuladan:

$$R = \left( \frac{e^2}{m\omega^2} \right)^{1/3} \quad (4.4)$$

Spektrning ko'rindigan sohasida  $\lambda = 6 \cdot 10^{-5}$  sm to'lqin uzunligiga  $\omega = 3 \cdot 10^{15}$  s<sup>-1</sup> chastota mos keladi. U vaqtida (4.4) ga asosan atom radiusini hisoblash mumkin ( $e = 1,6 \cdot 10^{-19}$  KI,  $m = 9,11 \cdot 10^{-31}$  kg).

$$R = \left( \frac{2,56 \cdot 10^{-38}}{9,11 \cdot 10^{-31} \cdot 9 \cdot 10^{30}} \right)^{1/3} = 3 \cdot 10^{-10} \text{ m.}$$


$R$  ning bu qiymati atomning gazokinetik o'lchamiga to'g'ri keladi. Buni Tomson modelining tasdig'i ham deyish mumkin. Keyinchalik Tomson modelining yaroqsizligi aniqlandi. Tomson modeli hozirgi vaqtida atom tuzilishi haqidagi tasavvurlarning rivojlanish bosqichlaridan biri sifatida tarixiy ahamiyatga egadir.

### 4.3-§. Rezerford tajribalari

1911-yilda Tomsonning sobiq assistenti professor Ernest Rezerford o'zining shogirdlari Gans Geyger va Ernest Marsdenlar bilan alfa-zarralarning yupqa metall folgalarda sochilishi ustida bir qator tajribalar o'tkazdi. Bunday tajribalar atom tuzilishining Tomson modeli yaroqsiz ekanligini ko'rsatdi. Bu esa Rezerfordning atom tuzilishi to'g'risidagi faraziga asos bo'ldi: atom diametri juda kichik ( $10^{-14}$  m), atomning barcha musbat zaryadi va massasining katta qismi to'plangan yadrodan iborat bo'lib, yadro (yadro – «mag'iz» degan ma'noni bildiradi) manfiy zaryadlangan elektronlar buluti bilan o'ralgan. Atomning o'lchami  $10^{-10}$  m tartibidadir. Atomning neytralligi esa elektronlarning manfiy zaryadi yadroning musbat zaryadiga tenglididan kelib chiqadi. Alfa-zarralarning sochilishi ustida o'tkazilgan tajribalarda Rezerford yupqa oltin folgasini ( $Z=79$ )  $^{214}\text{Po}$

yemirilishida hosil bo'ladigan alfa-zarralar bilan bombardimon qildi. Folgadan o'tayotganda sochilgan alfa-zarralarning sochilish burchagini aniqlagan holda, alfa-zarrani sochayotgan nishon atomlarning (oltin atomlarining) tuzilishini aniqlash mumkin edi. Alfa-zarra geliy atomi yadrosi bo'lib, ikki proton va ikki neytrondan iborat. Rezerford va Tomas Royds 1909-yilda alfa-zarra zaryadi 2e ga teng ekanligini aniqlagan edilar. Rezerford o'z modeli va Tomson modeli asosida sochilish burchagi  $\theta$  ni nazariy hisobladi. Natijalarini tajriba natijalari bilan taqqosladi. Tomson modelida atomga tushgan alfa-zarra dastlabki yo'nalishidan ahamiyatsiz bo'lgan juda kichik burchakka og'adi, bu esa atom ichida elektr maydonining nisbatan kuchsiz ekanligini ko'rsatadi. Rezerford atomida alfa-zarralarning dastlabki yo'nalishidan og'ish burchagi kattaligi kuzatiladi. Buning sababi atomning barcha musbat zaryadi  $+Ze$  kichik hajmda — yadroda to'planganligidir.


Rezerford o'z tajribalarida radioaktiv poloniy-214 yemirilishida hosil bo'ladigan energiyasi 7,68 MeV bo'lgan alfa-zarralardan foydalandi. Alfa-zarralarning parallel dastasi vakuumda qalinligi  $6 \cdot 10^{-7}$  m bo'lgan oltin folgaga yo'naltirilgan va unda sochilishi kuzatilgan. Rezerford tajribasi sxemasi 4.2-rasmida keltirilgan. Alfa-zarralar manbayi (*S*) oldiga markazida tirqishi bo'lgan diafragma (*D*) qo'yilgan. Manbadan chiqqan alfa-zarralarning tirqishga tushganlari tirqishdan dasta ko'rinishida chiqib lyumi-nessensiyali ekranga (*LE*) tushadi. Ekran rux sulfidi (ZnS) bilan qoplangan. Ekranning har bir alfa-zarra kelib urilgan joyida yorug' dog'lar-chaqnashlar (ssintillyatsiya) hosil bo'lishi kuzatiladi. Bir sekundda ekranga tushayotgan alfa-zarralar soni juda ko'p bo'lganligi uchun ularning hosil qilgan yorug' dog'lari qo'shilib bir-birini qoplagan markaziy yorug' dog'ni hosil qiladi (4.2 a-rasm). Endi ekran oldiga qalinligi  $6 \cdot 10^{-7}$  m bo'lgan oltin folga (OF) joylashtiriladi (4.2 b-rasm). Alfa-zarralar oltin folgadan o'tib ekranga tushadi. Oltin folga bo'limganda ekranda hosil bo'lgan markaziy yorug' dog' intensivligi oz bo'lsada kamayadi. Ekranda alfa-zarralar dastasi hosil qilgan markaziy yorug' dog'dan tashqarida boshqa yorug' dog'lar ham hosil bo'ladi. Bu yorug' dog'larni oltin folgadan o'tayotganda o'z harakat yo'nalishini o'zgartirgan, ya'ni oltin folga atomlarida sochilgan alfa-zarralar hosil qiladi. Ekranda hosil bo'lgan



4.2-rasm

yorug‘ dog‘lar lupa yoki mikroskop (M) orqali kuzatiladi. Bu tajribada quyidagi hollar muhimdir: oltin atomining diametri  $3 \cdot 10^{-10}$  m, u vaqtida qalinligi  $6 \cdot 10^{-7}$  m bo‘lgan oltin folgada 3300 atom qatlami bo‘lib, bunda atomlar zich joylashadi. Shuning uchun alfa-zarralar oltin folgadan o‘tganda taqriban 3000 ta oltin atomlari bilan to‘qnashadi. Alfa-zarralarning ko‘pchilik qismi folgadan o‘tganda oltin atomlarida 1÷3 daraja bo‘lgan kichik burchaklarda sochilishi kuzatilgan. Lekin sochilgan alfa-zarralar orasida  $150^\circ$  burchakgacha yetadigan katta burchaklarda sochilgan alfa-zarralar mayjudligi ham aniqlangan. Bunday katta burchaklarda sochiladigan alfa-zarralar soni juda oz bo‘lgan. Masalan, folgaga tushgan 8000 ta alfa-zarradan faqat bitta alfa-zarra  $90^\circ$  dan katta burchakka sochilgan. Katta tezlikdagi alfa-zarrani katta burchakka og‘dirish uchun unga katta kuch bilan ta’sir qilish kerak. Rezerford tajribada kuzatilgan natijalardan quyidagi xulosaga keldi: har bir katta burchakka sochilish, bu qandaydir biror nuqtaviy kuch markazining unga yaqin masofada uchib o‘tayotgan alfa-zarra bilan yakka ta’sirlashuvi natijasidir. Bunday kuch markazi esa musbat

zaryadlangan atom yadrosi edi. Demak, atomga tushgan alfa-zarralarning atomda katta burchakka sochilishi atom ichida musbat zaryadning juda kichik hajmda to‘planganligini va uning kuchli elektr maydonini hosil qilishini ko‘rsatadi. Alfa-zarra o‘zi geliy atomi yadrosidir. Bu ikki yadro orasidagi elektrostatik o‘zaro ta’sirlashuv alfa-zarraning katta burchaklarda sochilishiga sabab bo‘ladi. Alfa-zarralarning o‘z harakati yo‘nalishidan og‘ishini (sochilishini) ularning Vilson kamerasidagi izlarining fotosuratlaridan ko‘rish mumkin (4.3-rasm).



4.3-rasm

Rasmda alfa-zarraning kisloroddagi izi tasvirlangan. Odatda alfa-zarralar izlarining oxiri bir-biridan farq qilmaydi. Lekin rasmdagi izlar orasida oxiri siniq yoki *vilka* ko‘rinishida bo‘lgan izlar ham kuzatiladi. Bu izlar alfa-zarralarning yadro bilan to‘qnashuvlari natijasida hosil bo‘lgan. To‘qnashish natijasida alfa-zarraning harakat yo‘nalishi keskin o‘zgargan va to‘qnashish tufayli harakatga kelgan yadro esa yangi iz qoldirgan, bu iz alfa-zarra izi bilan *vilka* hosil qilgan. Bu fotosurat katta og‘ish burchaklari yakka

to‘qnashish natijasida hosil bo‘lishini ko‘rsatadi. Atom ichida juda kichik hajmga ( $o‘lchami 10^{-13}$  sm) va katta massaga ega bo‘lgan musbat zaryad – yadro kuchli elektr maydonni hosil qiladi. Demak, atom ichida musbat zaryad kichik hajmga to‘plangan, bu hajm *yadro* deyiladi. Bu xulosa atom tuzilishining yadroviy modeli edi. Uchib kelayotgan alfa-zarralarning atom ichida yadro hosil qilgan kuchli elektr maydoniga tushganlari maydon ta’sirida o‘z yo‘nalishini o‘zgartiradi, ya’ni katta burchaklarda sochiladi. Agar musbat zaryad atomda katta hajmda taqsimlangan bo‘lganda, atom ichida kuchli elektr maydoni bo‘lmassdi. U vaqtida atomga tushgan alfa-zarralar o‘z yo‘nalishni o‘zgartirmay, sochilmay to‘g‘ri o‘tib ketgan bo‘lardi.

O‘tkazilgan tajribalarning natijalarini Rezerford quyidagicha tushuntirdi: atomning juda kichik hajmida musbat zaryad joylashgan, uning atrofidagi atomning barcha qismi esa manfiy zaryadli elektronlar bulutidan iborat bo‘lib, bu elektronlarning to‘liq manfiy zaryadi kichik hajmdagi musbat zaryadga miqdor jihatidan teng. O‘tkazilgan tajribalarning bunday natijalari Rezerford farazi-


ning to‘g‘riligini tasdiqladi. Bunday tajribalar, hisoblashlar natijasida atomning yadroviy modeli yaratildi. Bu model ko‘pincha planetar model deb yuritiladi, chunki atomning yadroviy model asosidagi tuzilishi Quyosh tizimi tuzilishiga o‘xshatiladi, ya’ni yadroni Quyoshga, elektronlar esa planetalarga o‘xshatiladi.

#### **4.4-§. Alfa-zarralarning sochilish nazariyasi. Rezerford formulasi**

Rezerford alfa-zarralar sochilishining miqdoriy nazariyasini ishlab chiqdi. Bu nazariyada alfa-zarraning yadro bilan o‘zaro ta’sirlashuvi Kulon qonuni asosida bo‘ladi. Alfa-zarra va u bilan ta’sirlashadigan yadro orasidagi o‘zaro ta’sir kuchi ular orasidagi masofaning kvadratiga teskari proporsional deb faraz qilinadi. Bu albatta gipoteza, chunki alfa-zarra yadroga  $10^{-12}$  sm masofada yaqinlasha oladi. Bunday masofalar uchun Kulon qonuni tajribada tekshirilmagan. Alfa-zarralarning yadro maydonidagi harakati Rezerford tomonidan klassik mexanika nuqtai nazaridan qaralgan. Sochadigan yadro massasi alfa-zarra massasiga nisbatan shunchalik katta deb faraz qilinadiki, yadroni qo‘zg‘almas deb qarash mumkin. Lekin haqiqatda yadro harakatsiz emas, shuning uchun alfa-zarra massasini keltirilgan massa bilan almashtirib, yadro harakatinini hisobga olish mumkin.

Rezerfordning ko‘rsatishi bo‘yicha,  $\alpha$ -zarraning atomda sochilishi uchun atom ichida kichik hajmga (radiusi 10–14 m) to‘plangan katta massa bilan bog‘liq bo‘lgan musbat zaryad hosil qilgan kuchli elektr maydoni bo‘lishi kerak. Bunday tasavvurlar asosida Rezerford  $\alpha$ -zarralar sochilishining miqdoriy nazariyasini rivojlantirdi.

Rezerford tajribasida qalnligi  $10^{-5}–10^{-4}$  sm bo‘lgan metall folgalari ishlatilgan. Bunday holda katta burchaklarda sochilishda alfa-zarralarning yadro bilan ko‘p marta to‘qnashishlarini hisobga olmaslik mumkin. Ikki va undan ko‘p marta to‘qnashishda katta burchaklarga sochilish ehtimoliyati juda kichik. Elektronlar massasi kichik bo‘lganligi tufayli alfa-zarralarning elektronlarda katta burchaklarda sochilish ehtimoliyati ham juda kichik. U vaqtida alfa-zarralarning faqat bitta yadro bilan o‘zaro ta’siri hisobga olinadi.



4.4-rasm

Alfa-zarra bitta yadro bilan o'zaro ta'sirlashib, boshqa yadrolardan uzoqdan uchib o'tadi. Alfa-zarralarning atom yadrosida sochilishi 4.4-rasmda tasvirlan-gan. Shunday qilib, Rezerford nazariyasi faqat bitta yadro elektr maydoni ta'sirida bo'ladigan katta burchakdagi sochilishlar uchun o'rinni bo'ladi. Bunday sochilish *Rezerford sochilishi* deyiladi. Bu sochilish elastik sochilish hisoblanadi, chunki sochilish natijasida alfa-zarraning kinetik energiyasi o'zgarmaydi. Yuqorida qaralgan masala Quyosh atrofida planetalar harakati to'g'risidagi Kepler masalasiga o'xshaydi. Har ikki masalada ham jismlarning o'zaro ta'sir kuchi markaziy bo'lib, ta'sirlashuvchi jismlar orasidagi masofaning kvadratiga teskari proporsional ravishda o'zgaradi. Planetalar holida qaralsa, bu kuch tortishish kuchidir, zarralar holida esa bu kuch itarishish kuchidir. Bunday hol planetalar ellips va giperbola bo'yicha, alfa-zarralar esa faqat giperbola bo'yicha harakat qilishida ko'rindi. Rezerford  $\alpha$ -zarralar sochilishini quyidagi sxema orqali tushuntirdi: 0 nuqtaga sochadigan yadro joylashtirilgan bo'lsin. Yadro zaryadi  $+Ze$  va  $\alpha$ -zarra zaryadi  $+2e$  ga teng. Yadroning massasi  $\alpha$ -zarra massasiga nisbatan shunchalik kattaki, yadroni qo'zg'almas deb qaraladi. Lekin haqiqatda yadro harakatsiz emas, shuning uchun  $\alpha$ -zarra massasini keltirilgan massa bilan almashtrib yadro harakatini hisobga olish mumkin. Yadroga tomon uchib kelayotgan  $\alpha$ -zarra va yadro orasidagi o'zaro itarishish kuchi Kulon qonuniga bo'ysunadi deb faraz qilinadi. Bu kuch  $\alpha$ -zarra va yadro orasidagi masoфа kvadratiga teskari proporsional. Klassik mexanikadan ma'lumki,  $\alpha$ -zarra 0 nuqtadagi yadroga nisbatan giperbola bo'ylab harakatlanishi kerak.  $\alpha$ -zarraning massasi  $m$ , sochuvchi

yadrodan uzoqroq masofadagi tezligi  $\theta$  bilan belgilanadi. Agar  $\alpha$ -zarra yadro bilan ta'sirlashmasa, u yadrodan  $b$  masofadan uzoqlikda uchib o'tib ketgan bo'lar edi.  $b$  masofa  $\alpha$ -zarraning yadroga yaqinlashish masofasi bo'lib, unga nishonga olish masofasi deyiladi, lekin uni tajribada o'lhash imkoniyati mavjud emas. Uchib kelayotgan  $\alpha$ -zarra  $b$  masofagacha yaqinlashadi, so'ng yadrodan itarilib giperbola bo'yicha harakatlanishi kerak. Yadrodan itarilayotgan  $\alpha$ -zarraning chetlanish burchagi  $\vartheta$  Kulon qonuni asosida quyidagicha aniqlanadi:

$$\operatorname{ctg} \frac{\theta}{2} = \frac{m v^2 b}{2 Z e^2}. \quad (4.5)$$

Bu formuladan tajribada aniqlanishi mumkin bo'lgan parametrler asosida sochilishning effektiv kesimini aniqlashda foydalilanadi.

(4.5) formulada  $m$  – alfa-zarra massasi,  $v$  – uning tezligi,  $Ze$  – yadro zaryadi,  $2e$  – alfa-zarra zaryadi (elementar zaryad birligida),  $Z$  – yadroning zaryad soni yoki qisqacha yadro zaryadi deyiladi.  $b$  – alfa-zarraning yadroga eng kichik yaqinlashish masofasi, ya'ni nishonga olish masofasi. Sochilish burchagi  $\theta$  nishonga olish masofasi  $b$  ga bog'liq. Alfa-zarra qanchalik yadro yaqinidan o'tsa, ya'ni  $b$  qanchalik kichik bo'lsa, alfa-zarra shunchalik katta burchakka og'adi. (4.5) formulani tajribada tekshirish ancha qiyin, chunki bu formulaga o'lchab bo'lmaydigan kattalik  $b$  kiradi. Shuning uchun bu formuladan kelib chiqadigan statistik natijalarni qarab chiqish mumkin. Shu sababli differensial effektiv kesim tushunchasi kiritiladi. Vaqt birligida birlik yuza orqali yadroga tomon uchayotgan alfa-zarralar soni  $N$  bo'lsin. Bunda alfa-zarralar oqimiga perpendikulyar bo'lgan  $d\sigma$  elementar yuzadan uchib o'tgan alfa-zarralar soni quyidagicha:

$$dn = N d\sigma. \quad (4.6)$$

Sochilgandan so'ng bu zarralar  $d\Omega$  elementar fazoviy burchak ichiga tushadi.  $d\Omega$  – burchakning kattaligi va uning o'qining yo'nalishi  $d\sigma$  – yuzaning kattaligi va holati bilan aniqlanadi. Shuning uchun  $dN$  vaqt birligida  $d\Omega$  fazoviy burchak ichida yadrodan sochilgan alfa-zarralar sonini ifodalaydi.  $dN$  ning  $N$  ga nisbati  $d\sigma$  ga teng,  $d\sigma$  yuza birligida o'lchanadi.  $d\sigma$  alfa-zarralarning yadrodan

sochilishida yadroning differensial effektiv kesimini bildiradi. Bu tushuncha zarralar bilan bo‘ladigan barcha jarayonlarda ishlataliladi. Aytilgan ta’rifga binoan differensial effektiv kesimni quyidagicha ifodalash mumkin:

$$d\sigma = \frac{dN}{N}. \quad (4.7)$$

Demak, *differensial effektiv kesim deb, vaqt birligi ichida yadroda sochilgan zarralar sonining tushayotgan zarralar soniga bo‘lgan nisbatiga aytildi.*

Endi alfa-zarraning alohida atom yadrosida sochilishi uchun differensial effektiv kesimning aniqlanishini ko‘raylik. Alfa-zarralar sochilgandan so‘ng  $d\sigma$  yuza orqali o‘tib  $d\Omega$  burchak ichiga tushadi.  $x$  o‘qi sifatida nishonga olish masofasi  $b=0$  bo‘lganda, alfa-zarraning to‘g‘ri chiziqli trayektoriyasini olaylik. Silindrik simmetriyadan foydalanim, oddiylik uchun  $d\sigma$  ni halqa yuzasi deb olaylik, ya’ni:

$$d\sigma = 2\pi bdb. \quad (4.8)$$

$d\sigma$  yuza zarralar oqimiga perpendikulyar bo‘lsin. Bunday yuzaning ichki o‘lchami  $b$  ga, tashqi o‘lchami esa  $b+db$  ga teng, markazi  $x$  o‘qida joylashgan (4.4b-rasm).

$b$  va  $b+db$  oraliqqa alfa-zarralarning sochilish burchaklariga  $\theta$  va  $\theta+d\theta$  lar mos keladi. (4.5) formulaga asosan:

$$db = \frac{Ze^2}{m\theta^2} \cdot \frac{d\theta}{\sin^2(\theta/2)}. \quad (4.9)$$

Alfa-zarralar  $d\Omega$  fazoviy burchak ichida sochiladi va u quyidagicha aniqlanadi:

$$d\Omega = 2\pi \sin \theta d\theta. \quad (4.10)$$

U vaqtida (4.9) va (4.10) formulalarga asosan:

$$d\sigma = \left( \frac{Ze^2}{m\theta^2} \right)^2 \cdot \frac{d\Omega}{\sin^4(\theta/2)}. \quad (4.11)$$

(4.11) formula faqat halqa shaklidagi yuza uchun to‘g‘ri bo‘lmasdan, balki istalgan elementar yuza  $d\sigma$  uchun to‘g‘ri bo‘ladi. (4.11) for-

mulaga *Rezerford formulasi* deyiladi, tajribada tasdiqlangan. Rezerford birinchi bo'lib yadroning mayjudligini asosladi.

Sochilishning *to'liq effektiv kesimi* deb, vaqt birligi ichida sochilgan alfa-zarralarning *to'liq sonining tushayotgan zarralar to'liq soniga bo'lgan nisbatiga* aytildi. To'liq effektiv kesim  $\sigma$  differensial effektiv kesim  $dS$  ni  $dW$  ning mumkin bo'lgan qiyatlari bo'yicha integrallash orqali aniqlanadi. Alfa-zarralar sochilishi holida  $d\Omega = 2\pi \sin\theta d\theta$  ekanligini hisobga olib,  $\theta=0$  dan  $\theta=\pi$  gacha bo'lgan chegarada integrallash kerak. Integrallashda  $\sigma = \infty$  natija hosil bo'ladi. Bundan esa,  $d\sigma$  yuza  $x$  o'qidan qancha uzoq bo'lsa, sochilish burchagi  $\theta$  shuncha kichik bo'lishi ko'rindi.  $x$  o'qdan uzoqdagi yuzalardan o'tadigan alfa-zarralar amalda og'maydilar. Bunday yuzalarning yig'indisi va sochilgan zarralarning *to'liq soni* cheksiz. Xuddi shuningdek, sochilishning *to'liq kesimi* ham cheksiz kattadir. Bu xulosa formal xarakaterga ega, chunki kichik sochilish burchaklari uchun Rezerford formulasi *to'g'ri* bo'l-maydi.

(4.11) formulani tajribada tekshirish mumkin bo'lgan ko'rinishda yozish mumkin. Alfa-zarralarning turli yadrolarda sochilishi bir-biriga bog'liq emas. U vaqtida,  $n$  hajm birligidagi sochuvchi yadrolar soni bo'lsa, vaqt birligi ichida  $V$  hajmda  $d\Omega$  fazoviy burchak ichida sochilgan alfa-zarralarning o'rtacha soni  $dN$  quyidagicha aniqlanadi:

$$dN = VnN \left( \frac{Ze^2}{mg^2} \right)^2 \cdot \frac{d\Omega}{\sin^4(\theta/2)}. \quad (4.12)$$

(4.12) ifodada keltirilgan Rezerford formulasi tajribada tasdiqlangan. Tajribada  $d\Omega$  fazoviy burchak doimiy ( $d\Omega = \text{const}$ ) bo'lganda, (4.12) formuladan  $dN \sin^4(\theta/2)$  ham doimiy ( $dN \sin^4(\theta/2) = \text{const}$ ) bo'lishi ko'rindi. (4.12) formulada  $n = 1 \text{ sm}^3$  hajmdagi sochuvchi yadrolar soni,  $N$  – sochuvchi yupqa metall folgaga bir sekundda tushayotgan alfa-zarralar soni,  $\theta$  – sochilish burchagi, alfa-zarralar  $d\Omega$  fazoviy burchak ichida sochiladi,  $dN$  – sochilgan alfa-zarralarning soni,  $Ze$  – sochuvchi yadroning zaryadi. (4.12) formuladan ko'rindaniki, sochilgan alfa-zarralar soni  $dN$  sochilish burchagi  $\theta$  ga uzviy bog'liq, q burchakning kamayishi bilan  $dN$  ortadi. Hajm  $V = 1 \text{ sm}^3$  bo'lganda, Rezerford formulasi


$$dN = nN \left( \frac{Ze^2}{mg^2} \right)^2 \cdot \frac{d\Omega}{\sin^4(\theta/2)} \quad (4.13)$$

ko‘rinishda bo‘ladi. Rezerford formulasining tajribada tasdiqlanishi alfa-zarra va yadroning o‘zaro ta’sirlashuvi yaqin masofalarda Kulon qonuniga bo‘ysunishini isbotladi. Kulon qonunining ishlatalish chegarasini aniqlash maqsadida Blekett tomonidan gazlarda alfa-zarralarning sochilishi ustida tajribalar olib borildi. Vilson kamerasida alfa-zarralarning ko‘p sondagi izlari rasmga olindi, ularning og‘ish burchaklari o‘lchanildi, ya’ni sochilish burchaklari hisoblandi. Tajribalarda havoda ta’sirlashuvchi alfa-zarra va yadro orasidagi masofa  $3 \cdot 10^{-12}$  sm dan  $5 \cdot 10^{-10}$  sm gacha, argonda  $7 \cdot 10^{-12}$  sm dan  $10^{-9}$  sm gacha bo‘lganda bu ta’sirlarni tushintirish uchun Kulon qonunini tatbiq etish mumkinligi aniqlandi. Lekin tajribalar ta’sirlashuvchi zarralar orasidagi masofa  $10^{-12}$  sm va undan kichik bo‘lganda Kulon qonunidan keskin chetlanish bo‘lishini ko‘rsatadi. Bunday kichik masofalarda yadro tortishish kuchlari ta’sir qiladi va bu kuchlar Kulon itarishish kuchlaridan kattadir.


#### 4.5-§. Atom tuzilishining planetar modeli

Rezerford o‘tkazgan tajribalari asosida atom tuzilishining planetar modelini yaratdi. Bu modelga asosan atom markazida o‘lchami juda kichik ( $\approx 10^{-14}$  m) va zaryadi  $+Ze$  bo‘lgan og‘ir yadro turadi. Yadro atrofida Quyosh atrofida harakatlanayotgan planetalar singari manfiy zaryadlangan  $Z$  sondagi elektronlar doiraviy va elliptik orbitalarda harakatlanadi. Atom tuzilishining bu modeli dinamik planetar modelidir. Agar bu model statik model bo‘lganda edi, u vaqtida kulon tortishish kuchlari ta’sirida yadroni o‘rab turgan barcha elektronlar yadroga tortilgan bo‘lar edi. Dinamik planetar modelda esa og‘ir yadro qo‘zg‘almas deb qaraladi. Elektronlar esa yadro atrofida doiraviy va elliptik orbitalarda harakatlanadi (4.5-rasm).

Eng oddiy atom vodorod atomining planetar modelini ko‘rib chiqaylik. Oddiylik uchun massasi  $m$  va manfiy zaryadli elektron atomning markazida joylashgan zaryadi  $+e$  bo‘lgan proton atrofida doiraviy orbita bo‘ylab harakatlanadi (4.6-rasm). Birinchi yaqinlishishda massasi elektron massasidan 1836 marta katta bo‘lgan



4.5-rasm



4.6-rasm

protonning harakatini hisobga olmaslik mumkin. Elektronni orbitada ushlab turgan kuch proton va elektron orasidagi Kulon o‘zaro tortishish kuchidir. Bu kuchni quyidagicha ifodalash mumkin:

$$F = \frac{1}{4\pi\epsilon_0} \frac{e^2}{r^2}. \quad (4.14)$$

Bu formulada  $r$  – elektronning doiraviy orbitasi radiusidir. Nyutoning ikkinchi qonuni asosida (4.14) ifodani quyidagi ko‘rinishda yozish mumkin:

$$\frac{1}{4\pi\epsilon_0} \cdot \frac{e^2}{r^2} = m \frac{\vartheta^2}{r}. \quad (4.15)$$

(4.15) formulada  $\frac{\vartheta^2}{r} = \alpha_r$  – markazga intiima tezlanish. (4.15) formuladan foydalanib, klassik yaqinlashishda elektronning kinetik energiyasini quyidagi ko‘rinishda ifodalash mumkin:

$$E_k = \frac{1}{2} m \vartheta^2 = \frac{1}{8\pi\epsilon_0} \frac{e^2}{r}. \quad (4.16)$$

Atom tizimining potensial energiyasi esa:

$$E_n = -\frac{1}{4\pi\epsilon_0} \cdot \frac{e^2}{r}. \quad (4.17)$$

(4.17) formulada (–) ishora atom tizimida tortishish kuchlari ta’sir qilishini bildiradi. Atom tizimining to‘liq energiyasi kinetik va potensial energiyalar yig‘indisiga teng:

$$E = E_k + E_n = -\frac{1}{8\pi\varepsilon_0} \frac{e^2}{r}. \quad (4.18)$$

Atom tizimi bog'langan tizimdir. Elektronning bog'lanish energiyasi elektronni atomdan ajratish uchun yetarli bo'lgan eng kichik energiya miqdori yoki atomni ionlashtirish energiyasi ham deyiladi. Tajriba yo'li bilan vodorod atomi uchun bog'lanish energiyasi  $-13,53$  eV ekanligi aniqlangan. Bu qiymatni (4.18) formuladagi  $E$  o'rniga qo'yib, atom radiusi  $r = 0,53 \cdot 10^{-10}\text{m} = 0,53 \text{ Å}$  ekanligini hisoblash mumkin. Radiusning bu qiymati  $r = r_1$  – Bor radiusi deb qabul qilingan. Elektronning orbitadagi chiziqli tezligi, uning orbitada aylanish chastotasi bilan quyidagi munosabat orqali bog'langan:

$$\vartheta = \omega r = 2\pi f r. \quad (4.19)$$

(4.19) formuladan  $\vartheta$  ning qiymatnini (4.16) formulaga qo'yib quyidagi ifodani hosil qilish mumkin:

$$m(2\pi f r)^2 = \frac{1}{4\pi\varepsilon_0} \frac{e^2}{r}. \quad (4.20)$$

(4.20) formuladan elektronning yadro atrofida aylanish chastotasi  $f$  ni aniqlash mumkin:

$$f = \frac{1}{2\pi} \sqrt{\frac{e^2}{4\pi\varepsilon_0 m r^3}}. \quad (4.21)$$

(4.21) formulaga  $r = 0,53 \cdot 10^{-10}\text{m}$ ,  $e = 1,6 \cdot 10^{-19}\text{Kl}$ ,  $m = 9,11 \cdot 10^{-31}\text{kg}$  qiymatlarni qo'yib hisoblaganda, chastota  $f = 7 \cdot 10^{15}\text{s}^{-1}$  ekanligi aniqlanadi. Bu qiymat  $f$  ning boshqa usullar orqali aniqlangan qiymatiga mos keladi.


#### 4.6-§. Atom planetar modelining klassik fizika tasavvurlariga mos kelmasligi

Atom tuzilishini tushuntirishda muvaffaqiyatlarga erishilgan bo'sada, fiziklar oldida ayrim qarama-qarshiliklarni oydinlashtirish vazifasi turar edi. Masalan, klassik elektrodinamika qonunlariga asosan:

1. Atomning planetar modeliga ko'ra, elektronlar yadro atrofida yopiq orbitalarda markazga intilma tezlanish bilan harakatlanadilar. Klassik fizika nuqtai nazarida elektronlar uzlusiz ravishda elektro-magnit to'lqinlar nurlashi kerak. Natijada elektronning energiyasi nurlanishga sarflanib asta-sekin kamayib boradi, bunda elektronlar orbitasi ham uzlusiz kichrayib boradi. Bu vaqtda elektron juda qisqa vaqtda ( $10^{-8}$ s) yadroga tushib qoladi (4.7-rasm), bunda atom buziladi, uning barqarorligi yo'qoladi. Bunday bo'lishi esa mumkin emas.

Demak, klassik fizika nuqtai nazarida atom planetar modeli tuzilishida mavjud bo'la olmaydi. Planetar model atomning barqarorligini tushuntira olmaydi.

2. Klassik fizika nuqtayi nazaridan atom nurlaydigan energiya chastotasi elektronning yadro atrofida orbita bo'ylab aylanish chastotasiga teng bo'lishi kerak. Bunda atom chiqaradigan nurlanish energiyasi spektri uzlusiz bo'ladi va elektron yadro atrofida mumkin bo'lgan barcha orbitalarni chizadi. Bu vaqtda atomlar juda qisqa vaqt oralig'ida buzilishi kerak. Bu ko'rilgan har ikki mulohaza ham tajriba natijalariga ziddir. Tajriba natijalari atomning barqaror tizim ekanligini, atom spektrlari diskret energiyali spektral chiziqlar to'plamidan iborat bo'lgan chiziqli diskret spektr ekanligini, atomdagi elektron orbitalar diskret ekanligini ko'rsatadi. Shunday qilib, bir tomonidan Rezerford tajribalari atom tuzilishining planetar modelini tasdiqlaydi. Ikkinci tomonidan atom planetar modeliga va klassik fizika tasavvurlariga asoslanib, tajribada kuzatilgan bir qator natijalar va qonuniylatlarni tushuntirib bo'lmaydi. Planetar model atomning barqarorligini va atom nurlanish spektrlarining diskretligini tushuntira olmadi, ya'ni atomning energiya chiqarish va yutish jarayonlarini tushuntira olmadi. Bunday qarama-qarshiliklarni bartaraf qilish uchun fizikaga yangi tushunchalarni kiritish talab qilinar edi. Bunday tushunchalar 1913-yilda daniyalik fizik Nils Bor tomonidan kiritildi.




4.7-rasm

#### 4.7-§. Yadro zaryadini aniqlash

Rezerford formulasida ((4.13) formula)  $Z$  dan boshqa barcha kattaliklar qiymati ma'lum yoki tajribada o'lchash mumkin. (3.13) formulada sochuvchi yadro zaryadi  $Z$  soni elementning Mendeleyev elementlar davriy sistemasida joylashgan tartib raqamiga teng. Bu esa elementlarning davriy tizimda atom massasining ortishiga qarab emas, balki element atomi zaryadi  $Z_e$  ning ortishiga qarab joylashganligini ko'rsatadi.  $Z$  ni aniqlash borasidagi tajribalar Chavdik tomonidan o'tkazilgan. Haqiqatdan ham fluoressensiyali ekranga tushayotgan alfa-zarralar hosil qilgan ssintillyatsiyalar soni  $N$  ni va  $\theta$  burchakka sochilgan alfa-zarralar hosil qilgan ssintillyatsiyalar soni  $dN$  ni sanash orqali

$$d\sigma = dN/N$$

kattalikni aniqlash mumkin. Rezerford formulasining o'ng tomoniga esa aniq bo'lgan kattaliklar ( $n, e$ ) yoki tajribada aniqlanishi mumkin bo'lgan kattaliklar ( $M, \rho^2, \theta$ ) kiradi. Shunday qilib,  $Z$  ni topish uchun ekranga kelib tushgan alfa-zarralar soni  $N$  va ekranda hosil bo'lgan ssintillyatsiyalar (chaqnashlar) soni  $dN$  ni aniqlash kerak.  $dN$  va  $N$  larni o'lchashdagi qiyinchilik, ularning bir-biridan katta farq qilishidir. Dastlabki tajribalarda ular turli qurilmalarda o'lchandi, bu esa katta xatoliklarga olib keldi. Chavdik tajribalarida bu kamchiliklar bartaraf qilindi. Chavdik  $dN$  va  $N$  larni bir tajriba qurilmasida o'lchadi (4.8-rasm). Shuning uchun  $Z$  ni yuqori aniqlikda o'lchashga muvaffaq bo'ldi. Chavdik tajribasi quyidagicha:



4.8-rasm

sochuvchi folga zar qog'oz  $AA'$  halqa shakliga ega. Alfa-zarralar manbai  $R$  va rux sulfididan ( $ZnS$ ) yasalgan fluoressensiyalanuvchi  $S$  ekran  $AA'$  halqadan bir xil  $r$  masofada joylashtirilgan ma'lum burchakda sochilgan alfa-zarralar soni sanaladi. Bu burchak  $RS$  o'q bilan  $R$  manbadan chiqib folgaga kelayotgan alfa-zarralar yo'nalishi orasidagi burchakdan ikki marta katta bo'lishi kerak. Halqa ichida  $R$  va  $S$  orasiga alfa-zarralar uchun tiniqmas ekran qo'yib faqat sochilgan alfa-zarralar soni  $dN$  ni sanash mumkin, aksincha  $AA'$  halqani ekran bilan yopib, tushayotgan alfa-zarralar soni  $N$  ni sanash mumkin. Tushayotgan alfa-zarralar soni  $N$  juda katta bo'lgani uchun uni sanash qiyin. Masalan, sochilgan  $\alpha$ -zarralarning chaqnashlari soni minutiga 30 ta bo'lishi uchun tushayotgan  $\alpha$ -zarralarning soni  $N$  minutiga 2000 ga teng bo'lishi kerak. Shuning uchun  $S$  ekran oldiga kichik tirqishi bo'lgan aylanuvchi disk qo'yiladi. Disk yordamida ekrandagi ssintillyatsiyalar sonini bir necha marta kamaytirish mumkin. Shunday yo'l bilan Chadvik platina, kumush, mis elementlari uchun  $Z$  ning qiymatini aniqlashga muvaffaq bo'ldi: Pt (platina) uchun  $Z = 77,4$ ; Ag (kumush) uchun  $Z = 46,3$  va Cu (mis) uchun  $Z = 29,3$ . Bu elementlarning D. Mendeleyev davriy tizimidagi o'rni tegishlicha 78; 47 va 29 ga tengdir. Chadvik tomonidan o'tkazilgan bunday tajriba yadro zaryadi soni elementning D. Mendeleyev elementlar davriy tizimidagi tartib raqamiga teng ekanligini ko'rsatdi.

**Atom xususiyatlari.** Yuqorida bayon qilingan tushunchalardan kelib chiqadigan asosiy xulosalar:

1. Atom markazida musbat zaryadli og'ir yadro joylashgan, uning atrofida Quyosh atrofida harakatlanayotgan planetalar singari manfiy zaryadlangan yengil elektronlar yopiq orbitalarda harakat qiladi. Bu atom tuzilishining planetar modelidir.
2. Kimyoviy elementlarning D. Mendeleyev davriy tizimidagi tartib raqami  $Z$  atom yadrosining zaryadi sonini bildiradi hamda atom elektronlar qobiqlaridagi elektronlar sonini ko'rsatadi. Davriy tizimda elementlar atom massasining ortib borishi bilan emas, balki element zaryadi  $Ze$  ning ortishi bilan joylashadi.
3. Atomning musbat zaryadi radiusi  $10^{-14}$  m tartibda bo'lgan kichik hajmda joylashgan. Atomning musbat zaryadli bu kichik hajm atom *yadrosi* deb aytildi.

4. Atomning deyarli barcha massasi (99,95%) atom yadrosida to‘plangan. Buning sababi yadroning «og‘ir» protonlardan va neytronlardan, elektron qobiq «yengil» elektronlardan tuzilganligidir ( $m_p=1836m_e$ ,  $m_n=1838m_e$ ,  $m_e=9,11\cdot10^{-31}$  kg).

5. Atomning o‘lchami  $10^{-10}$  m tartibadir.

Shunday qilib, yuqorida bayon qilinganlar bo‘yicha atom to‘g‘risida quyidagi asosiy tushunchalarga ega bo‘lish mumkin.

Atom moddaning eng kichik zarrasi bo‘lib, elementning barcha kimyoviy va fizikaviy xossalariiga ega bo‘ladi. Atom musbat zaryadlangan yadro va yadroning Kulon elektr maydonida elektron qobiqlarda harakatlanuvchi manfiy zaryadli elektronlardan iborat. Atomning o‘lchami (radiusi)  $10^{-8}$  sm= $10^{-10}$  m tartibadir. Atomning deyarli barcha massasi (99,95%) yadroda joylashgan. Buning sababi yadroning *og‘ir* proton va neytronlardan tashkil topganligidir. Elektron qobiqlar esa, *yengil* elektronlardan tuzilgan ( $m_e=9,11\cdot10^{-31}$  kg =  $=9,11\cdot10^{-28}$  g = 0,000549 m.a.b.). Atomning zaryadi uning juda kichik hajmida (o‘lchami  $\sim 10^{-14}$  m) bo‘lgan yadrosida to‘plangan. Yadro zaryadi esa  $+Ze$  ga teng ( $Z$  – elementning Mendeleyev davriy tizimidagi tartib raqami, ya’ni element yadrosi zaryadi soni). Atom elektron qobiqlaridagi elektronlarning manfiy zaryadlari yig‘indisi yadroning musbat ( $+Ze$ ) zaryadiga teng. Bunday holda atom neytral deyiladi. Atom murakkab, barqaror elektr tizimidir. Barcha kimyoviy jarayonlar atom qobiqlarida elektronlarning qayta joylashishi tufayli yuz beradi. Atomning kimyoviy xossalari uning tashqi elektron qobiqlardagi elektronlari bilan aniqlanadi. Tashqi elektronlar yadro bilan kuchsiz bog‘langandir. Shuning uchun ularga qo‘sni atomlar tashqi qobiq elektronlarining elektr ta’siri kattaroq bo‘ladi. Atom elektron qobiqlarining tuzilishi va xossalari atom yadrosi elektr maydoni bilan aniqlanadi.

Eng oddiy atom vodorod atomidir. Vodorod atomi yadrosida bir proton va yadroning Kulon elektr maydonida elektron qobig‘ida harakatlanayotgan bir elektronidan iborat (4.6-rasmga qaralsin). Turli moddalar atomlarining o‘lchami turlicha bo‘ladi. Masalan, H (vodorod) atomi o‘lchami O (kislород) atomi o‘lchamidan kichik, Na (natriy) atomi o‘lchami Cl (xlor) atomi o‘lchamidan kichik, O (kislород) atomi o‘lchamidan esa katta. Atom o‘lchami  $10^{-10}$  m tartibida bo‘ladi.

Ion elektr zaryadiga ega bo'lgan zarra bo'lib, atom yoki molekulning elektron yo'qotishi yoki qo'shib olishi natijasida hosil bo'ladi.  $H^+$ ,  $Li^{++}$ ,  $Be^{+++}$  ionlar vodorodsimon ionlar bo'lib,  $+Ze$  zaryadga ega bo'lgan yadrodan va bir elektronidan iborat.

#### 4.8-§. Bor postulatlari. Atom tuzilishining Bor nazariyasi

Klassik fizika qonunlari o'z mohiyatiga ko'ra, uzlusiz jarayonlarni ifodalashga qodirdir. Kimyoviy elementlar atomlari nurlanish spektridagi spektral chiziqlarning xarakteri atom ichidagi jarayonlar uzlukli ekanligini ko'rsatadi. Buni birinchi bo'lib Nils Bor tushundi va klassik fizika qonunlarini atom ichkarisidagi jarayonlarga tatbiq qilib bo'lmasligini ko'rsatdi.

Rezerfordning atom tuzilishi planetar modeli to'g'ri hisoblanasada, lekin atomning energiya nurlashi jarayonini, atomlarning turg'unligini tushuntirishda qiyinchiliklarga duch keldi. 1913-yilda Rezer-fordning atom tuzilishi modeli Nils Bor tomonidan mukammallashtirildi va bu qiyinchiliklar bartaraf qilindi.

N.Bor Rezerford tajribalarida kuzatilgan, lekin klassik fizika tushuntira olmaydigan natijalarni, qonuniyatlarini tushuntirishda o'zi-ning vodorod atomi tuzilishi modelini taklif qildi. Bor model vodorod atomi tuzilishining birinchi muvaffaqiyatli modeli bo'lib, atom tuzilishi to'g'risidagi tasavvurlarning rivojlanishida muhim o'rinni tutdi. Bor modeli de-Broyl gipotezasining vujudga kelishida ham katta ahamiyatga ega bo'ldi. Atom nurlanishi spektridagi qonuniyatlar, atomdagi energetik sathlar birinchi marta Bor tomonidan tushuntirildi. Vodorod atomi tuzilishining Bor taklif qilgan modeli uning quyidagi postulatlarida asoslanadi:

1. Atom uzoq vaqt statsionar holatlarda bo'la oladi. Atom statsionar holatlarda energiyaning  $E_1, E_2, E_3, \dots, E_n$  diskret qiymatlariga ega bo'ladi. Atom statsionar holatlarda energiya nurlamaydi. Shuning uchun bunday holatlar statsionar holatlar deyiladi. Atomning statsionar holatlariga statsionar orbitalar mos keladi.

2. Atomda bo'lishi mumkin bo'lgan statsionar orbitalardan elektronning impuls momenti

$$L = m\vartheta r = n\hbar, (n=1,2,3,\dots) \quad (4.22)$$

shartni qanoatlantiradigan statsionar orbitalargina mayjud bo'ladi. Bunday orbitalar ijozat etilgan statsionar orbitalar deyiladi. Atomdagи statsionar orbitalar kvantlangan bo'lib, diskret energetik sathlarni hosil qiladi.

3. Elektron energiyasi  $E$  bo'lgan orbitadan energiyasi  $E_f$ , bo'lgan ( $E > E_f$ ) orbitaga o'tganda atom energiya chiqaradi. Chiqarilgan energiya har ikki orbita energiyalari farqiga teng bo'ladi, ya'ni:

$$h\nu = E - E_f, \quad (4.23)$$

Bu formuladan:

$$\nu = \frac{E_i - E_f}{h}, \quad (4.24)$$

(4.24) formulada  $E_i$  – birinchi orbita energiyasi,  $E_f$  – ikkinchi orbita energiyasi,  $n$  – chiqarilgan energiya chastotasi. (4.23) munosabat atom energiya yutganda ham o'rinali bo'ladi.  $E_i > E_f$  bo'lganda energiya yutiladi. Bunda atomga tushgan foton energiyasi atomni pastgi energetik holatdan yuqorigi energetik holatga o'tkazadi. Masalan, agar elektron  $n = 5$  orbitadan  $n = 4$  bo'lgan orbitaga o'tsa, u vaqtida atom chastotasi (4.9-rasm)


$$\nu = \frac{E_5 - E_4}{h}$$

bo'lgan energiya chiqaradi (chiquarish spektri hosil bo'ladi). Agar atomga energiyasi  $\nu = E_5 - E_4$  bo'lgan foton tushsa, bu foton atomda yutiladi va elektron bu foton energiyasi ta'sirida  $n = 4$  orbitadan  $n = 5$  orbitaga o'tadi (yutilish spektri hosil bo'ladi). Demak, atom energiyasi katta bo'lgan holatdan energiyasi kichik bo'lgan holatga o'tsa energiya chiqaradi. Agar atom energiyasi kichik bo'lgan holatdan energiyasi katta bo'lgan holatga o'tsa energiya yutadi. Buning uchun atomga tashqaridan energiya berish kerak. (4.24) ifodaga esa Bor chastotalari qoidasi deyiladi.  $\hbar$  – Plank doimiyligi bo'lib, uning son qiymati quyidagicha:  $\hbar = 6,62 \cdot 10^{-34} \text{ J} \cdot \text{s}$ .

$$\hbar = \frac{\hbar}{2\pi},$$

yoki

$$\hbar = \frac{6,62 \cdot 10^{-34}}{2 \cdot 3,14} = 1,05 \cdot 10^{-34} \text{ J} \cdot \text{s}.$$



4.9-rasm

Demak, atomda elektronlar ixtiyoriy qiymatdagি energiyaga ega bo'lmasdan, balki energiyaning aniq qiymatlariqagina ega bo'ladi, bu energiyalar qiymatlari diskret spektrni hosil qiladi. Yuqorida keltirilgan postulatlar asosida vodorod atomining birinchi muvafqaqiyatl modeli tuzildi. Bu modelda hisoblashlar doiraviy orbitalar uchun bajariladi.

Bor modeli atom statsionar holatda nima uchun energiya nurlamasligini tushuntira olmaydi. Bundan tashqari, elektron yadro atrofida doiraviy orbita bo'ylab harakatlanishini tajribada ko'rsatish mumkin emas. Shuning uchun Bor modelining tadbig'iда ma'lum cheklashlar mavjud. Keyinchalik spektroskopiyada qilinayotgan yangi kashfiyotlarga Bor modeli javob bera olmadi. Bu hol yangi fizikaviy nazariyani ishlab chiqishni talab qilar edi. Bor modeli o'rniga hozirgi vaqtida Geyzenberg, Shredinger, Diraklar tomonidan yaratilgan atom tuzilishining kvant mexanik modeli kelgan bo'lsada, Bor modeli statsionar holatlar tushunchalarining kiritilishida ko'rgazmali model sifatida foydalanildi. Bor modelini keyingi o'n yilda Zommerfeld, Vilson va boshqalar to'ldirdilar, aniqliklar kiritdilar. Atomda diskret energetik sathlarning mavjudligi 1914-yilda Frank va Gers tomonidan simob atomlari bilan o'tkazilgan tajribada tasdiqlandi.

#### 4.9-§. Doiraviy orbitalarni kvantlash

Statsionar holatlar energiyasi kvantlash qoidasi bilan aniqlanadi. Agar elektronlarning doiraviy orbitalari qarab chiqilsa, Borning ikkinchi postulatiga asosan, atomda elektronning impuls momenti

Plank doimiyligiga karrali bo'lgan shartni qanoatlantiradigan orbita-largina mavjud bo'la oladi, ya'ni

$$L = m\vartheta r = n\hbar, \quad (n = 1, 2, 3, \dots). \quad (4.25)$$

Bunda  $n$  – butun son bo'lib, kvant soni deyiladi. (4.25) formula elektronning impuls momenti –  $L$  kvantlanganligini, uning faqat  $1 \hbar, 2 \hbar, 3 \hbar, \dots$  bo'lgan diskret qiymatlarnigina qabul qilishi mumkinligini ko'rsatadi.

Bunda  $\hbar$  impuls momentining birligi qilib qabul qilinadi. (4.25) formula doiraviy orbitalarni kvantlash qoidasidir. Bu qoida yordamida vodorod atomining doiraviy statsionar orbitalar o'chamlarini va ularga tegishli energiyalarni hisoblash mumkin. Yadro massasi elektron massasidan 2000 marta katta bo'lganligi uchun yadro qo'zg'almas deb qaraladi. Elektron esa yadro atrofida radiusi  $r$  bo'lgan aylana bo'ylab harakatlanadi.

Yadro koordinatalar sistemasi boshiga joylashtirilgan bo'lsin. Yadrodan cheksiz uzoqdagi masofada elektronning potensial energiyasi nolga teng deb hisoblanadi. Bu vaqtida zaryadi  $+Ze$  bo'lgan yadrodan  $r$  masofadagi elektronning to'liq energiyasi quyidagicha ifodalanadi:

$$E = E_n + E_k \quad \text{yoki} \quad E = -\frac{Ze^2}{4\pi\epsilon_0 r} + \frac{m\vartheta^2}{2}. \quad (4.26)$$

Bu formulada  $E_n = -\frac{Ze^2}{4\pi\epsilon_0 r}$  – elektronning yadro bilan o'zaro tortishuv potensial energiyasi,  $E_k = \frac{m\vartheta^2}{2}$  – elektronning kinetik energiyasi,  $m$  – elektronning massasi,  $\vartheta$  – uning tezligi  $e$  – elektronning zaryadi,  $\epsilon_0$  – vakuum uchun dielektrik doimiylik.

Elektron yadro atrofida aylanma orbitada harakatlanadi deb hisoblanadi. U holda yadro elektr maydonidagi elektronga ta'sir etadigan Kulon tortishish kuchi markazga intilma kuchga teng bo'ladi, ya'ni

$$\frac{Ze^2}{4\pi\epsilon_0 r} = \frac{m\vartheta^2}{r}. \quad (4.27)$$

(4.27)dan  $m^2$  qiymatini topib, (4.26) ifodaga qo'yilganda, electronning to'liq energiyasi quyidagicha ifodalananadi:

$$E = -\frac{Ze^2}{8\pi\epsilon_0 r}. \quad (4.28)$$

(4.27) ifodaning har ikkala tomonlarini  $mr$  ga ko'paytirib, quyidagini hosil qilamiz:

$$\frac{Ze^2 mr}{4\pi\epsilon_0} = m^2 g^2 r^2. \quad (4.29)$$

Bu formulada o'ng tomondag'i ifoda impuls momenti kvadratidir. Shuning uchun (4.29)ni quyidagicha yozish mumkin:

$$n^2 \frac{r^2}{n^2} = \frac{Ze^2 mr}{4\pi\epsilon_0}. \quad (4.30)$$

(4.28) va (4.30) tenglamalarining tegishli o'ng va chap tomonlarini ko'paytirib, zaryadi  $+Ze$  bo'lgan yadro atrofida doiraviy orbita bo'ylab harakat qilayotgan elektronning to'liq energiyasini aniqlash mumkin, ya'ni:

$$E = -\frac{Z^2 e^4 m}{32\pi^2 \epsilon_0^2 \hbar^2} \cdot \frac{1}{n^2}. \quad (4.31)$$

Bu formula vodorod atomida elektronning statsionar holatlari-ning energiya sathini ifodalaydi. (4.31) formuladan ko'rindiki, elektronning to'liq energiyasi  $n$  kvant soniga bog'liq.  $n$  – elektron orbitalari tartib raqamini bildiradi va  $n = 1, 2, 3, \dots$  qiymatlarni qabul qiladi. (4.31) formula atom chiqaradigan yoki yutadigan energiyasini ifodalaydi va uning kvantlanganligini ko'rsatadi.  $n = 1, 2, 3, \dots$  bo'lgan-dagi energiyaning mumkin bo'lgan qiymatlari (4.31) formula orqali hisoblanadi.  $n \rightarrow \infty$  da energetik sathlar o'zining  $E_\infty = 0$  bo'lgan chegaraviy qiymatiga tomon zichlashadi. Atomning  $n=1$  bo'lgan eng kichik energiyali holati uning asosiy holati deyiladi. Atom asosiy holatda uzoq vaqt bo'lishi mumkin. Atomning  $n = 2, 3, 4, \dots$  bo'lgan holatlari ( $n > 1$ ) uning uyg'ongan holatlari deyiladi. Bu holatlarning har birida atomning energiyasi uning asosiy holati energiyasidan katta bo'ladi. (4.31) formuladagi manfiy ishora atom tizimining bog'langanligini va energiyaning kvantlanganligini ko'rsatadi.

(4.31) formulaga elektron massasi va zaryadi son qiymatlarini ( $m = 9,11 \cdot 10^{-31}$  kg,  $e = 1,6 \cdot 10^{-19}$  KI) qo'yib hisoblanganda:

$$E_n = -13.6 / n^2 \text{ eV}, \quad n = 1, 2, 3, \dots \quad (4.31a)$$

formula hosil bo'ladi. (4.31a) formula orqali n ning turli qiymatlariga to'g'ri keladigan energiya hisoblanganda energiyaning quyidagi qiymatlari hosil bo'ladi:

$$\begin{aligned} n = 1 & \quad E_1 = -13,55 \text{ eV}; \\ n = 2 & \quad E_2 = -3,38 \text{ eV}; \\ n = 3 & \quad E_3 = -1,5 \text{ eV}; \\ n = 4 & \quad E_4 = -0,84 \text{ eV}; \\ n = 5 & \quad E_5 = -0,54 \text{ eV}; \\ n = 6 & \quad E_6 = -0,38 \text{ eV}. \end{aligned}$$

Hisoblangan energiya qiymatlaridan ko'rindaniki, orbita radiusi ortishi bilan elektronning manfiy qiymatli energiyasi kamayib boradi.  $E \rightarrow 0$  da energetik sathlar zichlashib boradi.  $E > 0$  da elektron erkin bo'ladi va energetik sathlar kvantlanmaydi, uzlusiz spektr hosil bo'ladi.

Shunday qilib, elektron energetik sathlari energiyasi kvantlangan bo'lib, (4.31) yoki (4.31a) formulalar bilan aniqlanadigan diskret qiymatlarga ega bo'ladi. Endi Borning uchinchi postulatidan foydalanamiz. Elektron  $n$  statsionar orbitadan  $n_f$  statsionar orbitaga o'tganda, atom yorug'lik kvanti chiqaradi. Uning energiyasi quyida gicha aniqlanadi:

$$h\nu = E_i - E_f. \quad (4.32)$$

Bu formulani energiya uchun yozilgan (4.31) formulaga asosan (4.32) quyidagi ko'rinishda yozish mumkin:

$$h\nu = E_i - E_f = \frac{Z^2 e^4 m}{32\pi^2 \epsilon_0^2 \hbar^2} \left( \frac{1}{n_f^2} - \frac{1}{n_i^2} \right). \quad (4.33)$$

$n_i$  va  $n_f$  lar yuqori  $E$  va pastki  $E_f$  energetik sathlarga tegishli bo'lgan kvant sonlardir. (4.33) formula vodorod atomining spektrini tahlil qilish asosida hosil qilingan. (4.33) formuladan atom chiqaradigan energiya chastotasini hisoblash formulasini hosil qilish mumkin, ya'ni:

$$v = \frac{c}{\lambda} = \frac{Z^2 e^4 m}{32\pi^2 \epsilon_0 \hbar^2 h} \left( \frac{1}{n_f^2} - \frac{1}{n_i^2} \right),$$

Bunda  $\hbar = \frac{h}{2\pi}$ ;  $h = \hbar 2\pi$  va  $v = \frac{c}{\lambda}$  ekanligi hisobga olinganda, atom chiqaradigan foton energiyasining to'lqin uzunligini aniqlash mumkin bo'lgan formula hosil bo'ladi, ya'ni

$$\frac{1}{\lambda} = \frac{Z^2 e^4 m}{64\pi^3 \epsilon_0^2 \hbar^3 c} \left( \frac{1}{n_f^2} - \frac{1}{n_i^2} \right). \quad (4.34)$$

Bu formulada:

$$R = \frac{Z^2 e^4 m}{64\pi^3 \epsilon_0^2 \hbar^3 c}, \quad (4.35)$$

$R$  – Ridberg doimiyligi deyiladi.

(4.35) ifodada vodorod atomi uchun  $Z = 1$ , u holda

$$R = \frac{e^4 m}{64\pi^3 \epsilon_0^2 \hbar^3 c}. \quad (4.36)$$

U vaqtida (4.34) formulani quyidagicha yozish mumkin.

$$\frac{1}{\lambda} = R \left( \frac{1}{n_f^2} - \frac{1}{n_i^2} \right). \quad (4.37)$$

Bu formula empirik formula bo'lib, shvesiyalik olim Yu.R. Ridberg tomonidan ishlab chiqilgan. Ridberg doimiyligi bir  $sm$  da joylashadigan to'lqin sonini bildiradi. (4.35) formulaga kiradigan fizik kattaliklar  $e$ ,  $m$ ,  $\hbar$  larning son qiymatlarini qo'yib hisoblanganda,  $R$  ning nazariy hisoblangan qiymati hosil bo'ladi:  $R=109737 \text{ sm}^{-1}$ .  $R$  ning bu qiymati tajribada spektroskopik usul bilan aniqlangan qiymatiga juda yaqindir. Bu esa vodorod atomi energetik sathlari energiyasini aniqlash uchun Bor tomonidan ishlab chiqilgan (4.31) formulaning to'g'riligini tasdiqlaydi.

Bor nazariyasi atomda bo'lishi mumkin bo'lgan statsionar orbitalarning radiusini hisoblashga imkon beradi. (4.30) formuladan statsionar orbita o'lchami aniqlanadi.

$$r = r_n = \frac{4\pi\varepsilon_0 h^2}{e^2 m} \cdot n^2, \quad n = 1, 2, 3, \dots \quad (4.38)$$

Atomdagи birinchi statsionar orbita o'lchami aniqlanganda  $n = 1$  deb olinadi (atomning asosiy holati). U vaqtda:

$$r_1 = \frac{4\pi\varepsilon_0 h^2}{e^2 m} = 0,53 \text{ \AA},$$

bunda  $r_B$  – Bor orbitasi radiusi deyiladi. Bu natija gazlar kinetik nazariyasi beradigan qiymat bilan mos keladi. (4.38) formuladan:

$$r = n^2 r_1. \quad (4.39)$$

(4.39) formula atom statsionar orbitalari radiuslari (o'lcamlari) kvantlanganligini va ularning diskret  $r_1, 4r_1, 9r_1, \dots$  qiymatlariniga qabul qilishini ko'rsatadi.

#### 4.10-§. Elliptik orbitalarni kvantlash

Doiraviy orbitalalar yadroning Kulon maydonida harakatlanayotgan elektron orbitalarining xususiy holi hisoblanadi. Elektronlar harakatining orbitalari umumiy holda elliptik orbitalalar deb qaraladi

Ch.Vilson va A. Zommerfeld tomonidan kvantlash qoidasi elliptik orbitalar uchun umumlashtirildi. Erkinlik darajasi  $j$  bo'lgar mekanik tizim umumlashgan koordinata  $q_i$  ( $i = 1, 2, \dots, j$ ) va umumlashgan impuls  $P_i$  bilan ifodalanadi.

$$P_i = \frac{\partial E_k}{\partial \dot{q}_i}, \quad (4.40)$$

bunda  $E_k$  – tizimning kinetik energiyasi,  $\partial \dot{q}_i$  – umumlashgan koordinatalarning vaqt bo'yicha hosilasi.

Agar tizim  $j$  erkinlik darajasiga ega bo'lsa, uning harakatiga  $n_i$  ( $i = 1, 2, 3, \dots$ ) kvant sonlari yordamida  $j$  kvantlash shartlar qo'yiladi. Bu kvant shartlar quyidagi ko'rinishdadir:

$$\oint P_i dq_i = 2\pi\hbar n_i, \quad (n_i = 1, 2, 3, \dots, i = 1, 2, 3, \dots, j), \quad (4.41)$$

(4.41) ifodada umumlashgan koordinatalar  $q_i$  sifatida shunday koordinatalar olinadiki, ularda har bir  $P_i$  impuls faqat umumlashgan q

koordinatalarga tegishli funksiya hisoblanadi. Integral sohasi sifatida tegishli o'zgaruvchining barcha o'zgarish sohasi olinadi. (4.41) shart tizimning harakatini kvantlashga imkon beradi.

Vodorodsimon atom elliptik orbitalarining kvantlanishini quyidagicha qarash mumkin: umumlashgan koordinata sifatida qutb burchagi  $\varphi$  va  $r$  – elektronning zaryadi  $Ze$  bo'lgan yadro turgan joyga to'g'ri keladigan koordinata boshidan elektron o'zi turgan nuqtasigacha bo'lgan masofa olinadi. Koordinatalar boshida zaryadi  $Ze$  bo'lgan yadro joylashgan deb hisoblanadi. U vaqtida tizimning kinetik energiyasi:

$$E_k = \frac{1}{2} m(r^2 + r^2\dot{\varphi}^2). \quad (4.42)$$

Umumlashgan impuls esa:

$$P_\varphi = \frac{\partial E_k}{\partial \dot{\varphi}} = mr^2\dot{\varphi} = \text{const}, \quad (4.43)$$

$$P_r = \frac{\partial E_k}{\partial \dot{r}} = m\dot{r}. \quad (4.44)$$

$P_\varphi$  ning doimiy bo'lishining sababi ta'sir etuvchi kuchlar markaziy kuchlar ekanligidir. Energiyaning saqlanish qonuniga asosan elektronning yadro maydonidagi to'liq energiyasini quyidagicha yozish mumkin:

$$E = E_k - Ze^2 / (4\pi\epsilon_0 r) = (P_r^2 + P_\varphi^2 / r) / (2m) - Ze^2 / (4\pi\epsilon_0 r). \quad (4.45)$$

Tizim tekis harakat qilgani uchun ikkita erkinlik darajasiga ega, u vaqtida kvantlash sharti ham ikkita bo'ladi:

$$\oint P_\varphi d\varphi = 2\pi\hbar n_\varphi, \quad (4.46)$$

$$\oint P_r dr = 2\pi\hbar n_r. \quad (4.47)$$

Bunda  $n_\varphi$  – azimutal,  $n_r$  – radial kvant sonlar deyiladi,  $P_r$  – radial impuls,  $P_\varphi$  – azimutal impuls.

$$P_r = L = \text{const}, \quad (4.48)$$

bo'lishi shartidan

$$P_\varphi = L = n_\varphi \hbar, \quad (4.49)$$

ekanligi kelib chiqadi. (4.49) formulada  $\varphi$  ning 0 dan  $2\pi$  gacha o'zgarishi hisobga olingan. (4.47)dagi radial kvantlashni bajarish uchun umumlashgan impuls  $P_r$  ni  $r$  funksiyasi sifatida ifodalash kerak:

$$P_r = (A + 2B / r + c / r^2)^{1/2}, \quad (4.50)$$

bunda

$$A = 2mE; \quad B = mZe^2 / (4\pi\varepsilon_0); \quad C = n_\varphi^2 \hbar^2. \quad (4.51)$$

Shuning uchun (4.49) formulada keltirilgan radial kvantlash shartini quyidagi ko'rinishda ifodalash mumkin:

$$\oint (A + 2B / r + c / r^2)^{1/2} dr = 2\pi\hbar n_r. \quad (4.52)$$

(4.52) formulada integrallash chegarasi  $r$  ning mumkin bo'lgan barcha qiymatlarini o'z ichiga oladi.  $r$  ning minimal va maksimal qiymatlarida integral tagidagi ifoda nolga aylanadi. Buning ma'nosi shundan iboratki, bu nuqtalarda elektronning yadroga maksimal yaqinlashishi va yadrodan maksimal uzoqlashishida elektronning radial tezligi nolga aylanadi. Natijada radial impuls  $P_r$ , ham nolga aylanadi, ya'ni  $P_r = mr = 0$  bo'ladi.

(4.52) ifodadagi integral odatdagidek hisoblanadi:

$$\oint (A + 2B / r + c / r^2)^{1/2} dr = -2\pi i(\sqrt{c} - B / \sqrt{A}); \quad (i = \sqrt{-1}). \quad (4.53)$$

Shunday qilib,

$$\frac{Ze^2}{4\pi\varepsilon_0} \frac{m}{\sqrt{2mE}} = (n_\varphi + n_r)\hbar. \quad (4.54)$$

Bundan esa  $n$ -elliptik orbitadagi elektronning energiyasi aniqlanadi:

$$E_n = -\frac{Z^2 e^4 m}{32\pi^2 \varepsilon_0^2 \hbar^2} \frac{1}{(n_r + n_\varphi)^2} = -\frac{Z^2 e^4 m}{32\pi^2 \varepsilon_0^2 \hbar^2 n^2}. \quad (4.55)$$

(4.55) formula elektron orbitalari elliptik bo'lganda atom statsionar holating energiyasini ifodalaydi. Bu formulada  $n$  butun musbat son bo'lib,  $n = n_r + n_\varphi$  deb olingan.  $n$  bosh kvant son deyiladi. Elliptik orbitalar uchun yozilgan (4.55) ifodani doiraviy orbitalar uchun yozilgan (4.31) ifoda bilan taqqoslashdan ko'rindik, elliptik orbitalar uchun ham energiya qiymati doiraviy orbitalar uchun

bo‘lgan energiya qiymatidek bo‘ladi. Farqi faqat shundaki, doiraviy orbitalar holidagi kvant soni ( $n$ ), elliptik orbitalarda azimuthal ( $n_{\phi}$ ) va radial ( $n_r$ ) kvant sonlari yig‘indisiga teng bo‘ladi. Mumkin bo‘lgan ko‘p sondagi ellipslardan (4.46) va (4.47) kvantlash shartlari orqali o‘lchami va shakli  $n_{\phi}$  hamda  $n_r$  kvant sonlari bilan topiladigan aniq ellipslar ajratiladi.

$$n_{\phi} + n_r = \text{const} \quad (4.56)$$

bo‘lgan barcha ellipslar aniq doiraviy orbitalarga energiya jihatidan ekvivalent bo‘ladi.


Shunday qilib, kvantlash qoidasi yordamida elliptik orbitalarda harakatlanayotgan elektron energiyasi (4.55) formula orqali aniqlanar ekan. (4.46) va (4.47) formulalar elliptik orbitalarni kvantlash qoidalarini ifodalaydi.

#### 4.11-§. Frank va Gers tajribalari

Frank va Gers tomonidan 1913-yilda o‘tkazilgan tajribalar atom holatlarining diskret ekanligini tasdiqladi.

Elektron bilan atom orasidagi noelastik to‘qnashuvlarda elektron o‘z energiyasini atomga beradi. Elektron istalgan qiymatdagi kinetik energiyaga ega bo‘lishi mumkin. Agar atomning ichki energiyasi ham uzlusiz o‘zgarsa edi, atom elektron bilan noelastik to‘qnashganda atom elektronidan istalgan qiymatdagi energiyani qabul qilar edi. Lekin tajribada bunday hol kuzatilmadi. Tajribalar atom elektron bilan noelastik to‘qnashganda, atom elektronidan faqat aniq bir qiymatdagi energiyanigina qabul qila olishini ko‘rsatdi. Atom qabul qilgan bu energiya qiymati atomning ikki statsionar holatlari energiyalari farqiga teng bo‘ladi. Demak, elektron bilan atom orasidagi noelastik to‘qnashuvlarda elektron atomga energiyaning faqat aniq bir qiymatdagi energiyanigina bera oladi. Elektronning atomga bergen energiyasi miqdorini o‘lchab, bu energiya ikki statsionar holatlar energiyalari farqiga teng ekanligini aniqlash mumkin. Frank va Gers tajribasining g‘oyasi ham shundan iborat edi.

**Tajriba sxemasi.** Tajriba qurilmalarining sxemasi 4.10-rasmda keltirilgan. Bosimi 1 mm simob ustuniga ( $\approx 130$  Pa) teng bo‘lgan simob bug‘i bilan to‘ldirilgan trubka ichiga katod ( $K$ ), to‘r ( $A$ ) va



4.10-rasm


anod vazifasini bajaradigan (B) plastinka joylashtirilgan. Qizdirilgan katod (K) va to'r (A) orasiga katoddan chiqqan elektronlarni tezlatuvchi potensiallar farqi ( $U$ ) qo'yilgan. Elektronlar o'z harakatlari davomida simob atomlari bilan to'qnashadilar. B plastinka A to'rdan keyin joylashtirilgan, ular orasiga kuchsiz ( $\approx 0,5$  V) tormozlovchi potensial

$U_3$  qo'yiladi. Elektronlar A to'r bilan B plastinka orasida tormozlanadi. Agar energiyasi 0,5 eV dan kichik bo'lган elektron A to'rdan o'tsa, u B plastinkagacha yetib kela olmaydi. Energiyasi 0,5 eV dan katta bo'lган elektronlargina A to'rdan o'tib B plastinkaga yetib kela oladilar. Ularning soni galvanometr ( $G$ ) ko'rsatayotgan tok kuchi kattaligi orqali aniqlanishi mumkin.

Tajribalarda B plastinkaga tushgan elektronlar hosil qilgan tok kuchi bilan elektronlarni tezlatuvchi potensiallar farqi  $U$  orasidagi bog'lanishning (volt-amper xarakteristikasi) grafigi chizilgan (4.11-rasm). Volt-amper xarakteristikada tok kuchining maksimumlari bir-biridan bir xil oraliqda joylashgan. Ketma-ket joylashgan maksimumlar orasidagi har bir oraliq  $\approx 4,9$  V ga teng. Birinchi maksimum 4,9 V potensiallar farqiga, ikkinchi maksimum 9,8 V, uchinchi maksimum 14,7 V potensiallar farqiga to'g'ri keladi.

**Tajribalar tahlili.** Tajribalar natijalari asosida chizilgan volt-amper xarakteristikada tok kuchi maksimumlari hosil bo'lishini quyidagicha tushuntirish mumkin. Volt-amper xarakteristikada tok kuchi avval monoton ortib boradi va potensiallar farqi  $U = 4,9$  V ga yetganda maksimumga erishadi, so'ng  $U$  yana orttirilishi bilan tok kuchi keskin kamayib minimumga erishadi,  $U$  yana orttirib borilganda va  $U = 9,8$  V ga yetganda tok kuchi maksimumga erishadi. Tok kuchining bunday maksimumi  $U = 14,7$  V da yana takrorlanadi. Har ikki maksimumlar orasidagi potensiallar farqi 4,9 V da teng. Volt-amper xarakteristikaning bunday ko'rinishda bo'lishi atomlarda energetik sathlarning diskret ekanligini va atomlar energiyani faqat ma'lum bir porsiyalar tarzida qabul qila olishini, ya'ni simob atomlari 4,9 eV diskret energyanigina qabul qilishini ko'rsatadi. Elektronlar energiyasi 4,9 eV dan kichik bo'lganda,

elektronlar bilan simob atomlari orasida to‘qnashuvlar elastik bo‘ladi. Elektronlar *A* to‘r va *B* plastinka orasidagi tormozlovchi potensialni yengib *B* plastinkaga kelib tushadilar. Bu vaqtda zanjirda tok kuchining ortishi va elektronlar energiyasi 4,9 eVga yetganda tok kuchining maksimumga erishishi kuzatiladi. Elektronlar energiyasi 4,9 eV bo‘lganda, ular simob atomlari bilan noelastik to‘qnashadilar va o‘z energiyalarini simob atomlariga beradilar. Energiyasini simob atomlariga bergen elektronlar *B* plastinkaga yetib kela olmaydilar, bu vaqtda tok kuchining keskin kamayib ketishi ko‘rinadi. Potensiallar ayirmasi yana orttirib borilganda tok kuchi ortib boradi. Elektronlar energiyasi 9,8 eVga yetganda tok kuchi yana maksimumga erishadi. Bunda elektronlar simob atomlari bilan yana noelastik to‘qnashadi va o‘z energiyalarini simob atomlariga beradi. Energiyasini simob atomiga bergen elektronlar *B* plastinkaga (anodga) yetib kela olmaydilar, tok kuchi yana keskin kamayib ketadi. Shu tariqa elektronlar energiyasi 14,7 eVga yetganda ham elektron va simob atomi orasida noelastik to‘qnashuvlar bo‘ladi. Bu tajribalardan elektronlar energiyasi har 4,9 eVga oshganda simob atomlari bilan noelastik to‘qnashuvlar bo‘lishi ko‘rinadi. Demak, tajribada simob atomida 4,9, 9,8, 14,7 eV diskret energiyalarga ega bo‘lgan statsionar holatlar mavjudligi aniqlandi. Atomdagи holatlar kvantlangan bo‘lib, faqat diskret  $\Delta E = E_2 - E_1 = 9,8 - 4,9 = 4,9$  eV energiyalarnigina qabul qilishi yoki chiqarishi mumkin. Noelastik to‘qnashuvlarda 4,9 eV energiyani qabul qilgan simob atomlari uyg‘ongan holatga o‘tadilar. Uyg‘ongan holatda  $10^{-7} - 10^{-8}$  sekundgina yashab, so‘ng olgan energiyalarini yorug‘lik (chaqnash) kvant sifatida chiqarib yana asosiy holatga o‘tadilar. Simob atomi nurlanishida chiqargan energiyasi 4,9 eV ga teng. Yoki boshqacha aytganda, simob atomlari asosiy holatdan uyg‘ongan holatga o‘tishida energiyani yutadi, atom uyg‘ongan holatdan asosiy holatga o‘tishida energiyasini yorug‘lik ko‘rinishida chiqaradi. Atom chiqaradigan diskret



4.11-rasm

qiymatdagи energiyalar diskret spektrni hosil qiladi. Energianing har bir diskret qiymatiga spektrda ma'lum spektral chiziq to'g'ri keladi. Umumiyl holda o'tishlar ikki uyg'ongan holatlar orasida bo'lishi mumkin. Pastki energetik sathdan yuqoriga o'tishda energiya yutiladi, yuqori sathdan pastki sathga o'tishda esa energiya chiqariladi. Asosiy holat qatnashadigan o'tishlar rezonans o'tishlar deyiladi. Simob atomi chiqaradigan 4,9 eV energiya (yorug'lik kvanti) simob atomining to'lqin uzunligi 253,7 nm bo'lgan rezonans chizig'iga tegishlidir, ya'ni simob atomi 4,9 eV energiya chiqarganda rezonans o'tish bo'ladi, chunki bunda asosiy holat qatnashadi. 4,9 V simob atomi rezonans potensiali deyiladi. Tajriba natijalaridan shunday xulosa qilish mumkinki, simob atomida kamida ikkita energetik holat mavjud: uyg'otilmagan holat (bu holat asosiy holat deyiladi) va birinchi uyg'ongan energetik holat. Bu holat asosiy holatdan 4,9 eV energiya bilan farq qiladi. Lekin simob atomida yana yuqori uyg'ongan energetik holatlar mavjudligi aniqlangan. Atomlar nurlanishlarida uyg'ongan holatlarining diskret energetik spektrlari hosil bo'ladi. Atom chiqaradigan spektral chiziqlarning spektrda joylashishi atomda energetik sathlarning joylashishiga bog'liq. Shunga o'xshash tajribalar boshqa moddalar bilan ham o'tkazilgan. Barcha tajribalarda ham yuqorida bayon qilingan jarayonlar kuzatilgan. Masalan, kaliy va natriy atomlari bilan tajribalar o'tkazilgan. Kaliy uchun rezonans potensial 1,63 V, natriy uchun 2,12 V ekanligi aniqlangan.


#### **4.12-§. Vodorod atomi spektridagi qonuniyatlar**

Ma'lumki, qizdirilgan jismlar o'zlaridan yorug'lik nurlanishi chiqaradi. Jismlarning nurlanishi atom va molekulalar ichkarisida bo'ladigan jarayonlar bilan bog'liq. Shuning uchun jismlarning nurlanishini o'rganish atom va molekulalar tuzilishini o'rganishda muhimdir. Borning chastotalar shartiga asosan atomlarning nurlanishi elektronning bir statsionar orbitadan ikkinchi statsionar orbitaga o'tganida sodir bo'ladi. Jismlar qizdirilganda energiya yutgan atomlar uyg'ongan holatga o'tadi. Uyg'ongan holatda atomlar ( $10^{-8} \div 10^{-7}$ ) sekund yashaydi, so'ng yutgan energiyasini nurlanish sifatida chiqarib asosiy holatda o'tadi. Atomlar diskret qiymatdagи

energiyani chiqaradi yoki yutadi. Atom chiqargan yoki yutgan diskret energiyalari to‘plami spektrni hosil qiladi. Spektrdagи har bir spektral chiziq jism chiqargan yoki yutgan aniq bir diskret energiya qiyamatiga to‘g‘ri keladi. Spektrlarning turi (ko‘rinishi) nurlanayotgan jismning qanday holatda ekanligiga bog‘liq.

Qattiq jismlar nurlanishida tutash spektrlar hosil bo‘ladi. Molekulalar nurlanishida yo‘l-yo‘l spektrlar, atomlar nurlanishida chiziqli spektrlar hosil bo‘ladi. Spektrda ko‘p sondagi chiziqlarning bo‘lishi atom ichki tuzilishining murakkab ekanligini ko‘rsatadi. Atomlar nurlanishida chiqaradigan energiyalari hosil qilgan spektrlarni o‘rganish orqali atomdagi energetik sathlar to‘g‘risida to‘la ma’lumot olish mumkin. Atom spektrida spektral chiziqlarning joylashishi atomda energetik sathlar joylashishiga bog‘liqdir.

Atomlarning chiziqli spektrini o‘rganishda spektral chiziqlarning ketma-ketlik bilan joylashishida ma’lum qonuniyatlar mavjudligi aniqlanadi. Bunday qonuniyatlar birinchi marta vodorod atomi spektrida kuzatildi. Bu qonuniyatlarni aniqlashda birinchi bo‘lib, shvetsariyalik fizik Balmer 1885-yilda vodorod spektrining ko‘zga ko‘rinadigan sohasidagi spektral chiziqlar holatini aniqlaydigan empirik formulani ishlab chiqdi. Vodorod atomi chiqarish spektrining ko‘zga ko‘rinadigan sohasi (Balmer seriyasi) 4.12-rasmda, yutilish spektri esa 4.13-rasmlarda keltirilgan. Chiziqli spektrlar uchun olingan empirik natijalar tahlil qilib ko‘rulganda, spektrdagи alohida chiziqlar ma’lum guruhlarga birlashishi aniqlandi. Bu guruhlar *seriyalar* deyiladi. Balmer 1885-yilda vodorod spektrining ko‘rinadigan sohasida  $H_{\alpha}$ ,  $H_{\beta}$ ,  $H_{\gamma}$ ,  $H_{\delta}$  lar bilan belgilanadigan to‘rtta chiziqning to‘lqin uzunligi quyidagi empirik formula bilan ifodalanishi mumkinligini ko‘rsatdi:



4.12-rasm

$$\lambda \approx B \frac{n^2}{n^2 - 4}; \quad (n = 3, 4, 5, 6, \dots). \quad (4.57)$$

Bunda  $n$  atomdagi elektron orbitalalar (energetik sathlar) tartib raqamini bildiradi. B esa  $3645,6 \cdot 10^{-8} \text{ sm} = 3645,6 \text{ \AA}$  ga teng bo'lgan empirik doimiy. (4.57) formulaga asosan hisoblangan to'lqin uzunliklar, Balmer o'lchagan natijalarga deyarli mos keladi (4.1-jadval).



4.13-rasm

4.1-jadval

Chiziq	Balmer formulasi bo'yichahisoblangan	O'lchashlar bo'yicha	Farqi
$H_{\alpha}$	6562,08	6562,10	+0,02
$H_{\beta}$	4860,80	4860,74	-0,06
$H_{\gamma}$	4340,00	4340,10	+0,10
$H_{\delta}$	4101,30	4101,20	-0,10

Bu chiziqlar uchun hisoblangan va kuzatilgan to'lqin uzunliklarning mos kelishida farq mavjudligi aniqlandi. Bu esa o'sha vaqtgagi bu chiziqlarni o'lchash noaniqligi bilan bog'liq bo'lib chiqdi. (4.57) formulani chastotani hisoblash formulasi ko'rinishida yozish mumkin. U vaqtda spektrning ko'rinaldigan sohasidagi spektral chiziqlar chastotasi quyidagicha ifodalanadi:

$$v = R \left( \frac{1}{2^2} - \frac{1}{n^2} \right), \quad (n = 3, 4, 5, \dots) \quad (4.58)$$

(4.58) formulada  $R$  – doimiy kattalik (4.9-§ dagi (4.35) formulaga qaralsin),  $n$  – spektrdagи har bir spektral chiziqqa tegishli bo'lgan chastota, ya'ni elektronning  $n = 3, 4, 5, \dots$  uyg'ongan holatlardan  $n = 2$  uyg'ongan holatga o'tganida atom nurlaydigan energiya chastotasidir. (4.58) ifoda Balmer formulasidir. Spektrning ko'rinaldigan sohasida joylashgan spektral chiziqlar guruhi *Balmer seriyasi* deyiladi. Demak, vodorod atomi spektridagi Balmer seriyasi spektral chiziqlarining chastotasi (4.58) formula orqali aniqlanadi. Vodorod

atomi spektrida Balmer seriyasi bilan bir qatorda, shu formulaga o'xshash formula bilan ifodalananadigan boshqa seriyalar ham topildi.

Spektrning ultrabinafsha sohasida 1906-yilda Layman tomonidan quyidagi seriya kashf qilindi:

$$\nu = R \left( \frac{1}{1^2} - \frac{1}{n^2} \right), \quad (n = 2, 3, \dots). \quad (4.59)$$

Bu seriyaga *Layman seriyasi* deyiladi. Bunda  $n$  – elektronning  $n = 2, 3, 4, \dots$  uyg'ongan holatlardan  $n = 1$  bo'lgan asosiy holatga o'tishida atom nurlaydigan energiya chastotasidir.

Spektrning infraqizil sohasida 1908-yilda Pashen tomonidan quyidagi seriya topildi:

$$\nu = R \left( \frac{1}{3^2} - \frac{1}{n^2} \right), \quad (n = 4, 5, \dots). \quad (4.60)$$

Bu seriya *Pashen seriyasi* deyiladi.

Keyinchalik vodorod spektrining infraqizil sohasida yana boshqa seriyalar aniqlandi.

Breket seriyasi:

$$\nu = R \left( \frac{1}{4^2} - \frac{1}{n^2} \right), \quad (n = 5, 6, \dots). \quad (4.61)$$

Pfund seriyasi:

$$\nu = R \left( \frac{1}{5^2} - \frac{1}{n^2} \right), \quad (n = 6, 7, \dots). \quad (4.62)$$

(4.58) va (4.59) formulalardan vodorod atomi spektridagi barcha seriyalarni quyidagi umumiy formula:

$$\nu = R \left( \frac{1}{m^2} - \frac{1}{n^2} \right), \quad (m = 1, 2, 3, \dots; n = m + 1) \quad (4.63)$$

orqali ifodalash mumkin ekanligi ko'rindi. Bunda  $m$  har bir seriyada doimiy  $m = 1, 2, 3, 4, 5$  qiymatlarni,  $n$  esa  $m$  dan bittaga ortiq, ya'ni  $n = m + 1$  bo'lgan butun sonlarni qabul qiladi.  $m$  va  $n$  lar atomdagi elektron qobiqlar (orbitalar) tartib raqamini bildiradi. (4.63) formulaga *Balmerning umumlashgan* formulasi deyiladi. Kvant soni  $n$  ning ortishi bilan har bir seriyada spektral chiziqlar-

ning chastotasi seriya chegarasi deb ataluvchi  $R/m^2$  chegaraviy qiymatga intiladi.

Layman seriyasidagi spektral chiziqlarning katta to‘lqin uzunligi  $n=2$  bo‘lganda hosil bo‘ladi, ya’ni  $\lambda = \frac{4}{3R_H} = 121,56713 \text{ nm}$ . Bu

to‘lqin uzunlikka tegishli bo‘lgan spektral chiziq vodorodning rezonans chizig‘i deyiladi. Eng katta chastota  $n=\infty$  bo‘lganda, (4.58-4.62) formulalar yordamida hisoblanadi. Bu chastota seriya chegarasi deyiladi. Balmer seriyasida seriya chegarasi

$$v_{\infty} = \frac{R_H}{4} = 27419,69 \text{ sm}^{-1} \text{ yoki } \lambda_{\infty} = \frac{4}{R_H} = 3648 \text{ \AA}.$$


Vodorod atomi spektri to‘g‘risida yuqorida bayon qilingan tushunchalarning yakuni sifatida 4.2-jadvalni keltirish mumkin.

#### 4.2-jadval

#### Vodorod atomi spektral seriyalari

Seriya nomlari	Spektr sohalari	Seriya formulalari	Seriya chegarasi ( $n=\infty$ )
Layman seriyasi	Ultrabinafsha	$\frac{1}{\lambda} = R \left( \frac{1}{1^2} - \frac{1}{n^2} \right),$ $n = 2, 3, 4, \dots$	911,27 \AA
Balmer seriyasi	Ko‘rinadigan	$\frac{1}{\lambda} = R \left( \frac{1}{2^2} - \frac{1}{n^2} \right),$ $n = 3, 4, 5, \dots$	3645,6 \AA
Pashen seriyasi	Infraqizil	$\frac{1}{\lambda} = R \left( \frac{1}{3^2} - \frac{1}{n^2} \right),$ $n = 4, 5, 6, \dots$	8201,4 \AA
Breket seriyasi	Infraqizil	$\frac{1}{\lambda} = R \left( \frac{1}{4^2} - \frac{1}{n^2} \right),$ $n = 5, 6, 7, \dots$	14580 \AA
Pfund seriyasi	Infraqizil	$\frac{1}{\lambda} = R \left( \frac{1}{5^2} - \frac{1}{n^2} \right),$ $n = 6, 7, 8, \dots$	22782 \AA

Seriya chegarasiga yaqinlashganda spektral chiziqlar zichlashadi, ular orasidagi to'lqin uzunliklari farqi assimptotik ravishda nolga intiladi, spektral chiziqlar intensivligi ham nolga intiladi. Seriya chegarasidan tashqarida spektr uzilmaydi, balki tutash bo'ladi. Bunday qonuniyat faqat vodorod atomi spektridagina emas, balki boshqa elementlar spektrida ham kuzatiladi. Bunda ham seriya chegarasi mayjud bo'lib, chegaradan tashqarida tutash spektr hosil bo'ladi. Spektral chiziqlarning joylashishini sxematik ko'rinishda qaralsa va ularning inten-sivligini chiziqlar ko'rinishida tasvirlansa, spektral chiziqlar intensivligining nolga intilishini ko'rish mumkin (4.14-rasm).



4.14-rasm

#### 4.13-§. Spektral termlar. Kombinatsion prinsip

Spektroskopianing asosiy qonuni 1908-yilda Rits tomonidan empirik yo'l bilan aniqlangan kombinatsion prinsip hisoblanadi. (4.63) formulaga quyidagicha belgilashlar kiritish mumkin:

$$T(m) = \frac{R}{m^2}, \quad T(n) = \frac{R}{n^2}. \quad (4.64)$$

Bunday belgilashlar kiritib (4.60) formulani quyidagi ko'rinishda yozish mumkin:

$$\nu = T(m) - T(n). \quad (4.65)$$

$T(m)$ ,  $T(n)$  lar spektral termlar deb ataladi.

(4.65) formulaga asosan nurlanayotgan barcha chastotalar spektral termlar kombinasiyasi ko'rinishida aniqlanadi. Bu qoida Ritsning kombinatsion prinsipi deyiladi.

Vodorod atomi uchun barcha termlar tizimi bitta formuladan hisoblanadi:

$$T(n) = \frac{R}{n^2}, \quad (n = 1, 2, \dots). \quad (4.66)$$

(4.66) dan muayyan atom uchun termlar tizimini bilgan holda, istalgan spektral chiziqning chastotasini shu tizimning ikkita hadi ayirmasi holida topilishi mumkinligi kelib chiqadi.

Kombinatsion prinsipni quyidagicha ta'riflash mumkin: *atom spektridagi bitta seriyaning ikki spektral chizig‘ining chastotasi ma’lum bo’lsa, u holda ularning ayirmasi shu atomga tegishli biror uchinchi spektral chiziqning chastotasiga teng bo’ladi*. Agar Layman seriyasining ikki chizig‘i chastotasi ma’lum bo’lsa, ya’ni birinchi spektral chiziq chastotasi:

$$\nu_1 = T_1 - T_2,$$

ikkinchi spekral chiziq chastotasi:

$$\nu_2 = T_1 - T_3.$$

U holda  $\nu_1 - \nu_2$  ayirma Balmer seriyasi birinchi chizig‘ining chastotasiga teng bo’ladi:

$$\nu_2 - \nu_1 = T_2 - T_3 \text{ va h.k.}$$

Masalan, Layman seriyasida  $n=2$ ; 3 bo’lgandagi spektral chiziqlar chastotalarini tegishlichcha  $n_1=82258,31$  va  $n_2=97491,36$  ekanligi ma’lum bo’lsa, u vaqtida  $n_2 - n_1 = 97491,36 - 82258,31 = 15233,05$  bo’ladi. Bu son Balmer seriyasidagi  $n=3$  bo’lgandagi spektral chiziqning chastotasiga mos keladi, ya’ni  $n=15233,216$ .

Kombinatsion prinsip empirik yo’l bilan kashf qilingan bo’lib, spektrlardagi qonuniyatlarga o’xshab u ham qandaydir g’alati son bo’lib tuyulgan. Buning ma’nosи Borning kvant postulatlari ta’riflangandan keyin ochildi.

Bor birinchi bo’lib kombinatsion prinsip atomlar ichidagi harakatlarini boshqaradigan o’ziga xos kvant qonunlar ekanligini ko’rsatdi. Shunday qilib, har bir termga muayyan statsionar energetik holat to’g’ri keladi, har bir chiqarilgan chastota ikki statsionar holat bilan bog’langan kombinatsion prinsipning o’zidir. Agar  $\text{sm}^{-1}$  da ifodalangan to’lqin sonini  $v$  orqali belgilasak, u holda  $\text{s}^{-1}$  da ifodalangan chastota  $cv$  ga teng bo’ladi. Shunga asosan, Borning chastotalar shartini quyidagicha ifodalash mumkin:

$$hcv = E_n - E_m,$$

bundan

$$v = \frac{E_n}{hc} - \frac{E_m}{hc}. \quad (4.67)$$

Agar

$$T(n) = -\frac{E_n}{hc}. \quad (4.68)$$

deb olinsa, u holda (4.67) quyidagi ko'rinishga keladi:

$$v = T(m) - T(n),$$

ya'ni kombinatsion prinsipning ma'lum ta'rifi hosil bo'ladi. (4.68) ifodadan ko'rinish turibdiki, kulon maydonida elektronning bog'lanish energiyasi (norelyativistik hol) har doim manfiydir. (4.67) formulaga termning (4.64) ifodasiga asosan Ridberg doimiysi orqali berilgan ifodasi kiritilsa, atomlar energiyasini ham shu doimiy orqali ifodalash mumkin:

$$E_n = -\frac{Rhc}{n^2},$$

bu yerda  $h$  va  $c$  – universal doimiylardir,  $n$  – butun son va  $R$  – Ridberg doimiysi.

#### 4.14-§. Vodorod atomining energetik sathlari diagrammasi


Spektroskopiyada spektral termlar va energetik sathlarni gorizontal chiziqlar bilan, ular orasidagi elektron o'tishlarni esa strelkalar bilan ko'rsatish qabul qilingan. Yuqori energetik sathlardan pastki energetik sathlarga yo'naltirilgan strelkalar atomning energiya chiqarishidagi spektral chiziqlariga tegishli bo'ladi; teskari yo'nalishdagi strelkalar esa atomning energiyani yutishidagi spektral chiziqlarga tegishli bo'ladi. 4.15-rasmda vodorod atomi energetik sathlarining diagrammasi keltirilgan.

Rasmda energetik sathlar tartibi kvant soni  $n$  bilan ko'rsatilgan.  $n=1$  dan  $n=\infty$  gacha bo'lgan barcha sathlar kvantlangan bo'lib, diskret energiya qiymatiga ega bo'ladi. Bu holatlar bog'langan holatlar

bo'ladi. Energiya faqat diskret qiymatlarga ega bo'lgandagina yadro va elektronlar bog'langan tizim – atomni hosil qiladi.  $n=\infty$  dan yuqoridagi sathlar energiyasi uzlusiz bo'ladi. Bunda elektronlar yadrodan mumkin qadar uzoqlashgan va bog'lanmagan bo'ladi. Bu vaqtida yadro va elektron justini shartli ravishdagina atom deyish mumkin. Umuman, atom deganda, bog'langan tizimlar tushuniladi. Shunday bo'lishligi Bor o'z postulatlarida tushuntirdi.  $n$  ning ortishi va  $n=\infty$  ga yaqinlashishi bilan energetik sathlar bir-biriga yaqinlasha boradi,  $n=\infty$  ga yetganda undan yuqorida energetik sathlar shunchalik yaqinlashadiki, ketma-ket ikki sath orasidagi energiya farqi juda kichik bo'lib, energetik sathlar uzlusiz spektrni hosil qiladi.  $n=\infty$  bo'lgan energetik sathdan yuqorida bog'lanmagan elektronlarining mavjudligi uzlusiz energetik sathlar va diskret energetik sathlar orasida kvant o'tishlarni (elektron o'tishlarni) hosil qiladi. Bu holat atom chiziqli spektri ustiga tushadigan tutash chiqarish va yutilish spektrlari hosil bo'lishida ko'rindi. Shuning uchun ham seriya chegarasida spektr uzilmaydi, balki chegaradan keyin qisqa to'lqinlar tomonga davom etadi va tutash spektrga aylanadi.  $n=\infty$  dan yuqorigi sathlarda energiya uzlusiz bo'ladi.

Atomning biror diskret energiyali holatdan uzlusiz energiyali holatga o'tishi atomni bog'lanmagan tizimga aylantiradi, bu atomning ionlanishi bo'ladi.  $n=\infty$  dan yuqorida energetik sathlarning energiyasi musbat bo'ladi ( $E>0$ ), bunday holat bog'lanmagan holatdir. Demak,  $n=\infty$  dan yuqorida bo'lgan uzlusiz energiyali bog'lanmagan holatda atom musbat ion holda, elektron erkin holda bo'ladi.  $n=1$  dan  $n=\infty$  gacha bo'lgan barcha holatlar bog'langan holatlar bo'lib, ularga manfiy to'liq energiya qiymatlari to'g'ri keladi ( $E<0$ ). Bog'langan sistemagina atomni hosil qiladi, elektronlar ham bog'langan bo'ladi. Uzlusiz energiyali holatdan diskret energiyali holatlarga kvant o'tishlar elektronlarning tegishli musbat ion bilan rekombinatsiyasi orqali bo'ladi. Bunday o'tishlarda chiqariladigan nurlanishlar rekombinatsion nurlanishlar deyiladi. Atomning  $n=1$  bo'lgandagi eng kichik energiyali holati uning asosiy holati deyiladi va atom bu holatda uzoq vaqt davomida bo'lishi mumkin. Atomning asosiy holatidan yuqori  $n = 2, 3, 4, \dots$  bo'lgan diskret energetik holatlarga o'tishi atomning uyg'onishi bo'ladi. Demak, atomning  $n = 2, 3, 4$  bo'lgandagi holatlari uning uyg'ongan holatlari bo'ladi.

Uyg'ongan holatlarning har biridagi energiyasi, uning asosiy holatidagi energiyasidan katta bo'ladi.  $n=2$  bo'lgan holat atomning birinchi uyg'ongan holati,  $n=3$  esa ikkinchi uyg'ongan holati bo'ladi va hokazo.



4.15-rasm

4.15-rasmdagi vodorod atomi energetik sathlari diagrammasida gorizontal to'g'ri chiziqlarda vodorod atomi energiyasining mumkin bo'lgan qiymatlari qo'yilgan. Rasmdan ko'rindiki,  $n=1$  dan  $n=\infty$  gacha bo'lgan barcha holatlardir, chunki manfiy energiyaga egadirlar. Agar atom asosiy holatda bo'lsa, energiyasi  $-13,6 \text{ eV}$  ga teng, undan elektronni uzib olib ionga aylantirish uchun  $13,6 \text{ eV}$  energiya talab qilinadi. U vaqtida asosiy holatda bo'lgan vodorod atomining ionlashtirish ( $E_{ion}$ ) energiyasi va bog'lanish energiyasi ( $E_{bog}$ ) o'zaro teng bo'ladi, ya'ni:


$$E_{ion} = E_{bog} = 13,6 \text{ eV}.$$

#### 4.15-§. Pikering seriyasi va vodorodsimon ionlar spektrlari

Pikering 1897-yilda Puppis yulduzi spektrida Balmer seriyasiga o'xshash spektral seriyani kashf qildi. Ikkala seriyaning sxematik ko'rinishi 4.16-rasmda tasvirlangan.

Tasvirda ko'rinishicha, Pikering seriyasi xuddi ikki guruhga ajralgandek, bir chiziq osha joylashgan bir guruh chiziqlar deyarli Balmer seriyasidagi chiziqlarga mos keladi, oraliq chiziqlar esa Balmer seriyasidagiga o'xshash emas. Ridberg bu seriyani  $n$  butun va yarim qiymatlarga ega bo'lган Balmer formulasi bilan ifodalanishini ko'rsatdi.

$$\nu = R(1/2^2 - 1/n^2), \quad (n = 2, 5; 3; 3,5) \quad (4.69)$$



4.16-rasm

butun qiymatlariga Balmer chiziqlariga mos kelgan chiziqlar to‘g‘ri keladi, yarim qiymatlariga esa oraliq chiziqlar to‘g‘ri keladi.

Bu seriyani Yerdagi vodoroddan olishga qanchalik urinsalar ham uni olish imkonи bo‘lmadi. Shuning uchun Pikering seriyasi yulduzlarda qandaydir holatda bo‘lgan vodorodga taalluqlidir deb hisoblandi. Nihoyat, bu seriya laboratoriya sharoitida olindi. Tajriba muvaffaqiyatli o‘tishi uchun vodorodga geliy aralashtirish kerak edi. Bor bu faktlarning chigal majmuasini Pikering seriyasi vodorodga emas, balki ionlashgan geliyiga taalluqlidir, degan fikrni aytdi. Haqiqatdan, quyidagi ifodaga asosan:

$$\nu = \frac{2\pi^2 m Z^2 e^4}{h^3 c} \left( \frac{1}{m^2} - \frac{1}{n^2} \right), \quad (4.70)$$

$\nu$  har doim  $Z$  ga proporsional va geliy uchun  $Z=2$ , u holda ionlashgan geliyning ( $\text{He}^+$ ) spektral seriyasi:

$$\nu = 4 R_{\text{He}} \left( \frac{1}{m^2} - \frac{1}{n^2} \right), \quad (4.71)$$

formulaga mos kelishi kerak. Bu yerda geliy uchun  $m=4$  bo‘lsa, u holda formula quyidagi ko‘rinishga keladi:

$$\nu = 4 R_{\text{He}} \left( \frac{1}{4^2} - \frac{1}{n^2} \right), \quad (n = 5, 6, \dots), \quad (4.72)$$

yoki

$$\nu = R_{\text{He}} \left( \frac{1}{2^2} - \frac{1}{(n/2)^2} \right),$$

Bu formulada  $n/2$  ni  $k$  orqali belgilab, quyidagi ko‘rinishda yozish mumkin:

$$\nu = R_{\text{He}} \left( \frac{1}{2^2} - \frac{1}{k^2} \right), \quad (k = 2, 5; 3; 3, 5; 4; \dots),$$

ko‘rinishga ega bo‘ladi. Bu esa Pikering seriyasi formulasidir. Vodorod va geliy massalaridagi farq mavjudligi tufayli  $R_{\text{He}}$  Ridberg doimiysi  $R_H$  dan bir oz farq qilishi kerak. Shu sababli  $R$  ning butun qiymatlari uchun ham Pikering seriyasi chiziqlari vodorodning Balmer chiziqlariga nisbatan bir oz siljigan bo‘ladi. Borning bu fikrini Pashen tasdiqladi. Uning ko‘rsatishicha, Pikering seriyasini

sof vodorodda hosil qilib bo'lmaydi. Demak, hech qanday vodorod bo'lmagan sof geliyda Pikering seriyasini oson hosil qilish mumkin va bu seriyaning chiziqlari  $k$  ning butun qiymatlari uchun Balmer chiziqlariga nisbatan xuddi (4.72) formulada kutilgandek, binafsha tomonga siljigan bo'ladi. 4.3-jadvalda ionlashgan geliy spektrida Pashen o'lchagan to'lqin uzunliklar bilan yonma-yon  $n$  ning butun qiymatlariga mos keluvchi, vodorodning Balmer seriyasi to'lqin uzunliklari keltirilgan.

#### 4.3-jadval

K	$\text{He}^+$ , Å	H, Å
3,0	6560,01	6562,8(H <sub>α</sub> )
3,5	5411,6	—
4,0	4859,3	4861,3(H <sub>β</sub> )
4,5	4561,6	—
5,0	4338,7	4340,5(H <sub>γ</sub> )
5,5	4199,9	—
6,0	4100,0	4101,7(H <sub>δ</sub> )

$\text{He}^+$  dan keyingi vodorodsimon ionlar ikki karra ionlashgan litiy  $\text{Li}^{++}$  ( $Z=3$ ) va uch karra ionlashgan berilliyl  $\text{Be}^{+++}$  ( $Z=4$ )lardir. Ularning spektral seriyalari ushbu formulalar orqali aniqlanishi kerak:

$$v = 9R_{\text{Li}} \left( \frac{1}{m^2} - \frac{1}{n^2} \right); \quad v = 16R_{\text{Be}} \left( \frac{1}{m^2} - \frac{1}{n^2} \right),$$

Haqiqatdan ham, bu ionlar uchun Layman seriyasining dastlabki hadlarini ( $m=1$ ) spektrning chetdagi ultrabinafsha qismidan topishga muvaffaq bo'ldilar.

### 4.16-§. Vodorod atomining ionlashtirish energiyasi

***Ionlashtirish energiyasi.*** Agar atom tashqaridan energiya qabul qilsa, elektronning energiyasi ortadi va o'z orbitasidan yuqori bo'lgan orbitaga o'tadi. Agar elektronga tashqaridan berilgan energiya yetarlicha katta bo'lsa, elektron  $n=\infty$  bo'lgan orbitaga o'tadi, ya'ni

atomdan uzilib chiqadi. Natijada atom bir elektronini yo‘qotib ionlashadi, musbat ion hosil bo‘ladi.

Demak, asosiy holatda bo‘lgan atomdan elektronni uzib chiqarib atomni ion holiga o‘tkazish uchun zarur bo‘lgan energiya *ionlashtirish energiyasi* deyiladi.

$Z=1$  va  $n=1$  bo‘lgan asosiy holatdagi vodorod atomi uchun ionlashtirish energiyasi quyidagi formula orqali aniqlanadi:

$$E_{ion} = \frac{me^4}{32\pi^2 \epsilon_0^2 h^2} = 13,6 \text{ eV}. \quad (4.73)$$

(4.73) ifoda vodorod atomi uchun ionlashtirish energiyasini nazariy hisoblash formulasidir. Bu formula bilan hisoblangan ionlashtirish energiyasi  $E_{ion}$  qiymati, uning tajribada hisoblangan qiymati bilan mos keladi.

**Uyg‘onish energiyasi.** Elektronning asosiy holatdan uyg‘ongan holatga o‘tkazish uchun atomga berilishi zarur bo‘lgan energiya *uyg‘onish energiyasi* ( $E_{uyg}$ ) deyiladi.

Masalan, vodorod atomi uchun uyg‘onish energiyasi

$$E_{uyg} = E_{bog} - E_{ion}, \quad (4.74)$$

$n=2$  bo‘lgan birinchi uyg‘ongan holat uchun

$$E_{uyg} = -3,40 \text{ eV} - (-13,6 \text{ eV}) = 10,2 \text{ eV}.$$

Bu energiya qiymati  $n=2$  bo‘lan holatga tegishli uyg‘onish energiyasidir (birinchi uyg‘ongan holat).

**Bog‘lanish energiyasi.** Bog‘lanish energiyasi uyg‘ongan holatda bo‘lgan atomdan elektronni uzib chiqarish uchun zarur bo‘lgan energiyadir. Masalan,  $n=2$  bo‘lgan birinchi uyg‘ongan holatdagi atomdan elektronni uzib chiqarish uchun 3,40 eV energiya kerak. Demak, birinchi uyg‘ongan holat bog‘lanish energiyasi 3,40 eV. Agar atom asosiy holatda bo‘lsa, bu holatdagi bog‘lanish energiyasi ionlashtirish energiyasiga teng bo‘ladi, ya’ni  $E_{ion} = E_{bog} = 13,6 \text{ eV}$ . Agar holat ko‘rsatilmasdan bog‘lanish energiyasi haqida gapirilsa, bunda  $E_{ion}$  va  $E_{bog}$  lar bir xil bo‘ladi.

Atomning energiya chiqarmaydigan (nurlanmaydigan) holatlari statsionar holatlar deyiladi. Atomning  $n=1$  bo‘lgan eng kichik energiyali holati uning asosiy holati deyiladi. Atom asosiy holatda

uzoq vaqt davomida bo'lishi mumkin. Atomning  $n=2,3,4,\dots$  larga tegishli holatlari uning uyg'ongan holatlari deyiladi. Uyg'ongan holatlarning har birida atom energiyasi atomning asosiy holati energiyasidan katta bo'ladi.

#### 4.17-§. Yadro harakatini hisobga olish

Bor nazariyasida yadro massasi cheksiz katta bo'lib, yadro qo'zg'almas, elektron esa uning atrofida aylanadi deb qaraladi. Kvantlash qoidasi:

$$L = n\vartheta r = n\hbar.$$

Bu formula yadro harakatini hisobga olmasdan chiqarilgan. Haqiqatda esa, elektron va yadro umumiy massa markazi atrofida harakatlanadi (4.17-rasm).


Elektron va yadrodan iborat tizimni ko'raylik. Rasmida  $r_e$  va  $r_n$  masofalar elektrondan va yadrodan massa markazigacha bo'lgan masofalardir. Rasmdan ko'rish mumkinki,

$$r = r_e + r_n. \quad (4.75)$$

Massa markazi aniqlanishi qoidasiga asosan

$$Mr_n = mr_e. \quad (4.76)$$

(4.76) formulada  $M$  – yadro massasi,  $m$  – elektron massasi. (4.75) va (4.76) formulalarni  $r_e$  va  $r_n$  larga nisbatan yechilganda:



4.17-rasm

$$r_e = \left( \frac{M}{M + m} \right) r, \quad (4.77)$$

$$r_n = \left( \frac{m}{M + m} \right) r. \quad (4.78)$$

Borning postulatiga asosan umumiyl massal markaziga nisbatan elektron impulsining to'liq momenti:

$$L = M\vartheta_n r_n + m\vartheta_e r_e = n\hbar, \quad (4.79)$$

yadro va elektronning chiziqlari tezliklari tegishlichasi  $\vartheta_n = \omega r_n$  va  $\vartheta_e = \omega r_e$  ekanligini hisobga olgan holda (4.79) formulani quyidagicha yozish mumkin:

$$L = M\omega r_n^2 + m\omega r_e^2 = n\hbar, \quad (4.80)$$

bunda  $\omega$  – doiraviy chastota. (4.80) formulaga (4.77) va (4.78) ifodalardan  $r$  va  $r_n$  larning qiymatlari qo'yilsa, quyidagi tenglik hosil bo'ladi:

$$\mu\omega r^2 = n\hbar. \quad (4.81)$$

(4.81) formulada yadroning harakati hisobga olingan. Bunda  $\mu$  – yadro va elektronning umumiyl massa markazi atrofida harakatlanishini hisobga oladigan keltirilgan massa deyiladi va quyidagicha aniqlanadi:

$$\mu = \frac{mM}{m + M}. \quad (4.82)$$

(4.81) formula yadroning harakati hisobga olinmaydigan quyidagi

$$L = m\vartheta r = n\hbar \quad (4.83)$$

formula kabitdir. Haqiqatan ham,  $\vartheta = \omega r$  ekanligidan (4.83) formulani statsionar holat uchun quyidagicha yozish mumkin:

$$L = m\omega r^2 = n\hbar. \quad (4.84)$$

Shunday qilib, (4.81) formula (4.84) formula bilan mos keladi. (4.81) formulada faqat elektron massasi keltirilgan massa bilan almashirilgan. (4.84) formula (4.81) formulaga nisbatan taqrifiy formuladir. Buni  $M >> m$  va

$$\mu = \frac{mM}{m+M} \approx m,$$

ekanligidan ko'rish mumkin. Tizimning potensial energiyasi quydagicha aniqlanadi:

$$U = -\frac{e^2}{4\pi\epsilon_0 r}, \quad (4.85)$$

Kinetik energiyasi esa:

$$K = \frac{1}{2} m \dot{r}_e^2 + \frac{1}{2} M \dot{r}_n^2 = \frac{\omega^2}{2} (mr_e^2 + Mr_n^2). \quad (4.86)$$

Ma'lum o'zgartirishlardan so'ng

$$K = \frac{1}{2} \mu \omega^2 r^2. \quad (4.87)$$

Elektron harakatiga Nyuton qonuni tatbiq qilinganda:

$$\frac{e^2}{4\pi\epsilon_0 r^2} = m \frac{\dot{r}_e^2}{r_e} = m\omega^2 r_e. \quad (4.88)$$

Bu formulaga (4.77)dan  $r_e$  ning qiymati qo'yilganda

$$\frac{1}{4\pi\epsilon_0} \frac{e^2}{r^2} = \frac{mM}{m+M} \omega^2 r, \quad (4.89)$$

yoki

$$\frac{1}{4\pi\epsilon_0} \frac{e^2}{r^2} = \mu \omega^2 r. \quad (4.90)$$

(4.84) formuladan  $\omega$  ni topib,  $\omega^2$  ifodasini (4.90) formulaga qo'yilganda

$$\frac{1}{4\pi\epsilon_0} \frac{e^2}{r^2} = \mu \left( \frac{n\hbar}{\mu r^2} \right)^2 r. \quad (4.91)$$

(4.91)dan atom statsionar orbitalalar o'lchami aniqlanadi:

$$r_n = r = \frac{4\pi\epsilon_0 n^2 \hbar^2}{\mu e^2}. \quad (4.92)$$

(4.92) ifoda yadro harakati hisobga olinmagan holda orbita

o'lchamini aniqlash formulasidan faqat  $m$  o'rnida keltirilgan massa  $\mu$  yozilishi bilan farq qiladi. (4.87) va (4.88) formulalardan:

$$K = \frac{1}{2} \mu \omega^2 r^2 = \frac{1}{8\pi\epsilon_0} \frac{e^2}{r}.$$

Tizimning kinetik va potensial energiyalar yig'indisiga teng bo'lgan to'liq energiyasi esa quyidagicha:

$$E = -\frac{1}{8\pi\epsilon_0} \frac{e^2}{r}.$$

bu ifodada  $r = r_n$  ekanligi hisobga olinsa, tizimning yadro harakati hisobga olingandagi to'liq energiyasi hosil bo'ladi:

$$E_n = -\frac{\mu e^2}{32\pi\epsilon_0^2 \hbar^2 n^2}. \quad (4.93)$$

Yadro harakati hisobga olinmagan holda esa elektronning to'liq energiyasi quyidagicha edi:

$$E_n = -\frac{me^4}{32\pi^2 \epsilon_0^2 \hbar^2 n^2}. \quad (4.94)$$

Elektron energiyasi  $E_i$  bo'lgan holatdan energiyasi  $E_f$  ( $E > E_f$ ) bo'lgan holatga o'tganda chiqarilgan foton energiyasi chastotasi

$$\nu = \frac{c}{\lambda} = \frac{E_i - E_f}{\hbar}$$

ko'rinishni oladi. Bu formulaga  $E_i$ ,  $E_f$  larning (4.93) ifodalangan tegishli qiymatlari qo'yilganda:

$$\nu = \frac{\mu e^4}{64\pi^3 \hbar^3 \epsilon_0^2} \left( \frac{1}{n_f^2} - \frac{1}{n_i^2} \right). \quad (4.95)$$

$\nu = \frac{c}{\lambda}$  va  $\hbar = 2\pi\hbar$  ekanligini hisobga olib, atom chiqaradigan foton energiyasining to'lqin uzunligini quyidagicha aniqlash mumkin:

$$\frac{1}{\lambda} = \frac{\mu e^4}{64\pi^3 \hbar^3 \epsilon_0^2 c} \left( \frac{1}{n_f^2} - \frac{1}{n_i^2} \right). \quad (4.96)$$

U vaqtida yadro harakati hisobga olingan holda Ridberg doimiyligi formulasi quyidagicha ifodalananadi:

$$R_\mu = \frac{\mu e^4}{64\pi^3 \hbar^3 \epsilon_0^2 c}, \quad (4.97)$$

yoki

$$\frac{1}{\lambda} = R_\mu \left( \frac{1}{n_f^2} - \frac{1}{n_i^2} \right), \quad (4.98)$$

$R_\mu$  ning yadro harakati hisobga olinmagan holdagi  $R$  ga nisbati

$$\frac{R_\mu}{R} = \frac{\mu}{m} = \frac{1}{1 + \frac{m}{M}} < 1. \quad (4.99)$$

Yadro harakatini hisobga olgan holda (4.93) va olmagan holda (4.94) formulalar orqali energetik sathlar energiyalari hisoblanishidan ko‘rinadiki,  $n$  ning bir xil qiymati uchun hosil qilingan energiya natijalari bir-biridan quyidagicha farq qiladi:

$$E_n \text{ (hisobga olgan holda)} > E_n \text{ (hisobga olmagan holda)}.$$

Yadro harakatini hisobga olganda energiyasi hisoblangan energetik sathlar  $E_\infty = 0$  tomonga biroz siljigan bo‘ladi. (4.98) va (4.37) formulalar orqali hisoblangan natijalar to‘lqin uzunlik uchun quyidagilarni beradi:

$$\frac{1}{\lambda} \text{ (hisobga olgan holda)} < \frac{1}{\lambda} \text{ (hisobga olmagan holda)}.$$

Bundan esa yadro harakati hisobga olinganda foton chiqaradigan to‘lqin uzunligining qiymati yadro harakatini hisobga olmagan hisoblashlar qiymatidan biroz katta bo‘ladi. Yadro harakatini hisobga olgan va olmagan hollarda hisoblangan Ridberg doimiyligi qiymatlari quyidagicha:

$$R_\mu = 109677,58 \text{ sm}^{-1} \text{ (hisobga olgan holda)}$$

$$R = 109737,31 \text{ sm}^{-1} \text{ (hisobga olmagan holda)}.$$

Vodorodning og‘ir izotopi deyteriy  ${}^3D$  bir proton va bir neytron-dan tuzilgan. Neytron massasi proton massasidan juda

oz bo'lsa-da, farq qiladi ( $m_{\mu} = 1838m_e$ ,  $m = 1836m_e$ ,  $m_e = 9,11 \cdot 10^{-28}\text{g} = 9,11 \cdot 10^{-31}\text{kg} = 0,000511 \text{ m.a.b}$ ). Deyteriyning keltirilgan massasi

$$\mu_D = \frac{m}{1 + \frac{m}{2M}} \quad (4.100)$$

ya'ni  $\mu_D > \mu$  ( $\mu$  – vodorod atomi keltirilgan massasi,  $\mu_D$  – deyteriy atomi keltirilgan massasi). Ridberg doimiyligi keltirilgan massaga proporsional bo'lganligidan deyteriy uchun Ridberg doimiyligi, vodorod uchun Ridberg doimiyligidan katta bo'lishligi kelib chiqadi, ya'ni

$$R_{\mu_D} > R_{\mu}.$$

$R_{\mu_D}$  va  $R_{\mu}$  lar orasidagi ana shu farq amerikalik fizik T.K. Yuri tomonidan deyteriyning ochilishida muhim o'rinn tutdi. Bu kashfiyat uchun Yuriga 1934-yilda kimyo bo'yicha Nobel mukofoti berildi.

#### 4.18-§. Spektral chiziqlarning izotopik siljishi

Bundan oldingi mavzuda yadro harakatini hisobga olish to'g'risida so'z yuritildi. Yadro harakati hisobga olinganda, umumiy massa markazi atrofida harakatlanayotgan elektron va yadrodan iborat tizimning to'liq energiyasi  $E_{\mu}$  va Ridberg doimiyligi  $R_{\mu}$  tegishlicha (4.93) va (4.97) formulalar bilan ifodalanadi. Yadro harakati cheksiz katta bo'lib, uning harakati hisobga olinmagan, yadro ko'zg'almas deb qaralgan holda elektron energiyasi  $E$  (4.94) ifoda va Ridberg doimiyligi –  $R$  (4.100) formulalar bilan hisoblanadi. (4.99) formulaga asosan  $R_{\mu}$ ,  $E_{\mu}$  va  $R$ ,  $E$  kattaliklar orasida quyidagi munosabat mavjud:

$$E_{\mu} = E \frac{M}{M + m}; \quad R_{\mu} = R \frac{M_z}{M_z + m}.$$

Yadro harakatini hisobga oladigan (4.93) formula va yadro harakatini hisobga olmaydigan (4.94) formulalar orqali atom energetik sathlari energiyalari kvant soni  $n$  ning bir xil qiymati uchun hisoblanganda, ya'ni  $E_{\mu}$  va  $E$  lar hisoblanadi.

Bundan quyidagi natija hosil bo'ladi:

$$E_u > E.$$

Yadro harakatini hisobga olish bilan hisoblangan energetik sathlar  $E=0$  bo'lgan tomonga biroz siljigan bo'ladi. (4.34) va (4.96) formulalarni taqqoslashdan quyidagi xulosaga kelish mumkin:

$1/\lambda$  (yadro harakati hisobga olinganda)  $< 1/\lambda$  (hisobga olinmaganda).

Bu natijalardan ko'rindiki, yadro harakati hisobga olinganda atom chiqaradigan foton energiyasi to'lqin uzunligi, yadro harakati hisobga olinmaganda hisoblangan to'lqin uzunligidan kattadir. (4.97) formuladan Ridberg doimiyligi keltiralgan massaga to'g'ri proporsional ekanligi ko'rindi. Bu esa  $Z$  doimiy bo'lganda yadro massasining o'zgarishi spektral chiziqlarning siljishiga olib keladi. Bunday siljish *izotopik siljish* deyiladi. Yadro massasi qancha katta bo'lsa,  $M_{ya}/M_{ya} + m$  nisbat ham shuncha katta bo'lishi spektral chiziqlarining qisqa to'lqinlar tomoniga siljishiga sabab bo'ladi. Bu xulosa tajribada tasdiqlangan. Bunday bo'lishni vodorod atomi izotoplarida ko'rish mumkin.

Deyteriy ( $^2D$ ), tritiy ( $^3T$ ), protiy ( $^1H$ ) vodorod izotoplari hisoblanadi. Vodorodning og'ir izotopi deyteriy bir proton va bir neytordonan tuzilgan. Neytron massasi proton massasidan oz miqdorda farq qiladi. U vaqtda deyteriy uchun keltirilgan massa quyidagiga teng bo'ladi:

$$\mu_D = \frac{m}{1 + m/2M},$$

ya'ni,  $\mu_D > \mu$  ( $\mu$  – vodorod uchun keltirilgan massa). Ridberg doimiyligi keltirilgan massaga to'g'ri proporsionaldir ((4.97) formula). Demak, deyteriy uchun Ridberg doimiyligi vodorod uchun berilgan Ridberg doimiyligidan bir qancha katta bo'ladi, ya'ni,

$R_{u_D} > R_\mu$ . Ridberg doimiyliklari orasidagi ana shu farq atom spektral chiziqlarning siljishiga olib keladi.

Bunday siljish vodorod atomi izotoplarida kuzatiladi. *Izotoplar* deb, zaryadi ( $Ze$ ) bir xil, ammo massa sonlari ( $A$ ) har xil bo'lgan yadrolarga aytildi. Yoki protonlar soni bir xil, neytronlar soni har

xil bo'lgan atomlarga aytildi. Deyteriy va tritiylar vodorod izotoplari hisoblanadi. Deyteriy atomi yadrosi *deytron* deyiladi, bu yadro bir proton va bir neytrondan tashkil topgan. Tritiy yadrosi triton deyilib, bir proton va ikki neytrondan iborat. Izotoplarning massalari orasidagi farq, ularning spektrlardagi spektral chiziqlarni bir-biriga nisbatan siljishlariga olib keladi. Spektral chiziqlarning bunday siljishi *izotopik siljishdir*. Deyteriy va tritiylarning spektral chiziqlari qisqa to'lqinli sohaga siljigan bo'ladi. Lekin bu siljish unchalik katta emas, vodorod ( ${}_1^1\text{H}$ ) va deyteriy ( ${}_1^2\text{D}$ )lar uchun Ridberg doimiyligi formulalarini quyidagicha yozish mumkin:

$$R_D = R(1 + m / M_D) - \text{deyteriy uchun};$$

$$R_H = R(1 - m / M_H) - \text{vodorod uchun}.$$

U vaqtida spektral chiziqlar siljishini chastotalar siljishi orqali quyidagicha aniqlash mumkin:

$$\Delta\nu = R_D - R_H = R \left( \frac{m}{M_H} - \frac{m}{M_D} \right) = \frac{Rm}{2M_H}.$$

Ushbu formulada  $M_D \approx 2M_H$  va  $m \ll M_H$  ( $m$  – elektronning massasi).

Spektral chiziqlar siljishidan hosil bo'ladigan chastotalarning bunday farqi  $\Delta\nu$  tajribada tasdiqlangan. Deyteriy atomlari oddiy og'ir suv molekulasi tarkibida ham mavjud, ya'ni og'ir suv molekulasida vodorod atomlari deyteriy atomlari bilan almashgan bo'ladi. Suvda deyteriyning bir atomi besh yarim ming vodorod atomlariga to'g'ri keladi.

Shuning uchun deyteriy atomlari chiqaradigan nurlanish chizig'i intensivligi vodorod atomlari chiqaradigan nurlanish chizig'i intensivligiga nisbatan juda kuchsiz bo'ladi. Bu chiziqlarning siljishini bilgan holda izotoplar massasini hisoblash mumkin, nurlanish chiziqlari intensivliklari farqini bilgan holda izotoplar konsentratsiyasini aniqlash mumkin. Elementlar izotop tarkibini tahlil qilishning izotopik siljishga asoslangan bunday usuli amaliyotda keng qo'llaniladi.

#### **4.19-§. Bor nazariyasining asosiy kamchiliklari**

Makrodunyo hodisalarini o'rganishda yuzaga kelgan klassik fizika mikrodunyo hodisalariga tatbiq qilinishida principial qiyinchiliklarga duch keldi. Mikrodunyo hodisalarini ifodalash uchun klassik fizika qonunlarini tatbiq qilish mumkin emasligini, yangi kvant qonuniyatlar kerakligini tushunishda Bor nazariysi katta qadam bo'ldi.

Mikrodunyoda yangi principial tushunchalar va qonunlar talab qilinadi. Bunda birinchi o'rinda Plank tomonidan ochilgan kvant tushunchasi turishi kerak. Bor nazariysi muhim natijalarga olib kelgan juda ko'p tajribalarning qo'yilishiga olib keldi. Borning ikki postulati tajribada kuzatilgan hodisalarni klassifikatsiya va sifatiy tahlil qilishda asos bo'ldi.

Masalan, bu nazariya asosida atom va molekulalar spektroskopiyasidagi juda ko'p tajriba natijalari klassifikatsiya qilindi va umumlashtirildi. Lekin ularni to'liq tushunish uchun Borning ikki postulati yetarli emas edi. Ularga kvantlash qoidalarini ham kiritish talab qilindi. Kvantlash qoidasi yordamida atom energetik sathlari energiyalari hisoblanishi mumkin. Bor bir elektronli atomlarda – eng oddiy vodorod atomida elektronlarning doiraviy orbitallarini kvantlash qoidasini taklif qildi. Keyinchalik Zommerfeld Borning kvantlash qoidasini elektron harakatining elliptik orbitasi uchun umumlashtirdi. Lekin kvantlash qoidasini ko'p elektronli atomlarga, hatto geliy atomiga qo'llab bo'lmadi.

Lekin Bor nazariysi yuzaga kelgan vaqtidan boshlab unda kamchiliklar mavjudligi ma'lum bo'ldi. Bor nazariysi sof klassik ham, sof kvant nazariysi ham emas edi. Bu nazariya yarim klassik, yarim kvant nazariya edi. Bor nazariyasidagi kamchiliklar uning vodorod atomiga tatbiq qilinishida ko'rindi. Bu nazariya ishqoriy metallar spektrining dublet tuzilishini tushuntira olmadi. Bor nazariysi asosida geliy atomi nazariyasini tuzishga bo'lgan urinishlar befoyda bo'ldi. Bu nazariya ko'p elektronli atomlar kvantlanishini, almashinish kuchlarining mavjudligini, bu bilan molekulalardagi kimyoviy bog'lanishlarni tushuntira olmadi. Davriy bo'lmagan harakatlarning kvantlanishi, zarralar difraksiyasi, atom statsionar holatlarda energiya chiqarmasligining sabablari Bor nazariysi doirasida tushunarli bo'lmadi. Bundan tashqari, elektronning yadro

atrofida aylanma orbitalarda harakatlanishini ham tajribada kuzatish mumkin emas edi. Bor nazariyasi orqali eng oddiy bo'lgan vodorod atomi spektrida spektral chiziqlar chastotasini hisoblash mumkin bo'ldi, lekin spektral chiziqlarning intensivligini va qutblanishini aniqlab bo'lmasdi. Intensivlik va qutblanishini aniqlash uchun moslik prinsipidan foydalaniadi. Moslik prinsipi esa, faqat kvant sonlarining katta qiymatida to'g'ri bo'ladi, bunda intensivlik va qutblanishni hisoblashlar klassik fizika qonunlari asosida bajariladi. Bor nazariyasi bu natijalarni kvant sonlarining kichik qiymatlariga ham tatbiq qildi. Lekin bunga hech qanday asos yo'q edi. Shunday qilib, spektral chiziqlarning intensivligi va qutblanishi klassik fizika nuqtayi nazaridan aniqlandi. U faqat atom statsionar holatlarining mavjudligini yoki elektronlarning statsionar orbitalalarining mavjudligini ko'rsata oldi.

Bu esa klassik mexanika nuqtai nazaridan tushunarli emas edi. Klassik elektrodinamika qonunlarini ishlatish to'g'ri bo'lmasada (chunki nurlanish bo'lmaydi), elektronlarning statsionar holatdagi harakatiga klassik mexanika qonunlari tatbiq qilindi. Lekin G.Bregg hazil tariqasida shunday deydi: dushanba, chorshanba, juma kunlari Bor nazariyasiga klassik fizika qonunlarini, seshanba, payshanba, shanba kunlari kvant fizika qonuniyatlarini qo'llash kerak. Borning ikki postulati tajribada tasdiqlangan, shuning uchun ular to'g'ri deb hisoblanadi. Bor nazariyasi kvant mexanikasining paydo bo'lishidagi oraliq davr hisoblanadi. Bor nazariyasining muvaffaqiyati shundaki, bu nazariya Ridberg doimiyligi va atom o'Ichamini hisoblashlarda Plank doimiyligi  $\hbar$  materiyaning barcha turlarini ifodalashda universal fundamental kattalik sifatida muhim ahamiyatga ega ekanligini ko'rsatdi. Bor modelini qo'llash ma'lum chegaralarga ega bo'lsada, bu model energetik holatlar va boshqa ko'pgina tushunchalarni kiritishda qulay bo'lgan mexanik modeldir. Bor modeli faqat postulat sifatida qabul qilingan edi. Bor nazariyasidagi kamchiliklar vodorod atomi hodisalarini kvant mexanikasi doirasida tushuntirilishi bilan bartaraf qilindi.

### **Nazorat savollari**

1. Atom tuzilishining Tomson modelini tushuntiring. Bu modeldan foydalaniib qaysi kattalik aniqlangan?

2. Rezerford tajribalari. Rezerford formulasi, uning mohiyati qanday?
3. Rezerford tajribalaridan qilingan xulosalar va atom tuzilishining planetar modelini tushuntiring.
4. Planetar model qanday jarayonlarni tushuntira olmadi?
5. Rezerford formulasidan foydalanib, qaysi kattalikni aniqlash mumkin?
6. Bor postulatlarini ayting.
7. Bor nazariyasiga asosan elektron orbitasining radiusi, elektron tezligi, energiyasi qaysi formulalar yordamida hisoblanadi?
8. Frank va Gers tajribasining mohiyati qanday?
9. Vodorod atomi spektrida qanday qonuniyatlar aniqlangan?
10. Vodorod atomi spektrida qanday seriyalar aniqlangan?
11. Balmerning umumlashgan formulasini va kombinatsion prinsipini tushuntiring.
12. Vodorod atomi energetik sathlari diagrammasini chizing va izohlang.
13. Izotopik siljishni tushuntiring.
14. Bor nazariyasining kamchiliklari nimalardan iborat edi?
15. Nima uchun keltirilgan massa tushunchasi kiritilgan?

**V BOB**  
**KVANT MEXANIKASINING ASOSLARI**

---

### 5.1-§. To'lqin funksiyasi

Kvant mexanikasida mikrozarranning holati to'lqin funksiyasi bilan ifodalanadi. To'lqin funksiyasi  $\psi$  harfi bilan belgilanadi va «psi-funksiya» deb o'qiladi. Kvant mexanikasida mikrozarranning holatini klassik mexanikadagi kabi oldindan aniq aytib bo'lmaydi. Kvant mexanikasida mikrozarranning u yoki bu holatining ehtimolligi aniqlanishi mumkin. Shuning uchun to'lqin funksiya deyilganda, koordinata va vaqtga bog'liq bo'lgan shunday matematik ifoda  $\psi(x, y, z, t)$  tushunilishi kerakki, uning yordamida berilgan vaqtda mikrozarralarning fazodagi taqsimotini (joyini) aniqlash mumkin bo'lsin.

To'lqin funksiyasi qanday fizik ma'noga ega? To'lqin funksiyasi orqali mikrozarranning qaysi xarakteristikalarini aniqlash mumkin, degan savollar tug'iladi. Bu savollarga beriladigan javoblarni ko'ray-lik. To'lqin funksiyasi – elektr va magnit maydonlari tushunchalari kabi fizik tushunchadir. Maks Born to'lqin funksiyasiga quyidagicha ta'rif beradi: to'lqin funksiyasi ehtimoliyat interpretatsiyasiga ega va uning modulining kvadrati  $|\psi|^2$  fazoning berilgan nuqtasida va berilgan vaqtda zarraning topilish ehtimoliyatiga proporsional bo'ladi. Zarraning topilish ehtimoliyatni maydon intensivligi kuchli bo'lgan sohada katta bo'ladi. Zarraning  $dx$  uzunlik elementida topilishining ehtimoliyatini quyidagicha ifodalanadi:

$$P = \psi^* \psi dx.$$

Bu ifodaga normalash qoidasini qo'llab quyidagi formulani hosil qilish mumkin:

$$\int_{-\infty}^{\infty} \psi^* \psi dx = 1, \quad (5.1)$$

yoki umumiy holda zarraning  $dV = dx dy dz$  hajm elementida topilish ehtimoliyatini quyidagicha yozish mumkin:

$$\int_{-\infty}^{\infty} \int_{-\infty}^{\infty} \int_{-\infty}^{\infty} \psi^* \psi dV = 1. \quad (5.2)$$

(5.1) va (5.2) formulalar to'lqin funksiyasini normalash sharti deyiladi va zarraning mavjudligini, fazoning qaysidir biror nuqtasida bo'lishini ko'rsatadi.

Bunday normalash xususiy qiymatlarning spektri diskret bo'l-ganda to'g'ri bo'ladi. Xususiy qiymatlarning spektri uzluksiz bo'l-ganda,  $|\psi|^2$  dan olingan integral cheksizlikka aylanadi, shuning uchun xususiy qiymatlar uzluksiz bo'lganda boshqa normalash shartidan foydalilanildi.

Noaniqlik munosabatlaridan ko'rindiki, klassik fizikada ishlatalidigan deterministik prinsiplar kvant mexanikasida to'g'ri bo'lmaydi, chunki zarraning turgan joyi va tezligini bir vaqtda absolut aniqlikda o'chab bo'lmaydi.

Demak, kvant mexanikasida zarraning trayektoriyasi to'g'risida gapirib bo'lmaydi. Kvant mexanikasida faqat fazoning berilgan nuqtasida berilgan vaqtda zarraning topilish ehtimolligining zichligi  $\psi^* \psi$  ni aniqlash mumkin bo'ladi. Ehtimolligining o'zi esa  $\psi^* \psi dV$  ko'rinishda ifodalanadi.

Umuman,  $\psi$  funksiya fizikaviy jarayonlarni ifodalashda foydalilanildigan qulay instrument hisoblanadi.

Yuqorida mikrozarralar ham zarra ham to'lqin xususiyatiga ega ekanligi qarab chiqildi. Mikrozarralarning zarra xususiyati ularning o'zaro ta'sirida (fotoeffekt, Kompton effekti hodisalarida), to'lqin xususiyati esa ularning tarqalishida, interferensiya, difraksiya hodisalarini hosil qilishida namoyon bo'ladi.  $P$  impulsga va  $E$  energiyaga ega bo'lgan mikrozarraning to'lqin xususiyati quyidagi ko'rinishdagi de-Broyl yassi to'lqin funksiyasi orqali ifodalanadi:

$$\psi(r, t) = A e^{\frac{-i}{\hbar} (Et - Pr)}. \quad (5.3)$$

(5.3) formulada:  $A$  – doimiy son,  $\psi(r, t)$  – de-Broyl yassi to'lqin funksiyasi,  $t$  – vaqt,  $r$  – radius vektor.

## 5.2-§. Shredinger tenglamasi

Yuqorida  $E$  – energiya va  $P$  – impulsga ega bo‘lgan mikrozarra to‘lqin xususiyatiga ega ekanligi qarab chiqildi. Aniq biror yo‘nalishda erkin harakatlanayotgan zarraning holati de-Broyl yassi to‘lqin funksiyasi bilan ifodalanadi:

$$\psi = Ae^{i(kr-\omega t)}. \quad (5.4)$$

(5.4) formulada:  $\psi$  – psi funksiya,  $k$  – to‘lqin soni  $k = \frac{P}{\hbar}$ ,  $r$  – radius-vektor,  $\omega$  – doiraviy chastota,  $t$  – vaqt,  $i = \sqrt{-1}$  – kompleks son. Lekin zarra turli kuch maydonlarida ham harakatlanishi mumkin. Bunda uning harakati murakkabroq to‘lqin funksiyasi bilan ifodalanadi.

Mikrozarralarning harakatini uning to‘lqin xususiyatini hisobga olgan holda ifodalaydigan to‘lqin tenglama 1926-yilda Ervin Shredinger tomonidan taklif etildi. Shredinger tenglamasi faraz sifatida qabul qilingan, uning to‘g‘riligi bu tenglamadan kelib chiqadigan xulosalarning tajriba natijalariga mos kelishi bilan tasdiqlanadi. Shredinger tenglamasi kvant mexanikasining asosiy tenglamasi bo‘lib, norelyativistik kvant mexanikasi uchun, ya’ni yorug‘likning vakuumdagi tezligidan kichik ( $\theta \ll c$ ) bo‘lgan tezliklar uchun to‘g‘ridir. Shredinger o‘z tenglamasini yaratgandan so‘ng, uni vodorod atomiga tatbiq qilib, energiyaning xususiy qiymatlarining spektrini hosil qildi. Bu spektr vodorod atomining Bor nazariyasi orqali hosil qilingan spektr bilan mos keladi.

Shredinger tenglamasi faqat xususiy yechimlar uchun to‘g‘ri bo‘lmasdan, balki barcha yechimlar uchun to‘g‘ri bo‘ladigan umumiylenglama bo‘lishi kerak. Shuning uchun bu tenglamaga fundamental doimiylar, masalan, Plank doimiysi, zarraning massasi, impulsi, zarra harakatlanadigan maydon kuchlari kirishi kerak. Shredinger tenglamasini izlashda, uning yechimlaridan biri erkin fazoda de-Broyl yassi to‘lqini funksiyasi ekanligini ko‘rish mumkin.

Shredinger o‘z tenglamasini yaratishda de-Broyl va Plank munosabatlarini asos qilib oldi, ya’ni:

$$\lambda = \frac{\hbar}{P} \text{ va } v = \frac{E}{\hbar} .$$

U holda zarraning to'liq energiyasi quyidagi ko'rinishda aniqlanadi:

$$E = \frac{P^2}{2m} + U = \text{const.} \quad (5.4a)$$

bunda:  $P^2/2m$  – zarraning klassik fizikadagi kinetik energiyasi,  $P$  – zarraning impulsi. Zarra erkin bo'lgani uchun  $E$  va  $P$  kattaliklar doimiy va  $U$  – potensial energiya nolga teng deb qaraladi.

$\psi$  funksiya o'z ma'nosiga ko'ra, quyidagi shartlarni qanoatlantirishi zarur:

1.  $\psi$  funksiya chekli bo'lishi kerak, chunki zarraning fazoda topilish ehtimolligi birdan katta bo'la olmaydi.

2.  $\psi$  funksiya bir qiymatli bo'lishi kerak, chunki zarrani fazoning biror nuqtasida qayd qilish ehtimolligining qiymati bir nechta bo'lishi mumkin emas.

3.  $\psi$  funksiya uzluksiz bo'lishi kerak, chunki zarraning topilish ehtimolligi saqrash yo'li bilan o'zgara olmaydi.

Yechimi yuqorida keltirilgan shartlarni qanoatlantiradigan  $\psi$  funksiya uchun differensial tenglamani yechishda  $P$  – impulsni doimiy hisoblab, (5.4) formulani x koordinata bo'yicha differensiallaysaymiz:

$$\frac{\partial \psi}{\partial x} = ik_x \psi; \quad \frac{\partial^2 \psi}{\partial x^2} = -k_x^2 \psi.$$

(5.4) formulani  $y$  va  $z$  koordinata o'qlari bo'yicha differensiallashdan ham shunday munosabatlar hosil bo'ladi.

$x, y, z$  koordinatalar bo'yicha ikkinchi tartibli hosilalarni qo'shishdan quyidagi ifoda hosil bo'ladi:

$$\nabla^2 \psi = -k^2 \psi = -\frac{P^2}{\hbar^2} \psi, \quad (5.5)$$

bu yerda

$$\nabla^2 = \frac{\partial^2}{\partial x^2} + \frac{\partial^2}{\partial y^2} + \frac{\partial^2}{\partial z^2},$$

$\nabla^2$  – Laplas operatori deyiladi.

(5.5) ifoda differensial tenglama bo'lib, zarraning aniq doimiy impuls bilan qilayotgan harakatini ifodalaydi. Endi (5.4) formulada

○ ni doimiy deb hisoblab, (5.4) tenglamani vaqt bo'yicha differensial-laymiz:

$$\frac{\partial \psi}{\partial t} = -i\omega\psi = -\frac{E}{\hbar}\psi, \quad (5.6)$$

$E$  – zarraning kinetik energiyasi (5.4a) formulada  $U=0$  bo'lganda,  $E$  – kinetik energiyaga teng bo'ladi).

(5.6) tenglama erkin fazoda zarraning doimiy kinetik energiya bilan qilayotgan harakatini ifodalaydi. (5.5)ni (5.6) tenglamaga hadma had bo'lib va norelyativistik mexanikada kinetik energiya  $E=P^2/2m$  ekanligi hisobga olinganda, quyidagi bir jinsli tenglama hosil bo'ladi:

$$i\hbar \frac{\partial \psi}{\partial t} = -\frac{\hbar^2}{2m} \nabla^2 \psi. \quad (5.7)$$

(5.7) tenglamaga biror aniq harakatni ajratib ko'rsatadigan xususiy kattaliklar kirmaydi. Shuning uchun (5.7) tenglama zarraning erkin fazodagi istalgan harakatlari uchun to'g'ri bo'ladi. (5.7) tenglama zarraning potensial kuch maydoni bo'lmagandagi ( $U=0$ ) *Shredinger tenglamasidir*.

(5.7) tenglamani zarraning potensial kuch maydoni ta'sirida qiladigan harakati uchun ham umumlashtirish mumkin. Potensial kuch maydoni  $U(r)$  – potensial energiya bilan xarakterlanadi. Zarra harakatiga potensial kuch maydonining ta'siri hisobga olinganda, (5.7) tenglama quyidagi ko'rinishda yoziladi:

$$i\hbar \frac{\partial \psi}{\partial t} = -\frac{\hbar^2}{2m} \nabla^2 \psi + U(r)\psi. \quad (5.8)$$

(5.8) tenglama zarraning potensial kuch maydonidagi harakatini ifodalaydigan *Shredinger tenglamasidir*. To'lqin funksiyasi  $\psi$  ning interpretatsiyasiga ko'ra, zarralar fazoning aniq joyida to'planmagan, zarralar aniq biror ehtimollik bilan fazoda «bo'yalgan». Bunday hol (5.8) tenglamaning yozilishida hisobga olingan bo'lishi kerak. (5.8) tenglamada  $U(r)$  – zarraning fazoda mumkin bo'lgan barcha holatlarini va ularning ehtimolligini hisobga oladigan potensial energiya bo'lishi kerak. Haqiqatda esa (5.8) tenglamada  $U(r)$  – zarralarning klassik fizikadagi potensial energiyasi, ya'ni  $U(r)$  – potensial maydonda to'plangan zarralarning potensial energiyasi

sifatida qaraladi. Shredinger tenglamasi vaqt bo'yicha birinchi tartibli tenglamadir. Bundan esa  $\psi$  – to'lqin funksiya butun fazoda biror vaqtida aniqlansa, vaqtning keyingi barcha qiymatlarida ham  $\psi$  – funksiya butun fazoda bir qiymatda aniqlanishi kelib chiqadi.  $\psi$  – to'lqin funksiyasi haqiqatda kuzatiladigan namunalar bilan ehtimollik munosabatlari orqali bog'liqdir. Bu munosabatlar holatlarning superpozisiya prinsipi bilan ifodalanadi. Superpozitsiya prinsipining bajarilishi uchun Shredinger tenglamasi  $\psi$  – funksiyaga nisbatan chiziqli va bir jinsli bo'lishi kerak. Superpozitsiya prinsipi matematik shaklda ikkita mulohazada ko'rindi. Birinchidan, agar  $\psi_1$  va  $\psi_2$  funksiyalar Shredinger tenglamasining yechimlari bo'lsa, ularning doimiy  $a_1$  va  $a_2$  koeffisentlarga (umuman olganda, kompleks) ega bo'lgan har qanday chiziqli kombinasiyasi  $a_1\psi_1+a_2\psi_2$  ham shu tenglamaning yechimi bo'ladi. Ikkinchidan, agar  $\psi_1$  va  $\psi_2$  to'lqin funksiyalar tizimning qandaydir ikkita holatini ifodalasa, ularning chiziqli kombinatsiyasi  $a_1\psi_1+a_2\psi_2$  ham o'sha tizimning qandaydir holatini ifodalaydi. Zarraning holati  $a_1$  va  $a_2$  koeffitsientlarning o'zi bilan aniqlanmasdan, balki  $a_1/a_2$  nisbat bilan aniqlanadi. Agar har ikkala koeffitsientni bir xil kompleks doimiylikka ko'paytirilsa, holat o'zgarmaydi. Bu esa  $\psi=a_1\psi_1+a_2\psi_2$  funksiyani normalashga imkon beradi (agar butun fazo bo'yicha olingan integral  $\int \psi^* \psi dV$  to'g'ri kelsa). Kvant mexanikasida statsionar holat muhim o'rinni tutadi. Stasionar holat shunday holatki, bunda kuzatiladigan fizik kattaliklar vaqt o'tishi bilan o'zgarmaydi.  $\psi$  – to'lqin funksiyasining o'zi kuzatiladigan kattaliklarga kirmaydi,  $\psi$  – to'lqin funksiya prinsipial ravishda kuzatilmaydi. Kvant mexanikasi qonunlari asosida  $\psi$  – funksiyadan hosil qilinadigan va kuzatiladigan fizikaviy kattaliklar vaqt o'tishi bilan o'zgarmasligi kerak. Statsionar holatlarda

$$\psi(r, t) = \psi(r)e^{-i\omega t}, \quad (5.9)$$

Bu formulada  $\psi(r)$  – funksiya vaqtga bog'liq emas, doiraviy chastota  $\omega$  doimiydir.

Prinsipial kuzatiladigan kattaliklarning  $\psi$  – funksiyadan hosil qilinishini e'tiborga olmay, bu kattaliklardan biri bo'lgan ehtimoliyat zichligi  $\rho = \psi^* \psi$  ning (5.9) formuladagi holatda vaqt o'tishi bilan

o'zgarmay qolishini ko'rish mumkin. Haqiqatdan ham ehtimoliyat zichligi  $\rho = \psi^* \psi$  (5.9) holatda vaqt o'tishi bilan doimiy qoladi:

$$\rho = \psi^*(r)e^{i\omega t}\psi(r)e^{-i\omega t} = \psi^*(r)\psi(r),$$

bu kattalik esa vaqtga bog'liq bo'lmaydi. Statsionar holatda  $\psi(r)$  – funksiyani aniqlash uchun (5.9) ifodani (5.8) tenglamaga qo'yamiz:

$$\hbar\omega\psi = \left[ -\frac{\hbar^2}{2m} \nabla^2 + U(r) \right] \psi, \quad (5.10)$$

$\hbar\omega$  – kattalik statsionar holatda zarraning to'liq energiyasi  $E$  ni ifodalaydi. Shunday qilib, statsionar holatda to'liq energiya uchun quyidagi tenglama hosil bo'ladi (to'liq energiya deyilganda, statsionar holatdagi tizim energiyasi tushuniladi):

$$\left[ -\frac{\hbar^2}{2m} \nabla^2 + U(r) \right] \psi(r) = E\psi(r). \quad (5.11)$$

(5.11) tenglamaga vaqt kirmaydi. (5.11) tenglama statsionar holatlar uchun Shredinger tenglamasi deyiladi. Vaqt o'tishi bilan zarraning holati o'zgarmaydigan holat statsionar holat deb ataladi. Statsionar holatda zarraning to'liq energiyasi  $E$  o'zgarmaydi. Zarra hech qanday to'lqin xossasiga ega bo'lmasa,  $U(r)$  funksiya klassik nuqtai nazardan aniqlanadi. Kvant mexanikasida zarraning harakati deyilganda, uning statsionar holatining o'zgarishi tushuniladi. (5.8) tenglama (5.11) tenglamadan farqli ravishda Shredingerning vaqt bo'yicha o'zgaradi-gan yoki umumiy tenglamasi deyiladi, ya'ni Shredingerning nostatsionar tenglamasidir. Vaqt o'tishi bilan zarraning holati o'zgaradigan holat nostatsionar holat deyiladi. Statsionar holatlarda Shredinger tenglamasi superpozitsiya prinsipini qanoatlantiradi. Lekin energiyasi turlicha bo'lgan statsionar holatlar superpozitsiyasi statsionar holat bo'lmaydi. Faqat (5.11) tenglamaning yechimi bo'lgan  $\psi(r)$  ga ba'zi bir talablar qo'yiladi. Bu talablarni  $\psi(r)$  funksiya cheksizlikda va  $U(r)$  – potensial funksiyaning maxsus nuqtalarida qanoatlantirishi kerak. Bunday yechimlar  $E$  ning barcha qiymatlarida to'g'ri bo'lmasdan, balki ayrim qiymatlardagina to'g'ri bo'ladi. Energiyaning bunday qiymatlari esa statsionar holatlarda energiyaning tanlangan (kvantlangan) qiymatlaridir. Jumladan, vodorod atomi uchun hosil qilinadigan bunday energiya

qiymatlari vodorod atomi uchun Bor nazariyasi asosida hisoblangan energiya qiymatlariga mos keladi. (5.11) tenglama superpozitsiya prinsipini hisobga olgan holda Bor chastotasi qoidasiga olib keladi. Bundan ko‘rinadiki, har bir fizik jarayon qandaydir aniq fizik kattaliklarning vaqtga bog‘liq o‘zgarishi bilan xarakterlanadi. Lekin statsionar holatlarda barcha aniq fizik kattaliklar doimiy qoladi. Shuning uchun real fizik hodisalar holatini ifodalaydigan to‘lqin funksiyasi nostatsionar bo‘lishi kerak. Kvant mexanikasining prinsipial masalalarini hal qilishda Shredinger tenglamasi operatorlar orqali ifodalanadi. (5.11) ifodada keltirilgan Shredingerning statsionar tenglamasida qavs ichidagi ifoda operator orqali quyidagicha aniqlanadi:

$$H = -\frac{\hbar^2}{2m} \nabla^2 + U(r). \quad (5.12)$$

Bu formulada  $H$  – Gamilton operatori deyiladi. U vaqtida (5.11) ifodadagi statsionar tenglama qisqa holda quyidagi ko‘rinishda yoziladi:

$$H \psi = E\psi. \quad (5.13)$$

(5.13) tenglama *Shredingerning statsionar tenglamasi* bo‘lib, quyidagicha tushuntiriladi:  $\psi(r)$  funksiyaga ta’sir qiluvchi  $H$  – operator  $\psi(r)$  funksiyaga ko‘paytirilgan to‘liq energiya  $E$  ga teng. Nostatsionar holatlar uchun Shredingerning vaqtga bog‘liq bo‘lgan umumiy tenglamasi (5.8) qisqa holda quyidagi ko‘rinishda yoziladi:

$$i\hbar \frac{\partial \psi}{\partial t} = H \psi. \quad (5.14)$$

(5.13) va (5.14) tenglamalarni taqqoslashdan energiya operatori uchun quyidagi ifoda hosil bo‘ladi:

$$\hat{E} = i\hbar \frac{\partial}{\partial t},$$

U vaqtida Shredingerning vaqtga bog‘liq bo‘lgan umumiy tenglamasi quyidagicha yoziladi:

$$H \psi = E\psi. \quad (5.15)$$

Bu tenglamaning ma’nosi quyidagicha:  $\psi$  funksiyaga ta’sir qiluvchi operator  $H$ ,  $\psi$  funksiyaga ta’sir etuvchi  $\hat{E}$  operatorga teng, ya’ni  $H$  va  $\hat{E}$  lar oddiy skalyar ko‘paytuvchilar emas. To‘lqin funksiyasi  $\psi$  ning vaqt bo‘yicha o‘zgarishi Shredinger tenglamasi (5.15) bilan ifodalanadi. (5.8) va (5.14) tenglamalar nostatsionar holatlar uchun Shredingerning vaqtga bog‘liq bo‘lgan umumiy tenglamasidir.

Agar Shredingerning umumiy tenglamasi kuch maydoni ta’sir qilmagan erkin zarra harakatini ifodalasa, to‘liq energiya  $E$  istalgan qiymatlarni oladi. Bu holda (5.15) tenglamada  $\psi(x,y,z,t)$  to‘lqin funksiya koordinatalar va vaqtning funksiyasi bo‘ladi. To‘liq energiya olishi mumkin bo‘lgan qiymatlar  $\psi(x,y,z,t)$  to‘lqin funksiyasining mumkin bo‘lgan cheksiz ko‘p sondagi yechimlarida ko‘rinadi. Agar erkin zarra qandaydir biror chekli hajmda bo‘lsa, uni statsionar holatda deb hisoblab, (5.13) tenglamadan foydalanish mumkin. Bu tenglamada  $\psi(x,y,z)$  aniq qiymatlarnigina olishi mumkin. Shredinger tenglamasining chekli, bir qiymatli va uzlusiz yechimlarigina ma’noga ega bo‘ladi.

**Statsionar holatlar.** Klassik mexanikada korpuskulaning harakati deganda, uning vaqt o‘tishi bilan fazoda ko‘chishi tushuniladi. Kvant mexanikasida korpuskulaning harakati deganda, uning umuman o‘zgarishi tushuniladi. Shuning uchun harakat statsionar holatga kelish bilan bog‘liq bo‘lmasdan, balki statsionar holatning o‘zgarishi bilan bog‘liqidir. Bu tushuncha chuqur ma’noga ega, chunki dunyoda har qanday voqeanning sodir bo‘lishi biron holatning, biron narsaning o‘zgarishi tufayli bo‘ladi. Agar hech narsa o‘zgarmasa, hech qanday voqeа sodir bo‘lmaydi.

Agar dunyoning tashkil etuvchilari statsionar holatga o‘tsa, bu o‘tish Koinot tarixida buyuk bir voqeа bo‘lgan bo‘lar edi va bundan keyin Koinotning mavjud bo‘lishi ham tugagan bo‘lardi.

Bu voqeа bilan boshqa voqeа solishtirilishi mumkin, ya’ni Koinot qandaydir statsionar holatdan hozirdagi nostatsionar holatga o‘tgan. Bu o‘tish buyuk bir voqeа – Koinotning barpo bo‘lishidir. Bunday o‘tishga bundan 10–15 milliard yil oldin ro‘y bergen «katta portlash» sabab bo‘lgan bo‘lishi va Koinotning statsionar holatdan nostatsionar holatga o‘tishi sodir bo‘lgan bo‘lishi mumkin. Koinotning bunday

katta portlashgacha bo‘lgan holati to‘g‘risida fan hali ma’lumot bera olmaydi. Lekin bu borada izlanishlar davom etmoqda. Koinotning holati butunligicha statsionar holat emas, lekin uning tarkibiy qismlari (masalan, atomlar) statsionar holatlarda bo‘lishi mumkin. Agar atomlar ham abadiy ravishda statsionar holatlarda bo‘lsalar edi, fan ularning mavjudligini bilmas, ko‘rsata olmas edi, ular bilan hech qanday voqeа sodir ham bo‘lmас edi. Ularning mavjudligi statsionar holatlarining o‘zgarishi orgали aniqlanadi. Statsionar holatlarning o‘zgarishini o‘rganish uchun statsionar holatlarning o‘zini bilish kerak bo‘ladi yoki boshqacha aytganda, fizika olamida hech qanday voqeanning statsionar holati uni tushuntira olmaydi. Lekin fizika olamida yuz berayotgan voqealarni tushunish va ifodalashga imkon beradi. Statsionar holatlar fizika olamini ifodalashda dastlabki fundamental moment hisoblanadi. Statsionar holatning asosiy xossalaridan biri uning birligidir. Bu xossa orqali foton harakati ifodalangan. Foton butun holatga tegishlidir, holatni bo‘laklarga ajratish mumkin emas. Statsionar holatning fizikaviy xossalaridan to‘lqin funksiyasi  $\psi(x,y,z)$ ga bo‘lgan talablar kelib chiqadi.

Statsionar holatda kuzatilayotgan barcha fizik kattaliklar vaqt o‘tishi bilan o‘zgarmaydi. To‘lqin funksiyasi y ning o‘zi bu kattaliklarga tegishli bo‘lmaydi va prinsipial ravishda kuzatilmaydi. Stasionar holatda kvant mexanikasining qonunlari asosida  $\psi$  funksiyadan hosil qilinadigan, kuzatiladigan fizikaviy kattaliklar ham vaqt o‘tishi bilan o‘zgarmasligi kerak. Lekin barcha fizikaviy jarayonlar vaqt o‘tishi bilan real fizik kattaliklarning o‘zgarishi bilan xarakterlanadi. Shuning uchun fizik hodisalarning holatini ifodalaydigan to‘lqin funksiyasi nostatsionar bo‘lishi kerak.

**To‘lqin funksiyasiga matematik talablar.**  $\psi$  – to‘lqin funksiyasi (5.15)da ifodalangan differensial tenglamaning yechimidir.  $|\psi(x,y,z)|^2$  ifoda esa  $(x,y,z)$  – nuqtada zarraning topilish ehtimoliyati zichligidir. Yoki boshqacha aytganda,  $|\psi(x,y,z)|^2 \partial x \partial y \partial z$  – zarraning  $\partial x \partial y \partial z$  hajmda  $(x,y,z)$  nuqta atrofida topilishi ehtimoliyatining zichligin ifodalaydi. Bundan esa  $\psi$  – to‘lqin funksiyasi barcha nuqtalarda uzluksiz, bir qiymatli va chekli bo‘lishi kerakligi kelib chiqadi. Aga potensial energiya  $E_0(x,y,z)$  uzluksizlikning uzilishi sirtiga ega bo‘lsa  $\psi$  – funksiya va uning birinchi hosilasi bunday sirtda uzluksiz

bo'lib qolishi kerak, fazoning  $E_0$  – cheksizga aylangan sohalarida hum  $\psi$  – to'lqin funksiyasi nolga teng bo'lishi kerak.  $\psi$  – funktsiyaning uzlusizligi bu sohaning chegarasida  $\psi$  – funksiya nolga teng bo'lishini talab qiladi.

**To'lqin funksiyasini normalash sharti.** To'lqin funksiyasi chiziqli tenglama bilan aniqlanadi (doimiy ko'paytuvchiga bo'lgan aniqlikda). Doimiy ko'paytuvchini shunday tanlanishi kerakki, u  $|\psi|^2 = \psi\psi^*$  – ifodaning interpretatsiyasini ehtimoliyat zichligi sisatida qanoatlantirsin.  $\psi^*\psi dx dy dz$  – zarraning  $\partial x \partial y \partial z$  – hajm elementida topilish ehtimoliyatini bildiradi. U vaqtida normalash qoidasini qo'llashdan quyidagi ifoda hosil bo'ladi:

$$\int \psi^* \psi dx dy dz = 1 \quad (5.16)$$

Ifoda zarraning mavjudligini va fazoning qaysidir biror nuqtasida bo'lishini ko'rsatadi. (5.16) tenglama to'lqin funksiyasini normalash sharti deyiladi. Bunday normalash xususiy qiymatlarining diskret spektri holida to'g'ri bo'ladi. Xususiy qiymatlarning uzlusiz spektri holida  $|\psi|^2$  dan olingen integral cheksizlikka aylanadi, shuning uchun energiyaning uzlusiz qiymatlarida boshqa normalash shartidan soydalilaniladi. (5.16) ifodada zarraning butun fazoda topilish ehtimoliyati birga teng, demak, zarraning topilishi to'liq ishonchli.

**Xususiy funksiyalar va xususiy qiymatlar.** (5.11)da keltirilgan Shredinger tenglamasi zarraning to'liq energiyasi  $E$  ning barcha qiymatlarida to'lqin funksiyasiga qo'yilgan talablarni qanoatlantiradigan yechimga ega bo'lmaydi, balki  $E$  ning ayrim aniq qiymatlari-da-gina to'lqin funksiyasiga qo'yilgan talablarni qanoatlantiradigan yechimga ega bo'ladi. Energiyanig bu qiymatlarini  $E_1, E_2, E_3, \dots, E_n$  bilan belgilaymiz. (5.11) tenglama yechimga ega bo'ladigan energiyaning  $E_1, E_2, E_3, \dots, E_n$  qiymatlari xususiy energiyalar deyiladi. Energiyaning  $E=E_1; E=E_2, \dots, E=E_n$  qiymatlarida (5.11) tenglamанинг yechimi bo'lgan  $\psi_1, \psi_2, \dots, \psi_n$  to'lqin funksiyalar energiyaning  $E_1, E_2, \dots, E_n$  xususiy qiymatlariga tegishli bo'ladi. Bunday funksiyalar xususiy funksiyalar deyiladi. Energiya  $E < 0$  bo'lganda, energiyaning xususiy qiymatlari diskret spektrni hosil qiladi.  $E > 0$  bo'lganda, zarraning energetik spektri uzlusiz bo'ladi. Zarra noldan farq qiladigan ehtimoliyat bilan cheksizlikka ketishi mumkin yoki  $E > 0$  bo'lganda, zarra harakati infinit bo'ladi. Infinitlik sharti klassik

mexanikada ham shunday. Atomning mumkin bo'lgan statsionar holatlar soni (yoki energetik holatlar soni)  $U(x)$  potensia funksiyaning ko'rinishiga bog'liq bo'ladi.  $U(x)$  funksiya chekli yok cheksiz bo'lishi mumkin. Atomdagi diskret energetik sathlar soni ortishi bilan sath energiyasi assimptotik ravishda  $E=0$  ga yaqinlashadi, qo'shni sathlar oralig'i ham nolga intiladi. To'liq energiyas  $E=U_{\min}$  bo'lgan statsionar holat mavjud bo'lmaydi. Zarranining potensial chuqurlikdagi eng kichik energiyasi  $E_1$ , nol energiya deyiladi. Nol energiyani zarradan olish mumkin emas, chunki bu energiya ruxsat etilgan eng kichik energiyadir. Uni o'zgartirish uchun potensial chuqurlikni o'zgartirish kerak.

### 5.3-§. Operatorlar haqida qisqacha ma'lumot

Klassik mexanikada har bir fizik kattalik fazoning u yoki bu nuqtasida, bir vaqtida son qiymati bilan xarakterlanadi. Masalan, zarranining tezligi har bir vaqt oralig'ida aniq sonlar bilan, ya'ni tezlik-ning koordinata o'qlariga bo'lgan proyeksiyalari ( $\vartheta_x, \vartheta_y, \vartheta_z$ ) bilan aniqlanadi. Yoki boshqacha aytilganda, klassik mexanikada fizik kattaliklar koordinata va vaqtning funksiyalari sifatida ifodalanadi. Umumiy holda funksiya deb, ma'lum bir son yoki sonlar to'plami tegishli boshqa sonlar yoki sonlar to'plami orqali ifodalanuvchi kattalikga aytildi. Klassik mexanikaning vazifasi turli fizik kattaliklar orasidagi funksional bog'lanishni topishdan iborat.

**Kvant mexanikasida fizik kattaliklarni ifodalash.** Kvant mexanikasida fizik kattaliklar aniq son qiymatiga ega bo'la olmaydi. Masalan, zarranining joyini bildiradigan kattalikni ko'raylik. Klassik mexanikada zarranining joyi har bir vaqtida uchta son – zarra koordinatalari bilan ifodalanadi. Kvant mexanikasida faqat zarranining fazoning u yoki bu qismida topilish ehtimoliyati to'g'risida gapirish mumkin. Bu ehtimoliyat esa to'lqin funksiyasi yordamida hisoblanaadi. Lekin to'lqin funksiyasi zarra koordinatasini vaqt funksiyasi sifatida aniqlanishiga imkon bermaydi. Kvant mexanikasi faqat u yoki bu koordinata ehtimoliyatini va uning o'rtacha qiymatini hisoblashga, o'chanadigan fizik kattalik son qiymatining ehtimoliyatini bilishga imkon beradi. Shunday qilib, kvant mexanikasida fizik kattaliklar son qiymati bilan emas, balki berilgan fizik kattalikning

operatori bilan xarakterlanadi. Berilgan aniq bir holatda fizik kattalikning son qiymati aniq bo'lmaydi, balki uni ifodalaydigan operator aniq ma'lum bo'ladi. Funksiya ma'lum bir sonlarning boshqa sonlar bilan bog'lanishini ko'rsatadi. Operator ma'lum bir funksiyaning boshqa funksiyalar bilan bog'lanishini amalga oshiradi.

*Operator* deb, qandaydir sohada berilgan har bir funksiyaga tegishli shu sohada berilgan yangi funksiyani hosil qilish imkoniyatini beruvchi matematik amalga aytildi. Masalan, 2 soni ko'paytuvchi sifatida qandaydir oraliqda berilgan funksiyaning har bir qiymatini ikki baravar orttirib o'zgartiradi, bunda funksiyaning aniqlanish sohasi o'zgarmay qoladi. Bunday holda 2 soni arifmetik operator hisoblanadi.  $f(x)$  funksiyaga qo'yilgan differensial operator  $\frac{d}{dx}$  oddiy ma'noda  $f(x)$  funksiyaning har bir qiymatini uning hosilasi ko'rinishida o'zgartiradi:

$$\left( \frac{d}{dx} \right) f(x) = f'(x).$$

Operatorlarni sonlardan farq qilish uchun ustiga «^» belgi qo'yilgan harflar bilan yoziladi. Masalan,  $A, B$  va h.k. Operatorlarni qo'shish mumkin.  $A$  va  $B$  operatorlar yig'indisi deb shunday operator tushuniladiki, uning istalgan  $f(x)$  funksiyaga ta'siri  $Af(x) + Bf(x)$  natijani beradi. Operatorlar ko'paytmasi  $AB$  deb, shunday operator tushuniladiki, uning istalgan  $f(x)$  funksiyaga ta'siri  $A[Bf(x)]$  ifodaga teng bo'ladi. Bunda  $f(x)$  funksiya dastlab  $B$  operator ta'sirida bo'ladi, so'ng hosil bo'lgan natijaga  $A$  operator ta'sir qiladi. Operatorlar ko'paytmasining xususiy holi  $A$  operatorning  $\lambda$  soniga ko'paytmasi bo'ladi, ya'ni  $\lambda A$  yoki  $A\lambda$  ko'rinishda bo'ladi. Operatorlar algebra-sida ko'paytirishga nisbatan kommutativ qonun hamma vaqt ham to'g'ri bo'lmaydi. Ya'ni,  $AB = BA$  ifoda har doim to'g'ri bo'lmaydi. Ushbu tenglik to'g'ri bo'lgan hollarda  $A$  va  $B$  operatorlar bir-biri bilan *kommutativlashadi* deyiladi va ular *kommutativlashuvchi*

*operatorlar* deb ataladi. Aks holda  $\hat{A}$  va  $\hat{B}$  operatorlar bir-biri bilan kommutativlashmaydi, bu holda bu operatorlar antikommutativ operatorlar deyiladi. Antikommutativ operatorlarga  $x$  ga ko‘paytirish va  $x$  bo‘yicha differensiallash misol bo‘ladi. Haqiqatan ham

$$\left( x \frac{\partial}{\partial x} \right) f = x \frac{\partial f}{\partial x}, \quad (5.17)$$

$$\left( \frac{\partial}{\partial x} x \right) f = \frac{\partial}{\partial x} xf = f + x \frac{\partial f}{\partial x}. \quad (5.18)$$

Xuddi shunday

$$\frac{\partial}{\partial x} x - x \frac{\partial}{\partial x} = 1. \quad (5.19)$$

Bunday aniqlash berilgan  $\hat{A}$  va  $\hat{B}$  operatorlar orqali ularning funksiyasi bo‘lgan boshqa operatorlar  $L^{(\hat{A}\hat{B})}$  ni tuzishga imkon beradi.

Aniqlash  $\hat{A}$  va  $\hat{B}$  operatorlarning butun rasional funksiyalari uchun ma’noga ega bo‘ladi. Operatorlarni qo‘sish va ko‘paytirish sonlarni odatdagи algebraik qo‘sish, ko‘paytirish orqali bajariladi. Bunda faqat bitta farq shundan iboratki, operatorlarni ko‘paytirganda ko‘paytuvchilarni almashtirish hamma vaqt ham mumkin bo‘lmaydi. Masalan, hamma vaqt

$$(\hat{A} + \hat{B})^2 = (\hat{A} + \hat{B})(\hat{A} + \hat{B}) - \hat{A}^2 = \hat{B}\hat{A} + \hat{A}\hat{B} + \hat{B}^2. \quad (5.20)$$

Umumiy holda quyidagicha yozish noto‘g‘ri bo‘lar edi:

$$(\hat{A} + \hat{B})^2 = \hat{A}^2 = 2\hat{A}\hat{B} + \hat{B}^2 \quad (5.21)$$

Ushbu formula  $\hat{A}$  va  $\hat{B}$  operatorlar bir-birini kommutativlashganda to‘g‘ri bo‘ladi, qachonki,  $\hat{B}\hat{A} = \hat{A}\hat{B}$  bo‘lsa, u oldingisidan hosil bo‘ladi. Istalgan  $f$  va  $\varphi$  funksiyalar hamda  $\lambda$  va  $\mu$  doimiyliklar uchun quyidagi munosabat to‘g‘ri

$$\hat{A}(\lambda f + \mu \varphi) = \lambda \hat{A}f + \mu \hat{A}\varphi, \quad (5.22)$$

bo‘lsa  $\hat{A}$  operatori *chiziqli* deyiladi. Kvant mexanikasida chiziqli operatorlar ishlataladi. Aks holda holatlarning superpozitsiya prinsipi buziladi.

## O'zgaruvchi fizik kattaliklarning o'rtacha qiymatini hisoblash.

Ehtimoliyat nazariyasida  $|a_n|^2$  ehtimoliyat bilan  $\lambda_n$  ( $n=1,2,\dots$ ) qiymatlar qabul qiladigan  $\langle A \rangle$  kattalikning o'rtacha qiymati quyidagi formula orqali hisoblanadi:

$$\langle \hat{A} \rangle = \sum_n \lambda_n |a_n|^2, \quad (5.23)$$

Bu qoida quyidagicha umumlashtirilishi mumkin:  $\hat{A}$  operator bilan aniqlanadigan dinamik o'zgaruvchining o'rtacha qiymati  $\psi$  to'lqin funksiyasi bilan xarakterlana-digan holatda quyidagi formula yorda-mida aniqlanadi:

$$\langle \hat{A} \rangle = \int \psi^* \hat{A} \psi dx, \quad (5.24)$$

Agar  $\psi^*$  va  $\psi$  funksiyalarini

$$U = a_1 U_1 + a_2 U_2 + \dots + a_n U_n$$

qator ko'rinishida ifodalab ( $a$  – doimiy son, ajratish koeffitsienti deyiladi,  $U$  – operatorning xususiy funksiyasi) hosil bo'lgan qatorni (5.24) ifodaga qo'yilsa, kerakli amallar bajarilgandan so'ng (5.23) formula hosil bo'ladi. Bu esa (5.24) formulaning asosli ekanligini ko'rsatadi.

**Koordinata operatori.** Dinamik o'zgaruvchilarni aniqlaydigan operatorlar ermit operatorlari bo'lishi kerak. Ularning aniq ko'rinishlarini tanlash, ular yordamida olingen natijalarning tajriba natijalariga to'g'ri kelishi bilan aniqlanadi.

$\psi^*(x)\psi(x)$  – kattalik zarrani  $x$  nuqtada topilishining ehtimoliyati zichligini bildiradi (oddiylik uchun bir marta o'lchashdag'i holat qaraladi). U vaqtda koordinatalarning o'rtacha qiymati quyidagicha aniqlanadi:

$$\langle X \rangle = \int \psi^*(x) \psi(x) x dx = \int \psi^*(x) \psi(x) dx. \quad (5.25)$$

(5.25) ifodani (5.24) bilan taqqoslash  $x$  koordinataning operatori sifatida shu koordinataga ko'paytma operatorini tanlash kerakligini ko'rsatadi, ya'ni koordinata operatori  $\hat{x}$  ni qandaydir  $f(x)$  funksiyaga ishlatilganda, shu funksiyani  $x$  ga ko'paytirish kerak bo'ladi:

$$\hat{x}f(x) = xf(x), \text{ ya'ni operator } \hat{x} = x.$$

**Impuls operatori.** Impuls operatorini topish uchun de-Broyl gipotezasidan foydalanish mumkin. De-Broyl gipotezasiga asosan impulsi  $P_x$  bo‘lgan erkin zarra to‘lqin soni  $k_x = \frac{P_x}{\hbar}$  va chastotasi

$\omega = \frac{E}{\hbar}$  bo‘lgan yassi to‘lqin orqali aniqlanadi. Shuning uchun impulsning xususiy qiymatlarini ifodalaydigan quyidagi tenglamani yozamiz:

$$\hat{P}_x \psi = P_x \psi, , \quad (5.26)$$

bu tenglamaning yechimi quyidagi ko‘rinishdagi yassi to‘lqin bo‘lishi kerak, ya’ni

$$\psi = A e^{-i(\omega t - k_x x)} = A e^{-i(EZ - P_x x)} \quad (5.27)$$

(5.27) va (5.26) ifodalarini taqqoslashdan impuls operatori  $\hat{P}_x$  sifatida quyidagi operatorni tanlash mumkinligi ko‘rinadi:

$$\hat{P}_x = \frac{\hbar}{i} \frac{\partial}{\partial x}. \quad (5.28)$$

Impuls operatori  $\hat{P}$  ning bunday tanlanishida (5.27) formuladagi to‘lqin funksiyasi tenglamani qanoatlantirishi kerak. Impuls operatorining boshqa tashkil etuvchilari ham shunday aniqlanadi. Shuning uchun impuls operatorini vektor ko‘rinishida quyidagicha ifodalash mumkin:

$$\hat{P} = \frac{\hbar}{i} \left( i_x \frac{\partial}{\partial x} + i_y \frac{\partial}{\partial y} + i_z \frac{\partial}{\partial z} \right) = \frac{\hbar}{i} \nabla. \quad (5.29)$$

(5.29)dagi  $i_x, i_y, i_z$  lar operatorlar.

**Gamilton operatori.** Klassik fizikada Gamilton funksiyasi deb, zarraning impuls va koordinatasi orqali ifodalangan to‘liq energiya-siga aytildi. Bir zarra uchun to‘liq energiya kinetik va potensial energiyalar yig‘indisi sifatida aniqlanadi:

$$H(r, p) = \frac{P^2}{2m} + U(r). \quad (5.30)$$

Gamilton funksiyasi ta’rifiga asosan zarraning kinetik energiyasi tezlik bilan emas, balki impuls orqali ifodalansa, (5.30) formula quyidagi ko‘rinishda ifodalanadi:

$$H = \frac{P^2}{2m} + U = E = \text{const}, \quad (5.31)$$

klassik mexanikada (5.31) formuladagi  $H = \text{Gamilton funksiyasi}$  deyiladi.

Kvant mexanikasida Gamilton funksiyasiga tegishli operator bo‘lishi kerak. Bu operatorni hosil qilish uchun (5.31) formulaga  $P$  o‘rniga uning operatori  $\hat{P}$  ning ifodasini, ya’ni

$$\hat{P} = \frac{\hbar}{i} \nabla \quad (5.32)$$

ifodani qo‘yish kerak. U vaqtida

$$\hat{H} = \frac{\hat{P}^2}{2m} + U(r) \frac{\hbar^2}{2m} \nabla^2 + U(r), \quad (5.33)$$

yoki

$$\hat{H} = \frac{\hbar^2}{2m} \frac{\partial^2}{\partial x^2} + U(r), \quad (5.34)$$

$\hat{H} = \text{Gamilton operatori}$  deyiladi.

**To‘liq energiya operatori.** To‘liq energiya operatori  $\hat{E}$  ni shunday tanlash kerakki, uning xususiy qiymatlari zarraning  $E$  energiyasiga teng bo‘lsin. Erkin zarra misolida uning mumkin bo‘lgan ko‘rinishini topish mumkin. Buning uchun natijani umumiy hol uchun umumlashtiriladi:

$$\hat{E} \psi = E \psi. \quad (5.35)$$

Bu tenglamaning yechimi energiyasi  $E$  bo‘lgan erkin zarrani ifodalaydigan yassi to‘lqin ko‘rinishida bo‘lishi kerak, ya’ni

$$\psi = A e^{-i(Et - P_x x)}.$$

U holda to‘liq energiya operatori  $\hat{E}$  quyidagicha aniqlanadi:

$$\hat{E} = -\frac{\hbar}{i} \frac{\partial}{\partial t}. \quad (5.36)$$

Xususiy hol uchun topilgan (5.36) to‘liq energiya operatori ixtiyoriy hol uchun umumlashtiriladi.

### **Shredinger tenglamasining operatorlar orqali ifodalanishi.**

Yuqorida qaralgan turli ko‘rinishda yozilgan to‘lqin tenglamalarini operatorlar orqali qisqa qulay ko‘rinishda ifodalash mumkin.

Shredingerning statsionar tenglamasini quyidagi ko‘rinishda yozish mumkin:

$$\left( -\frac{\hbar^2}{2m} \frac{d^2}{dx^2} + U \right) \psi = E\psi, \quad (5.37)$$

bu tenglamada  $\psi=\psi(x)$  – to‘lqin funksiya,  $U=U(x)$  – potensial energiya,  $E$  – to‘liq energiya.

Bu tenglama harakat davomida to‘liq energiya  $E$  o‘zgarmaydigan holatlar uchun to‘g‘ri bo‘ladi.

(5.37) tenglamada qavs ichidagi ifoda operator ko‘rinishida ifodalanadi:

$$H = -\frac{\hbar^2}{2m} \frac{d^2}{dx^2} + U, \quad (5.38)$$

$H$  – *Gamilton operatori* deyiladi. Bu ifodaning klassik mexanikadagi Gamilton funksiyasiga o‘xshashligidan Shredingerning statsionar tenglamasini qisqa ko‘rinishda quyidagicha yozish mumkin:

$$H\psi = E\psi, \quad (5.39)$$

(5.39) tenglamani quyidagicha tushunish mumkin:  $\psi$  funksiyaga ta’sir etayotgan operator  $H\psi$  funksiyaga ko‘paytirilgan to‘liq energiya  $E$  ga teng. Endi Shredingerning umumiylenglamasini quyidagi ko‘rinishda yozish mumkin:

$$-\frac{\hbar^2}{2m} \frac{\partial^2 \psi}{\partial x^2} + U\psi = -\frac{\hbar}{i} \frac{\partial \psi}{\partial t}, \quad (5.40)$$

yoki

$$\left( -\frac{\hbar^2}{2m} \frac{\partial^2}{\partial x^2} + U \right) \psi = -\frac{\hbar}{i} \frac{\partial \psi}{\partial z}. \quad (5.41)$$

Bu tenglamada

$$\hat{H} = -\frac{\hbar^2}{2m} \frac{\partial^2}{\partial x^2} + U, \quad (5.42)$$

ifoda *Gamilton operatori* deyiladi. U vaqtida Shredingerning umumiy tenglamasini qisqa ko'rinishda quyidagicha yozish mumkin:

$$\hat{H}\psi = -\frac{\hbar}{i} \frac{\partial \psi}{\partial t}, \quad (5.43)$$

(5.35) va (5.43) tenglamalarni taqqoslashdan energiya operatori  $\hat{E}$  uchun quyidagi ifodani yozish mumkin:

$$\hat{E} = -\frac{\hbar}{i} \frac{d}{dt}. \quad (5.44)$$

Shunday qilib, Shredingerning umumiy tenglamasini operatorlar orqali quyidagicha ifodalash mumkin:

$$\hat{H}\psi = \hat{E}\psi, \quad (5.45)$$

Bu tenglama (5.35) ifodada keltirilgan statsionar holat uchun yozilgan tenglamaga juda o'xshashdir.

(5.45) tenglamaning ma'nosi quyidagicha:  $\psi$  funksiyaga ta'sir etayotgan operator  $\hat{H}$   $\psi$  funksiyaga ta'sir etayotgan  $\hat{E}$  operatoriga teng, ya'ni  $\hat{H}$  va  $\hat{E}$  operatorlar oddiy skalyar ko'paytuvchilar emas.

Agar (5.45) tenglamada ifodalangan Shredingerning umumiy tenglamasini potensial kuch maydoni ta'sir qilmagan erkin zarra harakatini ifodalasa, u vaqtida to'liq energiya  $E$  istalgan qiymatni qabul qilishi mumkin. Buni to'lqin tenglamasining mumkin bo'lgan ko'p sondagi  $\psi(x,y,z,t)$  yechimlarida ko'rish mumkin. Agar erkin zarra elastik devorlar bilan chegaralangan qandaydir chekli hajmda bo'lsa, bunday holatni statsionar hol deb qarab, (5.39) ifodadan foydalanish mumkin, bunda  $\varphi$  funksiya faqat koordinatalar funksiyasi  $\psi(x,y,z)$  bo'ladi. Bunday holda energiya istalgan qiymatlarni qabul qila olmaydi, balki energiyaning faqat ayrim aniq  $E$  qiymatlarnigina qabul qiladi, energiyaning bunday qiymatlari to'lqin tenglamasining aniq  $\psi(x,y,z)$  yechimlariga to'g'ri keladi. Mumkin bo'lgan  $\psi$ , yechimlarni ko'pincha xususiy funksiyalar,

bu yechimlarga tegishli bo'lgan  $E$ , energiya qiymatlarini xususiy qiymatlar deyiladi.

### 5.4-§. Zarraning erkin harakati

**To'lqin funksiyalari.** Zarranning erkin harakatida tashqi kuchlar ta'sir qilmaydi ( $U=0$ ). Bunday holda zarranning to'liq energiyasi uning kinetik energiyasi bilan aniqlanadi. Zarranning bir o'lchamdag'i harakatini ko'rib chiqaylik. Bunda Gamilton operatori  $\hat{H}$  va Shredinger tenglamasini quyidagicha yozish mumkin:

$$\hat{H} = -\frac{\hbar^2}{2m} \frac{\partial^2}{\partial x^2}, \quad (5.46)$$

$$-\frac{\hbar}{i} \frac{\partial \psi}{\partial t} = -\frac{\hbar^2}{2m} \frac{\partial^2 \psi}{\partial x^2}, \quad (5.47)$$

bunda:

$$\psi(x, t) = e^{-iEt/\hbar} \psi_0(x). \quad (5.48)$$

U vaqtida  $\psi_0(x)$  uchun quyidagi tenglama hosil bo'ladi:

$$\frac{d^2 \psi_0}{dx^2} + \frac{2m}{\hbar^2} E \psi_0 = 0, \quad (5.49)$$

(5.49) tenglamaning yechimi:

$$\psi_0(x) = Ae^{-iP_x x / \hbar} + Be^{iP_x x / \hbar}, \quad (5.50)$$

bunda erkin zarra impulsi  $P_x$  uning energiyasi bilan quyidagicha bog'langanligi hisobga olingan, ya'ni:

$$P_x = \sqrt{2mE}.$$

$A$  va  $B$  lar doimiyliklardir. (5.50) da birinchi had zarranning  $x$  o'qining musbat, ikkinchi had esa manfiy yo'nalishida harakatlanishini bildiradi. Shundayligiga ishonch hosil qilish uchun (5.50) ni hisobga olgan holda (5.48) funksiyani ko'rib chiqaylik. (5.50) funksiyaning birinchi va ikkinchi hadi bo'yicha fazalari doimiy bo'lgan nuqtalar qaysi yo'nalishda siljishini ko'raylik. Masalan, birinchi hadning fazalar doimiyligi sharti quyidagicha:

$$Et - P_x x = \text{const.}$$

Bu ifodani  $t$  bo'yicha differensiallab, fazaviy tezlik  $x$  o'qining musbat yo'nalishi bo'ylab yo'nalganligini ko'rish mumkin. (5.50) funksiyaning ikkinchi hadini ham shunday tahlil qilish mumkin. Zarra harakatini musbat yo'nalishida deb qarasak,  $B=0$  bo'lishi zarur. U vaqtida (5.48) ifodaga asosan erkin zarraning to'lqin funksiyasi yassi to'lqin ko'rinishida bo'ladi, ya'ni

$$\psi(x, t) = Ae^{-i(Et - P_x x)/\hbar}, \quad (5.51)$$

(5.49) tenglama energiya  $E$  ning istalgan qiymatida bir qiymatli, chekli va uzlusiz yechimga ega bo'ladi. Bu esa erkin zarraning energiya spektri uzlusiz bo'lishini ko'rsatadi. Erkin zarra uchun Puasson qavslari  $[\hat{H}, \hat{P}_x]$  nolga teng bo'ladi:

$$[\hat{H}, \hat{P}_x] = 0, \quad (5.52)$$

Bundan esa erkin zarraning impulsi harakat integrali doimiy kattalikka teng bo'lishi kelib chiqadi. (5.52) ifodaning nolga tengligi erkin zarraning energiyasi va impulsi bir vaqtida o'lchanadigan kattaliklar ekanligini ko'rsatadi.

**Davriy uzunlikka normalash.** Erkin zarraning xususiy qiymatlari spektri uzlusiz bo'lgani uchun xususiy qiymatlarni birga normalash mumkin emas, chunki

$$\int_{-\infty}^{\infty} \psi^* \psi dx = A^2 \int_{-\infty}^{\infty} dx = \infty, \quad (5.53)$$

bu holda  $\delta$  funksiyaga normalash shartidan foydalanish kerak. Lekin ko'pincha buning o'rniga davriy uzunlikka normalash usulidan foydalilaniladi. Bu usul quyidagicha: faraz qilaylik zarra uzunligi  $L$  bo'lgan sohada harakat qilayotgan bo'lsin. Bu sohadan tashqarida to'lqin funksiyasi davriy ravishda takrorlanadi. U vaqtida to'lqin funksiyasiga quyidagi davriylik shartini yozamiz:

$$\psi_0(x + L) = \Psi_0(x). \quad (5.54)$$

Bunday holda zarra to'liq ravishda erkin hisoblanmaydi, uning harakati (5.54) shart bilan cheklangan bo'ladi. Shunga ko'ra, zarraning energiya spektri uzlusiz bo'lmaydi. Lekin  $L$  ning uzunligi yetarlicha katta bo'lganda, zarra harakati uning erkin harakatidan

oz farq qiladi. Energiya spektri (5.51)ni hisobga olgan holda (5.54) shartdan topiladi va quyidagi ko‘rinishga ega bo‘ladi:

$$Ae^{i(x+L)P_x/\hbar} = Ae^{ixP_x/\hbar}, \quad (5.55)$$

yoki

$$e^{iP_x L/\hbar} = 1, \quad (5.56)$$

bunda  $P_x$  ixtiyoriy qiymatni olmaydi, balki faqat diskret  $P_{xn}$  qiymatlarnigina qabul qiladi, bu diskret qiymatlar (5.56) ifodaga asosan quyidagi tenglik bilan aniqlanadi:

$$P_{xn} = 2\pi\hbar n_x / L, \quad (5.57)$$

$n_x$  — butun son. Shunday qilib, davriylik shartini kiritish uzluksiz spektrning diskret spektriga o‘tishiga olib keladi, ya’ni:

$$E_n = P_{xn}^2 / 2m = 2\pi^2 \hbar^2 n_x^2 / (mL)^2, \quad (5.58)$$

diskret spektrda ortonormalash shartidan foydalanish kerak, bu shart:

$$\begin{aligned} \delta_{nn'} &= \int_{-L/2}^{L/2} \psi_{on} \psi_{on'} dx = A^2 \int_{-L/2}^{L/2} e^{2\pi i(n-n')x} dx = \\ &= A^2 L \frac{\sin \pi(n-n')}{\pi(n-n')} = \begin{cases} A^2 L (n=n') \\ 0 (n \neq n') \end{cases} \end{aligned} \quad (5.59)$$

bundan quyidagilar hosil bo‘ladi:

$$A^2 L = 1; \quad A = 1 / \sqrt{L}, \quad (5.60)$$

Ortonormalash funksiyalar tizimi quyidagi ko‘rinishda yoziladi.

$$\begin{aligned} \psi_{on}(x) &= e^{iP_{xn}X/\hbar} L^{-1/2} = L^{-1/2} e^{ik_{xn}X}, \\ P_{xn} &= 2\pi\hbar n_x / L; \quad k_{xn} = 2\pi n_x / L \end{aligned} \quad (5.61)$$

energianing xususiy qiymatlari uchun (5.58) formuladan foydalangan holda ko‘rish mumkinki,  $L$  makroskopik o‘lchamlarga ega bo‘lsa,  $E_n$  ning diskret qiymatlari bir-biriga yaqin bo‘lib, deyarli uzluksiz spektr hosil bo‘ladi. Bu natijalar taqrifiy natijalar bo‘lib, zarra erkin harakatning spektri cheklanmagan sohada uzluksiz bo‘ladi.

**Uzluksiz spektr.** Uzluksiz spektr holida to‘lqin soni  $k_x$  uzluksiz qiymatlar qatorini qabul qiladi va to‘lqin funksiyasi quyidagi ko‘rinishda bo‘ladi.

$$\psi_x(x) = A_l l^{ik_n x}, \quad (5.62)$$

$\delta$  funksiyaga normalash sharti quyidagi ko‘rinishga ega bo‘ladi:

$$\int_{-\infty}^{\infty} \psi_{k_x}^*(x) \psi_{k_x}(x) dx = A_l^2 \int_{-\infty}^{\infty} e^{i(k_x - k_x)x} dx = \delta(k_x - k_x). \quad (5.63)$$

Furening integrallar qatori yordamida quyidagi tenglik isbotlanadi:

$$(2\pi)^{-1} \int_{-\infty}^{\infty} e^{i(k - k')x} dx = \delta(k - k') \quad (5.64)$$

(5.63) va (5.64) ifodalarni taqqoslash ko‘rsatadiki,  $A_l = \frac{1}{\sqrt{2\pi}}$  va uzlusiz spektr funksiyalarining  $\delta$  funksiyaga normalashgan tizimi quyidagi ko‘rinishga keladi:

$$\psi_{k_x}(x) = 2\pi^{-1/2} e^{ik_x x}, \quad k_x = P_x / \hbar. \quad (5.65)$$

**Zaryad zichligi va tok zichligi.** (5.51) formuladan:

$$\begin{aligned} \partial \psi / \partial x &= (iP_x / \hbar)\psi, \\ \partial \psi^* / \partial x &= -(iP_x / \hbar)\psi. \end{aligned}$$

Shuning uchun tok va zaryad zichligi uchun quyidagi ifodalarni yozish mumkin. Tok zichligi:

$$J_x = \left[ \frac{iq\hbar}{2m} \right] \left( \frac{\psi \partial \psi}{\partial x} - \frac{\psi^* \partial \psi^*}{\partial x} \right) = \left( \frac{qP_x}{m} \right) \psi^* \psi = \left( \frac{qP_x}{m} \right) |A|^2. \quad (5.66)$$

Zaryad zichligi:

$$\rho = q\psi^* \psi = q|A|^2,$$

ya’m

$$j_x = \rho P_x / m = \rho \vartheta_x. \quad (5.67)$$

Bu ifoda klassik elektrodinamikadagi tok zichligi ifodasi bilan mos keladi. Yuqoridagi hisoblashlar bir koordinata uchun qaraldi. Bunday hisoblashlar ikkita boshqa koordinatalar uchun ham to‘g‘ri bo‘ladi. Erkin zarraning to‘lqin funksiyasi  $\psi(r, t)$ ni uch o‘lchamda quyidagicha ifodalash mumkin:

$$\psi(r, t) = \psi(x, t) \quad \psi(y, t) \quad \psi(z, t). \quad (5.68)$$

(5.68) tenglamaning o‘ng tomonidagi har bir funksiya (5.51) formula ko‘rinishidagi ifoda orqali aniqlanadi. Erkin zarraning to‘lqin funksiyasi uch o‘lchamda quyidagicha ifodalanadi:

$$\psi(r, t) = A e^{i(Et - pr)} / h. \quad (5.69)$$

Bunda

$$pr = P_x x + P_y y + P_z z,$$

$$E = P^2 / (2m) = (P_x^2 + P_y^2 + P_z^2) / (2m).$$

$A = (2\pi)^{-3/2}$  – normalash doimiyligi. Hajm davriyiliga normalashda normalash doimiyligi quyidagicha aniqlanadi:

$$A = (L_x L_y L_z)^{-1/2},$$

$(L_x, L_y, L_z)$  –  $x, y, z$  o‘qlari yo‘nalishidagi davriylik uzunliklaridir. Bu vaqtida to‘lqin funksiya:

$$\psi_{n_x n_y n_z} = (L_x L_y L_z)^{-1/2} e^{i(k_{n_x} x + k_{n_y} y + k_{n_z} z)}, \quad (5.69a)$$

$$k_{n_x} = 2\pi n_x / L_x, \quad k_{n_y} = 2\pi n_y / L_y, \quad k_{n_z} = 2\pi n_z / L_z,$$

bunda  $n_x, n_y, n_z$  – bir-biriga bog‘liq bo‘lmagan butun sonlar. Uzluksiz spektr uchun to‘lqin funksiyasi (5.65) formula o‘rniga quyidagi formula orqali ifodalanadi:

$$\psi_k(r) = (2\pi)^{-3/2} e^{ikr}; \quad k = P / \hbar. \quad (5.70)$$

U vaqtida (5.66) va (5.67) formulalar o‘rniga tok zichligi uchun quyidagi formulalar hosil bo‘ladi:

$$j = qp |A|^2 / m; \quad \rho = q |A|^2, \quad (5.71)$$

$$j = p\rho / m = \rho \vartheta, \quad j = P\rho / m = PV. \quad (5.72)$$

## 5.5-§. Bir o‘lchamli potensial o‘radagi zarra

Shredinger tenglamasi asosida kvantlash to‘g‘riburchak shakli-dagi bir o‘lchamli simmetrik «potensial o‘ra» misolida tushuntiriladi.  $U(x)$  potensial funksiya  $-\alpha < x < +\alpha$  intervalda  $U_0$  doimiy qiymatga ega bo‘ladi va bu intervaldan tashqarida nolga aylanadi (5.1-rasm). Bunday hol uchun Shredinger tenglamasining aniq yechimini hosil

qilish va shu asosda energiyaning kvantlanishini qarab chiqish mumkin.

Cheksiz chuqur potensial o‘rani ko‘raylik. Bunda  $U_0$  kattalik cheksizga aylanadi. Bunday holda potensial funksiyaning nol qiymati uchun, uning potensial o‘ra tubidagi qiymati, ya’ni  $-\alpha < x < +\alpha$  intervaldagи qiymati olinadi. Bu vaqtida o‘raning devorlarida (ya’ni  $x = \pm a$  bo‘lganda) 0 dan  $+\infty$  bo‘lgan oraliqda  $U(x)$  funksiyada uzilish bo‘ladi. Bunday potensial o‘ra 5.2-rasmda keltirilgan. Chekli chuqurlikka ega bo‘lgan potensial o‘ra holidan cheksiz chuqur potensial o‘ra holiga o‘tishdagi matematik soddalashtirish,  $-\alpha < x < +\alpha$  oraliqdan tash-qarida  $U$  funksiya cheksiz katta bo‘lganda y funksiya nolga aylanishi bilan bog‘liqidir. Haqiqatdan ham, klassik fizikaga asosan, energiyasi  $E$  bo‘lgan zarra  $U(x) = +\infty$  bo‘lgan sohaga o‘ta olmaydi. Kvant mexanikasida bunday holat ehtimoliyat zichligi  $\psi * \psi$  va funksiyani o‘zi  $\psi$  ning nolga aylanishi talabi bilan almashtiriladi.

Shunday qilib, Shredinger tenglamasining yechimini faqat  $-\alpha < x < +\alpha$  oraliqda ko‘rib chiqish yetarli bo‘ladi.  $-\alpha < x < +\alpha$  oraliq ichida  $U(x) = 0$ .

U vaqtida bir o‘lchamli holat uchun yozilgan

$$\frac{\hbar}{2m} \cdot \frac{d^2\psi}{dx^2} + (E - U)\psi = 0$$


Shredinger tenglamasini quyidagi ko‘rinishda yozamiz:

$$\frac{d^2\psi}{dx^2} + k^2\psi = 0. \quad (5.73)$$


Bunga quyidagi belgilash kiritilgan:

$$k^2 = 2mE/\hbar^2, \quad (5.74)$$

bo‘lib,  $k$  ning musbat qiymatlari bilan chegaralanamiz. (5.73) tenglamaning umumiy yechimi quyidagi ko‘rinishda bo‘ladi:



5.1-rasm



5.2-rasm

$$\psi = A \cos kx + B \sin kx.$$

O'raning  $x=\pm a$  devorlarida  $\psi = 0$  bo'lishi kerak. U vaqtida

$$x = +a \text{ bo'lganda } A \cos ka + B \sin ka = 0,$$

$$x = -a \text{ bo'lganda } A \cos ka - B \sin ka = 0. \quad (5.74a)$$

Agar  $A \neq 0$  bo'lmasa,  $A \cos ka = 0$ , demak,  $\cos ka = 0$  va  $\sin ka \neq 0$ ,  $B = 0$ . Aksincha, agar  $B \neq 0$  bo'lmasa,  $B \sin ka = 0$ , demak,  $\sin ka = 0$ ;  $\cos ka \neq 0$ ,  $A = 0$ . Shunday qilib, (5.73) tenglamaning barcha yechimlari ikki qismga ajraladi:

1. Juft funksiyalar bilan

$$\psi = A \cos kx, \quad k\alpha = \frac{\pi}{2}, \frac{3\pi}{2}, \frac{5\pi}{2}, \dots$$

2. Toq funksiyalar bilan

$$\psi = B \sin kx, \quad k\alpha = 2\left(\frac{\pi}{2}\right), 4\left(\frac{\pi}{2}\right), 6\left(\frac{\pi}{2}\right), \dots$$

Ikkinci holda  $k\alpha = 0$  bo'lishi mumkin emas, chunki bunda  $\psi = 0$  bo'lishi kerak, bu esa fizik ma'noga ega bo'lmaydi.  $A$  va  $B$  doimiyliklar quyidagi normalash sharti

$$\int_{-a}^{+a} |\psi|^2 dx = 0,$$

orgali aniqlanadi.

U vaqtida:

$$\psi = \begin{cases} \frac{1}{\sqrt{a}} \cos \frac{n\pi x}{2}; & n \text{ - toq bo'lganda,} \\ \frac{1}{\sqrt{a}} \sin \frac{n\pi x}{2}; & n \text{ - juft bo'lganda.} \end{cases} \quad (5.75)$$

Har ikkala holda  $k=n\pi/2a$ ,  $n$  ning har qanday butun qiymati uchun:

$$E = \frac{\hbar^2}{2m} \cdot k^2 = \frac{\hbar\pi^2}{8ma^2} n^2, \quad (n = 1, 2, 3, \dots). \quad (5.76)$$

(5.76) formula energiyaning kvantlanganligini ko'rsatadi. Energetik sathlar ham diskret,  $U=+\infty$  da ularning soni cheksiz katta, chunki

$n=0$  bo'lgan sath bo'lmaydi. Shuning uchun eng pastki sathning energiyasi  $\hbar\pi^2/8ma^2$  kattalikka teng. Energiyaning bu qiymati nolinch energiya bo'ladi. Yuqorida keltirilgan yechimga qarshi quyidagi inkorni ko'rish mumkin. Potensial funksiya  $U(x)$ ning har qanday uzilishi sirtlarida quyidagi chegaraviy shartlar bajarilishi kerak:

$$\left| \begin{array}{l} \psi_1(x - 0) = \psi_2(x + 0), \\ \frac{d\psi_1(x - 0)}{dx} = \frac{d\psi_2(x + 0)}{dx} \end{array} \right|. \quad (5.77)$$

$\psi_1(x) = \psi(x)$  funksiyaning uzilish sirtining bir tomoni,  $\psi_2(x)$  – ikkinchi tomoni. Qaralayotgan holda  $-a < x < +a$  oraliq ichida  $\psi = \psi_1$  ekanligi (5.74a) formulalar bilan ifodalangan. Bu intervaldan tashqarida esa  $\psi = \psi_2 = 0$ . Shunday qilib, potensial o'ra devorlarida  $\psi(x)$  funksiyaning birinchi hosilasi uzlusizlikning uzilishiga ega bo'ladi. Lekin  $\psi(x)$  funksiyani qanoatlantiradigan talablarga bo'lgan bunday qarama-qarshilik chegaraviy qiymatlarga matematik o'tishlarda hosil bo'ladi va qarama-qarshilikdek ko'rindi. Haqiqiy holatlarda esa potensial o'ra chuqurligi  $U_0$  cheklidir, lekin katta qiymatga ega bo'lishi mumkin. Bunday holda devor yaqinida undan har ikki tomonda  $\psi(x)$  va  $d\psi/dx$  noldan farqli va (5.77) shart qat'iy bajariladi. Lekin cheksiz chuqur o'ra chegarasiga o'tganda, chegaraviy qiymatlarda bu shartlar bajarilmasligi mumkin. Haqiqatdan ham, (5.77) dagi munosabatlardan quyidagi chegaraviy munosabatlarning bajarilmasligi ko'rindi.

$$\lim \psi_1(x - 0) = \lim \psi_2(x + 0),$$

$$\frac{d}{dx} \lim \psi_1(x - 0) = \frac{d}{dx} \lim \psi_2(x + 0).$$

Topilgan yechim  $U_0$  ning katta qiymatida real  $\psi(x)$ ga tegishli bo'lmay, balki  $U_0 \rightarrow \infty$  da uning chegaraviy qiymatiga tegishlidir. Chekli chuqurlikka ega bo'lgan potensial o'rani ko'raylik. O'rada tashqarida potensial funksiya nolga teng. O'ra ichida esa  $U(x) = U_0 < 0$ . Koordinata boshi sifatida o'ra tagining markazi olinadi. Dastlab to'liq energiya  $E$  manfiy bo'lgan holni ko'rish mumkin, bunda  $U_0 < E < 0$ . Quyidagi belgilashlarni kiritamiz:

$$\left. \begin{aligned} k &= +\sqrt{2m(E - U_0) / \hbar^2} \\ \alpha &= +\sqrt{-2mE / \hbar^2} \end{aligned} \right\}. \quad (5.78)$$

U vaqtida o'ra ichida Shredinger tenglamasini quyidagicha yozish mumkin:

$$\frac{d^2\psi}{dx^2} + k^2\psi = 0. \quad (5.79)$$

O'rada tashqarida esa

$$\frac{d^2\psi}{dx^2} - a^2\psi = 0. \quad (5.80)$$

(5.79) tenglamasining umumiy yechimi:

$$\psi = A \cos kx + B \sin kx, \quad (5.81)$$

(5.80) tenglamaning yechimi esa  $e^{\pm ax}$  bo'ladi. Bunda shunday ishorani tanlash kerakki,  $x=\pm\infty$  da yechim nolga aylansin. Shunday qilib, o'rada tashqarida

$$x > a \text{ bo'lganda } \psi = Ce^{-ax},$$

$$x < -a \text{ bo'lganda } \psi = De^{ax}$$

bo'ladi.

Simmetriklik xossasidan ko'rindaniki, ehtimoliyat zichligi  $|\psi|^2$  koordinata boshiga nisbatan  $x$  ning simmetrik funksiyasi bo'lishi kerak. Bundan  $C^2=D^2$ , ya'ni ikkita holat bo'lishi mumkin:  $C=D$  va  $C=-D$ .  $A, B, C, D$  doimiyliklarni shunday tanlash kerakki, o'raning chegarasida  $\psi$  funksiya va uning hosilasi  $d\psi/dx$  uzluksiz bo'lishi kerak.  $x=+a$  chegarada bunday bo'lishligidan:

$$A \cos ka + B \sin ka = Ce^{-aa},$$

$$-kA \sin ka + kB \cos ka = \alpha Ce^{-aa},$$

$x=-a$  chegarada:

$$A \cos ka - B \sin ka = De^{-aa},$$

$$kA \sin ka + kB \cos ka = \alpha De^{-aa}.$$

Bundan:

$$2A \cos ka = (C + D)e^{-aa},$$

$$2kA \sin ka = \alpha(C + D)e^{-a\alpha},$$

$$2B \sin ka = (C - D)e^{-a\alpha},$$

$$2kB \cos ka = -\alpha(C - D)e^{-a\alpha}.$$

Agar  $A \neq 0$  va  $C = D$  bo'lsa, u vaqtida

$$\operatorname{ktg} ka = \alpha. \quad (5.82)$$

Agar  $B \neq 0$  va  $C = -D$  bo'lsa, u vaqtida

$$k \operatorname{ctg} ka = -\alpha. \quad (5.83)$$

Bu shartlar bir vaqtida qanoatlantirilmaydi. Qanoatlantirilganda  $k^2 = -a^2$  bo'lishi kerak edi, bu esa mumkin emas.  $A, B, C, D$  koefitsientlar nolga teng bo'lgan holdagi yechim fizik ma'noga ega bo'lmaydi. Bo'lishi mumkin bo'lgan barcha yechimlar ikki guruhga bo'linadi:  $A \neq 0, B = 0, C = D$  bo'lgandagi just to'lqin funksiyali yechimlar va  $A = 0, B \neq 0, C = -D$  bo'lgandagi toq to'lqin funksiyali yechimlar. Energiya sathlari (5.82) yoki (5.83) tenglamalarning grafik yoki son qiymati orqali yechilishidan kelib chiqadi. Energiya sathlari (5.82) yoki (5.83) formulalarni grafik yoki sonlar ko'rinishidagi yechimlaridan hosil qilinadi.  $\alpha$  va  $k$  lar (5.78) dagi ifodalar orqali topiladi. Grafik holda yechish uchun o'lchamsiz kattaliklar kiritamiz:

$$\xi = ak; \eta = a\alpha. \quad (5.84)$$

U holda

$$\xi^2 + \eta^2 = -2mU_0a^2 / \hbar^2, \quad (5.85)$$

just to'lqin funksiyali yechimlar uchun (5.82) formuladan


$$\eta = \xi \operatorname{tg} \xi, \quad (5.86)$$

toq to'lqin funksiyali yechimlar uchun (5.83) formuladan

$$\eta = -\xi \operatorname{ctg} \xi, \quad (5.87)$$

5.3a-rasmda  $\eta = \xi \operatorname{tg} \xi$  va 5.3b-rasmda  $\eta = -\xi \operatorname{ctg} \xi$  kattaliklar egri chiziqlari keltirilgan.

Vertikal punktir chiziqlar bilan bu egri chiziqlarning asimtotalari ko'rsatilgan.  $\xi$  va  $\eta$  kattaliklar musbat bo'lgani uchun egri chiziqlarning faqat ( $\xi > 0, \eta > 0$ ) musbat kvadratda bo'lgan qismi



5.3-rasm

ahamiyatlidir. Bu egri chiziqlarni (5.85) formula hosil qiladigan aylana bilan kesib o'tamiz. Aylana radiusi  $\sqrt{-2mU_0a/\hbar}$  aniq deb hisoblanishi kerak, chunki  $U_0$  va  $a$  kattaliklar aniq kattaliklardir. Bu aylananing (5.86) va (5.87) formulalar bilan ifodalangan egri chiziqlar bilan kesishish nuqtalari koordinatalari  $\xi$  va  $\eta$  larning mumkin bo'lgan qiymatlariga teng bo'ladi. Demak,  $k$  va  $\alpha$  ham aniqlanadi. U vaqtida (5.78) formula orqali energiya  $E$  ni osonlikcha aniqlash mumkin. Sathlar soni chekli bo'lib, potensial o'ranging  $-U_0$  chuqurligi va  $2a$  kengligi bilan aniqlanadi. Masalan, aylananing radiusi 7 bo'lsa, 5 ta sath hosil bo'ladi. 1,3,5 kesishish nuqtalariga juft, 2, 4 larga esa toq to'lqin funksiyalari to'g'ri keladi. Agar  $0 \leq -U_0a^2 \leq \hbar^2\pi^2/(8m)$  bo'lsa, faqat bitta kesishish nuqtasi bo'ladi, chunki  $k$  kattalik noldan farq qiladi. U vaqtida (5.78) formulada  $E > U_0$ . Barcha energetik sathlar, jumladan, eng pastki sath ham potensial o'ra tagidan yuqorida yotadi. Topilgan yechim nolinchi energiyaning bo'lishi zarurligini ko'rsatadi.  $E > 0$  bo'lgan holni qarab chiqaylik. Bu vaqtida a kattalik eng kichik bo'ladi.  $\alpha = i\beta$  bo'lsa, (5.80) tenglamaning o'rniga quyidagi tenglama hosil bo'ladi:

$$\frac{d^2\psi}{dx^2} + \beta^2\psi = 0. \quad (5.88)$$

Bu tenglamaning yechimi:


$$\psi = A'\cos\beta x + B'\sin\beta x \quad x > +a \quad \text{bo'lganda}, \quad (5.89)$$

$$\psi = A''\cos\beta x + B''\sin\beta x \quad x < -a \quad \text{bo'lganda}, \quad (5.90)$$

$x$  ning istalgan qiymatida har ikki yechim chekli bo'ladi va ularda to'rtta ixtiyoriy doimiylar  $A'$ ,  $B'$ ,  $A''$ ,  $B''$  lar qatnashadi. Bu yechim-larni  $-a < x < +a$  intervaldagи (5.81) formula yechim bilan birlashtirish mumkin. Lekin bu vaqtida potensial o'raning har ikki devorida  $\psi$  va  $d\psi/dx$  kattaliklar uzlusiz bo'lishi kerak. Bunday  $A'$ ,  $B'$ ,  $A''$ ,  $B''$  koeffitsientlarga nisbatan to'rtta chiziqli tenglama hosil bo'ladi. Tenglamalar  $A$  va  $B$  parametrlarga ega bo'ladi. Bu esa noma'lum koeffitsientlarni  $A$  va  $B$  lar orqali ifodalash uchun yetarlidir.  $A$  va  $B$  lar istalgan qiymatlarni qabul qilishi mumkin. Bundan esa quyidagi xulosa kelib chiqadi:  $E > 0$  bo'lganda energiya kvantlanmaydi, energetik spektr uzlusiz bo'ladi. To'lqin funksiyasi  $x \rightarrow \pm\infty$  da nolga intilmaydi, ya'ni zarra harakati infinit, umumiy nazariya ham shuni talab qiladi.

### 5.6-§. Zarralarning potensial to'siqdan o'tishi. Tunnel effekti

Zarraning bir o'lchovli harakatining muhim hollaridan biri, uning potensial to'siqdan o'tishidir. 5.4-rasmida keltirilgan potensial o'rani ko'rib chiqish mumkin.  $\mu$  massali zarra  $x$  o'qi I, II, III sohalarga bo'lingan.  $a < x < b$  sohada potensial energiya noldan farq qiladi. Kengligi  $ab$  va balandligi  $U_0$  bo'lgan  $a < x < b$  soha potensial to'siq devyiladi. Zarra  $x$  o'qi yo'nalishida harakatlanganda potensial to'siqqa duch kelsin (5.4-rasm). Agar zarraning to'liq energiyasi  $E$  to'siq balandligi  $U_0$  dan katta, ya'ni  $E > U_0$  bo'lganda ( $U_0$  – potensial energiya) klassik mexanika tushunchalariga asosan zarra, albatta, I sohadan II sohaga o'tadi, ya'ni potensial to'siq ichiga kiradi va o'zining kamaygan  $E - U$  energiyasi bilan potensial to'siq ichida (II sohada) harakatini davom ettiradi. II sohada faqat o'tayotgan to'lqin tarqaladi. Bunda zarra potensial to'siq orqa tomonidagi III sohaga o'ta oladi va potensial o'rada chiqib ketadi, qaytmaydi. Agar zarraning to'liq energiyasi  $E$



5.4-rasm

potensial to'siq balandligi  $U_0$  dan kichik, ya'ni  $E < U_0$  bo'lsa, klassik mexanika bo'yicha zarraning bir sohadan ikkinchi sohaga o'tishi mumkin emas. Lekin kvant mexanikasida tunnel effekti deb ataladigan hodisaga asosan zarraning to'liq energiyasi  $E$  potensial to'siq balandligi  $U_0$  dan kichik bo'lganda, ya'ni  $E < U_0$  bo'lganda ham mikrozarraning II sohada topilishi aniq ehtimoliyatga ega bo'ladi.  $x$  ning ortishi bilan bu ehtimoliyat eksponensial kamaya boradi, lekin noldan farq qiladi. Tunnel effektini tushunish uchun kvant mexanikasida potensial to'siq shaffofligi  $D$  degan tushuncha kiritiladi.  $D$  – to'siqqa tushayotgan elektronlar to'lqinlari intensivligining to'siqdan o'tadigan qismini xarakterlaydigan kattalik. Mikrozarralarning klassik fizikaga zid bo'lgan, ya'ni  $E < U_0$  bo'lgan holda ham to'siqdan o'tishi Shredinger tenglamasining yechimidan kelib chiqadi. Rasmida  $a < x < b$  sohada Shredinger tenglamasining yechimi bo'lgan  $\psi$  funksiya noldan farqli qiymatlarga ega bo'ladi. Zarraning to'siq ichida topilishining ehtimoliyati esa to'lqin funksiyasi amplitudasining kvadratiga proporsionaldir. Shuning uchun mikrozarrani to'siq ichida ham qayd qilish ehtimoliyati mavjud, uning potensial to'siqdan o'tish ehtimoliyati noldan farq qiladi.

Demak, to'liq energiyasi  $E$  bo'lgan zarra  $U_0$  balandligi  $E$  dan katta bo'lgan potensial to'siqqa tushsa, ya'ni  $E > U_0$  bo'lganda zarraning potensial to'siqdan o'tishi chekli ehtimoliyatga ega bo'ladi. Zarralarning potensial to'siq orqali sizib o'tishi *tunnel effekti* deyiladi. Tunnel effekti faqat kvant mexanikasi nuqtai nazaridan tushuntiriladi.

Zarralarning potensial to'siqdan o'tishi ehtimoliyatini quyidagi hisoblash mumkin (5.4-rasm).

I, II, III sohalarda potensial energiya qiymatlari (potensial to'siq balandligi) quyidagicha:

$$U(x) = \begin{cases} 0, & 0 < x < a \\ U_0, & a < x < b \\ 0, & x > b \end{cases} \quad \text{sohada} \quad (5.91)$$

I, II, III sohalarda zarralarning to'lqin funksiyalari  $\psi_I$ ,  $\psi_{II}$ ,  $\psi_{III}$  bo'lsin. Har bir soha uchun Shredinger tenglamasi quyidagi ko'rinishda yoziladi:

$$\left. \begin{array}{l} \text{I sohada: } -\frac{\hbar^2}{2m} \frac{d^2\psi_1}{dx^2} = E\psi_1, \text{ bunda } U_0 = 0; \\ \text{II sohada: } -\frac{\hbar^2}{2m} \frac{d^2\psi_{II}}{dx^2} + U\psi_{II} = E\psi_{II}, \text{ bunda } U_0 = U; \\ \text{III sohada: } -\frac{\hbar^2}{2m} \frac{d^2\psi_{III}}{dx^2} = E\psi_{III}, \text{ bunda } U_0 = 0. \end{array} \right\} \quad (5.92)$$

$K_1^2$  va  $K_2^2$  belgilashlar kiritib, bu tenglamalarni quyidagicha yozish mumkin:

$$K_1^2 = \frac{2m}{\hbar^2} E \quad (5.93)$$

va

$$K_2^2 = \frac{2m(U - E)}{\hbar^2}. \quad (5.94)$$

U vaqtida

$$\left. \begin{array}{l} \text{I sohada: } \frac{d^2\psi_1}{dx^2} + K_1^2\psi_1 = 0; \\ \text{II sohada: } \frac{d^2\psi_{II}}{dx^2} - K_2^2\psi_{II} = 0; \\ \text{III sohada: } \frac{d^2\psi_{III}}{dx^2} + K_1^2\psi_{III} = 0. \end{array} \right\} \quad (5.95)$$

Bu tenglamalarning yechimlari quyidagi funksiyalardir:

$$\left. \begin{array}{l} \text{I sohada: } \psi_1 = C_1 e^{ik_1 x} + C_2 e^{-ik_1 x}; \\ \text{II sohada: } \psi_{II} = C_3 e^{-k_2 x} + C_4 e^{k_2 x}; \\ \text{III sohada: } \psi_{III} = C_5 e^{ik_1 x} + C_6 e^{-ik_1 x}. \end{array} \right\} \quad (5.96)$$

Bu yechimlarda  $C_1, C_2, C_3, C_4, C_5, C_6$  lar har bir to'lqinga tegishli bo'lgan amplitudalardir. Ular quyidagicha aniqlanadi:

$C_1$  – potensial to'siqqa chapdan tushayotgan to'lqin amplitudasi;  
 $C_2$  – I sohaga qaytgan to'lqin amplitudasi;

$C_3$  – II sohaga (potensial to'siq ichiga) o'tgan to'lqin amplitudasi;

$C_4$  – potensial to'siqqa (b nuqtadan) qaytgan to'lqin amplitudasi;

$C_5$  – potensial to'siqdan III sohaga o'tib, cheksizlikka ketgan to'lqin amplitudasi;

$C_6$  – III sohaga qaytgan to'lqin amplitudasi.

$C_6$  – mavjud bo'lmanan to'lqin, chunki to'lqin cheksizlikdan qaytmaydi, shuning uchun  $C_6 = 0$ .

(5.95) ifodadagi differensial tenglamalarning (5.96) da keltirilgan xususiy yechimlari I va II sohadagi de-Broyl yassi to'lqinlarini ifoda-laydi (mikrozarralar harakati de-Broyl yassi to'lqini sifatida namoyon bo'ladi). Xususiy yechimlar  $e^{\pm ik_1 x}$  va  $e^{\pm ik_2 x}$  ko'rinishga ega. Bunda  $e^{ik_1 x}$  yechim  $x$  o'qi yo'nali shida chapdan o'ngga borayotgan to'lqin,  $e^{-ik_1 x}$  esa qaytayotgan to'lqinga tegishli. Xuddi shunday,  $e^{\pm ik_2 x}$  yechim ham borayotgan va qaytayotgan to'lqinlarga tegishli. Rasmda keltirilgan I, II, III sohalarda qarab chiqilgan  $\psi_I$ ,  $\psi_{II}$ ,  $\psi_{III}$  – to'lqin funksiyalari  $x$  o'qining har bir nuqtasida uzlusiz va bir qiymatli holda aniqlanadi. Bu esa to'lqin tenglamasini yechish orqali turli amplitudalarini zarralarning energiyasi, potensial to'siq balandligi, uning kengligi orqali ifodalashga imkon beradi.

To'lqin funksiyasi bilan bog'liq bo'lgan ehtimoliyat zichligi shu funksiyaning amplitudasi kvadratiga proporsional bo'lgani uchun potensial to'siqning shaffoflik koefitsientini quyidagicha aniqlash mumkin:

$$D = \frac{|C_5|^2}{|C_1|^2}. \quad (5.97)$$

Xuddi shunday, to'siqdan qaytgan va unga tushgan to'lqinlar amplitudalarining modullari kvadratlarining nisbati aniqlanadi:

$$R = \frac{|C_2|^2}{|C_1|^2}. \quad (5.98)$$

(5.97) va (5.98) formulalarda  $D$  – zarralarning II sohadan o'tish yoki potensial to'siqdan o'tish ehtimoliyati;  $R$  – zarralarning sohalar chegarasidan qaytish ehtimoli.

Yuqoridagi  $\psi_1$ ,  $\psi_{II}$ ,  $\psi_{III}$  yechimlar va ularning hosilalarining  $x=a$  va  $x=b$  nuqtalarda teng bo'lishi shartidan  $C_1, C_2, C_3, C_4, C_5$  amplitudalar uchun tenglamalar tizimi kelib chiqadi. Bu tenglamalar yordamida  $C_5, C_1, C_2$  amplitudalar nisbatlarini aniqlash mumkin. Bunda shaffoflik koefitsientining to'siq parametri bilan bog'lanishi hosil bo'ladi. Bunday bog'lanishni topishda matematik amallarni keltirmasdan fizikaviy mulohazalar yordamida shaffoflik koefitsienti  $D$  ning ifodasini yozish mumkin bo'ladi.

Potensial to'siqning  $x=a$  devoriga chapdan kelib tushgan  $C_1 e^{ik_1 x}$  to'lqinning intensivligi to'siq ichida  $e^{-k_2 x}$  ko'rinishidagi eksponensial qonun bo'yicha kamayadi, to'siqning  $x=b$  bo'lgan ikkinchi devoriga bu to'lqin intensivligi dastlabki qiymatiga nisbatan

$$C \sim e^{-k_2(b-a)} \quad (5.99)$$

marta susayib yetib keladi. U vaqtida potensial to'siq orqa tomonidagi (potensial to'siqdan III sohaga o'tgan) zarralarning  $\psi$  funksiyasi potensial to'siqning oldi (I sohadagi) zarralarning  $\psi$  funksiyasidan  $e^{-k_2(b-a)}$  ko'paytuvchi bilan farq qiladi. Zarraning topilish ehtimoliyati to'lqin funksiyasi kvadrati bilan aniqlanadi. Shuning uchun potensial to'siq orqa tomonidagi zarralar zichligi to'siq oldi tomonidagi zarralar zichligidan quyidagi ko'paytuvchi bilan farq qiladi:

$$D = e^{-2k_2(b-a)} = \exp \left[ -2 \sqrt{\frac{2m}{\hbar^2} (U - E)} (b - a) \right]. \quad (5.100)$$

Bu formulada  $D$  – potensial to'siqning shaffoflik koefitsienti deyiladi va zarraning potensial to'siqdan o'tish ehtimoliyatini bildiradi. Bunday hodisa *tunnel effekti* deyiladi.

Shunday qilib, qaralayotgan to'g'ri burchakli potensial to'siq uchun shaffoflik koefitsienti

$$D \approx e^{-\frac{2}{\hbar} \sqrt{2m(U_0 - E)} (b - a)} \quad (5.101)$$

Ixtiyoriy shakldagi potensial to'siq uchun shaffoflik koefitsienti quyidagicha aniqlanadi:

$$D \approx e^{-\frac{2}{\hbar} \int_a^b \sqrt{2m(U - E)} dx} \quad (5.102)$$

bu formulada  $x_1$  va  $x_2$   $E$  energiyaga to‘g‘ri keladigan  $U=U(x)$  funksiya bilan potensial to‘siqning koordinatalari.

Energiyasi  $E$  bo‘lgan zarra balandligi  $E$  dan katta, ya’ni  $E < U(x)$  bo‘lgan potensial to‘siqqa kelib tushsa, zarraning o‘tishi chekli ehti-moliyatga ega bo‘ladi. Bu ehtimoliyat (5.101) formula orqali hisoblanadi. Demak, zarra potensial to‘siqdan o‘tishida o‘z energiyasini yo‘qotmaydi deb hisoblanadi. Zarraning to‘siqqa tushguncha energiyasi qancha bo‘lsa, to‘siqdan o‘shanday energiya bilan chiqadi. Zarralarning potensial to‘siqdan xuddi tunneldan o‘tgandek sizib o‘tishi *tunnel effekti* deyiladi.

### 5.7-§. Chiziqli garmonik ossillyator

Chiziqli garmonik ossillyator atom fizikasida foydalaniladigan muhim modellardan biri hisoblanadi.  $x$  o‘qi bo‘ylab kvazielastik  $F = -kx$  kuch ta’sirida harakatlanuvchi  $m$  massali zarra *garmonik ossillyator* deyiladi. Garmonik ossillyatorni klassik va kvant mexanikalarasi asosida qarab chiqish mumkin.

Klassik mexanika tushunchalari asosida garmonik ossillyatorni qarab chiqaylik. Massasi  $m$  bo‘lgan mikrozarra oddiy tebranishlarni bajarib, muvozanat holatdan  $x$  masofaga siljisin (5.5-rasm). Zarra


$$F = -kx \quad (5.103)$$

kuch ta’sirida harakat qiladi. Bu formulada  $k$  – doimiylilik,  $F$  – elastiklik kuchi, zarra harakatiga teskari yo‘nalgan bo‘lib, zarrani dastlabki holatiga qaytarishga harakat qiladi. (5.103) formulani Nyutonning ikkinchi qonuni asosida quyidagicha yozish mumkin:

$$m \frac{d^2x}{dt^2} = -kx, \quad (5.104)$$

yoki

$$m \frac{dx}{dt} \cdot \frac{d^2x}{dt^2} dt = -kx dx.$$



5.5-rasm

Bu tenglamani integrallashdan quyidagi ifoda hosil bo‘ladi:

$$\frac{1}{2}m\vartheta^2 + \frac{1}{2}kx^2 = \text{const} = E, \quad (5.105)$$

(5.105) formulada birinchi had zarraning kinetik energiyasini ifodalaydi:

$$K = \frac{1}{2}m\vartheta^2, \quad (5.106)$$

ikkinchi had esa zarraning potensial energiyasini ifodalaydi:

$$U = \frac{1}{2}kx^2. \quad (5.107)$$

U vaqtida ossillyator tizimining to‘liq energiyasi quyidagicha ifodalanadi:

$$K + U = E = \text{const}. \quad (5.108)$$

Energiyaning istalgan aniq bir qiymatida zarra ikki nuqta orasida, masalan,  $A$  (koordinatasi  $x=L$ ) va  $A'$  nuqta (koordinatasi  $x=-L$ )

lar orasida  $\omega = \sqrt{\frac{k}{m}}$  chastota bilan garmonik tebranma harakat qiladi.

Bunda energiya  $E$ ,  $x$  va  $\vartheta$  ga bog‘liq bo‘lgan istalgan qiymatlarni qabul qilishi mumkin bo‘lgani uchun uning olishi mumkin bo‘lgan qiymatlarining spektri uzluksiz bo‘ladi.

$$\omega^2 = \frac{k}{m} \quad (5.109)$$

belgilash kiritib, (5.104) tenglamani quyidagicha yozish mumkin:

$$\frac{d^2x}{dt^2} + \omega^2 x = 0 \quad (5.110)$$

(5.110) tenglama Shredingerning

$$\frac{d^2\psi(x)}{dx^2} + \alpha^2\psi = 0; \quad \alpha^2 = \frac{2mE}{\hbar^2} \quad (5.111)$$

to‘lqin tenglamasiga o‘xshashdir. Shuning uchun (5.110) tenglamaning yechimini (5.111) ning yechimi kabi ifodalash mumkin:

$$x = Ae^{i\omega t} + Be^{-i\omega t}. \quad (5.112)$$

*A* va *B* doimiyliklarni koordinata va tezlikning dastlabki qiymatlari dan foydalanib aniqlash mumkin. Buning uchun Eyler formulasi asosida (5.112) dagi yechimni quyidagicha yozish mumkin:

$$x = C \cos \omega t + D \sin \omega t. \quad (5.113)$$

(5.113) ifoda zarraning holatini vaqtga bog'liq ravishda ifodalaydigan harakat tenglamasidir. Vaqtning istalgan qiymatida zarraning tezligi quyidagicha ifodalanadi:

$$\vartheta = \frac{dx}{dt} = -C\omega \sin \omega t + D\omega \cos \omega t, \quad (5.114)$$

zarra  $t=0$  bo'lgan vaqtida  $x=L$  bo'lgan nuqtada bo'lsin, u holda uning tezligi ham  $\vartheta=0$  bo'ladi.  $t=0$  va  $\vartheta=0$  bo'lgan bunday boshlang'ich shartlarda (5.114) tenglamalarda  $C=L$  va  $D=0$  bo'ladi. U vaqtida (5.113) va (5.114) tenglamalarni quyidagicha yozish mumkin:

$$x(t) = L \cos \omega t \quad (5.115)$$

va

$$\vartheta(t) = -L\omega \sin \omega t. \quad (5.116)$$

Endi to'liq energiyani quyidagicha ifodalash mumkin:

$$E = \frac{1}{2} m L^2 \omega^2 \sin^2 \omega t + \frac{1}{2} k L^2 \cos^2 \omega t. \quad (5.117)$$

Zarra tebranma harakatida  $x=0$  bo'lgan muvozanat vaziyatidan o'tganida maksimal  $\vartheta_{\max}=\omega L$  tezlikka ega bo'ladi. Bu vaqtida potensial energiya nolga teng, ya'ni  $U=0$  bo'ladi. Bunday holda zarranning (garmonik ossillyatorning) to'liq energiyasi

$$E = \frac{1}{2} m \vartheta_{\max}^2 = \frac{1}{2} m \omega^2 L^2 \quad (5.118)$$

kattalik bilan aniqlanadi. Agar zarra *A* yoki *A'* chetki holatlarda bo'lsa, uning kinetik energiyasi nolga teng bo'ladi, chunki tezlik  $\vartheta=0$ . Bu holda zarranning to'liq energiyasi faqat potensial energiyaga teng, ya'ni

$$E = \frac{1}{2} k x_{\max}^2 = \frac{1}{2} k L^2. \quad (5.119)$$

Demak, klassik mexanikada chiziqli garmonik ossillyator muvozanat holati atrofida oddiy garmonik tebranishlarni bajarayotgan zarra deb qaraladi. Kvant mexanikasida garmonik ossillyatorni ko'raylik. Yuqorida klassik mexanikada qarab chiqilgan zarrani kvant mexanikasi usullari yordamida qarab chiqish uchun tegishli Shredinger tenglamasi yechimini topish kerak. Bunda to'lqin funksiyasining  $x$  o'qda biror nuqtada to'planmaganligini, shuning uchun berilgan vaqtida zarraning turgan joyini aniqlash mumkin emasligini hisobga olish zarur bo'ladi.

$\psi$ \* $\psi$  kattalik zarraning  $x$  o'qda istalgan kichik  $dx$  oraliqda zarrani topilish ehtimoli zichligini bildiradi. Shuning uchun zarraga ta'sir etuvchi kuch zarraning joylashishiga bog'liq bo'lsa (klassik mexanika holida qaralgandek, ya'ni  $F = -kx$  bo'lganidek), kvant mexanikasida garmonik ossillyatorni qarab bo'lmaydi. Haqiqatda ham, kvant mexanikasi modelida kuch o'z ma'nosini yo'qotadi, lekin impuls va energiya tushunchalari saqlanadi. Kvant mexanikasida klassik mexanikadagidek ossillyator uchun vaqt funksiyasi sifatida zarraning holati va tezligini ifodalaydigan (5.115) va (5.116) ga o'xshash tenglamalarni hosil qilib bo'lmaydi. Lekin ossillyator energiyasini qarash mumkin, chunki energiya klassik va kvant mexanikasi masalalarida koordinata funksiyasi ko'rinishdagi potensial energiya bilan ifodalanadi. Klassik mexanikada (5.107) tenglamadagi potensial energiya ifodasi Nyuton qonuni asosida ta'sir etuvchi kuch formulasida chiqariladi. Kvant mexanikasida esa potensial energiya

$$U = \frac{1}{2} kx^2. \quad (5.120)$$

mexanik tizimni xarakterlaydigan dastlabki va asosiy kattalik hisoblanadi. Bu hol kvant mexanikasida  $U(x)$  funksiyani yangicha aniqlash vazifasini qo'yadi. Klassik mexanikada zarra  $L = x_{\max}$  maksimal chetlanishga ega va bunda to'liq energiya potensial energiyaga teng degan tasavvurlar asosida (5.119) tenglama hosil qilinadi. Lekin kvant mexanikasida to'liq energiyani potensial energiya orqali ifodalab bo'lmaydi. Shuning uchun funksiyaga yangi shartlar qo'yilsa, uning aniqlanish sohasi  $x = \pm\infty$  gacha bo'ladi. To'lqin funksiyasiga quyidagicha yangi shart qo'yiladi:  $x \rightarrow \pm\infty$  da  $y(x) \rightarrow 0$  bo'lishi kerak. Bunday holda zarraning harakat manzarasi avvalgi

klassik mexanikadagi kabi bo'lmaydi, ya'ni elastik kuch ta'sirida zarraning muvozanat atrofida tebranadigan manzara bo'lmaydi.  $U(x)$  funksiyaga yangi shart qo'yilganda, kvant mexanikasidagi manzara potensial chuqurlikdagi to'lqinlar tizimini eslatadi. Bu potensial chuqurlik ichida yoki tashqarisida topilish ehtimolligi va zarra energiyasining potensial chuqurlik shakli bilan aniqlanadigan mumkin bo'lgan barcha qiymatlarini hisoblash mumkin bo'ladi. Bunday usulni qandaydir yo'l bilan hamma tomonidan chegaralangan to'lqinlarga qo'llash mumkin. Kvant mexanikasida chiziqli garmonik ossillyator qaralganda, potensial chuqurlik ichida turg'un to'lqinlar mavjud deb qaraladi. Demak, potensial chuqurlik ichida bo'lishi mumkin bo'lgan turli turg'un to'lqinlarning xususiy funksiyalarini ( $\psi_n$ ) va ularga tegishli bo'lgan xususiy energiyalarini ( $E_n$ ) topish talab qilinadi. Shunday qilib, kvant mexanikasida garmonik ossillyator potensial chuqurlikdagi turg'un to'lqinlar tizimidan iborat deb qaraladi. Chiziqli garmonik ossillyatorning kvant mexanikasidagi bu modelini turg'un to'lqinlar energiyasini istalgan sondagi o'hashlar uchun umumlashtirish mumkin. Agar potensial chuqurlik shakli klassik mexanikadagi chiziqli garmonik ossillyator energiyasi

$$U = \frac{1}{2} kx^2$$

bilan aniqlansa, u vaqtida chiziqli garmonik ossillyator uchun Shredinger tenglamasi quyidagicha ifodalanadi:

$$-\frac{\hbar^2}{2m} \cdot \frac{d^2\psi}{dx^2} + \frac{kx^2}{2}\psi = E\psi. \quad (5.121)$$

Bu tenglamaning yechimini chiqarish matematik jihatdan murakkab bo'lganligi va uni keltirishga zarurat yo'qligi tufayli bu tenglamaning tayyor holdagi yechimidan foydalangan holda xususiy energiya va xususiy to'lqin funksiyasi qiymatlarini qarash mumkin. Bir o'lchamli garmonik ossillyatorning mumkin bo'lgan energiyalari qiymatlarini aniqlaydigan formulani quyidagicha yozish mumkin:

$$E_n = \left(n + \frac{1}{2}\right) \hbar\omega = \left(n + \frac{1}{2}\right) \hbar\nu, \quad (5.122)$$

bunda  $\omega=2\pi n$  – doiraviy chastota,  $n$  – kvant soni,  $n=1,2,3,\dots$  qiymatlarni qabul qilib, energetik sathlar tartib raqamini ko'rsatadi.


(5.122) formula orqali hisoblangan energiya qiymatlarining spektri bir-biridan hın masofada joylashgan energetik sathlar sistemasiini hosil qiladi. Energianing eng kichik qiymati  $E_0 = \frac{\hbar v}{2}$  kattalikka, ikki qo'shni energetik sathlar orasi  $\hbar v$  ga teng. 5.6-rasmida garmonik ossillyatorning mumkin bo'lgan energiyalarining spektri keltirilgan.

$E_0 = \frac{\hbar v}{2}$  — ossillyatorning asosiy holatining energiyasi bo'lib, nolli energiya deyiladi.

Demak, kvant mexanikasida ossillyator energetik spektri diskret bo'ladi. Bu spektrda ossillyator energetik sathlari orasidagi energiya farqi  $\hbar v$  ga teng. Bunday diskret energetik spektrlar kvant mexanik tizim chegaralangan hollarda hosil bo'ladi. Klassik mexanikada ossillyator energetik spektri uzlusiz bo'ladi. «Erkin» zarra, ya'ni kuch maydonidan tashqarida bo'lgan, potensial energiyasi doimiy bo'lgan zarra energianing istalgan qiymatlari ega bo'lishi mumkin, bunda uning spektri ham uzlusiz bo'ladi.

5.6-rasmida ossillyator energetik sathlarining (5.122) formula orqali hisoblangan energiya qiymatlari va  $x$  o'qida har bir sohada zarraning topilish ehtimoliyatini zichligi  $|\psi|^2$  keltirilgan.

Kvant mexanikasi nuqtai nazaridan ossillyator to'g'risida bayon qilingan tushunchalardan yana bir muhim xulosa kelib chiqali:



5.6-rasm

ossillyator energiyasi nolga aylanishi mumkin emas. (5.122) formula dan ko'rinadiki, ossillyatorning eng kichik energiyasi  $E_0$  nolga teng bo'lmaydi, bu nolinchи energiya deyiladi va  $\frac{1}{2} \hbar v$  ga teng bo'ladi.

Berilgan sohada  $x$  o'qida zarraning topilish ehtimoli 5.6-rasmda energiyaning ruxsat etilgan ba'zi bir qiymatlari uchun ehtimoliyat zichligining taqsimlanishi keltirilgan. Grafikda chiziqli garmonik ossillyatorning  $U(r)$  potensial funksiyasi ifodalangan.  $A$  va  $A'$ ,  $B$  va  $B'$  nuqtalar kvant soni  $n$  ning berilgan qiymatida potensial energiya mumkin bo'lgan to'liq energiyaga teng bo'ladigan nuqtalardir. Klassik ossillyator (5.118) formulaga asosan bu nuqtalar chegarasidan chetga chiqa olmaydi. Kvant mexanikasidagi ossillyator uchun esa ehtimolik zichligi chekli qiymatga ega bo'ladi va bu chetki nuqtalar tashqarisida, ya'ni potensial chuqurlikdan tashqarida ham zarraning topilish ehtimoli kichik bo'lsada, chekli qiymatga ega bo'ladi.

### **Nazorat savollari**

1. Kvant mexanikasida mikrozarralarning holati qanday aniqlanadi?
2. To'lqin funksiyasi Shredinger tenglamasining yechimi bo'lishi uchun qanday shartlarni qanoatlantirish kerak?
3. To'lqin funksiyasi amplitudasi kvadratining mohiyati nima?
4. Statsionar holat va nostatsionar holatlar to'g'risida tushuncha bering.
5. Statsionar holatlar uchun Shredinger tenglamasini yozing va izohlang.
6. Nostatsionar holatlar uchun Shredinger tenglamasini yozing va tushuntiring.
7. Xususiy funksiya va xususiy energiyalar qanday funksiya va qanday energiyalardir?
8. Normalash shartining mohiyati nima?
9. Shredinger tenglamasida zarraning qaysi xususiyati hisobga olingan?
10. Fizik kattaliklar operatorlarini qanday tushuntirasiz? Operatorlar qanday bog'lanishni ifodalaydi?
11. Operatorlarni qo'shish va ko'paytirish qanday bajariladi?
12. Gamilton operatorlarining mohiyati nimadan iborat?
13. Zarra qachon erkin harakat qiladi va bunday harakat uchun Shredinger tenglamasi qanday ko'rinishda yoziladi?
14. Chiziqli garmonik ossillyatorni qanday tushunasiz?
15. Ossillyator energiyasi qanday formula bilan aniqlanadi?
16. Ossillyator energiyasi nolga aylanishi mumkinmi?

## VI BOB

# BIR ELEKTRONLI ATOMLAR

Tashqi elektron qobig‘ida bitta elektron (valent elektron) harakatlanayotgan atom *bir elektronli atom* deyiladi. Bir elektronli atomlarga vodorod va vodorodsimon atomlar kiradi.

### 6.1-\$. Vodorod atomi


Vodorod atomi eng oddiy atom sistemasi bo‘lib, u proton va elektronidan tuzilgan. Yadro maydonida bitta elektron harakatlanadi. Proton va elektron orasida elektr tortishish kuchi ta’sir qiladi.

Protonning massasi elektronning massasidan bir necha marta  $m_p = 1836m_e$  kattadir, shuning uchun protonni (yadroni) deyarli tinch holatda deb qabul qilish mumkin. Klassik tasavvurlarga asosan vodorod atomi tuzilishi 6.1-rasmida ko‘rsatilgan. Yadro to‘g‘ri burchakli koordinata sistemasi boshida joylashgan. Elektron yadro atrofida  $r$  o‘lchamli orbita bo‘ylab Kulon tortishish kuchi ta’sirida harakatlanadi. Elektronning potensial energiyasi:

$$U(r) = -\frac{e^2}{4\pi\epsilon_0 r}, \quad (6.1)$$

bunda formulada  $e$  — elektronning zaryadi,  $\epsilon_0$  — vakuum uchun dielektrik doimiylik,  $\epsilon_0 = 8,85 \cdot 10^{-12} F/m$ ,  $r$  — elektron orbitasi radiusi.

Kvant mexanikasi nuqtayi nazaridan elektron Kulon potensial chuqurligida joylashgan to‘lqinlar sistemasidan iborat. Bundan esa turg‘un to‘lqinlar



6.1-rasm

sistemasi mavjud bo‘lishligi kelib chiqadi. Bu to‘lqinlarning har biriga to‘liq energiyaning mumkin bo‘lgan qiymati mos keladi. Bunday holda to‘lqin tenglamasini uch o‘lchamli ko‘rinishda yozish talab qilinadi. Vodorod atomi statsionar holatda bo‘lgani uchun vaqtga bog‘liq bo‘limgan Shredinger tenglamasidan foydalanish qulaydir. Bunda to‘liq energiya quyidagicha yoziladi:

$$E = \frac{P^2}{2m} + U. \quad (6.2)$$

To‘g‘ri burchakli uch o‘lchamli koordinatalar sistemasida Gamilton operatori quyidagi ko‘rinishda yoziladi:

$$\hat{H} = -\frac{\hbar^2}{2m} \left( \frac{\partial^2}{\partial x^2} + \frac{\partial^2}{\partial y^2} + \frac{\partial^2}{\partial z^2} \right) + U. \quad (6.3)$$

Masalaning simmetrik bo‘lganligidan sferik koordinatalar sistemasidan foydalaniladi. Bunday sistema 6.1-rasmida keltirilgan. Rasmida radius vektor —  $r$ , qutb burchagi —  $\theta$ , azimut burchagi —  $\varphi$  sferik koordinatalar hisoblanadi. Dekart koordinatalar  $x, y, z$  va sferik koordinatalar  $r, \theta, \varphi$  orasida quyidagicha bog‘lanish mavjud:

$$\begin{aligned} x &= r \sin \theta \cos \varphi \\ y &= r \sin \theta \sin \varphi \\ z &= r \cos \theta \end{aligned} \quad | \quad , \quad (6.4)$$

(6.4) da keltirilgan formulalar orqali dekart koordinatalar sistemasidan sferik koordinatalar sistemasiga o‘tamiz. Gamilton operatorini sferik koordinatalar sistemasida yozib, ma’lum matematik amallarni bajargandan so‘ng Shredingerning statsionar tenglamasini quyidagi ko‘rinishda yozish mumkin:

$$\begin{aligned} -\frac{\hbar^2}{2m} \left[ \frac{1}{r^2} \frac{\partial}{\partial r} \left( r^2 \frac{\partial \psi}{\partial r} \right) + \frac{1}{r^2 \sin \theta} \frac{\partial}{\partial \theta} \left( \sin \theta \frac{\partial \psi}{\partial \theta} \right) + \right. \\ \left. + \frac{1}{r^2 \sin^2 \theta} \frac{\partial^2 \psi}{\partial \varphi^2} \right] + \left( \frac{-e^2}{4\pi\varepsilon_0 r} \psi \right) = E\psi. \end{aligned} \quad (6.5)$$

Endi to‘lqin funksiyasi  $r, \theta$  va  $\varphi$  ga bog‘liq bo‘ladi.

$$\Psi = \psi(r, \theta, \varphi). \quad (6.6)$$

Hosil qilingan (6.5) tenglamaning yechimi uchta koordinata funksiyasining ko‘paytmasi ko‘rinishida bo‘ladi:

$$\psi(r, \theta, \varphi) = R(r)\Theta(\theta)\phi(\varphi). \quad (6.7)$$

(6.7) ifodani (6.5) formuladagi Shredinger tenglamasiga qo‘yamiz va  $2mr^2/\hbar^2$  ga ko‘paytiramiz, u vaqtda:

$$\Theta\phi \frac{d}{dr} \left( r^2 \frac{dR}{dr} \right) + \frac{R\Theta}{\sin^2 \theta} \frac{d^2\phi}{d\varphi^2} + \frac{\phi R}{\sin \theta} \frac{d}{d\theta} \left( \sin \theta \frac{d\Theta}{d\theta} \right) + \frac{2mr^2}{\hbar^2} \left( E + \frac{e^2}{4\pi\epsilon_0 r} \right) R\Theta\phi = 0. \quad (6.8)$$

(6.8) tenglamani  $\psi=R\Theta\phi$  ga bo‘lsak, hadlari  $r$  ga bog‘liq va  $\theta, \varphi$  larga bog‘liq bo‘lmagan ifoda hosil bo‘ladi. Bu holat ikki qismni guruhlashga yordam beradi:  $r$  ga bog‘liq bo‘lgan radial va  $\theta, \varphi$  ga bog‘liq bo‘lgan burchak qismlaridir. Ularning har biri bir xil bo‘lgan qandaydir doimiy songa teng qilib olinadi. Bu doimiylik sifatida  $\ell(\ell+1)$  qabul qilingan.

$$\frac{d}{dr} \left( r^2 \frac{dR}{dr} \right) + \frac{2mr^2}{\hbar^2} \left( E + \frac{e^2}{4\pi\epsilon_0 r} \right) R = \ell(\ell+1)R, \quad (6.9)$$

va

$$\frac{1}{\phi \sin^2 \theta} \frac{d^2\phi}{d\varphi^2} + \frac{1}{\Theta \sin \theta} \frac{d}{d\theta} \left( \sin \theta \frac{d\Theta}{d\theta} \right) = \ell(\ell+1). \quad (6.10)$$

(6.10) tenglamani ikki qismga ajratish mumkin: birinchi faqat qutb burchagi  $\theta$  ga, ikkinchisi faqat azimut burchagi  $\varphi$  ga bog‘liq bo‘lgan qismlardir. Buning uchun (6.10) tenglamani  $\sin^2 \theta$  ga ko‘paytirib, hadlarni guruhlash kerak:

$$\frac{1}{\phi} \frac{d^2\phi}{d\varphi^2} + \frac{\sin \theta}{\Theta} \frac{d}{d\theta} \left( \sin \theta \frac{d\Theta}{d\theta} \right) - \ell(\ell+1) \sin^2 \theta = 0. \quad (6.11)$$

(6.11)ning har bir qismini doimiy kattalikka tenglashtiramiz. Hosil bo‘lgan tenglamalarning istalgan yechimi  $\ell$  ning parametr

ko‘rinishidagi tegishli qiymatiga ega bo‘ladi. Bo‘linma doimiyligini  $m_\ell^2$  bilan belgilaymiz. Tenglamaning har ikki qismini  $m_\ell^2$  ga tenglashtirib va kerakli matematik amallarni bajargandan so‘ng quyidagi ikkita tenglama hosil bo‘ladi:

$$\frac{m_\ell^2}{\sin^2 \theta} - \frac{1}{\Theta \sin \theta} \frac{d}{d\theta} \left( \sin \theta \frac{d\Theta}{d\theta} \right) = \ell(\ell + 1), \quad (6.12)$$

$$\frac{d^2\phi}{d\varphi^2} + m_\ell^2 \phi = 0. \quad (6.13)$$

Shunday qilib, vodorod atomining ideallashtirilgan modeli uchun Shredingerning sferik koordinatalar sistemasidagi to‘lqin tenglamasi uchta (6.9), (6.12) va (6.13) tenglamalarga ajratiladi. Tenglamalarning har biri faqat bitta koordinataga bog‘liq. Bu tenglamalarni ko‘rib chiqaylik.

1. Azimutal tenglama. (6.13) ifodada keltirilgan azimutal to‘lqin tenglamasi z o‘qi atrofida aylanayotgan de-Broyl to‘lqin funksiyasini ifodalaydi. Bu tenglama garmonik ossillyator tenglamasi bilan o‘xshash bo‘lib, ikkita haqiqiy yechimga va bitta kompleks davriy funksiyaga ega bo‘ladi, ya’ni:

$$\left. \begin{array}{l} \phi = A \sin m_\ell \varphi \\ \phi = A \cos m_\ell \varphi \\ \phi = A e^{im_\ell \varphi} \end{array} \right\} \quad (6.14)$$

Agar atom z o‘qi atrofida to‘liq bir marta aylansa,  $\phi$  funksiya dastlabki holatini oladi va azimut burchagi yana  $\varphi$  ga teng bo‘ladi.  $m_\ell \varphi$  kattalik  $2\pi$  ga karrali bo‘lganda har safar (6.14) funksiyaning bunday sharti qondiriladi.  $\varphi$  radianlarda o‘lchanadi, u holda  $m_\ell$  butun son qiymatlariiga ega bo‘lishi kerak. Lekin,  $m_\ell$  ning nolga teng qiymatini va qarama-qarshi tomonga aylanishini hisobga olish zarur. U vaqtida  $m_\ell$  ning mumkin bo‘lgan qiymatlari quyidagicha bo‘ladi:

$$m_\ell = 0, \pm 1, \pm 2, \pm 3, \dots \quad (6.14a)$$

«—» ishora qarama-qarshi tomonga aylanishini bildiradi,  $m_\ell$  ning bu qiymatlarining kvadrati (6.14) dagi turli xususiy funksiyalarga tegishli bo‘lgan xususiy qiymatlardir. O‘z navbatida bu qiymatlar azimutal tenglamaning mumkin bo‘lgan yechimlaridir. Doimiy kattalik  $m_\ell$  vodorod atomini xarakterlaydigan *kvant sonidir*.  $m_\ell$  – orbital magnit kvant soni deyiladi.

**2. Qutb koordinatalaridagi tenglama.** (6.12) tenglama qutb tenglamasi bo‘lib, qutb burchagining dastlabki holatiga nisbatan o‘zgorganidagi de-Broyl to‘lqin funksiyasini ifodalaydi. Bu tenglamaning yechimi Lejandrning bog‘langan polinomlari kabi bo‘ladi va quyidagicha ifodalanadi:

$$P_{lm_\ell}(\cos\theta). \quad (6.15)$$

Bu polinomlar  $\cos\theta$  va  $m_\ell$ ,  $\ell$  doimiyliklarga bog‘liq bo‘ladi.  $m_\ell$  musbat va manfiy butun sonlarni hamda nol qiymatlarni qabul qilgani uchun qutb burchagi 0 dan  $\pi$  gacha o‘zgaradi. Lejandr polinomlari xossasiga asosan (6.15) ifodadagi yechim  $\ell$  butun sonlarga teng va  $m_\ell$  ning absolyut qiymatidan katta yoki teng bo‘lgan qiymatlaridagina to‘g‘ri bo‘ladi. Bunday shartdan ikkinchi kvant son – orbital kvant sonining qabul qilishi mumkin bo‘lgan son qiymatlari kelib chiqadi, ya’ni:

$$\ell = 0, 1, 2, 3, \dots$$

$\ell = m_\ell$  ning absolyut qiymatidan katta yoki teng bo‘lganligidan  $\ell = 0$  bo‘lsa,  $m_\ell = 0$  yoki  $\ell = 1$  bo‘lsa,  $m_\ell = 0$  yoki  $\pm 1$  qiymatlariga teng bo‘lishi mumkin, ya’ni:

$$m_\ell = 0, \pm 1, \pm 2, \pm 3, \dots, \pm \ell.$$

Umumiy holda  $\ell$  ning har bir berilgan qiymatiga  $(2\ell+1)$  yechim to‘g‘ri keladi. Yoki buni quyidagicha ta’riflash mumkin:  $\ell$  ning har bir berilgan qiymatiga to‘g‘ri keladigan holat  $m_\ell$  ga nisbatan  $(2\ell+1)$ ga karrali turlangan («aynigan») bo‘ladi. Agar  $\ell$  ning har bir qiymatiga to‘g‘ri keladigan  $(2\ell+1)$  sondagi energiyalarning xususiy qiymatlari o‘zaro teng bo‘lsa, bunday holatlar «aynigan» deyiladi. Ikkinchi tomondan, qandaydir biror fizik hodisalar ta’sirida

xususiy qiymatlarga ajralsa, u holda turlanish («aynish») yo‘qoladi, hosil bo‘lgan holatlar turlanmagan («aynimagan») deyiladi.

**3. Radial tenglama.** (6.9) to‘lqin tenglamasi radial tenglama bo‘lib, protondan uzoqlik masofasi  $r$  ga bog‘liq ravishda de-Broyl to‘lqin funksiyasini ifodalaydi. Bu tenglamaning yechimi Lejandr polinomi  $L_{n,\ell}(r)$  ko‘rinishda bo‘lib, quyidagicha ifodalanadi:

$$R_{n,\ell}(r) = e^{-nr} r^\ell L_{n,\ell}(r). \quad (6.16)$$

Bunda  $n$  – noldan farqli bo‘lgan istalgan butun musbat son,  $\ell$  – orbital kvant son,  $n$  – esa *bosh kvant son* deyiladi. Lejandr polinomi xossasiga asosan (6.16) yechim to‘g‘ri bo‘lishi uchun  $n > \ell + 1$  bo‘lishi kerak. Bunday shartdan  $n$  ning qabul qilishi mumkin bo‘lgan son qiymatlari kelib chiqadi.

Shunday qilib, uch (6.9), (6.12) va (6.13) tenglamalardan vodorod atomi uchun bir-biri bilan quyidagicha bog‘lanishda bo‘lgan uchta kvant sonlar sistemasi hosil qilindi:

Bosh kvant son  $n = 1, 2, 3, \dots;$

Orbital kvant son  $\ell = 0, 1, 2, 3, \dots, (n-1);$

Orbital magnit kvant son  $m_\ell = 0, \pm 1, \pm 2, \pm 3, \dots, \pm \ell$

$n$  ning berilgan qiymatida (6.5) formulada ifodalangan Schrödinger tenglamasining bir-biriga bog‘liq bo‘limgan yechimlarining soni quyidagicha aniqlanadi:

$$\sum_{\ell=0}^{n-1} (2\ell + 1) = n^2. \quad (6.17)$$

**4. To‘liq to‘lqin funksiyasi.** Vodorod atomining qaralayotgan modeli uchun to‘liq to‘lqin tenglamasini hosil qilishda dastlab yuqorida hosil qilingan (6.9), (6.12), (6.14) tenglamalarning har birini tegishli chegarada har bir koordinata  $(r, \theta, \varphi)$  uchun normallash kerak. Hosil qilingan ifodalar (6.7) tenglamadagi kabi ko‘paytiriladi. Agar hosil qilingan natijaviy to‘liq to‘lqin tenglamasi uning xususiy funksiyalarida yechilsa, u vaqtida bu yechimlarning har biri o‘zgaruvchi amplitudá bilan xarakterlanishini ko‘rish mumkin. Koordinata boshi atrofidagi fazo tugunli sirtlar bilan bo‘limlarga ajratiladi. Bunda har bir ikki qo‘shti bo‘limlarda tebranish amplitudasi faza bo‘yicha qarama-qarshi bo‘ladi. Tugunli sirtlar soni  $n-1$  ga teng.

Agar energiyaning xususiy qiymatlari kvant sonlarining aniq bирор то‘лами учун hisoblansa, hisoblangan qiymatlar faqat bosh kvant son  $n$  ga bog‘liqligini ko‘rish mumkin. Bu esa qaralayotgan soddalashtirilgan model учун tizim aynishining ifodasıdir. Masalani kvant mexanikasi asosida yechishda energiyaning diskret xususiy qiymatlarini hosil qilish учун orbita radiusining har bir qiymatida elektronning to‘liq energiyasi  $E$ , uning potensial energiyasi  $U(r)$  dan kichik bo‘lishi kerak. Bunday holatlar bog‘langan holatlar, electronlar esa bog‘langan elektronlar deyiladi. Agar to‘liq energiya potensial energiya  $U(r)$  dan katta bo‘lsa, elektron istalgan energiya qiymatiga ega bo‘lishi mumkin. Bunda elektron energiyasi kvantlanmaydi va u erkin bo‘ladi. Bog‘langan holatlar yoki bog‘langan elektronlar учун energiyaning xususiy qiymatlari quyidagi formula orqali hisoblanadi:


$$E_n = -\frac{me^4}{32\pi^2 \epsilon_0^2 \hbar^2 n^2} = (-13,6) \frac{1}{n^2} eU. \quad (6.18)$$

$n = 1, 2, 3, \dots$

(6.18) formula Bor nazariyasida hosil qilingan energiya formulasi bilan mos keladi.

Bor nazariyasida hosil qilib bo‘lmaydigan ko‘pgina boshqa natijalar kvant-mexanik tasavvurlar asosida hosil qilinadi. Jumladan, kvant mexanikasi energetik holatlar aynishi bilan bog‘liq bo‘lgan masalalarni yoki tabiatda mavjud bo‘lgan atomlar xossalari bilan to‘g‘ri keladigan atom modelini aniqlashga imkon berdi. 6.2-rasmda Kulon potensial chuqurligi va chuqurlikda bog‘langan elektronlar sistemasiga tegishli bo‘lgan energetik sathlar sxematik ravishda keltiril-gan. Xuddi shunday rasmida energetik sathlar orasida bo‘ladigan ba‘zi bir optik o‘tishlar ko‘rsatilgan.

Bunday o‘tishlar vodorod atomi spektridagi Balmer seriyasini hosil qiladi. Rasmda elektronning to‘liq energiyasi nolga yaqinlashishi bilan energetik sathlar zinchashishi tasvirlangan. Elektronning to‘liq energiyasi noldan katta bo‘lganda, ya’ni  $E > 0$  da erkin harakat qiladi, bunda energetik sathlar kvantlanmaydi. Erkin elektron energiyasi diskret bo‘lmagan tutash spektrni hosil qiladi.



6.2-rasm

Shunday qilib, vodorod atomi uchun Shredinger tenglamasining yechimi uchta kvant son  $n, \ell, m_\ell$  larga bog'liq bo'lib, quyidagicha ifodalanadi:

$$\psi_{n,\ell,m_\ell}(r\theta\varphi) = R_{n,\ell}(r)\theta^m(\theta)\phi_m(\varphi). \quad (6.19)$$

## 6.2-§. Vodorodsimon atomlar

Vodorodsimon atomlar va tizimlar deb, oralarida elektr tortishish kuchlari ta'sir qilayotgan ikki nuqtaviy massadan iborat tizimga aytildi. Vodorodsimon atomlarga vodorodsimon ionlar, vodorod izotoplari, pozitroniy va myuoni, myuonli atomlar, adronli atomlar, Ridberg atomlari misol bo'ladi. Vodorodsimon atomlarning prototipi vodorod atomi hisoblanadi. Shuning uchun vodorod atomi uchun yozilgan barcha formulalar vodorodsimon atomlar uchun ham to'g'ri bo'ladi. Vodorod atomi uchun  $Z=1$ , proton massasi  $M$  va elektron massasi  $m$ .

**Vodorodsimon ionlar.** Bunday ionlarga bir marta ionlashgan, zaryad soni  $Z=2$  bo'lgan geliy atomi  $\text{He}^+$ ; ikki marta ionlashgan, zaryad soni  $Z=3$  bo'lgan litiy atomi  $\text{Li}^{++}$ ; uch marta ionlashgan, zaryad soni  $Z=4$  bo'lgan berilliyl atomi  $\text{Be}^{+++}$  va boshqa vodorodsimon ionlar kiradi.

Atomda yadro atrofida elektron buluti taqsimlanishining zichligi maksimum bo'lgan radius quyidagicha aniqlanadi:

$$r_n = \frac{n^2 a_0}{Z}, \quad (6.20)$$

bunda  $a_0 = \frac{4\pi\varepsilon_0\hbar^2}{me^2}$  – vodorod atomida birinchi Bor orbitasi radiusi.

Vodorodsimon atomlarning energetik sathlari energiyasi:

$$E_n = -\frac{mZ^2 e^4}{32\pi^2 \varepsilon_0^2 \hbar^2 n^2}, \quad (6.21)$$

Bunda  $n=\ell+k+1$  bo'lib,  $n, \ell, k$  lar butun sonlar;  $n$  – bosh kvant son,  $\ell$  – orbital kvant son,  $k$  – radial kvant son.  $\ell$  va  $k$  lar  $0, 1, 2, \dots$  qiymatlarni,  $n = 1, 2, 3, \dots$  qiymatlarni qabul qiladi,  $Z$  – zaryad soni.

(6.20) va (6.21) formulalardan ko'rindiki, He, Li, Be atomlarida birinchi Bor orbitasining radiusi (tegishlicha boshqa orbitalar ham) vodorod atomiga qaraganda  $Z$  marta kichik, ionlashtirish potensiali esa  $Z^2$  marta kattadir. Yadro atrofida elektron buluti taqsimlanishining zichligi radial yo'nalişda qaralganda  $n=\ell+k+1$  ifodada  $k=0$ ,  $\ell=n-1$  da orbitalar doiraviy bo'ladi,  $k\neq0$  da orbitalar elliptik bo'ladi.

Vodorod izotoplarida (deyteriy va tritiy) proton deytron va triton bilan almashgan bo'ladi. Deytron proton va neytrondan, triton esa, proton va ikkita neytrondan tashkil topgan. Shuning uchun deyteriy va tritiyda vodorod atomidagi singari  $Z=1$  bo'ladi, energetik sathlar energiyasi orasidagi farq keltirilgan massaning turli xil bo'lganligidandir. Deytron va triton massasi proton massasidan taxminan tegishlicha ikki va uch marta katta. Proton, deytron va triton uchun keltirilgan massalarining nisbiy farqi  $10^{-3}$  tartibidadir. Bundan ko'rindiki, deyteriy va tritiy uchun orbita o'lchamlari va ionlashtirish potensiali qiymatlari vodorod atomi uchun shu kattaliklar qiymatlari bilan mos tushadi. Keltirilgan massalar orasidagi kichik farq nurlanish spektral chiziqlarining izotopik siljishiga olib keladi. Izotopik siljishning nisbiy qiymati nurlanish chastosining  $10^{-3}$  tartibidadir.

**Pozitroniy va myuoniy.** Pozitroniy deb, pozitron  $e^+$  va elektron  $e^-$  dan iborat *vodorodsimon tizimga* aytiladi. Pozitron massasi elektron massasiga teng, zaryadi bir musbat zaryadga teng. Bunday tizim uchun  $Z=1$ , keltirilgan massa vodorod atomi keltirilgan massasidan deyarli ikki marta kichik. Shuning uchun vodorod atomiga qaraganda pozitroniy Bor orbitasi o'lchami ikki marta katta va ionlashtirish potensiali ikki marta kichik. Myuoniy musbat myuon  $\mu^+$  va electrondan tashkil topgan. Myuon o'z xossalari bilan pozitroniga o'xshaydi, lekin massasi pozitron massasidan 207 marta kattadir. Myuon zarralari leptonlar guruhiga kiradi. Leptonlar kuchli o'zaro ta'sirlarda qatnashmaydi.

Myuon beqaror zarra bo'lib, uning yashash vaqt 2,2 mks. Myuon uchun  $Z=1$ , keltirilgan massa vodorod atomi keltirilgan massasiga teng, myuonning Bor orbitasi o'lchami va ionlashtirish potensiali qiymatlari vodorod atomi bilan deyarli bir xil. Pozitroniy va myuoniy beqaror atomlardir. Myuoniyning beqarorligi va yashash vaqt myuonning beqarorligi va yashash vaqt bilan aniqlanadi. Pozitroniyning beqarorligi pozitron va elektronning mumkin bo'lgan o'zaro annigilyatsiyasi bilan xarakterlanadi. Pozitroniy ikki xil bo'ladi: ortopozitroniy va parapozitroniy. Ortopozitroniyda pozitron va elektron spinlari qarama-qarshi yo'nalgan. Ortopozitroniy  $1,4 \cdot 10^{-7}$ s vaqt oralig'ida annigilyatsiyalangandan so'nt uchta gamma-kvant hosil bo'ladi, parapozitroniydan esa  $1,25 \cdot 10^{-10}$ s vaqt oralig'ida ikkita gamma-kvant hosil bo'ladi.

**Myuonli atomlar.** Yadro zaryadi  $Ze$  bo'lgan va elektroni manfiy myuon  $\mu^-$  bilan almashtirilgan atomlar *myuonli atomlar* deyiladi. Manfiy ion massasi va yashash vaqt musbat ionga tegishli va shu kattaliklarga tengdir. Zaryadi esa manfiy ishoralidir. Vodorod atomi uchun yozilgan formulalar o'zgarishsiz holda myuon uchun ham to'g'ri bo'ladi, faqat elektron massasini manfiy myuon massasi bilan almashtirish kerak. Manfiy myuon massasi elektron massasidan 207 marta katta. Bu vaqtida keltirilgan massa ham 186 marta ortadi. Myuonli atomlarda Bor orbitasi o'lchami vodorod atomi Bor orbitasi o'lchamidan 186 marta kichik, ionlashtirish potensiali esa 186 marta katta. Spektral chiziqlar chastotasi vodorod atomida  $n \rightarrow n'$  o'tishda hosil bo'ladigan spektral chiziqlar chastotasidan 186 marta kattadir. Bu esa pastki energetik sathlar orasidagi o'tishlarda rentgen

nurlanishlari hosil bo'lishini ko'rsatadi.  $Z$  katta bo'lgan myuon atomlarida keltirilgan massaga bo'lgan tuzatmani hisobga olmaslik mumkin. Shuning uchun og'ir myuonli atomlarda Bor orbitasi o'lchami  $207Z$  marta kichrayadi, ionlashtirish potensiali esa  $207Z^2$  marta ortadi, vodorod atominikiga nisbatan,  $Z \sim 102$  tartibda bo'lsa, Bor orbitasi o'lchami  $10^{-15} \text{m}$  tartibda bo'ladi, ionlashtirish potensiali esa bir necha MeV bo'ladi. Myuonli atomlar zaryadi yadro hajmi bo'ylab taqsimlangandir. Bu esa ayrim hajmiy effektlarga olib keladi. Og'ir yadroli myuonli atomlarda bunday effektlar ko'proq sezilarlidir. Myuonli atomlar spektri yadrolarning ichki tuzilishiga juda bog'liqligini ko'rsatadi, bundan esa yadrolar tuzilishini o'rghanishda soydalanish mumkin. Myuonli atomlarda myuon orbitasi yadro ichkarisiga tushadi. Myuonli atomlar yashash vaqtin chekli bo'lib,  $\mu^-$  myuon yashash vaqt bilan aniqlanadi ( $\approx 2,2 \text{mks}$ ). Odatda, myuonli atomlar qobig'ida myuon bilan birga elektron ham bo'ladi, lekin ularning ahamiyati kamdir, chunki elektronga qaraganda myuon yadroga yaqinroq turadi. Myuonli atomlar  $\mu^-$  myuonni qamrab olgandan so'ng uyg'ongan holatga o'tadi va so'ng elektromagnit nurlanishlar yoki atom qobig'idan elektronni chiqarish bilan asosiy holatga o'tadi.

**Adronli atomlar.** Adronli atomlarda yadro zaryadi  $Ze$  bo'lib, elektron manfiy adron bilan almashgan bo'ladi. Adronlar kuchli o'zaro ta'sirlarda qatnashadigan zarralardir. Spini yarim butun songa teng bo'lgan adronlar *barionlar* deyiladi, spini butun songa teng bo'lgan adronlar *mezonlar* deyiladi. Barionlarga proton, antiproton, neytron, antineytron, giperon, sigma, ksi kabi zarralar kiradi. Mezonlarga  $\Pi$ -mezonlar, K-mezonlar va boshqalar kiradi. Vodorod atomi uchun yozilgan formulalar adronli atomlar uchun birinchi yaqinlashishda ishlatalishi va Bor orbitasi o'lchami va ionlashtirish potensiali qiymatlari uchun katta natijalar berishi mumkin. Lekin, kuchli o'zaro ta'sir, qisqa ta'sir bo'lganligi sababli uyg'ongan holatlar uchun kuchli o'zaro ta'sir kamayadi, bu vaqtida vodorod atomi uchun yozilgan formulalardan adronli atomlar uchun to'g'ri natijalar olish mumkin.

**Ridberg atomlari.** Ridberg atomlarida elektron kuchli uyg'ongan holatda joylashadi, ya'ni bosh kvant soni –  $n$  katta qiymatga ega bo'ladi. Bunday elektron yoki atom yuqori Ridberg holatida joylash-

gan deyiladi. Elektron orbitasi o'lchami  $a=\alpha_0 n^2$  formula bilan aniqlanadi. Bunda  $\alpha_0=5,3 \cdot 10^{-7} \text{m}$  – birinchi Bor orbitasi o'lchamidir. Bundan ko'rinaridiki, bunday atomlarda elektron orbitasi o'lchami juda katta bo'ladi. Masalan,  $n=100$  bo'lganda, orbita o'lchami  $\alpha_0=5,3 \cdot 10^{-7} \text{m}$  bo'ladi. Bunday atomning ko'ndalang kesimi yuzasi  $n^4$  ga proporsional va  $n=1$  bo'lgandagi asosiy holatnikidan 108 marta katta. Ionlashtirish potensiali esa  $n^2=104$  marta kichik bo'lib,  $1,36 \cdot 10^{-3} \text{ eV}$  ga teng. Ridberg atomlarida bog'lanish kuchsiz bo'lsada, yashash vaqtini nisbatan kattadir, uyg'ongan qo'shni holatlar oralig'i esa kichikdir.

$$\frac{1}{n^2} - \frac{1}{(n+1)^2} \approx 2/n^3.$$

Ridberg atomlarini o'rganish radioastronomiyada, plazmalar va lazerlar fizikasida muhim ahamiyatga egadir.

### 6.3-§. Kvant sonlar

Yuqorida (V-bobda) vodorod atomining oddiy lashtirilgan modelini tahlil qilish uchun Shredinger tenglamasidan foydalanildi. Bunday tahlilning birinchi natijasi sifatida bir-biriga bog'liq bo'limgan uchta to'lqin tenglamalari sistemasi hosil qilindi. Har bir tenglamaga sferik qutb koordinatalar sistemasidagi uchta o'zgaruvchidan ( $r, \theta, \phi$ ) bittasining funksiyasi kiradi. So'ng bog'langan holatlar uchun (elektronning to'liq energiyasi potensial energetik to'siqning balandligidan kichik ya'ni  $E_{\text{to}}, < U(r)$  bo'lgan holda) uchta kvantlangan doimiyliklar ( $n, \ell, m_\ell$ ) hosil qilindi. Bu doimiyliklar vodorod atomi uchun Bor nazariyasidagi kabi *kvant sonlar* deb ataldi.

Sferik koordinatalar sistemasida vodorod atomi uchun yozilgan ((6.5) tenglama) Shredinger tenglamasining yechimi uchta kvant sonlari  $n, \ell, m_\ell$  ga bog'liq bo'lib, (6.19) quyidagi ko'rinishda ifodalanadi:

$$\psi_{n\ell m}(r, \theta, \phi) = R_{n\ell}(r)\Theta_\ell^m(\theta)\Phi_m(\phi),$$

bunda  $n, \ell, m_\ell$  – kvant sonlari bo'lib,  $R_{n\ell}$ ,  $\Theta_\ell^m$  va  $\Phi_m$  funksiyalarning holatini aniqlaydi. Kvant sonlarining ma'nosini ko'rib chiqaylik.

Birinchi kvant son  $n$  – *bosh kvant son* deyiladi. Bosh kvant son  $n$  vodorod atomida bog‘langan holatlar uchun energiyaning elektron ega bo‘lishi mumkin bo‘lgan diskret xususiy qiymatlarini aniqlaydi. Buni quyidagi formulada ko‘rish mumkin:

$$E_n = -\frac{me^2}{32\pi^2 \epsilon_0^2 \hbar^2} \frac{1}{n^2} = -\frac{13,6}{n^2} eV, \quad (6.22)$$

bunda  $n$  – bosh kvant son bo‘lib, birdan boshlanadigan musbat butun sonlarni qabul qiladi:

$$n = 1, 2, 3, \dots$$

Ikkinchi kvant son  $\ell$  – *orbital kvant son* deyiladi. Orbital kvant son yordamida elektron ega bo‘la oladigan impuls momenti  $L$  ning diskret qiymatlarini quyidagi formula orqali ifodalash mumkin:

$$L = \hbar \sqrt{\ell(\ell+1)}.$$

Orbital kvant son –  $\ell=0$  dan  $n-1$  gacha butun musbat sonlarni qabul qiladi, ya’ni

$$\ell = 0, 1, 2, 3, \dots, n-1.$$

Bor nazariyasida elektron proton atrofida orbita bo‘ylab harakatlanayotgan zarra deb qaraladi, atom sistemasida kvantlash sharoitini yaratish uchun elektronning impuls momentini kvantlash qoidasi kiritilgan. Endi kvant mexanikasi asosida impuls momenti uchun kvantlash munosabatlarini topish kerak. Buning uchun yuqorida qaralgan radial to‘lqin tenglamasida potensial energiyani  $U(r)$  bilan belgilab quyidagi ko‘rinishda yozish mumkin:

$$\frac{1}{r^2} \frac{d}{dr} \left( r^2 \frac{dR}{dr} \right) + \frac{2m}{\hbar^2} \left[ E - U(r) - \frac{\hbar^2}{2mr} \ell(\ell+1) \right] R = 0, \quad (6.23)$$

bu formulada radial funksiya  $R$  ga ko‘paytirilgan qavs ichidagi uchta had ham energiya o‘lchov birligiga ega bo‘lishi kerak. Bu tenglamani  $\hbar^2 \ell(\ell+1)$  ga nisbatan yechimidan quyidagi ifoda hosil bo‘ladi:

$$\hbar^2 \ell(\ell+1) = r^2 (2mK) = r^2 P^2.$$

Bu formulada  $K$  – kinetik energiya,  $P$  – impuls. Radiusning impulsga ko‘paytmasi impuls momenti  $L$  ga teng, shuning uchun quyidagi ifodani yozish mumkin bo‘ladi:

$$L = \hbar\sqrt{\ell(\ell+1)}. \quad (6.23a)$$

(6.23a) ifoda vodorod atomida bog‘langan holatlarda bo‘lgan elektronning kvantlangan orbital impuls momentini bildiradi. Demak, orbital kvant son  $\ell$  elektron ega bo‘lishi mumkin bo‘lgan impuls momentining diskret qiymatlarini aniqlaydi.

Orbital kvant soni  $\ell$  nol qiymatga ega bo‘lishi mumkinligi ko‘rsatildi. Bor nazariyasida impuls momenti nol bo‘lgan holat bo‘lishi man qilinadi. Shredinger nazariyasida esa impuls momenti nol bo‘lgan holat bo‘lishi mumkin. (6.23a) formula Bor modelida impuls momentining kvantlash shartiga juda o‘xshashdir. Bor nazariyasida

$$L = m\vartheta r = n\hbar, \quad (6.24)$$

bunda  $n$  — yadro atrofida orbita bo‘ylab harakatlanayotgan elektron uchun to‘liq kvant sonini ifodalaydi:

$$n = 1, 2, 3, \dots$$

Orbital kvant soni —  $\ell$  to‘liq to‘lqin funksiyasining koordinata boshi atrofida turli yo‘nalishda taqsimlangan qismini aniqlaydigan sferik garmonik funksiyalar xossalardan hosil bo‘ladi.

$\ell$  ning katta qiymatlarida (6.23a) formula quyidagi ko‘rinishga keladi:

$$L = \hbar\sqrt{\ell(\ell+1)} \approx \ell\hbar. \quad (6.24a)$$

Bu esa Bor postulatiga o‘xshashdir:

$$L = n\hbar.$$

Atom spektrlarini o‘rganishda optik spektroskopiyada  $\ell$  ning har bir son qiymati elektron holatlarni aniqlaydigan kichik lotin harflari bilan quyidagicha belgilanadi (6.1-jadval).

6.1-jadval

$\ell$ ning qiymatlari	0	1	2	3	4
Holatlар belgisi	<i>s</i>	<i>p</i>	<i>d</i>	<i>f</i>	<i>g</i>

Bunday belgilashlarga asosan agar  $\ell=0$  bo‘lsa, *s*-elektronlar,  $\ell=1$  bo‘lsa, *p*-elektronlar,  $\ell=2$  bo‘lsa, *d*-elektronlar va hokazo deb yuritiladi. Elektronning holati kvant sonlari bilan quyidagicha

ko'rsatiladi:  $n=1$ ,  $\ell=0$  da  $1s$  holat,  $n=2$ ,  $\ell=1$  da  $2p$  holat,  $n=3$ ,  $\ell=2$   $3d$  holat va hokazo.  $\ell=0$  bo'lgan  $s$  holat elektronning impuls momenti nol bo'lgan holatdir. Bunday holatda vodorod atomi uchun bo'lgan uchta to'lqin funksiyasidan faqat bitta radial to'lqin funksiyasi qoladi. Shuning uchun atom sistemasi qutb  $\theta$  va azimut  $\varphi$  burchaklarga bog'liq bo'lmaydi. Bu vaqtida tizim sferik-simmetrik bo'ladi. Lekin  $\ell$  noldan farqli qiymatlarni ham qabul qilgani uchun to'liq to'lqin funksiyasi sferik simmetriyaga ega bo'lmaydi va sistema impuls momentiga ega bo'ladi. (6.23) tenglamada kvadrat qavsdagi uchinchi had  $R$  – to'lqin funksiyasiga xuddi Kulon potensial to'sig'i  $U(r)$  kabi ta'sir qiladi. Shuning uchun uchinchi had impuls momentining to'sig'i deb ataladi.

Uchinchi kvant soni  $m_l$  – orbital magnit kvant soni deyiladi.  $F_m(\varphi)$  funksiya z o'qi atrofida yuguruvchi de-Broyl to'lqinini ifodalaydi. Orbital magnit kvant soni esa orbital impuls momenti  $L$  ning z o'qiga proyeksiyasini aniqlaydi, ya'ni

$$L_z = m_l \hbar.$$

Bu formula impuls momentining z o'qiga mumkin bo'lgan proyeksiyalarini aniqlaydi.

Shredinger to'lqin mexanikasida magnit kvant soni  $m_l$  ning qanday fizik ma'noga ega ekanligini quydagicha tushunish mumkin. Buning uchun impuls momenti operatori kiritiladi, bu operator sferik koordinatalar sistemasida quyidagi ko'rinishga ega:

$$L_z = \frac{\hbar}{i} \frac{\partial}{\partial \varphi}. \quad (6.25)$$

Klassik mexanikada zarraning impuls momenti vektor tenglama orqali aniqlanadi:

$$\vec{L} = \vec{r} \cdot \vec{P}.$$

Bunda  $\vec{r}$  – zarraning koordinata boshiga nisbatan holatini aniqlovchi radius-vektor,  $\vec{p}$  – zarraning impulsi, to'g'ri burchakli koordinatalar sistemasida z o'qidagi komponenta quyidagi tenglama orqali aniqlanadi:

$$L_z = xP_y - yP_x,$$

Bunda  $P_y$  va  $P_x$  lar impuls  $\vec{P}$  ning  $y$  va  $x$  o'qlari bo'ylab komponentalari. Impulsning bu komponentalarini kvant mexanikasidagi tegishli operatorlar bilan almashtiramiz:

$$L_z = \frac{\hbar}{i} \left( x \frac{\partial}{\partial y} - y \frac{\partial}{\partial x} \right).$$

Bu tenglama to'g'ri burchakli koordinatalar sistemasida  $z$  komponenta uchun impuls momenti operatorini ifodalaydi. Bu ifodada koordinatalarni o'zgartirib, sferik qutb koordinatalar sistemasida quyidagi ko'rinishda yozish mumkin:

$$L_z = \frac{\hbar}{i} \frac{\partial}{\partial \varphi}. \quad (6.26)$$

Bu ifoda impuls momenti operatorini ifodalaydi. To'lqin funksiyasiga tatbiq qilingan impuls momenti operatori impuls momenti  $z$  komponentalari holatlarining sistemasini aniqlaydi (impuls momenti  $z$  komponentalarining xususiy qiymatini):

$$\frac{\hbar}{i} \frac{\partial \psi}{\partial \varphi} = L_z \psi.$$

Bu tenglamaning yechimi quyidagi ko'rinishda:

$$\psi = f(r, \theta) \ell^{iL_z \varphi / \hbar}. \quad (6.27)$$

Bunda  $\psi$  funksiya uzlusiz, bir qiymatli va azimut burchagi  $\varphi$  bo'yicha  $2\pi$  davrga ega bo'lishi kerak. Bu esa

$$L_z = m\hbar; \\ m = 0, \pm 1, \pm 2, \pm 3, \dots \quad (6.28)$$

bo'lishini ko'rsatadi.

$m$  doimiylik orbital magnit kvant soni  $m_\ell$  ni ifodalaydi.  $m_\ell$  ning qiymatlari (6.14a) ifodada keltirilgan, ya'ni

$$m_\ell = 0, 1, 2, 3, \dots, \pm \ell.$$

(6.27)–(6.28) tenglamalardan  $L_z$  ning xususiy qiymatlari bilan bog'liq bo'lgan xususiy funksiyalar

$$F = A \ell^{im\varphi} \quad (6.29)$$

formula orqali aniqlanadi.

Bunda  $A$  – doimiylik bo‘lib, uning qiymati quyidagi normalash shartidan topiladi:

$$\int_0^{2\pi} \Phi^* \Phi d\varphi = 1, \quad (6.30)$$

bunda  $\Phi$  – xususiy funksiyalar azimuthal tenglamaning yechimi sifatida (6.14) ifodada keltirilgan. Bu xususiy funksiyalar impuls orbital momenti  $z$  komponentalarining mumkin bo‘lgan qiymatlariga tegishlidir, ya’ni:

$$L = \hbar \sqrt{\ell(\ell+1)}. \quad (6.31)$$

Bor nazariyasidagi cheklashlardan biri impuls momenti nol bo‘lgan holatning bo‘lishi mumkinligi tan olinmaydi: ikkinchi cheklashda esa  $L$  ning kvantlanishi pospulat sifatida qaralgan, lekin Shredinger ta’rifida  $L$  ning kvantlanishi to‘lqin tenglamasining natijasi va sferik garmonik ko‘rinishidagi yechim xossalardan kelib chiqadi.

Impuls to‘liq momenti vektorining qutb burchagi  $\theta$  faqat quyidagi shartni qanoatlantiradigan qiymatlarga ega bo‘lishi mumkin:


$$\cos \theta = \frac{L_z}{L} = \frac{m_e \hbar}{\hbar \sqrt{\ell(\ell+1)}} = \frac{m_e}{\sqrt{\ell(\ell+1)}}. \quad (6.32)$$

Bu esa 6.3-rasmda grafik ravishda tasvirlangan.

Impuls momentining katta qiymatlarida,  $\ell \gg 1$  bo‘lganda bo‘ladi. U vaqtida (6.31) tenglama quyidagi ko‘rinishda keladi:

$$L \approx \ell \hbar, \quad (6.33)$$

Bunday holda impuls momentining ketma-ket qiymatlari orasidagi farq to‘liq impuls momentiga nisbatan kichik bo‘ladi va impuls momentining ruxsat etilgan qiymatlarining spektri yaxlit spektrga intiladi. Orbital kvant son  $m_\ell$  ning maksimal qiymati  $\pm \ell$  ga teng.  $\ell$  ning katta qiymatlari va  $|m_\ell|$  ning maksimal qiymatlari uchun (6.32) tenglama quyidagi ko‘rinishda bo‘ladi:



6.3-rasm

$$\cos \theta = \frac{m_\ell}{\sqrt{\ell(\ell+1)}} = \pm \frac{1}{1} = \pm 1, \quad (6.34)$$

ya'ni impuls momenti vektorining 0 dan  $\pi$  gacha bo'lgan oraliqda barcha proyeksiyalari mavjud bo'lishi mumkin.

Shunday qilib, orbital magnit kvant son  $m_\ell$  elektronning orbital impuls momenti  $L$  ning  $z$  o'qiga bo'lgan proyeksiyasini aniqlaydi (6.3-rasm).

Energetik sathlar tartib raqami bosh kvant son  $n$  ning qiymatlari bilan, elektron holatlari esa orbital kvant son  $\ell$  ning qiymatlari bilan aniqlanadi. Bir energetik sathda  $\ell$  ning qiymatlariga qarab bir nechta holatlar bo'lishi mumkin.

Agar  $\ell$  ning har bir berilgan qiymatida elektronning orbital magnit kvant soni  $m_\ell$  turlicha bo'lgan  $(2\ell+1)$  holatlarda bo'lishi mumkinligi hisobga olinsa, u vaqtida  $n$  ning berilgan qiymatida (bir energetik sathda)  $\ell$  va  $m_\ell$  larning qiymatlari turlicha bo'lgan holatlar soni quyidagicha aniqlanadi:

$$\sum_{\ell=0}^{n-1} (2\ell+1) = n^2. \quad (6.35)$$

Lekin elektron spinga ega bo'lganligi uchun bu formulada  $n^2$  ning o'rniغا  $2n^2$  qiymat bo'lishi kerak. Agar bir energetik sathga birdan ortiq holat tegishli bo'lsa, bu holatlarning energiyalari bir xil bo'ladi. Bunday energetik sath «aynigan» deb aytildi. Bir xil energiyaga ega bo'lgan holatlar soni «aynish» karraligi deyiladi. Vodorod va vodorodsimon atomlarda faqat  $n=1$  bo'lgan sath «aynimagan» bo'ladi, bu sath atomning asosiy holatini aniqlaydi.  $n=2$  bo'lgan sath to'rt karra «aynigan» bo'ladi, bunda  $\ell=0$  ( $m_\ell=0$ ) bo'lgan bitta holat va  $\ell=0$  ( $m_\ell=0, \pm 1$ ) bo'lgan uchta holat bo'lishi mumkin.  $n=3$  bo'lgan sath to'qqiz karra «aynigan»,  $n=4$  bo'lgan sath o'n olti karra «aynigan» va hokazo.

Shunday qilib, yuqorida  $n$ ,  $m_\ell$ ,  $\ell$  kvant sonlari qarab chiqildi. Lekin elektron ichki harakat miqdor momentiga (spinga) ega bo'lganligi sababli elektronning atomdag'i holatini xarakterlash uchun uchta

kvant soni yetarli bo'lmaydi. Ko'rيلayotgan holda vodorodsimon atomlar yoki tashqi qobig'ida bitta elektron (valent elektron) bo'lgan atomlardagi elektron qaralmoqda. Kvant mexanikasida bunday elektronning atomdagi holati to'rtta kvant son bilan aniqlanadi:

- 1) bosh kvant son —  $n$ ;
- 2) orbital kvant son —  $\ell$ ;
- 3) orbital magnit kvant son —  $m_\ell$ ;
- 4) spin magnit kvant son —  $m_s$ .

To'rtinchchi kvant son  $m_s$  — spin magnit kvant son deyiladi va u spin vektori  $S$  ning berilgan yo'nalishga proyeksiyasini aniqlaydi. Masalan, z o'qi yo'nalishiga.  $m_s$  to'g'risida keyingi paragraflarda ma'lumot beriladi.

**Vodorod atomi orbitalarining shakli.** Uch o'lchamli fazoda  $\psi_{n,\ell,m}(r,\theta,\varphi)$  to'lqin funksiyasining o'zgarishini grafik ravishda ifodalash murakkab bo'lib, bunda elektron zichligining radial va burchak bo'yicha taqsimlanishini alohida ifodalash kerak bo'ladi.

**Elektron buluti zichligi ehtimolligining radial taqsimlanishi.** To'lqin funksiyasining radial qismi bosh kvant son  $n$  va orbital kvant son  $\ell$  ga bog'liq bo'lib, yadrodan uzoqlashgan sari eksponentsiyal qonun bo'yicha kamayadi. Xuddi shunday elektronning topilish ehtimoli  $|rR_{nl}|^2 dr$  ham kamayadi.  $|rR_{nl}|^2 dr$  funksiya elektronning yadrodan  $r$  va  $r+dr$  sohada topilishi ehtimolini bildiradi.  $|rR_{nl}|^2$  — ehtimollik zichligi deyiladi. Elektron buluti zichligining yadro atrofida taqsimlanishi  $|\psi_{n\ell m}|^2$  kattalik bilan aniqlanadi.


Elektron buluti zichligining radius bo'ylab taqsimlanishi esa  $|rR_{nl}|^2$  funksiya bilan beriladi. Elektron atomda ma'lum biror ehtimoliyat bilan istalgan nuqtada bo'lishi mumkin. Elektronning  $1s$  holatda bo'lishining ehtimoliyat 0,3 nm masofada nolga yaqinlashadi. Bu esa elektronlar zichligi to'plangan fazo hajmini cheklashga imkon beradi.  $1s$  holat uchun elektron zichligining radial taqsimlanishi maksimumi 0,053 nm masofaga to'g'ri keladi, bu masofa birinchi

Bor orbitasi radiusiga mos keladi. Atomning  $n=2,3,\dots,\infty$  uyg'ongan holatlari elektron zichligining radial taqsimlanishi quyidagi qonuniyat asosida bo'ladi, ya'ni  $n$  ning ortishi bilan elektron orbitalarining cho'zin-choqligi ortadi, elektronning yadro bilan bog'lanish energiyasi kamayadi. Atomda yadro atrofida elektron buluti zichligining burchak bo'yicha taqsimlanishi  $\ell$  va  $m_\ell$  kvant sonlariga bog'liq ( $\psi(\theta, \varphi) = \Theta_{\ell,m}(\theta)\Phi_m(\varphi)$ ) bo'lib,  $\sin\theta$  va  $\cos\theta$  trigonometrik funksiyalar qatori bilan ifodalanadi. Atom orbitalarining simmetriyasi va chegaraviy sirt shaklini to'lqin funksiyasining burchakli tashkil etuvchisi aniqlaydi.  $\ell=0$  va  $m_\ell=0$  holatlar uchun, ya'ni  $n=1$  bo'lgan  $1s$  asosiy holat uchun va  $n=2,3,\dots,\infty$  bo'lgan uyg'ongan holatlar uchun burchakli qism  $\theta$  va  $\varphi$  burchaklarga bog'liq emas. Bu esa fazodagi barcha yo'nalishlarda elektronning topilish ehtimoliyati bir xil ekanligini bildiradi. Shuning uchun barcha  $s$  orbitalar yadroga nisbatan sferik simmetrik bo'ladi ( $6.5$ -rasmda birinchi shakl.  $s$  holat (cheгаравиё сирт сфера, унинг текислик билан кесими айланади)).

Elektron buluti har doim sferik-simmetrik bo'lavermaydi.


### ***Elektron buluti zichligi ehtimolligining burchakli taqsimlanishi.***

To'lqin funksiyasining burchakli qismi  $\ell, n$  va  $m_\ell$  kvant sonlariga bog'liq:  $\psi(\theta, \varphi) = \Theta_{\ell,m}(\theta)\Phi_m(\varphi)$ . Elektronning  $d\Omega = \sin\theta d\theta d\varphi$  fazoviy burchakda topilish ehtimolligi  $|\Theta_{\ell,m}''(\theta)\Phi_m(\varphi)|^2 \sin\theta d\theta d\varphi$  kattalik bilan aniqlanadi. Yadro atrofidagi elektron buluti zichligining qutb burchagi  $\theta$  va azimut burchagi  $\varphi$  ga bog'liq ravishda taqsimlanishi  $|\Theta_{\ell,m}''(\theta)\Phi_m(\varphi)|^2$  funksiya orqali ifodalanadi.  $\Theta_{\ell,m}''$  funksiyaning  $\theta_0^0, \theta_1^0, \theta_1^1$  ko'rinishdagi funksiyalarining qutb koordinatalar sistemasidagi grafiklari  $6.4$ -rasmda tasvirlangan. Bunda  $\theta$  qutb burchagida  $z$  o'qi tomon yo'nalgan radius-vektorning uzunligi  $\Theta_{\ell,m}''$  funksiya qiymatiga teng.  $\Theta_{\ell,m}''$  funksiya azimut burchagi  $\varphi$  ga bog'liq bo'lмаганилиги учун  $6.4$ -rasmdagi egri chiziqlar  $z$  o'qiga nisbatan simmetrikdir.



6.4-rasm

Azimutal tenglamasining yechimidan ko‘rinadiki,  $|\Phi_m(\phi)|^2$  kattalik  $\phi$  ga bog‘liq emas. Shuning uchun elektron buluti zichligining taqsimlanishi burchak  $\phi$  ga bog‘liq bo‘lmasligi kerak, ya’ni elektron buluti  $\varphi$  simmetriya o‘qi atrofida aylanuvchi jism «shaklida» bo‘lishi kerak. 6.5-rasmda  $\ell$  va  $m_\ell$  ning har xil qiymatlarida  $p, d, f$  holatlardagi elektronlar buluti zichligining taqsimlanishi (shakli) keltirilgan, ya’ni elektron buluti zichligining yadro atrofida qutb burchagi  $\theta$  ga bog‘liq ravishda taqsimlanishi ko‘rsatilgan. 6.5-rasmda elektron bulutining holatlari spekroskopiyada ishlataladigan kichik lotin harflari bilan belgilangan.



6.5-rasm

## 6.4-§. Elektronning orbital mexanik momenti

Klassik mexanikada atom yadrosi atrofida orbita bo'ylab harakatlanayotgan elektronning koordinata boshi  $O$  ga nisbatan orbital mexanik momenti  $L$  quyidagicha aniqlanadi.

$$L = m_e \vartheta r = Pr . \quad (6.36)$$

Bu formulada:  $L$  – elektronning orbital mexanik momenti (impuls momenti),  $m_e$  – elektron massasi,  $\vartheta$  – elektronning tezligi,  $r$  – orbita radiusi,  $P$  – elektron impulsi. Lekin kvant mexanikasida impuls momentining bunday aniqlanishi ma'noga ega emas. Chunki har ikki vektor  $r$  va  $P$  bir vaqtida aniq qiymatlarga ega bo'lgan holat mavjud emas. Kvant mexanikasida impuls momenti ayrim o'ziga xos kvantmexanik xossalarga ega. Shu xossalarni qarab chiqaylik. Kvant mexanikasida  $r$  va  $P$  kattaliklarning operatorlari bilan ish ko'riladi.

**Impuls momentining proyeksiyasi.** Impuls momenti  $L$  ning  $z$  o'qi yo'naliishiga bo'lgan proyeksiyasi  $L_z$  ning qabul qilishi mumkin bo'lgan qiymatlarini topaylik. Kvant mexanikasining asosiy tushunchalaridan biri shuki, bunda fizik kattalik  $f$  aniq bir  $f_\theta$  qiymatga ega bo'ladigan holat  $\psi$  funksiya bilan ifodalanadi:

$$f\psi = f_\theta\psi . \quad (6.37)$$

Bu tenglamaning yechimi  $\psi$  funksiyadir. Bunda  $f$  fizik kattalik  $f_\theta$  ning operatoridir. Kvant mexanikasining ushbu tushunchasidan foydalanib, (6.37) tenglamani impuls momenti uchun quyidagicha yozish mumkin:

$$\hat{L}_z\psi = L_z\psi . \quad (6.38)$$

(6.38) formulada  $L_z$  – impuls momenti  $L$  ning  $z$  o'qiga bo'lgan proyeksiyasi,  $\hat{L}$  esa  $L_z$  ning operatori bo'lib, quyidagicha aniqlanadi:

$$\hat{L}_z = -i\hbar \frac{\partial}{\partial \varphi} , \quad (6.39)$$

bunda  $\varphi$  va  $L_z$  lar umumlashgan koordinata va umumlashgan impulslardir. Umumlashgan impuls operatori esa umumlashgan koordinatadan olingan hosila

$$-\hat{P}_x = -i\hbar \frac{\partial}{\partial x}$$

ko'rinishida aniqlanadi.

(6.39)ni (6.38) formulaga qo'ysak quyidagi ifoda hosil bo'ladi:

$$-i\hbar \frac{\partial \psi}{\partial \varphi} = L_z \psi. \quad (6.40)$$

(6.40) tenglamaning yechimi y funksiya sifatida aniqlanadi:

$$\psi = \frac{1}{\sqrt{2\pi}} e^{\frac{iL_z\varphi}{\hbar}}, \quad (6.41)$$

bunda  $\frac{1}{\sqrt{2\pi}}$  ko'paytuvchi  $\psi$  funksiyani normallash uchun kiritilgan, ya'ni

$$\int_0^{2\pi} \psi^* \psi d\varphi = 1.$$


(6.41)dagi yechim har doim chekli, lekin har doim bir qiymatli bo'lmaydi.  $\psi$  funksiya bir qiymatli bo'lgan hollarda (6.41)dagi yechim uzluksiz va tekis bo'ladi. Agar  $\varphi$   $2\pi$  ga o'zgarganda (6.41)dagi  $\psi$  funksiya dastlabki qiymatiga qaytsa, u bir qiymatli bo'ladi, ya'ni

$$\frac{L_z}{\hbar} 2\pi = 2\pi m \quad (6.42)$$

bo'lganda, (6.41) ifodadagi  $\psi$  funksiya bir qiymatli bo'ladi. Bunda  $m$  istalgan butun son (musbat, manfiy yoki nolga teng). U vaqtida (6.42) ifodadan:

$$L_z = m\hbar, \quad (m=0, \pm 1, \pm 2, \dots). \quad (6.43)$$

(6.43) formuladagi  $L_z$  impuls momenti  $L$  ning ( $L$  – orbital mexanik momenti yoki impuls momenti deyiladi) z o'qiga proyeksiyasini ifodalaydi. (6.43) formula impuls momenti  $L$  ning proyeksiyasining kvantlash qoidasidir.  $L_z$  ning kvantlanishi 6.8-rasmda sxematik ravishda tasvirlangan. Rasmda z o'qiga  $m$  ning mumkin bo'lgan qiymatlari qo'yilgan. Shunday qilib, (6.43) formuladan



6.6-rasm

ko'rinadiki, impuls momentining istalgan o'qqa proyeksiyasi kvantlanadi va Plank doimiyligining butun sonlariga teng bo'ladi. Bu natijaning fizikaviy ma'nosini ko'raylik. Buning uchun impuls momenti vektori  $L$  ni qarab chiqamiz. Birinchi qarashda  $L$  ning proyeksiyasi  $L_z$  ning kvantlanishi  $L$  vektorining  $z$  o'qi bilan ma'lum burchak hosil qiladiganek ko'rinadi. Lekin  $z$  o'qi fazoda istalgan tomonga yo'nalgan bo'lishi mumkin. Shuning uchun bunday mulohaza ma'nosizzdir. (6.43) formuladan chiqadigan natija boshqacha ma'noga ega. (6.43) formula ko'rsatadiki, impuls mo-

menti proyeksiyasini tajribada o'lhashda  $\hbar$  ga karrali bo'lgan natijalar hosil bo'ladi. Lekin  $L_z$  ning qiymati tajribagacha  $\hbar$  ning butun sonlariga teng bo'lmasligi kerak. Tajribagacha va tajribadan keyin  $\psi$  funksiyalar mos tushishi shart emas, tajribagacha tizim holatining  $\psi$  funksiyasi, ya'ni istalgan fizik holatning  $\psi$  funksiyasi uning xususiy yechimlari superpozitsiyasi ko'rinishida bo'lishi mumkin:

$$\psi = \sum_m C_m \psi_m = \sum_m C_m \left( \frac{1}{\sqrt{2\pi}} e^{im\varphi} \right). \quad (6.44)$$

Bunday  $\psi$  funksiya bilan ifodalanadigan tizim impuls momenti  $L$  ning aniq proyeksiyasiga ega bo'la olmaydi. Bunda  $L$  vektori ixtiyoriy tomonga yo'nalgan bo'lishi mumkin. Lekin  $L_z$  ni o'lhashda  $m$  ning qiymatlarining (6.44) formulaga kiradigan birorta qiymati topiladi.  $L_z = mh$  qiymatining topilishining ehtimoliyati  $|C_m|^2$  kattalik bilan aniqланади. Shunday qilib, impuls momenti vektori fazoda aniq yo'nalishga ega bo'la olmaydi. Impuls momenti proyeksiyاسининг kvantlanishi kvantlangan impuls momenti vektorining fazoda aniq bir yo'nalishga nisbatan ixtiyoriy yo'nalishga ega bo'la olmasligini ko'rsatadi. Bunday holat fazoviy kvantlash deyiladi.

(6.43) formuladan ko'rinadiki, o'lchashlarda hamma vaqt impuls momentining butun sonli qiymatlari topiladi. Demak, tizimning istalgan holati (6.44)dagi qator ko'rinishida bo'lishi mumkin. Azimut burchagi  $\varphi$  ning istalgan bir qiymatli uzlusiz funksiyasi  $2\pi$  davr bilan davriydir. Fure teoremasiga asosan bunday funksiya (6.44)dagi qatorga yoyilishi mumkin.

Shunday qilib, (6.44) formula  $\psi$  funksiyasi ko'rinishiga hech qanday cheklanishlarni yuklamaydi.

**Impuls momentining kvadrati.** Impuls momenti kvadratining  $L^2$  mumkin bo'lgan qiymatlarini topaylik. (6.37) tenglama asosida quyidagi ifodani yozish mumkin:

$$\hat{L}^2 \psi = L^2 \psi. \quad (6.45)$$

Operator  $\hat{L}^2$  ning ko'rinishi murakkab bo'lib, uning yechimi ham maxsus funksiyalar bilan ishlashni talab qiladi. Shuning uchun  $\hat{L}^2$  ning mumkin bo'lgan qiymatlarini topishga boshqacha yondashi-ladi. Klassik mexanikada impuls momentining kvadrati uning koordinatalar o'qiga bo'lgan proyeksiyalari kvadratlari yig'indisiga teng:

$$L^2 = L_x^2 + L_y^2 + L_z^2. \quad (6.46)$$

Kvant mexanikasida (6.46) tenglamani tegishli operatorlarni bog'lov-chi formula deb qarash mumkin.

$$\hat{L}^2 = \hat{L}_x^2 + \hat{L}_y^2 + \hat{L}_z^2, \quad (6.47)$$

o'rtacha qiymati esa

$$\langle L^2 \rangle = \langle L_x^2 \rangle + \langle L_y^2 \rangle + \langle L_z^2 \rangle. \quad (6.48)$$

Bunda sferik-simmetrik maydonda harakatlanayotgan zarrani ko'raylik. Zarraning impuls momenti kvadrati qandaydir aniq qlymatga ega bo'lsin. Lekin impuls momenti kvadratining berilishi zarrni holatini to'liq aniqlamaydi, chunki bu vaqtda impuls momentining  $z$  o'qiga proyeksiyasi turli qiymatlarga ega bo'lishi mumkin. Bunda impuls momenti kvadratining berilgan qiymatida zarraning sferik-simmetrik holati qiziqtiradi.  $z$  o'qi boshqa koordinata o'qilardan hech qanday farq qilmaydi. Shuning uchun zarraning sferik-simmetrik holati uchun quyidagi ifodani yozish mumkin:

$$\langle L_x^2 \rangle = \langle L_y^2 \rangle = \langle L_z^2 \rangle. \quad (6.49)$$

U vaqtida (6.48) ifodaga asosan

$$\langle L^2 \rangle = 3 \langle L_z^2 \rangle. \quad (6.50)$$

Simmetrik yechim impuls momentining aniq bir proyeksiyasiga ega bo'lmaydi. Chunki bunday holatlar  $L$  vektori bo'lishi mumkin bo'lgan burchaklar sohasini cheklaydi. Simmetrik yechim  $L$  ning mumkin bo'lgan barcha proyeksiyalari yechimlari superpozitsiyasiga teng bo'ladi. Simmetrik yechimda istalgan o'qqa jumladan, z o'qqa ham bo'lgan barcha proyeksiyalar teng ehtimollidir. Shuning uchun  $\langle L_z^2 \rangle$  ning mumkin bo'lgan barcha qiymatlarining o'rtachasiga teng bo'ladi. (6.43) formulaga asosan  $L_z$  ning mumkin bo'lgan qiymatlari Plank doimiyligining butun qiymatlariga teng bo'ladi:

$$L_z = 0, \pm 1\hbar, \pm 2\hbar, \dots, \pm m_{maks}\hbar.$$

Impuls momenti proyeksiyasi  $L_z$  ning maksimal qiymati  $L$  ning absolyut qiymati  $|L|$  dan katta bo'la olmaydi.  $m$  ning maksimal qiymatini  $\ell$  orqali belgilaylik:  $m_{maks} = \ell$ .  $\ell$  – butun musbat son  $L_z$  va  $m$  ning qabul qilishi mumkin bo'lgan barcha qiymatlari to'plamini yozamiz.

$$\left. \begin{aligned} L_z &= \ell\hbar, (\ell-1)\hbar, (\ell-2)\hbar, \dots, (-\ell)\hbar, \\ m &= \ell, (\ell-1), (\ell-2), \dots, 1, 0, -1, \dots, -(\ell-1), -\ell. \end{aligned} \right\} \quad (6.51)$$

Bundan ko'rindaniki,  $\ell$  ning har qanday berilgan qiymatlarida impuls momenti proyeksiyasi  $L_z$   $2\ell+1$  ga teng bo'lgan turli qiymatlarni (bitta nol,  $\ell$  ning musbat,  $\ell$  ning manfiy qiymatlarini) qabul qiladi. Shuning uchun  $\langle L_z^2 \rangle$  ning o'rtacha qiymati quyidagi formula bilan aniqlanadi:

$$\begin{aligned} \langle L_z^2 \rangle &= \hbar^2 \frac{\ell^2 + (\ell-1)^2 + \dots + (-\ell)^2}{2\ell+1} = 2\hbar^2 \frac{1^2 + 2^2 + 3^2 + \dots + \ell^2}{2\ell+1} = \\ &= \frac{2\hbar^2}{2\ell+1} \cdot \frac{\ell(\ell+1)(2\ell+1)}{6} = \frac{\hbar^3}{3} \ell(\ell+1) \end{aligned}$$

yoki

$$\langle L_z^2 \rangle = \frac{\hbar^2}{3} \ell(\ell+1), \quad (6.52)$$

$\langle L_z^2 \rangle$  ning hosil qilingan bu qiymatini (6.52) formulaga qo'yib, elektronning impuls momenti kvadrati  $L^2$  uchun quyidagi ifodani hosil qilamiz:

$$L^2 = \hbar^2 \ell(\ell + 1), \quad (6.53)$$

(6.53) formulada  $\ell$  – musbat butun son yoki nol. (6.53) formula impuls momenti kvadratining kuantlash qonunini bildiradi.

(6.51)da  $\ell$  ning berilgan qiymatda  $L_z$  qabul qilishi mumkin bo'lgan barcha qiymatlar keltirilgan. (6.51) va (6.53) formulalarni taqqoslashdan ko'rnatadiki,  $\ell$  ning  $\ell > 0$  bo'lgan har qanday qiymatlarida quyidagi munosabat o'rinali bo'ladi:

$$L_{z_{\max}}^2 < L^2,$$

chunki

$$L_{z_{\max}}^2 = \hbar^2 \ell^2,$$

$L^2$  esa

$$L^2 = \hbar^2 \ell(\ell + 1), \quad (6.54)$$

$$L = \hbar \sqrt{\ell(\ell + 1)}. \quad (6.55)$$


Bu natijani klassik fizika nuqtai nazaridan tushuntirish qiyin. Lekin kvant mexanikasida osonlikcha tushuntiriladi. Tekshirishlar ko'rsatadiki, mikrozarralarning harakat miqdor momentining ikkita har xil o'qlarga bo'lgan proyeksiyasini bir vaqtida aniqlash mumkin emas. Masalan,  $L_x$  va  $L_z$  larni bir vaqtida aniqlash mumkin emas. Ular uchun noaniqlik munosabatlari mavjud. Proyeksiya  $L_z$  ning qiymatini aniq bilganimizda  $L_x$  va  $L_y$  proyeksiyalar aniqlanishiga noaniqlik kiritiladi. Bunday holatda  $\langle L_x^2 \rangle$  va  $\langle L_y^2 \rangle$  larning o'rtacha qiymatlari bunday «bo'yalgan» holatlarda noldan farqli bo'ladi:  $\langle L_x^2 \rangle >> 0$  va  $\langle L_y^2 \rangle >> 0$ . Shuning uchun

$$L^2 = [\langle L_x^2 \rangle + \langle L_y^2 \rangle + \langle L_z^2 \rangle] > L_z^2.$$

Impuls momentining kvadrati  $L^2$  va uning proyeksiyalaridan biri, masalan,  $L_z$  bir vaqtida aniqlanishi mumkin. Kvant mexanikasida ko'rsatiladiki,  $L$  va  $L^2$  qiymatlarining berilishi to'liq ravishda zarra-

ning aylanma holatini aniqlaydi.  $L^2$  berilgan holat  $L_z$  ning mumkin bo‘lgan  $2\ell+1$  qiymatlaridan biri bilan aniqlanadi. Shunday qilib, (6.54)dagi qator  $L^2 = \hbar^2\ell(\ell+1)$  ning berilgan qiymatida  $2\ell+1$  ta haddan iborat bo‘ladi. Tajribada impuls momentining biror o‘qqa proyeksiyasi kattaligi o‘lchanganda  $2\ell+1$ ning mumkin bo‘lgan qiymatlaridan birortasi aniqlanadi. (6.54) formula elektronning impuls momenti kvadratini, (6.55) formula esa elektron impuls momentini ifodalaydi.

### **6.5-§. Elektronning orbital magnit momenti**



## 6.7-rasm

6.7-rasm

Elektrodinamika kursidan ma'lumki, aylana bo'ylab harakat qilayotgan zaryadli zarra yopiq elektr tokini hosil qiladi. Maksvell nazariyasiga asosan yopiq elektr toki magnit maydonni vujudga keltiradi. Bunday magnit maydon kuchlaniganligini magnit momenti orqali ifodalash mumkin. Buning uchun  $R$  radiusli aylanma orbitada proton atrofida harakatlanayotgan elektronni qarab chiqaylik (6.7-rasm).

Elektronning orbital harakat miqdori momenti esa:

$$L_e = (m\vartheta)R. \quad (6.56)$$

(6.56)da  $m$  – elektronning massasi,  $R$  – orbita radiusi,  $\vartheta$  – elektronning chiziqli tezligi,  $\vartheta = 2\pi v R$ . U vaqtida elektronning orbital harakat miqdor momenti quyidagi ko‘rinishda bo‘ladi:

$$L_p = m2\pi\nu R^2. \quad (6.57)$$

Elektronning orbitada aylanish chastotasi  $v$  bo'lsa, uning hosil qilgan elektr toki:

$$i = -ev. \quad (6.58)$$

Yuzasi  $S = \pi R^2$  bo‘lgan yopiq konturdan o‘tayotgan  $i$  tok hosil qilgan magnit maydonning magnit momenti quyidagicha aniqlanadi:

$$\mu_e = iS = i\pi R^2 = ev\pi R^2. \quad (6.59)$$

(6.59) formula elektronning orbital magnit momentini ifodaydi.

(6.59) ifodaning (6.57)ga nisbati olinsa:

$$\frac{\mu_e}{L_e} = -\frac{ev\pi R^2}{m2\pi v R^2} = -\frac{e}{2m} = 8,8 \cdot 10^9 \text{ KJ/kg}, \quad (6.60)$$

$\frac{\mu_e}{L_e} = -\frac{e}{2m}$  – *giromagnit nisbat* deyiladi. U vaqtda elektronning orbital magnit momentini quyidagicha ifodalash mumkin:

$$\mu_e = -\frac{e}{2m} L_e. \quad (6.61)$$

Elektronning orbital harakat miqdor momenti  $L_e$  kvantlangan bo‘lib, quyidagicha aniqlanadi:

$$L_e = \hbar \sqrt{\ell(\ell+1)}. \quad (6.62)$$

U vaqtda (6.60) ifodadan:

$$\mu_e = \frac{e}{2m} L_e = \frac{e\hbar}{2m} \sqrt{\ell(\ell+1)}, \quad (6.63)$$

bunda  $\mu_e$  – orbital magnit momenti bo‘lib, elektronning orbital harakati bilan bog‘liqdir.

Elektron manfiy zaryadga ega bo‘lganligi uchun magnit momenti vektori harakat miqdor momenti vektoriga qarama-qarshi yo‘nalgan bo‘ladi.

(6.62) ifodada  $\ell$  – orbital *kvant soni* deyiladi va  $\ell=0,1,2,\dots,$   $n-1$  qiymatlarni qabul qiladi. (6.63) ifodada  $\frac{e\hbar}{2m} = M_B$  – Bor magnetonidir.

$$M_B = \frac{e\hbar}{2m} = 9,27 \cdot 10^{-24} \text{ J} \cdot \text{Tl}^{-1},$$

Bor magnetoni magnit momentining birligidir. Elektronning magnit momenti va mexanik momentlari proyeksiyalari  $\mu_{tz}$  va  $L_{tz}$  lar uchun ham (6.63) dagidek bog‘lanish to‘g‘ri bo‘ladi.

$$\mu_{tz} = -\frac{e}{2m} L_{tz}. \quad (6.64)$$

## 6.6-§. Elektronning xususiy momenti. Spin

Tajribada ishqoriy atomlar spektrlarini o‘rganishda spektr chiziqlarining bir-biriga juda yaqin joylashgan ikkita komponentadan (dublet) iboratligi aniqlangan. Masalan,  $^{23}\text{Na}_{11}$  atomida eng kuchli nurlanish  $3p \rightarrow 3s$  o‘tishda kuzatiladi, bu nurlanish spektrda bitta spektral chiziqni hosil qiladi. Lekin sisnchiklab o‘tkazilgan tekshirishlar bu bitta oddiy chiziq bo‘lmasdan, balki ikkita to‘lqin uzunlikdan (5890,12 va 5896,26 Å) iborat dublet chiziq ekanligini ko‘rsatadi. Bitta spektral chiziqning bir-biriga juda yaqin joylashgan ikkita komponentaga ajralishi atom spektrlarining *nozik strukturası* deyiladi. Spektr chiziqlarning dublet tuzilishini tushuntirishda uchta kvant son –  $n$ ,  $\ell$ ,  $m$ , yetarli bo‘lmaydi. Buning uchun yana to‘rtinchchi kvant sonni kiritish talab qilinadi. Bunday holni tushuntirishda A.X. Kompton 1921-yilda elektron pildiroqqa o‘xhash zarra bo‘lishi kerak, deb faraz qildi. 1925-yilda Leyden universiteti bitiruvchilari Gaudsmiit va Ulenbeklar elektron o‘z xususiy o‘qi atrofida aylanma harakat qiladi, deb faraz qilib, spektral chiziqlarning ajralishini nazariy jihatdan tushuntirdilar. Gaudsmiit va Ulenbekning bunday gipotezasiga asosan o‘z xususiy o‘qi atrofida aylanma harakat qilayotgan elektron xususiy mexanik impuls momenti  $L_s$  ga va unga tegishli bo‘lgan xususiy magnit momenti  $\mu_s$  ga ega bo‘lishi kerak.

**Spin.** Elektronning xususiy mexanik impuls momenti  $L_s$  spin momenti (yoki spin) deyiladi. Spin vektor kattalik bo‘lib, dekart koordinatalar sistemasida koordinata o‘qlariga  $S_x$ ,  $S_y$ ,  $S_z$  proaksiyaligiga ega. Elektronning yadroga nisbatan impuls momentini Yerning Quyosh atrofida aylanishidagi impuls momentiga, xususiy mexanik momentini (spinni) esa, Yerning o‘z o‘qi atrofida aylanishidagi impuls momentiga taqqoslash mumkin. 1928-yilda Dirak elektronning relyativistik kvant nazariyasini yaratdi, bu nazariyadan spin xususiyatlari kelib chiqadi.

Elektronning o‘z xususiy o‘qi atrofida aylanishini hisobga olishda yana bir kvant sonni kiritish kerak bo‘ladi. Dirakning relyativistik kvant nazariyasiga asosan bu kvant son – *spin kvant soni* –  $s$  dir.

Spin kvant sonining mayjudligi atomning nozik strukturasini o‘rganishda tajribada aniqlangan.

Xususiy mexanik impuls momenti  $L_s$  quyidagi formula orqali kvantlangan:

$$L_s = \hbar \sqrt{s(s+1)}. \quad (6.65)$$

Bu formulaga kirgan spin kvant soni  $s$  faqat  $s=1/2$  ga teng bo'lgan bitta qiymat qabul qiladi. U vaqtida  $L_s$  ning qabul qilishi mumkin bo'lgan qiymati:

$$L_s = \hbar \sqrt{\frac{1}{2} \left( \frac{1}{2} + 1 \right)} = \frac{\sqrt{3}}{2} \hbar, \quad (6.66)$$

bunda  $s$  – spin kvant soni deyiladi, lekin u odatda boshqa kvant sonlar qatorida foydalanilmaydi, chunki faqat bitta ( $s=1/2$ ) qiymatga ega va holatlar orasiga farq kiritmaydi. Xususiy mexanik

moment ham faqat bitta ( $L_s = \frac{\sqrt{3}}{2} \hbar$ ) qiymatga ega bo'ladi va

elektronning massasi, zaryadi kabi fundamental xarakteristikasi hisoblanadi. Xususiy mexanik moment  $L_s$  ning tanlangan yo'nalishiga, masalan  $z$  o'qi yo'nalishiga proyeksiyasi  $L_{sz}$  ham kvantlangan bo'lib, quyidagi formula orqali aniqlanadi:

$$L_{sz} = m_s \hbar, \quad (6.67)$$

bunda  $m_s$  – spin magnit kvant soni deyiladi  $m_s = \pm 1/2$  qiymatlarini qabul qilishi mumkin.  $m_s = 1/2$  bo'lganda «spin yuqoriga» ( $\uparrow$ ) va  $m_s = -1/2$  bo'lganda «spin pastga» ( $\downarrow$ ) ko'rinishda belgilanadi.

$m_s = \pm \frac{1}{2}$  bo'lganligidan xususiy mexanik moment  $L_s$  ning

$z$  o'qi yo'nalishiga proyeksiyasi quyidagi qiymatlarni qabul qilishi mumkin:

$$L_{sz} = \pm \frac{1}{2} \hbar, \quad (6.68)$$


6.2-jadvalda kvant sonlarining qiymatlari keltirilgan.

Kvant sonlari	Qiymatlari	Mumkin bo'lgan qiymatlar soni
$n$ – bosh kvant son	1,2,3,4,...	Istalgan son
$\ell$ – orbital kvant son	0,1,2,3,...,n-1	n
$m_s$ – orbital magnit kvant son	0, $\pm 1, \pm 2, \pm 3, \pm 4, \dots, \pm \ell$	$2\ell + 1$
$s$ – spin kvant son	$1/2$	1
$m_s$ – spin magnit kvant son	$\ell, \pm 1/2$	$2s+1=2$

Spin kvant son –  $s$  doim  $1/2$  ga teng bo'lgani uchun tizimning holati  $n$ ,  $\ell$ ,  $m_\ell$ ,  $m_s$  kvant sonlari orqali to'liq ravishda aniqlanishi mumkin.

$\ell$  ning har bir qiymati uchun  $m_\ell$  ning  $2\ell + 1$  qiymatlari mavjud.  $s$  ning qiymati uchun esa  $m_s$  ning  $2s+1=2$  qiymati mavjud.

Spin momentining berilgan yo'nalishga faqat ikkita mumkin bo'lgan oriyentatsiyasi bo'lishi mumkin. Bu ikki oriyentasiyaning mumkin bo'lgan holatlari («yuqoriga», «pastga») 6.8-rasmida tasvirlangan. Yuqorida qaralган kvantlanish spin momentining fazoviy kvantlanishi deb qaraladi.



6.8-rasm

## 6.7-§. Shtern va Gerlax tajribalari


1921-yilda O. Shtern atom magnit momentini tajribada o'lchash q'oyasini taklif qildi. Bu taklif 1922-yilda V. Gerlax bilan birgalikda tajribada amalga oshirildi. Shtern va Gerlax tajribasida magnit maydonida vodorod atomlari dastalarining ajralishi, ya'ni atom energetik sathlarining ajralishi birinchi marta kuzatildi. Bu tajribada vodorodning neytral atomlari dastasi bir jinsli bo'limgan magnit maydonidan o'tkaziladi. Bir jinsli bo'limgan maydonda atomlarga maydon tomonidan

$$F = -\text{grad } u = \text{grad}(\mu H) \quad (6.69)$$


kuch ta'sir qiladi. Bunda  $\mu$  – atomning magnit momenti,  $H$  – magnit maydon kuchlanganligi. (6.69) formulada ifodalangan kuch magnit maydonida atomlar dastasini alohida komponentalarga ajratadi. Tajriba qurilmasi 6.9 va 6.10-rasmarda keltirilgan.

Vakuumga joylashtirilgan  $S$  va  $N$  magnit qutblari uchlari orasida bir jinsli bo'limgan magnit maydon hosil qilinadi. Kuchli bir jinsli bo'limgan magnit maydon *pichoq* shaklidagi  $S$  qutbi yaqinida bo'ladi. Pechda bug'lantirib hosil qilingan vodorod atomlari dastasi hosil qilingan bir jinsli bo'limgan maydonda  $y$  o'qi bo'ylab yo'naltiriladi. Magnit maydonda atomlar dastasining  $z$  o'qi bo'ylab ajralishi kuzatiladi. Bu ajralishni  $\Pi$  ekranda kuzatish mumkin (6.10-rasm).  $z$  o'qi bo'yicha atomlar dastasiga ta'sir etuvchi kuch:

$$F_z = \mu_x \frac{\partial H_x}{\partial x} + \mu_y \frac{\partial H_y}{\partial y} + \mu_z \frac{\partial H_z}{\partial z}. \quad (6.70)$$



6.9-rasm



6.10-rasm

*S* qutbi *pichoq* shakli ostidagi  $\gamma z$  tekisligida faqat  $H_z$  tashkil etuvchigina noldan farq qiladi:  $H_z$  *pichoq* shaklidagi *S* magnit qutbiga yaqinlanishda tez ortib boradi. (6.70) ifodadagi boshqa hadlar atomlar dastasining  $x=0$  tekislikdan siljishidagina paydo bo'ladi. Shunday qilib, atomlar dastasiga ta'sir etuvchi asosiy kuch:

$$F_z = \mu_z \frac{\partial H_z}{\partial z}. \quad (6.71)$$

$F_z$  kuchning kattaligi  $\mu_z$  ga bog'liq.  $F_z$  kuch ta'sirida bunday magnit maydonidan o'tgan atomlar dastasi *pichoq* yaqinida alohida komponentalarga ajraladi. Ajralgan komponentalar soni atom magnit momentining mumkin bo'lgan proyeksiyalari soniga teng bo'lishi kerak.

Shtern va Gerlax tajribalarida vodorod atomlarining dastasi ikkita komponentalarga ajraladi. Bu esa atomlar dastasining ajralishiga sabab bo'lgan atomning magnit momenti magnit maydon yo'naliishi da ikkita proyeksiyaga ega bo'lishini ko'rsatadi. Bu proyeksiyalarga tegishli bo'lgan kvant soni  $m_s$  bilan belgilanadi va  $m_s$  faqat ikkita qiymatni qabul qilishi aniqlandi. Shtern va Gerlax tajribalarida atomning magnit momenti proyeksiyasi  $m_s$  ning kvantlanishi ko'rsatildi.

Shtern va Gerlax  $F_z = \frac{\partial H_z}{\partial z}$  kattalik qiymatini va atomlar dastasining nechta komponentaga ajralishini bilgan holda elektronning xususiy aylanishiga tegishli bo'lgan spin magnit momenti  $\mu_z$  ning magnit maydon yo'naliishi proyeksiyasining kattaligini hisobladilar. Bu proyeksiya kattaligi bir Bor magnetoniga teng bo'lib chiqdi. Bu kutilmagan natija giromagnit nisbatni aniqlashga olib keladi (elektronning spin magnit momenti va mexanik momenti proyeksiyalarining nisbati). Aniqlangan giromagnit nisbat orbital mexanik va magnit momentlarni bog'lovchi giromagnit nisbatdan ikki marta kattadir, ya'ni:

$$\frac{\mu_{sz}}{L_{sz}} = -2 \frac{e}{2m},$$

$$\mu_{sz} = -2 \frac{e}{2m} L_{sz} = -2 \frac{e\hbar}{2m} m_s = \pm 1 M_B. \quad (6.72)$$

Elektronning spin magnit momentining moduli quyidagicha aniqlanadi:

$$|\mu_s| = 2 \frac{e}{2m} |L_s| = 2 \frac{e\hbar}{2m} \sqrt{S(S+1)} = \sqrt{3} M_B. \quad (6.73)$$

Lekin odatda elektronning spin magnit momenti bir Bor magnetoniga teng deb yuritiladi. Bunday deyilishining sababi magnit moment o'changanda, doim uning o'zi emas, balki proyeksiyasi o'lchanadi, bu esa 1 Bor magnetoniga teng, ya'ni  $1 \mu_B$ .

Shtern va Gerlax tajribalari natijalarini miqdoriy tahlil qilish 1925-yilda elektron spinining ochilishiga olib keldi. Spin magnit momentining proyeksiyalari ( $\hbar$  birliklarda) soni  $2S+1$  ifoda orqali hisoblanadi. Shtern va Gerlax tajribasida  $2S+1=2$  ekanligi aniqlandi, bundan esa elektron spini  $S=1/2$  ekanligi kelib chiqadi. Keyinchalik Shtern va Gerlax tajribasi mis, oltin va boshqa atomlar bilan o'tkazildi. Bunda ham vodorod atomi bilan o'tkazilgandagi natijalar hosil qilindi. Shunday qilib, Shtern va Gerlax atomda magnit momentining mavjudligini tajribada ko'rsatdilar.

## 6.8-§. Elektronning to'liq mexanik va magnit momentlari

**Elektronning to'liq mexanik momenti.** Elektron atom yadrosi atrofida orbita bo'yab harakatlanishi tufayli orbital impuls momenti  $L_\ell$  ga ega bo'ladi. Elektron o'zining xususiy o'qi atrofida aylanishi sababli xususiy impuls momenti  $L_s$  (spin momenti)ga ega bo'ladi. Elektronning to'liq mexanik momenti elektronning orbital va spin momentlarining yig'indisiga teng:

$$I_J = L_\ell + L_s, \quad (6.74)$$

bunda  $I_J$  – elektronning to'liq mexanik momenti,  $L_\ell$  – elektronning orbital mexanik momenti,  $L_s$  – elektronning xususiy mexanik momenti, ya'ni spin momenti. Orbital va xususiy mexanik momentlarining modulli quyidagi ko'rinishdagi formulalar orqali kvantlanadi:

$$|L_\ell| = \hbar \sqrt{\ell(\ell+1)} \text{ va } |L_s| = \hbar \sqrt{s(s+1)}. \quad (6.75)$$

Elektronning to‘liq mexanik momenti moduli ham kvantlangan ya’ni:

$$|I_j| = \hbar\sqrt{j(j+1)}, \quad (6.76)$$

$j$  – to‘liq moment kvant soni.  $j$  ni aniqlaylik.  $L_\ell$  va  $L_s$  vektorlarining z o‘qiga mumkin bo‘lgan proyeksiyalari quyidagicha aniqlanadi:

$$L_{\ell z} = \hbar m_\ell, \quad (m_\ell = 0, \pm 1, \pm 2, \dots, \pm \ell), \quad (6.77)$$

$$L_{sz} = \hbar m_s, \quad (m_s = \pm 1/2), \quad (6.78)$$

u vaqtida (6.74) ifodaga asosan:

$$I_{jz} = L_{\ell z} + L_{sz}. \quad (6.79)$$

To‘liq mexanik impuls momentining tanlangan yo‘nalishiga proyeksiyasi ham kvantlangan, masalan z o‘qi yunalishiga proyeksiyasi

$$I_{jz} = \hbar m_j, \quad (6.80)$$

bunda  $m_j = \pm j, \pm(j-1), \pm(j-2), \dots$  (hammasi bo‘lib,  $2j+1$ ) qiymat oladi, ya’ni  $j$  ning berilgan qiymatida  $2j+1$  holatlar bo‘lishi mumkin.  $j$  to‘liq moment kvant soni,  $m_j$  elektronning to‘liq magnit moment kvant soni.

To‘liq mexanik moment kvant soni  $j$  quyidagi formulalar orqali aniqlanadigan qiymatlarni qabul qiladi:

$$j = \ell + s \text{ va } j = \ell - s.$$

Bu formulalarda «+» ishora elektron spin momenti  $s$  ning orbital momenti yo‘nalishida, «-» ishora esa  $\ell$  ga qarama-qarshi yo‘nalishida oriyentirlanishini ko‘rsatadi. Elektron uchun spin  $s=1/2$  bo‘lganligidan:

$$j = \ell + 1/2 \text{ va } j = \ell - 1/2.$$

**Elektronning to‘liq magnit momenti.** Elektronning to‘liq magnit momenti elektronning orbital magnit momenti ( $\mu_\ell$ ) va spin magnit momenti ( $\mu_s$ ) vektorlarining yig‘indisiga teng:

$$\mu_j = \mu_\ell + \mu_s. \quad (6.81)$$

Bu formulada  $\mu_j$  – elektronning to‘liq magnit momenti,  $\mu_\ell$  –

elektronning orbital magnit momenti,  $\mu_s$  – elektronning spin magnit momenti.  $\mu_L$  va  $\mu_s$  lar quyidagi formulalar orqali aniqlanadi:

$$\mu_L = -\frac{e}{2m} L_L, \quad (6.81a)$$


$$\mu_s = -\frac{e}{m} L_S.$$

Elektronning spin magnit momenti giromagnit nisbati, uning orbital magnit momenti giromagnit nisbatidan ikki marta kattadir. Shuning uchun elektronning to'liq magnit momenti vektori to'liq mexanik momenti vektoriga kollinearen emas.

**Atomning to'liq magnit momenti.** Atomning to'liq magnit momenti ( $\mu_{atom}$ ) uning to'liq orbital magnit momenti ( $\mu_L$ ) va to'liq spin magnit momenti ( $\mu_s$ ) larning vektor yig'indisiga teng (6.11-rasm):

$$\mu_{atom} = \mu_L + \mu_s. \quad (6.81b)$$

(6.81a) formulalardan spin momenti uchun giromagnit nisbat magnit momenti uchun bo'lgan giromagnit nisbatan ikki marta katta ekanligi ko'rindi. Shuning uchun elektronning to'liq magnit momenti, uning to'liq mexanik momenti bilan bir to'g'ri chiziqda yotmaydi (6.11-rasm). Elektronning magnit momentlarini qo'shishni qarab chiqaylik. Bunda atomning vektor modelidan foydalaniлади. Izolyatsiyalangan atomda yoki izolyatsiyalangan mexanik tizimda to'liq mexanik moment doimiydir. Bunda esa to'liq mexanik moment ( $L_J$ ) fazoda o'z yo'nalishini saqlashi kelib chiqadi. 6.11-rasmida orbital mexanik moment ( $L_s$ ), xususiy mexanik moment ( $L_L$ ), to'liq mexanik moment ( $I$ ) vektorlari yo'nalishlari tasvirlangan. Bu vektorlarning uzunliklari birligi sifatida Plank doimiyligi  $\hbar$  olingan. Rasmida orbital magnit momenti ( $\vec{\mu}_L$ ), spin magnit momenti ( $\vec{\mu}_s$ ) momentlari yo'nalishlari ham ko'rsatilgan. Bu vektorlarning uzunliklari



6.11-rasm

birligi sifatida Bor magnetoni olingan. Vektorlar uzunliklari birliklarining bunday tanlanishida ( $\mu_L$ ) vektorining uzunligi  $L_L$  vektori uzunligi  $L_s$  vektorining uzunligidan ikki marta uzunroq. Shuning uchun yig'indi magnit momenti vektori ( $\mu_{yig}$ ) to'liq mexanik moment ( $J$ )ga parallel bo'lmaydi. Atomning markaziy elektr maydonida ( $J$ ) vektori o'z kattaligini va yo'nalishini saqlaydi.  $L_s$  va  $L_L$  vektorlari esa magnit o'zaro ta'sir mavjudligi tufayli o'z yo'nalishlarini saqlamaydi. Shu bilan birga ( $L_s$ )ning absolyut qiymati o'zgarmaydi ( $s=1/2$ );  $L_L$  vektorining ham absolyut qiymati saqlanadi. Bunday holda to'liq orbital moment vektori ( $L_L$ ) va to'liq spin momenti ( $L_s$ ) vektorlari esa to'liq mexanik moment ( $L_J$ ) yo'nalishi atrofida presession harakat qiladi. Natijada to'liq orbital magnit ( $\mu_L$ ) va to'liq spin magnit moment ( $\mu_s$ )lari vektorlari ham yig'indi mexanik moment yo'nalishi atrofida prosession harakat qilishi kelib chiqadi, ular bilan esa atomning to'liq magnit momenti ham prosession harakat qiladi. U vaqtida atomning to'liq magnit momenti 6.11-rasmdan quyidagicha aniqlanadi:

$$\mu_{to'liq} = \mu_J + \mu_{\perp}, \quad (6.82)$$

(6.82) formulada  $\mu_J$  – atomning to'liq magnit momentining tashkil etuvchisi bo'lib, to'liq mexanik momentga paralleldir;  $\mu_{\perp}$  – atom to'liq magnit momentining tashkil etuvchisi bo'lib, to'liq mexanik moment yo'nalishiga perpendikulyardir. Presession harakat tez vaqt oralig'ida yuzaga keladi. Shuning uchun atomning to'liq magnit momentiga bog'liq bo'lgan hodisalarda atom magnit momentini presessiyaning ko'p sondagi davrlari bo'yicha o'rtacha-lashga to'g'ri keladi. Atomning to'liq magnit momentining perpendikulyar tashkil etuvchisining o'rtacha qiymati nolga barobar. Shuning uchun atom-ning to'liq magnit momentining o'rtacha qiymati deb ( $\mu_J$ ) kattalikka aytildi, ya'ni to'liq magnit momentining to'liq mexanik moment yo'nalishidagi tashkil etuvchisi ( $\mu_J$ ) olinadi. Demak, atomning to'liq magnit momenti deyilganda ( $\mu_J$ ) kattalik tushuniladi va unga atomning to'liq magnit momenti deyiladi. Elektronning to'liq mexanik momenti  $J$  va  $\mu_J$  lar bir-biriga parallel bo'lgani uchun quyidagi ifodani yozish mumkin:

$$\mu_J = -gM_B J,$$

Bu formulada proporsionallik koeffitsienti  $g$  – Lande faktori deyiladi.  $\mu_i$  – atomning to'liq magnit momenti,  $M_B$  – Bor magnetoni,  $J$  – atomning to'liq mexanik momenti.

**Lande ko'paytuvchisi.** Atomning to'liq magnit momentini 6.11-rasmida keltirilgan sxema bo'yicha momentlarni qo'shish orqali aniqlash mumkin.

Rasmdan:

$$\mu_J = \mu_L \cos(L_L, L_J) + \mu_S(L_S, L_J), \quad (6.83)$$

$$L_J = L_L + L_S, \quad (6.84)$$

(6.84) ifodadan:

$$L_L = L_J - L_S,$$

$$L_S = L_J - L_L.$$

Bu tengliklarni kvadratga ko'tarib, tegishli vektorlar orasidagi burchak kosinuslari uchun quyidagi formula hosil qilinadi:

$$\cos(L_L, L_J) = \frac{(J+1) + L(L+1) - S(S+1)}{2\sqrt{J(J+1)} \cdot \sqrt{L(L+1)}}, \quad (6.85)$$

$$\cos(L_S, L_J) = \frac{(J+1) + S(S+1) - L(L+1)}{2\sqrt{J(J+1)} \cdot \sqrt{S(S+1)}}. \quad (6.86)$$

$L_J^2, L_L^2, L_S^2$  kattaliklarni aniqlashda quyidagi formulalardan foydalanildi:

$$|L_J| = L_J = \hbar\sqrt{j(j+1)},$$

$J$  – atomning to'liq momenti kvant soni bo'lib, quyidagi qiymatlarni olishi mumkin:

$$(J = L + S, L + S - 1, \dots, |L - S|),$$

$$|L_L| = L_L = \hbar\sqrt{L(L+1)},$$

$L$  – atomning orbital momenti kvant soni bo'lib, quyidagi qiymatlarni olishi mumkin:

$$(L = l + l_2, l_1 + l_2 - 1, \dots, |l_1 - l_2|),$$

$$|L_S| = L_S = \hbar\sqrt{S(S+1)},$$

$S$  – atomning spin moment kvant soni bo‘lib, quyidagi qiymatlarini olishi mumkin:

$$S = \begin{cases} \frac{1}{2}N, \frac{1}{2}N-1, \dots, 0 & (N - juft bo‘lganda) \\ \frac{1}{2}N, \frac{1}{2}N-1, \dots, \frac{1}{2} & (N - toq bo‘lganda) \end{cases}$$

hamda

$$\mu_L = M_B \sqrt{L(L+1)},$$

$$\mu_S = 2M_B \sqrt{S(S+1)},$$

( $M_s = e\hbar/2m_e$  – Bor magnetoni,  $MV = 9,27 \cdot 10^{-24} A \cdot m^2$ ) formulalarni hisobga olgan holda (6.85) va (6.86) formulalarga asosan (6.83) formulani quyidagi ko‘rinishda yozish mumkin:

$$\mu_J = M_B \left[ \frac{J(J+1) + L(L+1) - S(S+1)}{2\sqrt{J(J+1)}} + \right. \\ \left. + 2 \frac{J(J+1) + S(S+1) - L(L+1)}{2\sqrt{J(J+1)}} \right] = M_B g_J \sqrt{J(J+1)}$$

bu formulada

$$g_J = 1 + \frac{J(J+1) + S(S+1) - L(L+1)}{2J(J+1)}, \quad (6.87)$$

(6.87) formula Lande ko‘paytuvchisi deyiladi. Bu formuladan ko‘rinadiki, Lande ko‘paytuvchisi ( $g_J$ ) – atomning to‘liq magnit va mexanik momentlari uchun giromagnit nisbatni ifodalaydi. Bu esa Lande ko‘paytuvchisining fizik ma’nosidir. Agar atomning to‘liq spin momenti nolga teng bo‘lsa, atomning to‘liq momenti, uning orbital momenti bilan aniqlanadi, u vaqtida  $S=0$ , va  $J=L$  bo‘ladi. Bunday holda (6.87) formulada  $g_J=g_L=1$  bo‘ladi, orbital moment uchun giromagnit nisbat ham shunday bo‘ladi. Agar atomning to‘liq orbital momenti nolga teng bo‘lsa, u vaqtida atomning to‘liq momenti faqat spin momenti bilan aniqlanadi, ya’ni  $L=0$ ,  $J=S$  bo‘ladi. Bunday holda (6.90) formulada  $g_J=g_S=2$  bo‘ladi.

Atom holatlarining klassifikatsiyasi atomning to‘liq spin moment kvant soni  $S$ , to‘liq orbital moment kvant soni  $L$  va to‘liq moment kvant soni  $J$  bilan aniqlanadi. Atomning to‘liq momenti atomning orbital holatini ifodalaydigan harfning o‘ng tomoniga pastiga yoziladi. Masalan,  $S_{1/2}$  yozuvdan  $L=0$ ,  $J=1/2$  ekanligini,  $D_{3/2}$  yozuvdan  $L=2$ ,  $J=3/2$  ekanligini tushunish mumkin. Atomning to‘liq spini term multipletligi  $2S+1$  bilan xarakterlanadi.  $2S+1$  soni atom orbital holatini ifodalaydigan harfning chap tomoniga yuqoriga yoziladi. Masalan,  $^2S_{1/2}$  yozuvda  $L=0$ ,  $J=1/2$ ,  $S=1/2$  ekanligini,  $^2D_{3/2}$  yozuvda  $L=2$ ,  $J=3/2$ ,  $S=1/2$  ekanligini tushunish mumkin.

## 6.9-§. Atomning vektor modeli

Atomning to‘liq mexanik va magnit momentlari elektron qobiqlarni hosil qiluvchi elektronlar mexanik va magnit momentlarining hamda spin va spin magnit momentlarining yig‘indisidan iborat. Lekin atomning to‘liq mexanik va magnit momenti vektori alohida qo‘siluvchilarni qo‘sish usuliga va qo‘sish ketma-ketligiga bog‘liq bo‘ladi. Fazoviy kvantlashni hisobga olgan holda impuls momentlarini qo‘sishning umumiyligi usulini ko‘rib chiqamiz:

**Impuls momentlarini umumiy holda qo‘sish.** Impuls momentlarini qo‘sish qoidasini quyidagi mulohazalar yordamida hosil qilish mumkin.

$L_{\ell_1}$  va  $L_{\ell_2}$  ikkita orbital momentlar bo‘lsin. Ularning modullari  $\ell_1$  va  $\ell_2$  kvant sonlar bilan aniqlanadi. Ya’ni:

$$L_{\ell_1} = \hbar\sqrt{\ell_1(\ell_1 + 1)} \quad \text{va} \quad L_{\ell_2} = \hbar\sqrt{\ell_2(\ell_2 + 1)}, \quad (6.88)$$

Momentlar yig‘indisi moduli

$$L_{\ell} = L_{\ell_1} + L_{\ell_2}. \quad (6.89)$$

Fazoviy kvantlash hisobga olinsa, quyidagicha aniqlanadi:

$$|L_{\ell}| = L_{\ell} = \hbar\sqrt{L(L + 1)}, \quad (6.90)$$

bunda kvant soni  $L$  quyidagi qiymatlardan birini qabul qilishi mumkin:

$$L = \ell_1 + \ell_2, \ell_1 + \ell_2 - 1, \dots, |\ell_1 - \ell_2|, \quad (6.91)$$

Ikki momentni qo'shish usullarining soni  $L$  ning (6.91)da ifodalangan mumkin bo'lgan qiymatlarga teng.  $\ell_1 > \ell_2$  bo'lgan holda (6.91) formulani quyidagicha yozish mumkin:

$$L = \ell_1 + \ell_2, \ell_1 + \ell_2 - 1, \dots, \ell_1 - \ell_2. \quad (6.92)$$

Sonlarning bu ketma-ketligida nolgacha  $1, 2, \dots, \ell_1 - \ell_2 - 1$  sonlari yetishmaydi. Shuning uchun bu ketma-ketlikda hadlar soni quyidagicha bo'ladi:

$$(\ell_1 + \ell_2) - (\ell_1 - \ell_2 - 1) = 2\ell_2 + 1. \quad (6.93)$$

Xuddi shunday  $\ell_2 > \ell_1$  bo'lgan holatda o'zaro oriyentatsiyaning turli usullari soni  $2\ell_1 \pm 1$  ifodaga teng bo'ladi. Shuning uchun orbital kvant sonlari  $\ell_1$  va  $\ell_2$  bo'lgan mexanik momentlarni qo'shish usullarining soni fazoviy kvantlashni hisobga olgan holda quyidagi formula yordamida ifodalanadi:

$$N_{\ell_1, \ell_2} = 2 \min(\ell_1, \ell_2) + 1. \quad (6.94)$$

To'liq moment  $I_L$  ning tanlangan yo'nalishga proyeksiyasi, masalan,  $z$  o'qiga bo'lgan proyeksiyasi

$$I_{Lz} = \hbar m_L, (m_L = -L, -L+1, \dots, L-1, L) \quad (6.95)$$

formula bilan aniqlanadi.  $m_L$  – orbital magnit kvant soni. To'liq moment  $I_L$  ning tanlangan yo'nalishga nisbatan turli oriyentatsiyalarining to'liq soni  $2I+1$  formula bilan aniqlanadi.

Ko'p sondagi momentlarni qo'shish qoidasini yuqorida keltirilgan ikki momentni qo'shish qoidasini ketma-ket qo'llash orqali hosil qilish mumkin.

**Spin magnit momentlarini qo'shish qoidasi.** Bu qoida ham yuqorida bayon qilingan qoida singaridir. Spin vektorlari  $L_{Si}$  ( $i=1, 2, \dots, N$ ) bo'lgan  $N$  elektron bo'lsin. Hamma elektronlarning to'liq spin momentlari  $L_S$  alohida elektronlar spinlari vektorlarining yig'indisiga teng

$$L_S = \sum_{i=1}^N L_{Si}, \quad (6.96)$$

$L_S$  – vektorning moduli

$$|L_S| = L_S = \hbar\sqrt{S(S+1)}, \quad (6.97)$$

To‘liq spin  $S$  ning kvant soni quyidagi qiymatlarni olishi mumkin:

$$S = \begin{cases} 1/2N, 1/2N-1, \dots, 0, & (N\text{-juft bo‘lganda}) \\ 1/2N, 1/2N-1, \dots, 1/2, & (N\text{-toq bo‘lganda}) \end{cases} \quad (6.98)$$

Bu qoida (6.91) formulada ifodalangan qo‘sish qoidasining tatbig‘idan hosil bo‘ladi. Bunda

$$1/2N = \frac{1/2 + 1/2 + \dots + 1/2}{N}. \quad (6.99)$$

elektronlarning to‘liq spinining  $z$  o‘qiga mumkin bo‘lgan proyeksiyalarini quyidagicha ifodalanadi:

$$L_{Sz} = \hbar m_s, \quad (m_s = -S, -S+1, \dots, S), \quad (6.100)$$

Ya’ni to‘liq spinning mumkin bo‘lgan oriyentatsiyalari soni  $2S+1$  ifodaga teng.

## 6.10-§. Vodorod va vodorodsimon atomlar spektrining nozik strukturası

**Spin-orbital o‘zaro ta’sir va uning energiyasi.** Atom elektroni va yadrosi orasidagi o‘zaro ta’sir elektrostatik o‘zaro ta’sirdir. Lekin elektron atom yadrosiga nisbatan harakat qiladi, bunda elektron spini va yadro zaryadiga bog‘liq bo‘lgan qo‘sishimcha o‘zaro ta’sir paydo bo‘ladi. Bunday o‘zaro ta’siriga spin-orbital o‘zaro ta’sir deb aytildi.

Elektron orbital va spin mexanik momentlarga ega bo‘lar ekan, ularga tegishli bo‘lgan orbital magnit va spin magnit momentlarga ham ega bo‘ladi. Elektronning spin magnit momenti  $\mu_s$  va orbital magnit momenti  $\mu_i$  larning o‘zaro ta’siriga *spin-orbital o‘zaro ta’sir* deyiladi. Spin-orbital o‘zaro ta’sirning mavjudligini Borning yarim klassik nazariyasidagi tasavvurlardan ham ko‘rish mumkin. Atomning oddiy modeli vodorod atomi hisoblanadi, bunda elektron doiraviy orbitada aylanadi. Bunda shunday sanoq sistemasiga o‘tish mumkinki, bu sanoq sistemasida elektron tinch holatda bo‘ladi,

ya'ni tizim o'zi elektron bilan birga harakatlanadi. Bu sanoq tizimda yadro harakatlanadi va kuchlanganligi  $H$  bo'lgan magnit maydonini hosil qiladi. Magnit maydoni tizimda tinch holatda bo'lgan elektronning spin magnit momenti  $m_s$  ga ta'sir qiladi. Proton (yadro) va elektron zaryadi son jihatidan teng bo'lib, ishorasi qarama-qarshi. Harakatlanayotgan sanoq sistemasida harakat qilayotgan yadro elektron turgan joyda magnit maydonini hosil qiladi, tinch turgan sanoq sistemasida aylanayotgan elektron yadro turgan joyda magnit maydonini hosil qiladi. Shuning uchun spin-orbital o'zaro ta'sirni spin magnit momenti ( $\mu_s$ ) va orbital magnit momenti ( $\mu_\ell$ ) orasidagi o'zaro ta'sir deb qarash mumkin. Elektronning spin magnit momenti  $m_s$  orbital magnit maydoni bo'yab yoki unga qarama-qarshi oriyentirlanishi mumkin. Birinchi holda elektron va yadroning o'zaro ta'sir potensial energiyasi kamayadi, ikkinchi holda esa ko'payadi. Shuning uchun spin-orbital o'zaro ta'sir natijasida atomning har bir energetik sathi ikkita sathchalarga ajraladi. Lekin faqat atom  $s$  holatda bo'lganda energetik sathlar ajralmaydi,  $s$  holatda atom orbital magnit momenti-ga ega bo'lmaydi, bunda spin-orbital o'zaro ta'sir yo'qoladi. Spin-orbital o'zaro ta'sir natijasida energetik sathlarning ajralishiga *sathning nozik strukturasi* deyiladi. Energetik sathning ajralgan sathchalari *to'plamiga multipletlik* deb ataladi. Multipletdagи ajralgan sathchalalar soniga multipletni tashkil qilgan sathchalalar soniga bog'liq ravishda dublet, triplet, kvartet, kvintetlar deyiladi. Oddiy sathlar sathchalarga ajralmaydi, bunday sathlar singlet deyiladi.

Shunday qilib, bir valent elektroni bo'lgan atom yoki ionlarda spin-orbital o'zaro ta'sir  $s$  singlet sathdan tashqari barcha energetik sathlarning dublet xarakterga ega bo'lishiga olib keladi. Faqatgina  $s$  sath ajralmaydi,  $s$  sath singlet bo'lib qoladi. Masalan,  $4^2d_{3/2}$  sath «*to'rt, dublet d<sub>3/2</sub>*» deb aytildi, ya'ni  $n=4$  bo'lgan sathdagi  $d_{3/2}$  holat ikkiga ajraladi. Multipletlik  $N=2S+1$  formula orqali aniqlanadi. Bu formula multipletdagи spin-orbital o'zaro ta'sir natijasida hosil bo'lgan sathchalalar sonini bildiradi.

Spin-orbital o'zaro ta'sir natijasida paydo bo'ladigan qo'shimcha potensial energiya kattaligini hisoblash mumkin. Buning uchun asosiy holatdagи vodorod atomini ko'rib chiqamiz. Spin-orbital o'zaro ta'sir mexanizmidan foydalanamiz. Elektron bilan birgalikda

harakatlanayotgan sanoq sistemasini olamiz.  $\vartheta$  tezlik bilan harakatlana-yotgan protonning elektron topilishi mumkin bo‘lgan joyda hosil bo‘lgan magnit maydon kuchlanganligi quyidagicha ifodalaniladi:

$$H = e[J - \mathbf{r}]/cr^3, \quad H = e[\vartheta - \mathbf{r}]/cr^3, \quad (6.101)$$

bunda  $r$  – elektronning protonga nisbatan radius vektori. Absolyut qiymati jihatidan  $H$ :

$$H = \frac{\alpha e}{r^2}, \quad (6.102)$$

bunda  $\alpha = 9/c$ ,  $\alpha$  – o‘lchamsiz doimiylik bo‘lib, *nozik struktura doimiysi* deyiladi va quyidagicha aniqlanadi:

$$\alpha = \frac{e^2}{\hbar c}. \quad (6.103)$$

Kuchlanganligi  $H$  bo‘lgan magnit maydonda elektron  $\mu_e H$  potensial energiyaga ega bo‘ladi.  $\mu_e$  vektori magnit maydon kuchlanganligi  $H$  yo‘nalishi bo‘yicha yoki unga qarama-qarshi yo‘nalishi mumkin. Absolyut qiymati jihatidan bu energiya

$$\mu_e H = M_B H, \quad (6.104)$$

ifoda bilan aniqlanadi,  $M_B$  – Bor magnetoni

$$M_B = \frac{e\hbar}{2m_e c}. \quad (6.105)$$

(6.104) formuladagi energiya spin-orbital o‘zaro ta’sir natijasida paydo bo‘ladigan qo‘sishmcha potensial energiyadir. Bu potensial energiyani vodorod atomining asosiy holatidagi to‘liq energiyasi bilan taqqoslash mumkin. Vodorod atomining energiyasi

$$E_1 = -\frac{\alpha^2 m_e c^2}{2}, \quad (6.106)$$

bu formulada  $r$  – birinchi Bor orbitasining radiusi bo‘lib, quyidagicha aniqlanadi:

$$r_1 = \frac{\hbar^2}{m_e e^2}.$$

(6.104) va (6.106) formulalarni taqqoslashdan quyidagi ifoda hosil bo‘ladi:

$$\frac{M_B H}{E_1} = \alpha^2 = 5,32 \cdot 10^{-5}.$$

Nozik struktura doimiysi  $\alpha=9/c$  ifodasidan ko‘rinadiki, spin-orbital o‘zaro ta’sir  $\alpha$  ning kvadratiga bog‘liq bo‘lgan effektdir. Shuning uchun spin-orbital o‘zaro ta’sirning nazariyasi relyativistik nazariya bo‘lishi kerak. Chunki spin o‘zi ham kvant-relyativistik effekt bo‘lib, norelyativistik yaqinlashishda hisobga olinmaydi. Massaning tezlikka bog‘liqligi ham energetik sathlarning nozik ajralishiga olib keladi. Buni Borning yarim klassik nazariyasi asosida birinchi marta Zommerfeld aniqladi. Energetik sathlarning bunday ajralishini quyidagicha tushuntirish mumkin: Borning norelyativistik nazariyasida elektronning bir xil katta o‘qqa ega bo‘lgan doiraviy va elliptik orbitalariga bir xil energiya to‘g‘ri keladi. Massaning tezlikka bog‘liqligi hisobga olinganda bunday hol bo‘lmaydi. Energiya esa ellips eksentrisitetiga bog‘liq bo‘la boshladi. Bu esa energetik sathlarning nozik ajralishiga olib keladi.

Shunday qilib, energetik sathlarning nozik strukturasi (sathlarning ajralishi – dublet bo‘lishi) spin-orbital o‘zaro ta’sir va elektron massasining tezlikka bog‘liqligi natijasida hosil bo‘ladi. Har ikki holda ham ajralish  $\alpha$  parametr bo‘yicha ikkinchi tartiblidir, shuning uchun bu ajralishlar bir vaqtida qaraladi.

**Vodorod atomi energetik sathlarining nozik strukturasi.** Shredingerning norelyativistik tenglamasi yechimidan vodorod va vodorodsimon atomlar energetik sathi energiyasi ifodasi kelib chiqadi.

Shredingerning norelyativistik tenglamasida elektron spinini hisobga olinmaydi. Massaning tezlikka relyativistik bog‘lanishini va elektron spinini hisobga oladigan tenglamani 1928-yilda Dirak taklif qildi. Bu tenglamaning yechimidan vodorodsimon atomlar energetik sathlari energiyasini ifodalovchi formula kelib chiqadi. Bu formula nozik struktura formulasi deyiladi. Elektron spinining atom energetik sathlari holatiga qanday ta’sir qilishini ko‘raylik.

$\ell \neq 0$  bo‘lgan elektronni qaraylik. Elektronning orbital mexanik momenti uning magnit momenti va magnit maydoni  $H$  bilan bog‘liq. Spinning maydon yo‘nalishiga proyeksiyasi ikkita qiymatni olishi

mumkin, ya'ni  $m_s = \pm \frac{1}{2}$ . Bu esa spektral chiziq  $2S+1=2\frac{1}{2}+1=2$


multipletlikka ega ekanligini, ya'ni  $n$ ,  $\ell$ ,  $m$  kvant sonlari bilan aniqlanadigan holat ikkita holatchalarga ajralishini ko'rsatadi, bittasi

$m_s = +\frac{1}{2}$  va ikkinchisi uchun  $m_s = -\frac{1}{2}$ . Demak,  $\ell \neq 0$  bo'lgan elektron

uchun to'liq momentlari  $j_1 = \ell + \frac{1}{2}$  va  $j_1 = \ell - \frac{1}{2}$  bo'lgan ikkita

holat bo'lishi mumkin. Bu ikki holatning energiyalari turlichadir, shuning uchun  $\ell \neq 0$  bo'lgan energetik sath yolg'iz bo'lmay, balki ikkilangan bo'ladi. Energetik sathning bunday ikkiga ajralishining sababi spin-orbital o'zaro ta'sirdir. Spin-orbital o'zaro ta'sir energiyasi elektronning orbital harakati tufayli hosil bo'ladigan magnit maydon kattaligiga bog'liq. U vaqtida bosh kvant soni bir xil, lekin  $\ell$  va  $j$  lar qiymatlari har xil bo'lgan holatlar energiyasi turlichcha bo'ladi. Bosh kvant sonning berilgan qiymatida elektronning spin va orbital magnit momentlarining magnit o'zaro ta'siri natijasida energetik sathlarining ajralishiga nozik struktura deyiladi. Bunday ajralish optik spektrlarda yaqqol kuzatiladi. Vodorodsimon atom energetik sathining spin-orbital ajralishi 6.12-rasmida ko'rsatilgan.

$\ell = 0$  bo'lgan S holat ajralmaydi, bunda  $m_s = \pm 1/2$  ikkita qiymatda ham holat energiyasi bir xil bo'ladi, chunki bunda orbital magnit maydoni bo'lmaydi. Bir xil orbital kvant soni qiymatiga va turli xil energiya qiyma-tiga ega bo'lgan, to'liq moment kvant sonni hisobga oladigan holatlarini ko'rsatish uchun ma'lum belgilashlar qabul qilingan. Masalan,  $2p_{1/2}$  yozuv elektronning  $n=2$ ,  $\ell=1$  va



6.12-rasm

$j = i - \frac{1}{2} = \frac{1}{2}$  holatda bo'lishini ko'rsatadi, yoki  $2p_{3/2}$  yozuv

elektronning  $n=2$ ,  $\ell=1$   $j = 1 + \frac{1}{2} = \frac{3}{2}$  holatda bo'lishini bildiradi.

Spin-orbital o'zaro ta'sir holatlarning orbital harakat miqdor momenti bo'yicha «aynishini» yo'qotadi, holatlar faqat to'liq moment proyeksiyasi qiymatlari bo'yicha «aynigan» bo'ladi. To'liq moment kvant soni  $j$  bo'lgan sath  $m$ , ning turli qiymatlariga tegishli  $2j+1$  ga karrali bo'lgan aynishga ega bo'ladi.

Vodorod va vodorodsimon atomlar nozik strukturasi Dirakning relyativistik to'lqin tenglamasi yordamida hisoblanadi. Dirak tenglamasining yechimidan vodorodsimon atomlar energetik sathlarning energiyasini aniqlaydigan quyidagi formula kelib chiqadi:

$$E = -AZ^2 \frac{1}{n^2} - \frac{\alpha^2 AZ^4}{n^3} \left( \frac{1}{j + \frac{1}{2}} - \frac{3}{4n} \right). \quad (6.107)$$

Bu formulada  $A = \frac{me^4}{2\hbar^2}$ ;  $n$  – bosh kvant son,  $j$  – to'liq moment kvant soni,  $Z$  – element atomining zaryadi. Formuladagi birinchi had atom energetik sathining Shredinger tenglamasi yechimidan kelib chiqadigan energiyasi. Ikkinci had sathlarning nozik ajralishiga olib keladigan qo'shimcha energiyadir. (6.107) formulaga nozik struktura doimiyligining kvadrati  $\alpha^2$  kiradi:

$$\alpha^2 = \left( \frac{e^2}{\hbar A} \right)^2 = \left( \frac{1}{137} \right)^2 \approx \frac{1}{2000}. \quad (6.108)$$

Bu kattalikning kichikligi spin-orbital o'zaro ta'sir tufayli energetik sathlar ajralishining «nozikligi»ni aniqlaydi. (6.107) formuladan ko'rindiki, ikkinchi had j orqali  $\ell$  ga bog'liq. Bundan esa  $j$  ning bir xil va  $\ell$  ning har xil qiymatiga ega holatlari, masalan,  $3p_{3/2}$  va  $3d_{3/2}$  holatlar energiyalari mos tushishi kelib chiqadi.  $n$  va

$j$  lar bir xil va  $\ell$  lari har xil bo‘lgan holatlarning energiyalari mos tushishi faqat vodorod va vodorodsimon atomlarda kuzatiladi.


Bunday mos tushishning sababi spin-orbital tuzatmaning va elektron massasining tezlikka relyativistik bog‘lanishni hisobga oladigan tuzatmalarning qisman kompensasiyasidir.

Vodorod va vodorodsimon atomlar spektrini tajribada tekshirish (6.107) formulaning to‘g‘ri ekanligini ko‘rsatadi. (6.107) formuladan yana shu narsa ko‘rinadiki, nozik struktura vodorod atomiga qara-ganda vodorodsimon atomda oson-roq kuzatiladi. Chunki ikkinchi hadga  $Z^4$  kattalik kiradi. 6.13-rasmda bosh kvant soni  $n=3$  va  $n=4$  bo‘lgan geliy  $\text{He}^+$  ioni sathlari nozik strukturasini keltirilgan. Agar nozik struktura bo‘lmasa edi,  $n=4$  va  $n=3$  bo‘lgan sathlar orasida to‘lqin uzunligi  $\lambda \approx 4686\text{\AA}$  bo‘lgan foton chiqadigan bitta o‘tishlar kuzatilar edi. Spin-orbital ajralish bo‘lganligi tufayli bitta o‘tish o‘rniga tanlash qoidasi man qilmagan bir necha o‘tish hosil bo‘ladi.

Vodorod atomi spektrida va boshqa ko‘pgina atomlar spektrida o‘ta nozik struktura kuzatiladi. O‘ta nozik struktura elektronlar magnit momentining yadroning kuchsiz magnit maydoni bilan o‘zarota’sir natijasida hosil bo‘ladi.

Yengil atomlar energetik sathlarining nozik ajralishi kattaligi  $10^{-5}\text{ eV}$  dan oshmaydi va yadro zaryadining ortishi bilan ortib boradi. Og‘ir atomlar uchun bu kattalik eV ning o‘ndan bir ulushiga teng bo‘lishi mumkin.

6.3-§ da qaralgan  $n$ ,  $\ell$ ,  $m_\ell$  kvant sonlari uchun elektronning mumkin bo‘lgan holatlari soni  $n^2$  bilan aniqlanadi:



6.13-rasm

$$\sum_{\ell=0}^{n-1} (2\ell + 1) = n^2. \quad (6.109)$$

Multipletlik  $2S+1=2$  bo'lganda mumkin bo'lgan elektron holatlarning to'liq soni  $2n^2$  ga teng bo'ladi:

$$\sum_{\ell=0}^{n-1} 2(2\ell + 1) = 2n^2. \quad (6.110)$$

## 6.11-§. Spektrlarning multipletligi

**Atom termlari.** Spektroskopiyada atomning tashqi qobig'idagi elektronlarning (valent) holatlari atomning orbital kvant soni  $L$  ning har bir son qiyamatiga mos ravishda bosh lotin harflari  $S, P, D, F, H$  bilan ko'rsatiladi. Bunda quyidagi sxemadan foydalанилди:

6.3-jadval

Kvant son L	0	1	2	3	4
Holatlar	S	P	D	F	H

Bu harflarning o'ng tomoni indeksida atomning to'liq moment kvant soni –  $J$  va chap tomoni yuqorisiga shu holat multipletligi  $2S+1$  yoziladi. Atomning har bir holati uchun yoziladigan bunday belgi atom termlari deyiladi va quyidagi ko'rinishda yoziladi:

$$^2S_{1/2}, ^2P_{3/2}, ^2P_{1/2}, ^2D_{5/2}, ^2D_{3/2}, ^2F_{1/2}, ^2F_{5/2}, \dots$$

yoki termni umumiy holda, masalan,  $P$  holati uchun  $^{2S+1}P_1$  ko'rinishda yozish mumkin.

Spin-orbital o'zaro ta'sir natijasida energetik sathlar ajraladi. Lekin atom  $S$  holatda bo'lganda ajralish bo'lmaydi, chunki bu holatda atomning orbital magnit momenti bo'lmaydi. Spin-orbital o'zaro ta'sir ham yo'q. Spin-orbital o'zaro ta'sir natijasida energetik sathning ajralishidan hosil bo'lgan sathchalar (komponentalar) soni multipletlik deyiladi va  $N=2S+1$  formula orqali aniqlanadi. Elektronning spin va orbital momentlarining mumkin bo'lgan o'zaro oriyentatsiyalari soniga *multipletlik* deb ataladi. Energetik sathlarning ajralishini ajrata olish kuchi yuqori bo'lgan spektroskopik qurilmalar

yordamida kuzatish mumkin. Spektrda kuzatilgan har bir spektral chiziqning ajralgan komponentalari soni multipletlikni bildiradi. Agar energetik sathlar ajralishidan hosil bo'lgan sathlar soni (yoki har bir spektral chiziqning ajralgan komponentalari soni), ya'ni multipletligi ikkiga teng bo'lsa *dublet*, uchga teng bo'lsa *triplet*, to'rtga teng bo'lsa *kvartet* va hokazo deyiladi. Masalan, natriy atomida  $3P \rightarrow 3S$  o'tishda hosil bo'lgan sariq chiziq to'lqin uzunligi  $5890\text{\AA}$  va  $5896\text{\AA}$  bo'lgan ikkita chiziqdan iborat (dublet) ekanligi kuzatilgan. Valent elektroni birga teng bo'lgan atom (ishqoriy metallar atomlari) yoki ionlar spektral chiziqlari dublet xarakterga ega. *S* singlet sathni rasmiy holda bir-birining ustiga tushgan sathlardan iborat bo'lgan dublet holat deb qarash mumkin. Demak, energetik sathlar multipletligi  $N=2S+1$  ifoda orqali aniqlanadi. Atomning nurlanish spektral chiziqlarining multipletligi energetik sathlar multipletligidan hosil bo'ladi.

Elektron magnit momentining mumkin bo'lgan proyeksiyasi nechta bo'lsa, har bir energetik sath shuncha komponentaga ajralgan bo'ladi.  $2S+1$  multipletik orqali spin *S* ni va spin-orbital o'zaro ta'sir natijasida energetik sath ajralishidan hosil bo'lgan komponentalar sonini aniqlash mumkin.

$S \leq L$  bo'lgan holda multipletlik, ya'ni energetik sathning ajralgan komponentalari soni  $N=2S+1$  formula orqali aniqlanadi.

$S > L$  bo'lgan holda energetik sathning ajralgan komponentalari soni  $N=2L+1$  ifoda orqali aniqlanadi. Bunday holda ham  $2S+1$  ifoda sath multipletligini aniqlaydi. Masalan, atomning tashqi elektron qobig'ida ikkita elektron bo'lsa, ikki hol bo'lishi mumkin:

1. Elektronlar spinlari qarama-qarshi yo'nalgan, natijaviy spin  $S=0$ ;

2. Elektronlar spinlari parallel yo'nalgan, natijaviy spin  $S=1$ .

Birinchi holda to'liq moment kvant soni  $I=L$ ; multipletlik  $N=2S+1=2\cdot0+1=1$ . Bunday holda sathlar singlet sathlar bo'ladi, sath ajralishi bo'lmaydi. U vaqtida *L* ning turli son qiymatlariga tegishli bo'lgan quyidagi sathlar hosil bo'ladi:

6.4-jadval

$L=J$	0	1	2	3	4	5	6
Sathlar	$^1S_0$	$^1P_1$	$^1D_2$	$^1F_3$	$^1G_4$	$^1H_5$	$^1J_6$

Ikkinchchi holda spin kvant soni  $S=1$  sath multipleti  $N=2S+1=2\cdot1+1=3$ . Ya'ni, har bir energetik sath uchta sathga (triplet) ajralgan bo'ladi ( $S$  – singlet sathdan boshqa sathlar). To'liq moment kvant soni  $J$  quyidagi qiymatlarni qabul qilishi mumkin:

$$I=L-1; \quad I=L; \quad I=L+1.$$

Masalan, uglerod atomining asosiy holati  ${}^3P_0$  yozuvni ko'raylik. Holat  $P$  harfi bilan ko'rsatilgani uchun  $L=1$ ,  $2S+1=3$  bo'lidanan  $S=1$ .

To'liq moment kvant soni

$$I=L-1=1-1=0; \quad I=L=1; \quad I=L+1=1+1=2.$$

Demak,  $L=1$  bo'lган  $P$  sath to'liq momentlari  $I=0, 1, 2$  va energiyalari bir-biriga yaqin bo'lган uchta  ${}^3P_0, {}^3P_1, {}^3P_2$  sathga ajraladi yoki  $L=2$  bo'lган  $D$  sathning to'liq momentlari  $J=1, 2, 3$  bo'lган uchta  ${}^3D_1, {}^3D_2, {}^3D_3$  bo'lган sathlarga ajraladi. Sathlarning bunday ajralishi  $L$  va  $I$  ning qiymatlariga bog'liq ravishda 6.5-jadvalda keltirilgan.

6.5-jadval

$L$	0		1			2			3			4		
$I$	0	1	0	1	2	1	2	3	2	3	4	3	4	5
Sath	${}^3S_0, {}^3S_1$		${}^3P_0, {}^3P_1, {}^3P_2$			${}^3D_1, {}^3D_2, {}^3D_3$			${}^3F_2, {}^3F_3, {}^3F_4$			${}^3G_3, {}^3G_4, {}^3G_5$		

$L, S, J$  kvant sonlari atomning elektron qobig'i holatini to'liq xarakterlay olmaydi. To'liq xarakterlash uchun spektroskopiyada atomning elektron konfiguratsiyasi ko'rsatiladi, ya'ni  $s, p, d, \dots$  holatlardagi elektronlar soni ko'rsatiladi.

Multipletlik qoidasi: elektronlarining soni juft bo'lган atom yoki ionlarning termlari toq multipletlikka ega, elektronlarining soni toq bo'lган atom yoki ionlarning termlari juft multipletlikka ega.

### **Nazorat savollari**

1. Bir elektronli atomlar deb, qanday atomlarga aytildi va bunday atomlarga qaysi atomlar misol bo'lishi mumkin?
2. Vodorod atomining tuzilishini tushuntiring. Yadro bilan elektron orasidagi o'zaro ta'sir kuchi qanday kuch hisoblanadi?

3. To 'g'ri burchakli koordinatalar sistemasidan sferik koordinatalar sistemasiga qanday o'tiladi?
4. Sferik koordinatalar sistemasida Shredingerning statsionar tenglamasi qanday ko'rinishda yoziladi va bunday tenglamaning yechimi qanday bo'ladi?
5. Shredinger tenglamasi qaysi tenglamalarga ajratiladi?
6. Azimutal tenglama de-Broyl to'lqin funksiyasining qaysi holatini ifodalaydi va qaysi koordinataga bog'liq?
7. Qutb koordinatalaridagi tenglama qaysi vaqtdagi de-Broyl to'lqin funksiyasini ifodalaydi va qaysi koordinataga bog'liq?
8. Radial tenglama qaysi masofadagi de-Broyl to'lqin funksiyasini ifodalaydi va u qaysi koordinataga bog'liq?
9. Kvant sonlar qabul qilishi mumkin bo'lgan qiymatlarni yozing.
10. Qanday vodorodsimon atomlarni bilasiz?
11. Elektronning orbital mexanika va magnit momentlari formulalarini yozing va tushuntiring.
12. Elektronning to'liq magnit momenti qanday aniqlanadi?
13. Elektronning to'liq mexanik momenti formulasini qanday ifodalanadi?
14. Bor magnetoni qaysi kattalikning o'chov birligi, uning formulasini va son qiymatini yozing.
15. Giromagnit nisbat haqida tushuncha bering.
16. Shtern va Gerlax tajribasida atomlar dastasining ikkiga ajralishi nimani ko'rsatadi?
17. Elektronning xususiy mexanik momentini tushuntiring
18. Ulenbek va Gaudsmiit gipotezasining mohiyati nima?
19. Vodorod atomi energetik sathlarining nozik strukturasini qanday tushunasiz?
20. Dirak tenglamasida qaysi kvant soni hisobga olingan?
21. Atom termlari qaysi ko'rinishda yoziladi?
22. Multipletlikni qanday tushunasiz?
23. Energetik sathning ajralgan komponentalari soni nechta bo'lishi qaysi kattalikka bog'liq?

## VII BOB

# KO'P ELEKTRONLI ATOMLAR

---

### 7.1-§. Ko'p elektronli atomlar sistemasi

Vodorod va vodorodsimon atomlar elektron qobig'ida atom yadrosi maydonida bitta elektron harakatlanadi. Vodorod va vodorodsimon atomlar spektrini o'rganish mikroolam fizikasining asosiy qonuniyatlarini o'rnatdi. Elektroni birdan ortiq bo'lgan atomlar *ko'p elektronli atomlar* deyiladi. Ko'p elektronli atomlar spektrini o'rganish esa bir qator yangi qonuniyatlarni o'rganishga imkon berdi. Masalan, 1925-yilda Ulenbek va Gaudsmiit tomonidan ishqoriy metallar atomlarining nozik strukturasini tushuntirishda elektronning spinga ega ekanligi haqida gipoteza aytildi. Terenin va Dobretsovlar tomonidan 1928-yilda ishqoriy metallar atomlari spektrida birinchi marta o'ta nozik struktura kuzatildi, atom yadrolarining magnit va mexanik momentlarga ega ekanligi ko'rsatildi. Ko'p elektronli atomlar spektralaridagi qonuniyatlarni tahlil qilish asosida 1925-yilda Pauli elektronlar tabiatini boshqaradigan o'z prinsipini (Pauli prinsipi) taklif qildi. Ko'p elektronli atomlar nazariyasiga bir atomli elektronlar nazariyasiga qaraganda ancha murakkabdir.


Ko'p elektronli atomlar uchun Shredinger tenglamasini yozganda elektronning atom yadrosi bilan o'zaro ta'siridan tashqari electronlarning ham o'zaro ta'sirlarini hisobga olish kerak bo'ladi. Bunday differensial tenglama juda murakkabdir. Murakkab atomlarni ifodalovchi tenglamani yechish uchun kvant mexanikasida turli yaqin-lashish usullari qabul qilingan. Ko'p elektronli atomlarda har bir elektron yadro maydoni va qolgan boshqa elektronlar hosil qilgan maydonda harakatlanadi. Bu maydonni markaziy maydon deb hisoblash mumkin. Shuning uchun elektronlarning harakat miqdor momenti saqlanadi va bu elektronlarga vodorodsimon atomlarga to'g'ri keladigan  $n$ ,  $\ell$ ,  $m_\ell$ ,  $m_s$  kvant sonlari to'g'ri keladi. Bunday mulohazalar, Pauli prinsipini va ko'p elektronli atomlarda

elektron qobiqlari to'ldirilishi tartibi haqidagi ayrim qoidalardan foydalanish, ko'p elektronli atomlar tuzilishini, elementlar davriy sistemasining tuzilishini, atomlarning optik va rentgen nurlanishlarining xususiyat-larini o'rganishga yordam beradi. Murakkab atomlar spektrlari ham murakkab bo'lib, spektral chiziqlar soni juda ko'p bo'ladi. Hatto geliy, litiy atomlari spektrlarida ham juda ko'p sondagi chiziqlar kuzatiladi. Og'ir elementlar atomlari spektrlarida esa chiziqlar soni bir necha o'n minglarga yetadi. 7.1-rasmda:

a) temir atomi spektrining  $(3700 \div 4000)\text{\AA}$  to'lqin uzunlikdagi sohasi keltirilgan;

b) uglerod atom spektrining  $(2500 \div 3300)\text{\AA}$  to'lqin uzunlikdagi sohasi ko'rsatilgan. Bu rasmlarda ko'p sondagi chiziqlardan iborat murakkab spektrni ko'rish mumkin.

Elektroni birdan ortiq bo'lган barcha atomlar ko'p elektronli atomlarga misol bo'la oladi. Masalan, He, Li, Be, B, C, N, O, F, Ne, Na, Mg, Si, P, S, Cl, Ar, K,... elementlar atomlari misol bo'ladi.




7.1-rasm

## 7.2-§. Ko'p elektronli atomlarda elektron sathlarining tuzilishi

Vodorodsimon atomlarda bir xil bosh kvant soni  $n$  ga va turli xil orbital kvant soni  $\ell$  ga ega bo'lgan barcha sathlar bir xil energiya qiymatiga ega bo'ladi. Bu «aynish» tasodifiy bo'lib, uning sababi shuki, vodorodsimon atomlarda elektronlar Kulon maydonida bo'ladi, maydon potensiali esa  $1/r$  qonun bo'yicha kamayadi. Ko'p elektronli atomlarda elektronlar harakatlanadigan maydon deyarli markaziy maydondir va maydon potensiali  $1/r$  qonun bo'yicha o'zgarmaydi. Shuning uchun ko'p elektronli atomlarda harakat miqdor momenti  $\ell$  bo'yicha «aynish» bo'lmaydi. Ko'p elektronli atomlarda esa bir xil bosh kvant soniga va turli xil orbital kvant soniga ega bo'lgan energetik sathlar turlichayotgan energiya qiymatiga ega bo'ladi. Bir xil  $n$  ga turli xil  $\ell$  ga ega bo'lgan elektronlar

to'lqin funksiyasini ko'raylik. 7.2-rasmda vodorodsimon atomning  $2s$  va  $2p$  holati uchun punktir chizig'i bilan to'lqin funksiyasi kvadrati  $|\psi|^2$  ning uzluksiz chiziq bilan esa elektronning  $|\psi|^2 r^2 dr$  shar qatlamida bo'lishining ehtimoliyati zichligi grafigi keltirilgan. Ko'p elektronli atomlarda elektr maydoni potensiali  $1/r$  ga qaraganda tez kamayadi. Chunki elektronni atom markazidan uzoqlashtirganda yadroning elektr maydoni nafaqat Kulon qonuni bo'yicha kamayadi, balki yadroga yaqin bo'lgan elektronlar bilan ekranlanadi.



7.2-rasm

elektronlarinikidan kuchlidir.  $p$  elektronlarniki esa  $d$  elektronlarnikidan kuchli  $n$  ning bir xil qiymatlarida  $\ell$  ning qiymati qancha kichik bo'lsa, sathlar shuncha kattaroq chuqurroqda joylashadi.

Masalan, natriy atomida  $3s$  sathning energiyasi  $5,12$  eV.  $3p$  sathning energiyasi esa  $3,02$  eV. Atomda elektronlar qancha ko'p bo'lsa, ekranlanish shuncha ko'proq ta'sir qiladi va orbital kvant soni  $\ell$  turlicha bo'lgan sathlarga ajralishi shuncha kuchli bo'ladi. Og'ir atomlarda  $\ell$  lari turlicha bo'lgan sathlarning ajralishi shuncha kuchliki,  $n$  ning ma'lum bir qiymatida  $\ell$  li katta sathlar bosh kvant soni  $n+1$  bo'lgan s holatdan yuqorida joylashadi. Spin-orbital o'zaro ta'sirning bo'lishi  $n$  va  $\ell$  lari bir xil bo'lgan sathlarning qo'shimcha nozik ajralishiga olib keladi. Lekin bunda spin momenti  $s$  ning orbital momenti  $\ell$  ga nisbatan oriyentatsiyasi turlicha bo'ladi.  $s=1/2$  qaraganda  $s$  ning faqat ikkita oriyentatsiyasi bo'lishi mumkin, u vaqtida  $\ell \neq 0$  bo'lgan har bir sath dublet (ikkilangan) bo'ladi.

Masalan,  $3p$  sathi  $3p_{1/2}$  va  $3p_{3/2}$  sathchalarining to'plami hisoblanadi. Natriy atomida bu sathchalar orasidagi masofa (energiya farqi)  $2 \cdot 10^{-3}$  eV ni tashkil qiladi, bu esa  $3s$  va  $3p$  sathlar orasidagi

masofadan ancha kichikdir. Lekin spin-orbital o'zaro ta'sir energiyasi atom tartib raqami ortishi bilan  $Z^2$  ravishda ortadi. Shuning uchun og'ir atomlarda spin-orbital ajralishi sathlar holatiga ta'sir qiladi. Vodorodsimon atomlardagi singari ko'p elektronli atomlarda ham tashqi magnit maydoni bo'limganda sathlarning to'liq harakat miqdori momenti proyeksiyasi bo'yicha aynishi saqlanadi. Ko'p elektronli atomlar tuzilishini bilish uchun atomdagи hamma elektronlar holatini bilish kerak. Agar biror holatda  $n$ ,  $\ell$ ,  $j$  kvant sonlarining berilgan qiymatiga ega bo'lgan bir nechta elektron bo'lsa, bu holatni oddiyroq yozish mumkin. Masalan, geliyning uyg'onmagan holatida har ikki elektron  $1s_{1/2}$  holatda bo'ladi. Bu holatni  $1s_{1/2}:1s_{1/2}$  yozuv o'rniga  $[1s_{1/2}]^2$  yoki  $1s^2_{1/2}$  ko'rinishida berish mumkin.

### 7.3-§. Geliy atomi

Vodorod atomi elektron qobig'ida yadro maydonida bitta elektron harakat qiladi. Shunday ko'p elektronli atomlar borki, ularning tashqi qobig'ida ikkita elektron harakatlanadi. Bunday atomlarga magniy, radiy, berilliyl, stronsiy, geliy elementlari atomlari kiradi. Geliy atomi elektron qobig'i ikkita elektronidan iborat. Geliy atomi vodoroddan keyingi oddiy atom hisoblansada, Bor nazariyasi quyidagi sabablarga ko'ra uni tushuntira olmaydi: birinchidan Borning kvant nazariyasi almashish energiyasini hisobga olmaydi. Almashish energiyasi esa ko'p elektronli atomlarda, jumladan, geliy atomida ham muhim ahamiyatga egadir. Ikkinchidan, Bor nazariyasi elektron spinini hisobga olmaydi. Ko'p elektronli atomlarda esa spin bilan bog'liq bo'lgan effektlarni hisobga olmasdan turib, ularning ko'pgina xossalalarini tushuntirib bo'lmaydi. Geliy atomi spektridagi har bir seriya ikki nusxdadan iborat bo'ladi. Birinchi nusxdagi chiziqlar oddiy singlet chiziqlardir, ikkinchi nusxdagi har bir chiziq triplet chiziqlardan iborat bo'ladi, ya'ni har bitta chiziq bir-biriga yaqin joylashgan uchta chiziqdan iborat bo'ladi. Geliy atomida 2 ta elektron  $1s$  holatda joylashgan. Atom uyg'ontilganda bu elektronlardan bittasi yoki 2 tasi ham yuqori sathga o'tadi. Yuqori sathga o'tgan elektron spinii pastki energetik sathda qolgan elektron spinii bilan parallel yoki antiparallel bo'lishi mumkin. Spinlar parallel

yo'nalgan bo'lsa, natijaviy spin  $s=1/2+1/2=1$ ; antiparallel yo'nalgan bo'lsa, ularning natijaviy spini  $s=1/2-1/2=0$  bo'ladi. Bunda energetik sath multipletligi  $2s+1=2\cdot0+1=1$  bo'ladi. Bunday energetik sath ajralmaydi. Bu geliy atomining singlet holatidir. Geliy atomining singlet holatiga parageliy deyiladi. Agar elektronlar spinlari parallel yo'nalgan bo'lsa, energetik sath multipletligi  $2s+1=2\cdot1+1=3$  bo'ladi. Bunda har bir energetik sath uchga ajralgan bo'ladi. Bu geliy atomining triplet holati bo'ladi. Geliy atomining triplet holatiga ortogeliy deyiladi (7.3-rasm). Elektron o'tishlar singlet-singlet ( $ss$ ) yoki triplet-triplet ( $tt$ ) holatlar orasida bo'lishi mumkin. Bunday o'tishlarda tanlash qoidasi spin kvant soni bo'yicha bajariladi, ya'ni  $\Delta s=0$  bo'lishi kerak. Triplet chiziqlardan iborat bosh seriya chiziqlari spektrning infraqizil sohasida yotadi. Singlet chiziqlar spektrning ultrabinafsha sohasida yotadi. Geliy atomi spektrida eng aniq chiziq  $D_3$  sariq chiziqdir. Geliy elementi shu sariq chiziq orqali 1867-yilda Quyoshda aniqlangan. Bu  $D_3$  sariq chizig'i triplet bo'lib, ularning to'lqin uzunliklari 587,59; 587,56 nm. Bunday tashqi qobig'ida 2 ta elektroni bo'lgan atomlar uchun Shredinger tenglamasini yozish mumkin. Potensial maydonda zarraning harakati Shredinger tenglamasi bilan ifodalanganadi.

$$\hat{H}\psi = E\psi, \quad (7.1)$$

bunda  $\hat{H}$  – zarra gamiltonianidir, ya'ni zarraning to'liq energiyasi impuls va koordinata funksiyasi sifatida ifodalangan:

$$\hat{H} = \frac{\hat{P}^2}{2m} + E_n, \quad (7.2)$$

(7.1) tenglama bir elektron uchun mukammalroq holda quyidagi ko'rinishda yoziladi:

$$\nabla^2\psi + \frac{2m}{\hbar^2}(E - E_n)\psi = 0. \quad (7.3)$$

Geliy atomida ikkita elektron bo'lgani uchun atom sistemasining to'liq energiyasi quyidagi energiyalar yig'indisidan iborat bo'ladi:

a) har bir elektronning kinetik energiyalaridan:

$$E_{k_1} = \frac{P_1^2}{2m} \text{ va } E_{k_2} = \frac{P_2^2}{2m}.$$

b) har bir elektronning potensial energiyalaridan:

$$E_{p_1}(r_1) \text{ va } E_{p_2}(r_2).$$

$r_1$  va  $r_2$  birinchi hamda ikkinchi elektronning radius-vektorlari.

d) har ikki elektronning o'zaro ta'sir energiyasi

$$E_{p_{12}} = E_{p_{21}} = \frac{e^2}{4\pi\epsilon_0 r_{12}} = \frac{e^2}{4\pi\epsilon_0 |r_1 - r_2|}, \quad (7.4)$$

$r_{12}$  – elektronlar orasidagi masofa. Ikki elektronli atom sistemasi uchun gamiltonianni quyidagicha yozish mumkin:

$$\hat{H} = \frac{\hat{P}_1^2}{2m} + \frac{\hat{P}_2^2}{2m} + E_p(r_1) + E_p(r_2) + E_{p_{12}}(|r_1 - r_2|). \quad (7.5)$$

Ikki geliy elektronidan iborat tizim uchun Shredinger tenglamasi (7.1) ko'rinishda bo'ladi, lekin bu tenglamada  $\hat{H}$  (7.5) formula ko'rinishida ifodalanadi. Bunda  $\psi$  – to'lqin funksiyasi.  $\psi$  har ikkala elektronning koordinatalariga bog'liq bo'ladi, ya'ni oltita o'zgaruvchiga bog'liq. Shunday qilib, ikki elektronli tizim uchun  $\psi(r_1, r_2)$  to'lqin funksiyasini topishda (7.3) tenglamaning o'niga Shredinger tenglamasi quyidagi ko'rinishda yoziladi:

$$\nabla_1^2 \psi + \nabla_2^2 \psi + \left( \frac{2m}{\hbar^2} \right)^2 [E - E_{p_1}(r_1) - E_{p_2}(r_2) - E_{p_{12}}] \psi = 0. \quad (7.6)$$

Bu tenglamada

$$\nabla_1^2 = \frac{\partial^2}{\partial x_1^2} + \frac{\partial^2}{\partial y_1^2} + \frac{\partial^2}{\partial z_1^2}, \quad (7.7)$$

$$\nabla_2^2 = \frac{\partial^2}{\partial x_2^2} + \frac{\partial^2}{\partial y_2^2} + \frac{\partial^2}{\partial z_2^2}. \quad (7.8)$$

$\nabla_1^2$  va  $\nabla_2^2$  – birinchi va ikkinchi elektron uchun Laplas operatorlaridir.

(7.5) tenglamada to'lqin funksiyasi y ning ma'nosi bir elektron uchun yoziladigan to'lqin funksiyasining ma'nosi kabi bo'ladi, ya'ni  $|\psi(r_1, r_2)|^2$  – radius vektorlari  $r_1$  va  $r_2$  bo'lgan tegishli nuqtalarda birinchi va ikkinchi elektronni topish ehtimoliyatining zichligidir. Endi ikki elektronli atom uchun yozilgan tenglamaning xususiy

qiymatini va xususiy funksiyasini topish lozim. Xususiy funksiyaga qo'yiladigan talablar bir elektronli atomlar uchun xususiy funksiyalarga qo'yilgan talablar kabi bo'ladi.

Ikki elektron orasidagi o'zaro ta'sir va elektronlar spini hisobga olinmaganda, (7.6) tenglamaning xususiy qiymati va xususiy funksiyasini topish ancha murakkab. Har bir elektronning yadro bilan o'zaro ta'sir energiyasi elektronlarning bir-biri bilan o'zaro ta'sir energiyasidan katta. Shuning uchun birinchi yaqinlashishda elektronlarning o'zaro ta'sir energiyasi  $E_{p_12}$  ni hisobga olmaslik mumkin. U vaqtida (7.6) tenglama o'rniga quyidagi ko'rinishdagi tenglama qarab chiqiladi:

$$\nabla_1^2\psi + \nabla_2^2\psi + \left(\frac{2m}{\hbar^2}\right)^2(E - E_{p_1} - E_{p_2})\psi = 0. \quad (7.9)$$

(7.9) tenglamada birinchi va ikkinchi elektronlarning potensial energiyalari:

$$E_{p_1} = E_{p_1}(r_1) \text{ va } E_{p_2} = E_{p_2}(r_2).$$

Elektronlar orasidagi o'zaro ta'sir hisobga olinmaganligi uchun har bir elektron yadro maydonida ikkinchisiga bog'liq bo'limgan ravishda mustaqil harakatlanadi deb qaraladi. U vaqtida bu bir elektronning fazoning u yoki bu nuqtasida topilish ehtimoliyati va uning energiyasi ikkinchi elektronning topilish ehtimoliyati va energiyasiga bog'liq bo'lmaydi. Demak, ikki elektronning umumiy energiyasi har ikki elektronlar energiyalari yig'indisiga teng:

$$E = E_a(1) + E_b(2). \quad (7.10)$$

(7.10)da  $E_a(1)$  – birinchi elektronning  $a$  holatdagi energiyasi,  $E_b(2)$  – ikkinchi elektronning  $b$  holatdagi energiyasi.

Bir-biriga bog'liq bo'limgan ikki voqeanning yuzaga chiqish ehtimoliyati har bir voqeanning alohida yuzaga chiqish ehtimoliyatlarini ko'paytmasiga teng.

Shunga asosan  $\psi$  to'lqin funksiyasining ma'nosini va elektronlar harakatining mustaqilligini hisobga olgan holda quyidagi ifodani yozish mumkin:

$$\psi(1,2) = \psi_a(1)\psi_b(2). \quad (7.11)$$

(7.11) formulada

$$\psi_a(1) = \psi_a(r_1) \text{ va } \psi_b(2) = \psi_b(r_2). \quad (7.12)$$

ifodalar  $a$  va  $b$  holatlarda bo‘lgan elektronlarning tegishli to‘lqin funksiyalaridir.

(7.9) tenglamaga (7.10) va (7.11) formulalardagi ifodalar qo‘yilganda quyidagi ko‘rinishdagi tenglama hosil bo‘ladi:

$$\begin{aligned} & \psi_b(2) \left[ \nabla_1^2 \psi_a(1) + \left( \frac{2m}{\hbar^2} \right) [E_a(1) - E_{p_1}] \right] \psi_a(1) + \\ & + \psi_a(1) \left[ \nabla_2^2 \psi_b(2) + \left( \frac{2m}{\hbar^2} \right) [E_b(2) - E_{p_2}] \right] \psi_b(2) = 0. \end{aligned} \quad (7.13)$$

$\psi_a(1)$  funksiya  $\psi_b(2)$ ga bog‘liq bo‘lmaganligini hisobga olgan holda (7.13)dan:

$$\nabla_1^2 \psi_a(1) + \frac{2m}{\hbar^2} (E_a - E_{p_1}) \psi_a(1) = 0, \quad (7.14)$$

$$\nabla_2^2 \psi_b(2) + \frac{2m}{\hbar^2} (E_b - E_{p_2}) \psi_b(2) = 0. \quad (7.15)$$

Bu tenglamalar zaryadi  $+2e$  bo‘lgan yadroning kulon maydonida harakatlanayotgan elektronlarning harakat tenglamalaridir.

Bunda yuqorida qaralgan vodorodsimon atomlardagidek xususiy funksiyalar va xususiy qiymatlar tegishlicha quyidagi formulalar orqali beriladi:

$$\psi_{n,\ell,m} = R_{nr}(r) Y_\ell^m(\theta, \varphi), \quad (7.16)$$

xususiy energiya qiymatlari esa quyidagi formula orqali:

$$E_n = -\frac{mz^2 e^4}{32\pi^2 \epsilon_0^2 \hbar^2 n^2}, \quad (7.17)$$

$$n = \ell + k + 1,$$

$n$  – bosh kvant soni,  $\ell$  – orbital kvant soni,  $k$  – radial kvant soni,  $\ell$  va  $k$  lar  $0, 1, 2, \dots$  sonlarni va  $n=1, 2, 3, \dots$  qiymatlarni qabul qiladi.

Elektronlar bir-biriga bog‘liq bo‘lmagan holda turli holatlarda bo‘lishi mumkin. Elektronlar bir-biriga bog‘liq bo‘lmagan holda qayerda bo‘lishlari ehtimoliyatining taqsimlanishi vodorodsimon atomlar ehtimolliklarining taqsimlanishi bilan mos keladi. To‘liq

energiya elektronlar energiyalarining yig‘indisiga teng bo‘ladi. Har bir elektronning energetik sathi vodorodsimon atom energetik sathi bilan mos tushadi. Lekin elektronlarning o‘zaro ta’sirlari va spinlari hisobga olinsa, vodorodsimon atom bilan bunday mos tushishlar ahamiyatli darajada o‘zgaradi.

**Turli elektronlarning o‘xshashligi.** Elektron muayyan massa va zaryadga ega bo‘lgan nuqtaviy zarradir. Elektronlarning barcha fizikaviy xossalari bir-birinikiga o‘xshashdir. Shuning uchun agar bir elektron ikkinchisi bilan almashtirilsa, hech narsa o‘zgarmaydi  
Almashtirish «aynishi»

$$\psi(1,2) = \psi_a(1)\psi_b(2). \quad (7.18)$$

(7.18)da ifodalangan to‘lqin funksiyasi  $E=E_a+E_b$  xususiy energiya qiyamatiga tegishlidir. Bu to‘lqin funksiyasi (7.9) tenglamaning yechimi bo‘ladi. 2-elektronni 1-elektron bo‘lgan a holatga va 1-elektronni 2-elektron bo‘lgan b holatga o‘tkazilganda, ya’ni elektronlar joylari almashtirilganda, elektronlar o‘xhash bo‘lganligi sababli hech qanday o‘zgarish bo‘lmaydi. U vaqtda elektronlar joylari almashtirilishiidan hosil bo‘lgan to‘lqin funksiyasi quyidagicha:

$$\psi(2,1) = \psi_a(2)\psi_b(1). \quad (7.19)$$

(7.19)da ifodalangan to‘lqin funksiyasi ham (7.9) tenglamaning yechimi bo‘la oladi. Bu to‘lqin funksiyasi  $E=E_a+E_b$  xususiy energiya qiyamatiga tegishli bo‘ladi. Shunday qilib, ayni bir xususiy energiya qiyamatiga tegishli bo‘lgan (7.18) va (7.19) to‘lqin funksiyalari mavjud bo‘ladi. Bunday hol elektronlarning o‘xhash bo‘lishligining natijasidir. Bunday aynish almashtirish aynishi deyiladi.

**To‘lqin funksiyalarning simmetriyasi.** Elektronlarning o‘xshashlidan birinchi elektronning  $r_1$  nuqtada, ikkinchi elektronning  $r_2$  nuqtada topilish ehtimoliyati ikkinchi elektronning  $r_1$  nuqtada, birinchi elektronning  $r_2$  nuqtada topilish ehtimoliyatiga teng:

$$|\psi(1,2)|^2 = |\psi(2,1)|^2, \quad (7.20)$$

u vaqtda ikki tenglamadan biriga amal qilinadi:

$$\psi(1,2) = \psi(2,1), \quad (7.21a)$$

yoki

$$\psi(1,2) = -\psi(2,1). \quad (7.21b)$$

/ Ya'ni to'lqin funksiyasi simmetrik yoki antisimmetrik bo'lishi kerak:

$$\psi(1,2) = \psi_a(1)\psi_b(2) \text{ va } \psi(2,1) = \psi_a(2)\psi_b(1).$$

To'lqin funksiyalari elektronlarning o'xshashligini hisobga olgan holda, ularning harakatini ifodalamaydi, chunki bu to'lqin funksiyalar muayyan simmetriklik xossalariiga ega emas, ya'ni bu to'lqin funksiyalar simmetrik ham emas, antisimmetrik ham emas. Lekin ular orqali simmetrik va antisimmetrik to'lqin funksiyalarini tuzish mumkin. (7.9) tenglama chiziqli differensial tenglamadir. Shuning uchun bu tenglamaning ixtiyoriy doimiy koeffitsientlar bilan bo'lgan yechimlarining yig'indisi ham (7.9) tenglamaning yechimi bo'la oladi. U vaqtida:

$$\psi^+(1,2) = \psi_b(1)\psi_b(2) + \psi_a(2)\psi_b(1), \quad (7.22)$$

$$\psi^-(1,2) = \psi_a(1)\psi_b(2) - \psi_a(2)\psi_b(1). \quad (7.23)$$

To'lqin funksiyalar ham (7.9) tenglamaning yechimi bo'la oladi. (7.22) va (7.23) tenglamalarda ifodalangan to'lqin funksiyalar to'lqin funksiyalariga qo'yilgan talablarni qanoatlantiradi. Lekin (7.22) va (7.23) to'lqin funksiyalar (7.18) va (7.19) to'lqin funksiyalardan farqli ravishda quyidagi simmetrik xususiyatlarga egadir:

$\psi^+(1,2)$  – simmetrik to'lqin funksiyasi;

$\psi^-(1,2)$  – antisimmetrik to'lqin funksiyasi.

Shuning uchun bu funksiyalar elektronlarning harakatini ularning o'xshashligini hisobga olgan holda ifodalay oladi.

Yuqorida elektronlarning bir-biriga o'xshashligi ko'rildi. Lekin turli protonlar va turli neytronlar ham bir-biriga o'xshashlik xossasiiga ega. Demak, o'xshashlik xossasi boshqa elementar zarralarga ham tegishlidir. Elementar zarralar sistemasini istalgan to'lqin funksiyasi ifodalay olmaydi, balki muayyan simmetriya xossalariiga ega bo'lgan. Simmetrik yoki antisimmetrik to'lqin funksiyalarigina ifodalay oladi. Biror elementar zarra harakatini ifodalashda simmetrik yoki antisimmetrik to'lqin funksiyalardan qaysi birini ishlatish zarranining spiniga bog'liq bo'ladi. (7.22) va (7.23) ifodalardagi to'lqin funksiyalar bir xil xususiy energiya qiymatiga  $E=E_a+E_b$  tegishlidir. Lekin elektronlar orasidagi o'zaro ta'sir hisobga olinsa, bu mulohaza to'g'ri kelmaydi.

***Elektronlarning o'zaro ta'sirini hisobga olgandagi to'lqin funksiyalarining almashish «aynishi» va simmetriyasi.*** Elektronlar orasidagi o'zaro ta'sir hisobga olinganda, ularning to'lqin funksiyasi har ikki elektron funksiyalarining ko'paytmasi ko'rinishida bo'la olmaydi, ya'ni (7.18) va (7.19) to'lqin funksiyalari yoki ularning (7.22) va (7.23) ifodalangan chiziqli kombinatsiyalari ko'rinishida bo'la olmaydi. Shuning uchun elektronlarning o'zaro ta'siri hisobga olinganda, almashtirish «aynishi» bo'lmaydi.

(7.21a) va (7.21b) to'lqin funksiyalarining simmetriklik xususiyati elektronlar orasidagi o'zaro ta'sir hisobga olinganda ham saqlanishi kerak, chunki simmetriyaning bu xususiyati elektronlarning o'xshashligi natijasi bo'lib, o'zaro ta'sir bo'lganda ham saqlanadi. Lekin o'zaro ta'sir bo'lganda simmetrik va antisimmetrik to'lqin funksiyalar turli xususiy energiya qiymatlariga tegishli bo'ladi.

***Elektronning spinini hisobga olgandagi to'lqin funksiyasi.*** Spinning vektorini spinning to'lqin funksiyasi deb ataymiz va  $S^{(+)}(i)$ ,  $S^{(-)}(i)$  ( $i=1,2,3,\dots$ ) bilan belgilaymiz. Bunda  $i$  – to'lqin funksiyaga tegishli bo'lgan elektronning tartib raqami,  $S^{(+)}$  – spinning to'lqin funksiyasi, uning berilgan yo'nalishga (odatda  $z$  o'qiga) bo'lgan proyeksiyasi musbat bo'lib,  $\hbar/2$  ga teng,  $S^{(-)}$  – spin proyeksiyasi manfiy bo'lgan to'lqin funksiyasidir. Spin proyeksiyasining kvant sonini  $m_s$  bilan belgilaymiz.  $m_s = \pm \frac{1}{2}$  elektron spini uning fazoviy

harakati bilan kuchsiz ta'sirlashadi. Agar  $\psi_a(1)$  elektronning fazoviy harakatini ifodalovchi to'lqin funksiyasi bo'lsa, u vaqtida spinni hisobga oladigan to'lqin funksiyasi spin orientatsiyasiga bog'liq ravishda quyidagicha ifodalanadi:

$$\psi_a(1)S^{(+)}(1) \text{ va } \psi_a(1)S^{(-)}(1). \quad (7.24)$$

Ikki elektronning spin funksiyasi alohida elektronlarning spin funksiyalarining ko'paytmasi ko'rinishida beriladi. Elektronlarning ikki spin funksiyalaridan quyidagi spin funksiyalarining ko'paytma-larini hosil qilish mumkin:

$$S^{(+)}(1)S^{(+)}(2), \quad (7.25a)$$

$$S^{(+)}(1)S^{(-)}(2), \quad (7.25b)$$

|

$$S^{(-)}(1)S^{(+)}(2), \quad (7.25c)$$

$$S^{(-)}(1)S^{(-)}(2). \quad (7.25d)$$

(7.25)larda keltirilgan funksiyalardan faqat  $a$  va  $d$  funksiyalar ma'lum simmetriyaga ega bo'lib, elektronlar joylari almashinishiga nisbatan simmetrik funksiyalardir.  $b$  va  $c$  funksiyalar simmetrik emas. Lekin ulardan simmetrik va antisimmetrik kombinatsiyalar qurish mumkin:

$$\begin{aligned} S^{(+)}(1)S^{(-)}(2) + S^{(+)}(2)S^{(-)}(1), \\ S^{(+)}(1)S^{(-)}(2) - S^{(+)}(2)S^{(-)}(1). \end{aligned} \quad (7.26)$$

Shunday qilib, quyidagi spin to'lqin funksiyalari hosil qilinadi:

*a) simmetrik funksiyalar:*

$$S^{(+)}(1)S^{(+)}(2) \quad 1, \quad (7.27a)$$

$$S^{(+)}(1)S^{(-)}(2) + S^{(+)}(2)S^{(-)}(1) \quad 0, \quad (7.27b)$$

$$S^{(-)}(1)S^{(-)}(2) \quad -1, \quad (7.27c)$$

*b) antisimmetrik funksiya:*

$$S^{(+)}(1)S^{(-)}(2) - S^{(+)}(2)S^{(-)}(1) \quad 0. \quad (7.27d)$$

Ikki elektrondan iborat sistemaning to'lqin spinining berilgan yo'nalishga proyeksiyasi birinchi va ikkinchi elektronlar spinlari proyeksiyalarining yig'indisiga teng, ya'ni:

$$m_s = m_s^{(1)} + m_s^{(2)}, \quad (7.28)$$

(7.28) formuladagi  $m_s$  kvant soni spin to'lqin funksiyasining aniqlanishini hisobga olgan holda hosil qilinadi. Ma'lumki, to'lqin spinning kvant soni  $S$  quyidagi qiymatlarni olishi mumkin:


$$S = \begin{cases} \frac{1}{2}N, \frac{1}{2}N-1, \dots, 0, & (N - juft bo'lganda) \\ \frac{1}{2}N, \frac{1}{2}N-1, \dots, \frac{1}{2}, & (N - toq bo'lganda) \end{cases}$$

bunda  $N$  – elektronlar soni. Bu formuladan ko'rindik, ikki elektronning to'lqin spinining kvant soni –  $S$  0 yoki 1 qiymatlarni olishi mumkin. (7.27a)–(7.27d)lardagi to'lqin spin funksiyalar to'lqin spini 1 ga tegishli ekanligi aniq ko'rini turibdi, chunki to'lqin spin

0 bo‘lganda, spinning noldan farq qiladigan proyeksiyasi bo‘lishi mumkin emas. Bu funksiyalar simmetrikdir. Agar to‘liq spin 1 boshqa funksiyalar bilan ifodalansa, u vaqtida bu funksiyalarning chiziqli kombinatsiyasi to‘liq spini 1 ni ifodalashi kerak. Lekin chiziqli kombinatsiyaning to‘lqin funksiyasi bo‘lishi uchun aniq simmetriya ga ega bo‘lishi kerak, bunday hol esa uning funksiyasining tashkil etuvchilari bir xil simmetriyaga ega bo‘lganda bo‘lishi mumkin. Bundan esa to‘liq spin 1 ni ifodalaydigan barcha funksiyalar bir xil simmetriyaga ega bo‘lishi kerakligi kelib chiqadi. Shuning uchun (7.27b) funksiyasi ham (7.27a) va (7.27c) funksiyalar kabi to‘liq spin 1 ga tegishli bo‘ladi. (7.27d)da ifodalangan to‘lqin funksiyasi to‘liq spin 0 ga tegishli, chunki bu funksiya simmetriyaning boshqa xossalariiga ega. Demak, (7.27a) va (7.27c) simmetrik spin to‘lqin funksiyalar ikki elektronning ( $S=1$ ) triplet holatini ifodalaydi, antisimmetrik spin to‘lqin funksiyasi (7.27d) esa ikki elektronning ( $S=0$ ) singlet holatini ifodalaydi.

Shunday qilib, geliy atomi elektronlari spinlari parallel yo‘nal-ganda, natijaviy spin birga teng bo‘lib, uchta proyeksiyaga ega bo‘ladi:  $+1, -1, 0$ .

Bundan esa geliy atomining triplet holati hosil bo‘ladi. Geliy atomining natijaviy spini birga teng bo‘lgan triplet (ortogeliy)



7.3-rasm

holatida noldan farq qiladigan magnit momentiga ega bo‘ladi va magnit maydonda Zeeman ajralishini hosil qiladi. Ortogeliyning energetik sathlari va spektral chiziqlari tanlash qoidasiga bo‘ysunadi.

Geliy atomi natijaviy spini nol bo‘lgan singlet (parageliy) holatida magnit momentiga ega bo‘lmaydi va magnit maydonida Zeeman ajralishini hosil qilmaydi. Shunday qilib, geliy atomining asosiy holati singlet  ${}^1S_0$  holatdir (parageliy). Geliy atomi energetik sathlari va ular orasidagi elektron o‘tishlar 7.3-rasmda keltirilgan. Triplet termlar  ${}^3S_1$  to‘liq emas, chunki  $S>L$  bo‘lgani uchun bitta energetik sathdan iborat.  ${}^3P$ ,  ${}^3D$  va boshqa triplet termlar uchta sathdan iborat:  ${}^3P_{0,1,2}$  va  ${}^3D_{1,2,3}$ . Bu triplet termlarining har bir sati o‘z energiyasiga ega. Sathlar energiyalarining bir-biridan farq qilishining sababi spin-orbital o‘zaro ta’sirdir. Geliy atomi uchun triplet termlari sathlarining ajralish kattaligi kichikdir.

#### 7.4-§. Ishqoriy metallar atomlari

**Umumiy tushunchalar.** Vodorod atomi eng oddiy atom hisoblanadi, uni o‘rganish, hisoblashda ham oddiy analitik usullaridan foydalanish mumkin. Boshqa atomlar tuzilishi esa murakkab bo‘lib, ularni o‘rganishda yaqinlashish (taqrifiy) usullardan foydalaniladi. Lekin ishqoriy metallar (litiy, natriy, kaliy, rubidiy, seziy) atomlari o‘rganilganda nisbatan oddiyoq usul bilan natijalar olish mumkin, bu esa ularning atom tuzilishalari bilan bog‘liq. Ishqoriy metallar Mendeleyev elementlar davriy sistemasida inert gazlardan keyin joylashgan: litiy geliydan keyin, natriy neondan keyin, kaliy argon dan keyin va boshqalar. Inert gazlar atomlari juda barqaror bo‘lib, ularni ionlashtirish uchun katta energiya talab qilinadi. Ishqoriy metallar atomlari tashqi elektron qobig‘ida bitta elektron bo‘lib, bir valentlidirlar. Ularni osonlikcha ionlashtirish mumkin, ionlashtirishga katta energiya talab qilinmaydi. Agar ishqoriy metall atomi  $Z$  elektronlar soniga ega bo‘lsa, atomning  $Z-1$  elektronlari inert gazlar atomi tuzilishini hosil qiladi. Oxirgi qobiqdagi elektron esa boshqa elektronlar va yadro bilan kuchsiz bog‘langan bo‘ladi. Shunday qilib, ishqoriy metall atomining  $Z-1$  elektroni yadro bilan zaryadi  $Z_a e$  bo‘lgan barqaror o‘zakni hosil qiladi. Bu esa zaryadi  $Z_a e$  bo‘lgan yadroga o‘xshaydi. Bunday yadroga effektiv yadro va  $Z_a e -$  zaryadga

*effektiv zaryad* deyiladi. Atom tashqi qobig‘idagi bitta elektron (valent elektron) effektiv yadro elektr maydonida harakatlanadi. Neytral atom uchun  $Z_\alpha = Z - 1$ , bir marta ionlashgan atom uchun  $Z_\alpha = Z - 2$ , ikki marta ionlashgan atom uchun  $Z_\alpha = Z - 3$  va h.k. Masalaning bunday qo‘yilishida ishqoriy metallar atomlari bir elektronli atomlar deb qaraladi, yadro sifatida effektiv yadro tushuniladi. Ishqoriy metallar atomlari tashqi elektron qobig‘ida bitta elektron (valent) harakat qilgani sababli ular vodorod atomiga o‘xshaydi. Lekin vodorod atomi va ishqoriy metall atomi orasida quyidagicha jiddiy farq bor: vodorod atomida elektron nuqtaviy zaryad maydonida harakatlanadi, ishqoriy metall atomida esa tashqi qobiqdagi bitta elektron effektiv yadro maydonida harakatlanadi, effektiv yadro esa nuqtaviy zaryad emas. Uning tuzilishi yuqorida bayon qilindi.

**Kvant sonlar.** Ishqoriy metallar atomi tashqi qobig‘idagi valent elektronning statsionar holatlari vodorod atomi singari uchta kvant sonlari – bosh kvant soni –  $n$ , orbital kvant soni –  $\ell$  va orbital magnit kvant soni –  $m_\ell$  bilan aniqlanadi.

Orbital kvant soni –  $\ell$  elektron burchak momenti kvadratini ifodalaydi:

$$\ell^2 = \hbar^2 \ell(\ell + 1). \quad (7.29)$$

Magnit kvant soni  $m$  burchak momentining tanlangan yo‘nalishiga, odatda z o‘qiga bo‘lgan proyeksiyasini ifodalaydi:

$$m_z = \ell_z m \hbar, \quad (7.30)$$

$\ell$  ning berilgan qiymatida  $m$   $2\ell + 1$  qiymat olishi mumkin, ya’ni  $m = -\ell, -(\ell - 1), \dots, -1, 0, +1, \dots, +(\ell - 1), +\ell$ .

Bosh kvant son:

$$n = n_r + \ell + 1, \quad (7.31)$$

formula bilan aniqlanadi.  $n_r$  – radial kvant son bo‘lib, radius bo‘ylab  $\psi$  to‘lqin funksiyasi tugunlari soniga teng ( $r = 0$  bo‘lgan nuqta tugun hisoblanmaydi).  $n$  ning berilgan qiymatida  $\ell$  quyidagi qiymatlarni olishi mumkin:

$$\ell = 0, 1, 2, 3, \dots, n - 1.$$

Valent elektronning holatini to‘liq aniqlash uchun uchta kvant sonlari  $n$ ,  $\ell$ ,  $m_\ell$  yana qo‘shimcha to‘rtinchi kvant soni bilan

to‘ldirilishi kerak. To‘rtinchi kvant soni spin magnit kvant soni bo‘lib, ikkita qiymat olishi mumkin, ya’ni  $m_s = \pm 1/2$ . Bundan esa elektronning kvant holatlari soni ikki marta ortadi, ya’ni:

$$\sum_{\ell=0}^{n-1} 2(2\ell + 1) = 2n^2. \quad (7.32)$$

Shunday qilib, bir-biriga bog‘liq bo‘lmagan  $2n^2$  sondagi kvant holatlari hosil bo‘ladi. Elektronning atomdagi holatlari orbital kvant soni  $\ell$  ning son qiymatlariga mos ravishda kichik lotin harflari bilan belgilanadi. Holatlari belgisi quyidagi jadvalda keltirilgan.

7.1-jadval

$\ell$ kvant soni	0	1	2	3	4	5	6	7
Holatlari belgisi	$s$	$p$	$d$	$f$	$g$	$h$	$i$	$k$

Bunda  $s$ -holatni  $s$ -elektronlar,  $p$ -holatni esa  $p$ -elektronlar deb yuritiladi.

**Valent elektronning effektiv yadro maydonidagi harakati.** Ishqoriy metallar atomi tashqi qobig‘idagi valent elektronning effektiv yadro elektr maydonidagi harakatini ko‘raylik. Valent elektron effektiv yadroga ta’sir qilib, undagi zaryad taqsimlanishini va elektr maydonini o‘zgartiradi. Birinchi yaqinlashishda effektiv yadro maydonini atom markazida joylashgan nuqtaviy zaryad  $Z_a e$  nuqtaviy dipolning ustma-ust tushgan maydoni deb qarash mumkin. Bunda dipol o‘qi tashqi elektronga qarab yo‘nalgan. Shuning uchun tashqi elektronning harakati sferik-simmetrik maydonidagi harakat deb qaraladi. Bunday maydonning potensial funksiyasi quyidagicha ifodalanadi:

$$U = -\frac{Z_a e^2}{r} - c \frac{Z_a e^2}{r^2}, \quad (7.33)$$

bunda  $s$  – doimiy kattalik,  $cZ_a e^2/r^2$  hadni asosiy had  $-Z_a e^2/r$  ga tuzatma deb qarash mumkin. Qabul qilingan yaqinlashishda ishqoriy metall atomining vodorodsimon atomdan farqi potensial funksiyaga  $-c(Z_a e^2/r)$  hadning qo‘shilishidan iborat. Statsionar holatdagi Shredinger tenglamasi o‘lchami vektor  $r$  va  $\theta, \phi$  burchaklarga bog‘liq

bo'lishi mumkin. Lekin bog'lanish qanday bo'lsada, statsionar holatlarda burchak momenti kvadrati

$$\hat{L}^2\psi = \hat{L}^2\psi = \hbar^2\ell(\ell+1)\psi$$

bo'ladi. Shuning uchun bunday holda potensial kuch funksiyasi

$U(r) + \frac{\hbar^2\ell(\ell+1)}{2mr^2}$  bo'lgan radial-simmetrik kuch maydoni uchun

Shredinger tenglamasi quyidagicha ifodalanadi:

$$\frac{\partial^2\psi}{\partial r^2} + \frac{2}{r} \frac{\partial\psi}{\partial r} + \frac{2m}{\hbar^2} \left( E - U - \frac{\hbar^2\ell(\ell+1)}{2mr^2} \right) \psi = 0, \quad (7.34)$$

$E$  – elektronning to'liq energiyasi,  $U(r) = -\frac{Ze^2}{r}$  – potensial

energiya,  $\frac{\hbar^2\ell(\ell+1)}{2mr^2}$  – elektronning yadro atrofida aylanishidagi kinetik energiyasi, bu kattalikni markazga intilma energiya ham deyiladi. (3.34) tenglama Shredingerning statsionar holatlar uchun

yozilgan  $\hat{H}\psi = E\psi$  tenglamasidan farqi  $\frac{\hbar^2\ell(\ell+1)}{2m^2}$  qo'shimcha hadning kelishidir. (7.33) ifodadagi  $-c(Z_\alpha e^2/r)$  hadni (7.34) tenglamadagi markazga intilma energiya ifodasi bilan qo'shilsa, hosil bo'lgan yig'indini quyidagi ko'rinishda yozish mumkin:

$$\frac{\hbar^2\ell(\ell+1)}{2mr^2} - c \frac{Z_\alpha e^2}{r^2} = \frac{\hbar^2\ell^*(\ell^*+1)}{2mr^2}. \quad (7.35)$$

(7.35) formulada doimiy son  $\ell^*$  quyidagi kvadrat tenglama orqali aniqlanadi:

$$\ell^*(\ell^*+1) = \ell(\ell+1) - \frac{2m}{\hbar^2} c Z_\alpha e^2. \quad (7.36)$$

U vaqtida

$$\frac{\partial^2\psi}{\partial r^2} + \frac{2}{r} \frac{\partial\psi}{\partial r} + \left( \frac{q}{r} - \beta^2 - \frac{\ell^*(\ell^*+1)}{r^2} \right) \psi = 0. \quad (7.37)$$

$$q = 2mZe^2 / \hbar^2 \quad \text{va} \quad \beta^2 = -2mE / \hbar^2 \quad (7.38)$$

tenglamada  $\ell$  ni  $\ell^*$  bilan va  $q$  ni  $q^*$  bilan almashtirish kerak bo'ladi, ya'ni:

$$\frac{\partial^2 \psi}{\partial r^2} + \frac{2}{r} \frac{\partial \psi}{\partial r} + \left( \frac{q^*}{r} - \beta^2 - \frac{\ell^*(\ell^* + 1)}{r^2} \right) \psi = 0, \\ q^* = 2mZ_\alpha e^2 / \hbar^2. \quad (7.39)$$

$\ell$  dan farqli ravishda  $\ell^*$  butun son emas. Effektiv yadro maydoni potensial energiyasi  $-U(r)$  ni

$$U = \sum_{k=j}^{\infty} a_k r^k \quad (7.40)$$

qator ko'rinishida izlash mumkin. (7.36) ifodadan:

$$\ell^* = -\frac{1}{2} \pm \sqrt{\left( \ell + \frac{1}{2} \right)^2 - \frac{2m}{\hbar^2} c Z_\alpha e^2}. \quad (7.41)$$

(7.41)da musbat had hisoblangan  $\left( \frac{2m}{\hbar^2} \right) c Z_\alpha e^2$  kattalikni asosiy had  $(\ell + 1/2)^2$  ga tuzatma deb qarash mumkin. Bu tuzatma nolga aylanganda yoki noldan farq qilganda ham kvadrat ildiz oldida (+) ishora olinadi. Shunday qilib, ishqoriy metall atomining vodorod-simon atomdan farqli  $\ell$  ni  $\ell^*$  bilan almashtirilishidir. Bunday holda ishqoriy metallar energetik sathlari energiyasi quyidagicha aniqlanadi:

$$E = -\frac{m Z_\alpha^2 e^4}{2 \hbar^2 (n_r + \ell^* + 1)^2}. \quad (7.42)$$

(7.42) formulada bosh kvant son n:

$$\begin{aligned} n &= n_r + \ell + 1 \\ \ell^* &= \Delta + \ell; \quad \Delta = \ell^* - \ell \\ n^* &= n_r + \Delta + \ell + 1 = n_r + \ell + 1 + \Delta = n + \Delta \end{aligned} \quad (7.43)$$

U vaqtida (7.42) formulani quyidagicha yozish mumkin:

$$E = -\frac{mZ_\alpha^2 e^4}{2\hbar^2(n + \Delta)^2}, \quad (7.44)$$

bunda  $\Delta = \ell^* - \ell$ ,  $\Delta$  – kattalik bosh kvant soni  $n$  ga tuzatmadir. Bu tuzatma orbital kvant soni  $\ell$  ga bog‘liq. Bundan ko‘rinadiki, ishqoriy metallar atomlarida sathlar energiyasi bosh kvant soni  $n$  ga va orbital kvant soni  $\ell$  ga bog‘liq.  $c$  doimiy kattalik ham  $\ell$  ga bog‘liq.  $\Delta$  tuzatmaning Li, Na, K uchun hisoblangan qiymatlari 7.2-jadvalda keltirilgan. Demak,  $\Delta$  tuzatma ishqoriy metallar energetik sathlari energiyasining  $\ell$  ga bog‘liqligini hisobga oladigan kattalikdir.

7.2-jadval

Elementlar	$\Delta$		
	$\ell=1$	$\ell=2$	$\ell=3$
Litiy	0,41	0,04	0,00
Natriy	1,67	0,38	0,01
Kaliy	2,23	1,77	0,15

**Spektral termlar.** Atom tuzilishining Bor nazariyasiga asosan  $\ell$  ning maksimal qiymati doiraviy orbitaga to‘g‘ri keladi, minimal qiymati esa tortilgan elliptik orbitaga to‘g‘ri keladi. Bunday holda valent elektronning orbitasi atom o‘zagining ichkarisiga kiradi va uning maydonini kuchli ravishda ko‘zg‘atadi. Doiraviy orbitalarda bunday hol bo‘lmaydi va qo‘zg‘alish kuchsiz bo‘ladi. Atom o‘zagida elektronning topilish ehtimoliyati  $\ell$  ning kichik qiymatlarida katta bo‘ladi. Haqiqatda esa  $\ell$  ning katta qiymatlarida atomda elektronni topish ehtimoliyati sferik simmetriyaga nisbatan,  $\ell$  ning kichik qiymatiga yaqin bo‘ladi. Shunday qilib, ishqoriy metallar atomlarida energetik sathlar energiyasi bosh kvant son  $n$  va orbital kvant son  $\ell$  ga bog‘liq bo‘ladi, buni (7.44) formuladan ko‘rish mumkin. Ishqoriy metallar atomlarida energetik sathlarga quyidagi spektral termlar to‘g‘ri keladi:

$$T = -\frac{E_n}{ch} = -\frac{E}{2\pi ch} = \frac{Z_\alpha^2 R}{(n + \Delta)^2}, \quad (7.45)$$

bunda

$$R = \frac{2m\pi^2 e^4}{ch^2} = \frac{me^4}{4c\pi\hbar^3}, \quad (7.46)$$

$R$  – Ridberg doimiyligi.

Ishqoriy metall atomlari termlari ( $Z = Z - 1$ ) uchun  $T_n = -\frac{E_n}{ch}$  ko‘rinishidagi ifoda XIX asr oxirida Ridberg tomonidan empirik yo‘l bilan aniqlangan. Bu termlar vodorod atomi termidan  $\Delta$  tuzatma bilan farq qiladi. Vodorod atomi uchun bu tuzatma  $\Delta = 0$ . Ishqoriy metallar spektral termlari ikkita kvant soni:  $n$  va  $\ell$  bilan xarakterlanadi. Spektral termlar yozilishida bosh kvant son –  $n$  oldin, so‘ng esa  $\ell$  ning son qiymati bilan ifodalangan lotin harfi yoziladi. Masalan,  $3s$  yozuv  $n = 3$  va  $\ell = 0$  bo‘lgan,  $5d$  yozuv  $n = 5$  va  $\ell = 2$  bo‘lgan termlarni ifodalaydi. Shunday qilib, ishqoriy metall atomlari uchun termlarning quyidagicha belgilashlari hosil bo‘ladi:

$$ns = \frac{R}{(n+s)^2}, \quad np = \frac{R}{(n+p)^2}, \quad nd = \frac{R}{(n+d)^2}, \quad (7.47)$$

bunda neytral atomlar uchun  $Z = 1$  deb olingan. Bosh kvant son  $n$  ga bo‘lgan tuzatmalar  $s, p, d$  harflar orqali yozilgan bo‘lib,  $\ell = 0, \ell = 1, \ell = 2, \dots$  sonlarni bildiradi. Bu harflarni formulaning chap tomonidagi harflar bilan almashtirmaslik kerak, bu harflar termlarni bildiradi.

**Tanlash qoidasi. Spektral seriyalar.** Kombinatsion prinsip asosida turli termlarni kombinatsiya qilish bilan spektral chiziqlar hosil bo‘ladi. Lekin nur chiqarish yoki yutish orqali bo‘ladigan spektral chiziqlarning barcha kombinatsiyalari ruxsat etilmagan. Ishqoriy metallarda nur yutish yoki chiqarishda  $s$  termi  $r$  va  $d$  termlari,  $d$  termi  $p$  va  $f$  termlari bilan kombinatsiyalishi mumkinligi aniqlangan. Bir energetik sathdan boshqa sathlarga bo‘ladigan elektron o‘tishlarda tanlash qoidasi bilan ruxsat etilgan o‘tishlarga to‘g‘ri bo‘ladi. Bunday kvant o‘tishlarda (nur chiqarish yoki yutish) orbital kvant soni  $\ell$  bo‘yicha tanlash qoidasi quyidagicha bajarilishi kerak:

$$\Delta \ell = \pm 1.$$

Bosh kvant son bo'yicha esa  $\Delta n$  istalgan songa teng bo'lishi mumkin. Kvant o'tishlarda kvant sonlarining bunday o'zgarishi *tanlash qoidalari* deb ataladi. Tanlash qoidalari dipol nurlanishga va yutilishga tegishli bo'lib, atomlarda sodir bo'ladigan boshqa jarayonlarga tegishli emas. Masalan, zarba bo'lganda qandaydir s holatdan  $d, f, g$  va boshqa holatlarga o'tish sodir bo'lishi mumkin. Lekin bunda nurlanish beradigan atom dipol momentining o'zgarishi kuzatilmaydi. Bundan tashqari, *man etilgan* o'tishlar ham spektral chiziqlar chiqarish orqali sodir bo'ladi. Bu atomda dipol momenti o'zgaradi-gan dipol nurlanishi bo'lmaydi, balki atomning kvadrupol va oktupol momentlari o'zgaradigan kvadrupol yoki oktupol nurlanishlar bo'ladi. Bunday nurlanishlar tanlash qoidasi  $\Delta \ell = \pm 1$  ga bog'liq bo'lmaydi.

Kvant mexanikasida atom sistemasining nurlanishi bilan bir kvant holatdan ikkinchi kvant holatga o'tishining ehtimolligi aniqlanadi. Tanlash qoidasiga rivoja qilinmaganda bu ehtimollik nolga aylanadi. Ishqoriy metallar atomlar energetik sathi energiyasining  $n$  va  $\ell$  ga bog'liq bo'lishligidan ularning spektral seriyalari hosil bo'ladi. Tanlash qoidasi  $\Delta \ell = \pm 1$  hisobga olinganda ishqoriy metallar atomlari spektrlarida, masalan, litiy atomi spektrida quyidagi spektral seriyalar aniqlanadi (7.4-rasm):

$$\text{Bosh seriya} \quad \bar{v} = ns - mp. \quad (7.48)$$

$$\text{O'tkir seriya} \quad \bar{v} = np - ms. \quad (7.49)$$

$$\text{Diffuz seriya} \quad \bar{v} = np - md. \quad (7.50)$$

$$\text{Asosiy seriya (Bergman seriyasi)} \quad \bar{v} = nd - mf. \quad (7.51)$$


Bu formulalarda  $\bar{v} = 1/\lambda$  — spektroskopik to'lqin soni. Har bir seriyada  $n$  doimiy saqlanadi. Bosh seriyada  $m$ :  $m=n, n+1, n+2$  boshqa seriyalarda esa  $m=n+1, n+2, \dots$  qiymatlar qabul qiladi.  $\Delta$  tuzatma har bir seriya chegarasida doimiy bo'lib, seriyadan seriyaga o'tganda o'zgaradi. Litiy atomi uchun kvant o'tishlar va spektral chiziqlari 7.4-rasmida va natriy atomi uchun 7.5-rasmida keltirilgan. Spektral chiziqlar to'lqin uzunliklari angestremlarda berilgan ( $1\text{\AA}=0,1 \text{ nm}$ ). 7.4-rasmida birinchi ustunchada  $n$  ning turli

qiymatlari uchun  $s$  holatdagi energetik sathlari ifodalangan, ikkinchi ustunda  $n$  ning turli qiymatlari uchun  $p$  holatdagi energetik sathlar keltirilgan, uchinchi uctunda esa  $d$  holatdagi energetik sathlar keltirilgan. Tanlash qoidasi  $\Delta \ell = \pm 1$  ga asosan atom nurlanishi faqat  $\ell$  bo'yicha qo'shni sathlar orasidagina bo'lishi mumkin, ya'ni  $s$  va  $p$  holatlar,  $p$  va  $d$  holatlar,  $d$  va  $f$  holatlar orasida bo'lishi mumkin.


Litiy atomida valent elektron  $2s$  holatda bo'ladi, uning eng yaqin uyg'ongan holati  $2p$  holatdir. Shuning uchun elektronning  $2p$  holatidan  $2s$  holatga o'tgandagi nurlanish chizig'inining intensivligi katta bo'ladi. Bunday intensivligi katta chiziq rezonans chizig'i deyiladi. Rezonans chizig'inining chastotasi:

$$\bar{v} = ns - np \text{ yoki } \bar{v} = 2s - 2p, \quad (7.52)$$


ifoda orqali aniqlanadi.  $n$  elektronning  $2p$  holatdan  $2s$  holatga o'tgandagi nurlanish chastotasidir. Litiyning atomi spektri valent elektronlar o'tishlarida hosil bo'ladi. Litiy qizil chizig'i, natriyning sariq chizig'i rezonans chiziqlardir. Litiy atomida  $2s$ ,  $2p$  sathlar energiyalari har xildir. Xuddi shunday  $3s$ ,  $3p$ ,  $3d$  sathlarning energiyalari ham turlicha. Umuman bosh kvant soni  $n$  bir xil va orbital kvant soni  $l$  har xil bo'lgan barcha energetik sathlar energiyasi turlichadir. Litiy atomida  $s$  sath yolg'iz bo'lib, boshqa sathlar esa magnit spin-orbital o'zaro ta'sir natijasida ajralgan multiplet sathlardir. Spin kvant soni  $s = 1/2$  bo'lganligidan barcha energetik sathlar dublet bo'lishi kelib chiqadi, ya'ni, masalan,  $p$  sath  $p_{1/2}$  va  $p_{3/2}$ ,  $d$  sath  $d_{3/2}$  va  $d_{5/2}$  sathlardan iborat bo'ladi. Valent elektronning turli  $p$  holatlardan chuqurroq sath  $s$  ga o'tishida ( $np-2s$ ) bosh seriya spektral chiziqlari hosil bo'ladi. Bosh seriya spektral chiziqlari atomning nur yutishida ham chiqarishida ham kuzatiladi. 7.6-rasmda natriy bug'ining chiqarish spektrida hosil bo'lgan bosh seriya chiziqlari ko'rsatilgan. Rasmda faqat serianing qisqa to'lqinli qismi



7.4-rasm



7.5-rasm



7.6-rasm

1. Bosh seriya chiziqlarining ajralishi doimiy emas, u chiziqdan bu chiziqqa o'zgaradi.

2. Diffuz seriya chiziqlarining barchasida ajralish bir xil.

3. O'tkir seriya chiziqlarida ajralish bir xil.

Ishqoriy metallar atomlari nurlanishlarining tajribalarda kuzatilgan spektrlarini tahlil qilish spektrdagи har bir spektral chiziq ikkiga ajralganligini, ya'ni dublet xarakterda ekanligini ko'rsatadi. Spektral chiziqlarning bunday ajralishi ko'rsatadiki, atomdagi energetik sathlarning energiyasi faqat bosh kvant songa va orbital kvant songa bog'liq bo'lmasdan, balki yana qandaydir qo'shimcha kattalikka

keltirilgan. Bosh seriya chiziqlarida qaralayotgan element atomining rezonans chizig'i bo'ladi.

Diffuz seriya chiziqlari elektronning turli  $d$  holatlardan  $p$  holatga o'tganida hosil bo'ladi. Diffuz seriyada elektronlarning  $d$  holatlardan  $p$  holatga o'tganida hosil bo'ladigan diffuz seriya chiziqlarining chastotasi  $n = 2p - nd$  ( $n = 3, 4, \dots$ ) formula bilan aniqlanadi. O'tkir seriya chiziqlari esa valent elektronning turli  $s$  holatlardan  $p$  holatlarga o'tganida hosil bo'ladi. O'tkir seriya chiziqlarining chastotasi  $n = 2p - ns$  ( $n = 3, 4, \dots$ ) formula orqali ifodalanadi.

Ajrata olish qobiliyati kuchli bo'lган spektroskopik qurilmalar yordalari spektri kuzatilganda spektrdagи har bir chiziq ikkiga ajralganligi, ya'ni dublet chiziq ekanligi aniqlangan. Spektral chiziqlarning ajralishida quyidagi konuniyatlar kuzatiladi:

bog'liq bo'lib, bu kattalik sathlar energiyasini bir muncha o'zgartiradi. Sath energiyasining o'zgargan kattaligi sathlar ajralishiga yetarli bo'lgan energiya kattaligida bo'ladi. Shuning uchun bu qo'shimcha energiya (7.42) formulada ifodalangan energiyaga tuzatma kiritadi. Aytish mumkinki, elektron atom nurlanishida seziladigan qandaydir qo'shimcha erkinlik darajasiga egadir. Bu qo'shimcha erkinlik darajasiga tegishli kvant soni  $m_s$  bilan belgilansa, atom energetik sathlari energiyasi uchta kvant soniga bog'liq bo'ladi:

$$E = E_{n,\ell,m_s}. \quad (7.53)$$

Shunday qilib, tajriba natijalarini tushuntirishda elektron ichki erkinlik darajasiga ega deb taxmin qilindi. Keyinchalik yana bir qator kashfiyotlar qilindiki, ularni tushuntirish uchun ham elektronning ichki erkinlik darajasini hisobga olish zarurati tug'ildi.

Elektronning ichki erkinlik darjasasi, bu uning xususiy mexanik momenti bo'lib, unga elektron spinii deyiladi. Elektron xususiy mexanik momentiga tegishli bo'lgan xususiy magnit momentiga ham ega bo'ladi. Elektronning magnit momentiga ega bo'lishi ishqoriy metallar atomlari spektridagi chiziqlarning dublet xarakterini tushuntirish imkoniyatini beradi, chunki magnit momenti qo'shimcha o'zaro ta'sirni vujudga keltiradi. Bunday o'zaro ta'sir spin-orbital o'zaro ta'sir deyiladi. Bunday o'zaro ta'sir elektron magnit momentining tashqi magnit maydon bilan o'zaro ta'sir energiyasi tufayli hosil bo'ladi. Bu energiya quyidagi formula orqali aniqlanadi:

$$E_n = -\mu B. \quad (7.54)$$

Spin-orbital o'zaro ta'sir energiyasi atom energetik sathlarining sathlarga ajralishiga olib keladi. Bunday ajralish spektrda spektral chiziqlarning ajralishida, ya'ni dublet xarakterda ekanligida kuzatiladi.

Shunday qilib, ishqoriy metall atomlari va vodorod atomi nurlanishi spektrida spektral chiziqlarning dublet xarakteri elektronning magnit momentiga ega bo'lishi va natijada spin orbital o'zaro ta'sir vujudga kelishi bilan tushuntiriladi.

## 7.5-§. Pauli prinsipi

Atomda elektronlar  $n$ ,  $\ell$ ,  $m_\ell$ ,  $m_s$  – kvant sonlari to‘plami turlichalbo‘lgan turli holatlarda bo‘lishi mumkin. Odatdagi tasavvurlarga asosan uyg‘otilmagan (asosiy holat) atomlarda elektronlar mumkin bo‘lgan eng kichik energiyali sathlarda bo‘lishi kerak, ya’ni atomning eng ichki energetik sathida. Lekin tajribalar bunday emasligini ko‘rsatadi. Z ning ortishi bilan atom elektron sathlari ketma-ket to‘ldirilabordi. Sathlarning bunday ketma-ket to‘ldirilishini tushuntirish uchun Pauli o‘zining quyidagi gipotezasini taklif qildi: istalgan kvant holatda (energetik sathda) faqat bitta elektron bo‘lishi mumkin. Uyg‘otilmagan atomning har bir keyingi elektroni hali to‘ldirilmagan sathlarda eng ichki sathini egallashi kerak. Paulining bu gipotezasi har tomonlama tekshirishlarda tasdiqlandi.

Bir kvant holatda bittadan ortiq elektron bo‘la olmasligining tasdiqlanishi, uning umumiy tatbig‘iga olib keldi va bu qoida *Pauli prinsipi* yoki man etish prinsipi deb ataldi. Pauli prinsipi faqat ma’lum bir atomdagi elektronlar uchun to‘g‘ri bo‘lmasdan, balki koinotdagi barcha elektronlar uchun ham to‘g‘ri bo‘ladi. Lekin bunda elektronlarning holati ularning energiyasi va fazoviy taqsimlanishi bilan farq qiladi. Pauli prinsipi kvant mexanikasining asosiy prinsiplaridan biri hisoblanadi. Bu prinsipni tavsiflashda zarralarning aynan bir-biriga o‘xhashligi hisobga olinadi. Kvant mexanikasida zarralar sistemasining holati to‘lqin funksiyasi bilan ifodalanadi. Bir xil zarralardan iborat tizimda shunday holatlar bo‘ladiki, tizimdagi istalgan zarralar o‘rinlari almashtirilganda, to‘lqin funksiyasining ishorasi o‘zgarmasa, bunday to‘lqin funksiya simmetrik to‘lqin funksiya deyiladi. Bir xil zarralar sistemasidagi istalgan zarralar o‘rinlari almashtirilganda, to‘lqin funksiyasi ishorasini o‘zgartirsa, bunday to‘lqin funksiya antisimmetrik to‘lqin funksiya deyiladi. Kvant mexanikasida ko‘p sondagi zarralarni xarakterlashda Fermi-Dirak va Boze-Eynshteyn statistikalaridan foydalaniladi. Tajribalar ko‘rsatadi, spini yarim butun songa teng bo‘lgan zarralar (elektronlar, protonlar, neytronlar va h.k.) antisimmetrik to‘lqin funksiyasi bilan ifodalanadi. Bunday zarralar Pauli prinsipiga bo‘ysunadi va ularni Fermi-Dirak zarralari yoki *fermionlar* deyiladi. Spini nol yoki butun songa teng bo‘lgan zarralar (alfa zarralar,  $\pi^-$ ,  $K$ -mezonlar va h.k.)

simmetrik to‘lqin funksiyasi bilan ifodalanadi. Bunday zarralar Pauli prinsipiga bo‘ysunmaydi va ularni Boze-Eynshteyn zarralari yoki *bozonlar* deb aytildi.

Shunday qilib, Pauli prinsipini quyidagicha tushunish mumkin: bir kvant holatda (energetik sathda) to‘rtta kvant sonlari ham bir xil qiymatga ega bo‘lgan ikki elektron bo‘la olmaydi. Masalan, ikki elektronning bosh kvant soni  $n$ , orbital kvant soni  $\ell$  va orbital magnit kvant soni  $m_\ell$  bir xil qiymatga ega bo‘lsa, to‘rtinchisi spin magnit kvant soni  $m_s$  ning qiymati bir-biridan farq qilishi kerak, ya’ni ikki elektron uchun  $m_s$  ning qiymatlari ikki xil bo‘lishi zarur:

$$-\frac{1}{2} \text{ va } +\frac{1}{2}.$$

Atom holatini to‘liq ravishda aniqlaydigan  $n$ ,  $\ell$ ,  $m_\ell$ ,  $m_s$  – kvant sonlarning uchtasi –  $n$ ,  $\ell$ ,  $m_\ell$ . Shredinger tenglamasining yechimidan kelib chiqadi, to‘rtinchisi spin magnit kvant soni  $m_s$  esa elektronning Dirak ishlab chiqqan relyativistik nazariyasidan kelib chiqadi.

Wolfgang Pauli o‘z prinsipini kashf qilgani uchun 1945-yilda Nobel mukofotiga sazovor bo‘lgan.

## **7.6-§. Elementlarning davriy sistemasi. Atom elektron qobiq va holatlarining elektronlar bilan to‘ldirilish tartibi**

Kimyoviy elementlar xossalaring davriy ravishda takrorlanishi 1869-yilda D.I. Mendeleyev tomonidan kashf qilindi va Mendeleyevning elementlar davriy sistemasida o‘z aksini topdi. Bu kashfiyat 1922-yilda Bor tomonidan atom tuzilishi nuqtai nazaridan tushuntirildi va kimyoviy elementlar sistemasi asosida elementning atom massasi emas, balki uning zaryadi yotishi aniqlandi. Agar zaryad birligi qilib elementlar zaryad  $e$  qabul qilinsa, u vaqtida yadro zaryadi butun son bo‘lib,  $Z$  bilan belgilanadi.  $Z$  soni elementning davriy tizimdagi tartib raqamini bildiradi va element atomidagi elektronlarning umumiyligi soniga teng bo‘ladi. Yadro zaryadi son jihatidan yadroni o‘rab turgan elektronlar qobig‘idagi elektronlar soniga teng, elementning xossasi atom elektron qobig‘idagi elektronlar soniga

va qobiq tuzilishiga bog'liq. Elementning kimyoviy xossasi tashqi qobiqdagi elektronlar (valent elektron) bilan aniqlanadi. Mendeleev davriy sistemasi 1925-yilda Pauli prinsipi aniqlangandan so'ng to'laroq tushuntirildi. Pauli prinsipi atom elektron qobig'ida ma'lum bir kvant holatda bo'lishi mumkin bo'lgan elektronlar sonini aniqlaydi. Shundan so'ng elementlarning davriy tizimda guruhlar va davrlar bo'yicha taqsimlanishi tushuntirildi. Tabiatda tabiiy holda 90 ta element uchraydi. Elementlarning eng katta tartib raqami — (92) uranga to'g'ri keladi.  $^{43}\text{Tc}$  (texnetsiy) va  $^{61}\text{Pm}$  (prometiy) tabiiy holda uchramaydi. Bu elementlar radioaktiv bo'lib, ularning yarim yemirilish davri  $^{99}_{43}\text{Tc}$  ning asosiy izotopi uchun  $2,12 \cdot 10^5$  yil, Pm ning izotoplari uchun bir necha yildan bir necha o'n yilgacha bo'lib, Yer yoshidan ko'p marta kichik. Yer paydo bo'lgandan beri bu elementlar butunlay yemirilib bo'lgan. Elementlar sistemasidagi tartib raqami 92 dan katta bo'lgan elementlar *transuran elementlar* deyiladi. Bu elementlar radioaktiv bo'lib, sun'iy yo'l bilan hosil qilingan. Hozirgi kunda tartib raqami 109 bo'lgan element ham hosil qilingan. Elementlarning davriy xossalaringin takrorlanishi atom elektron qobiqlari ichki tuzilishining tashqi belgisidir. Atomda alohida elektronning kvant holati to'rtta kvant soni  $n$ ,  $\ell$ ,  $m_\ell$ ,  $m_s$  bilan aniqlanadi. Pauli prinsipi bir kvant holatda bittadan ortiq elektron bo'lishi mumkin emas deb tushuntiradi. Bosh kvant soni  $n$  ning berilgan qiymatidagi elektronlar to'plami elektronlar qobiqlarini hosil qiladi. Elektron qobiqlar bosh kvant soni qiymatlariga mos ravishla bosh lotin harflar bilan belgilanadi (7.3-jadval).

7.3-jadval

Tartib raqami	1	2	3	4	5
Elektron qobiq qatlami	$K$	$L$	$M$	$N$	$O$
Elektron qobiqlardagi elektronlarning maksimal soni	2	8	18	32	50

Bosh kvant soni  $n$  va orbital kvant soni  $\ell$  ning berilgan qiymatlaridagi elektronlar to'plami elektron holatlarni hosil qiladi.  $n$  ning  $\ell$  qabul qilishi mumkin bo'lgan qiymatlariga qarab bir

elektron qobiqda bir nechta holatlar bo‘lishi mumkin. Bu holatlar  $m_\ell$  ning qiymatlari bilan farq qiladi.  $m_\ell$  quyidagi qiymatlarni qabul qiladi:

$$m_\ell = -\ell, -(\ell-1), \dots, 0, \dots, +(\ell-1), +\ell.$$

Elektron holatlar orbital kvant soni  $\ell$  ning son qiymatlariga mos ravishda kichik lotin harflari bilan beogilanadi (7.4-jadval).

7.4-jadval

$\ell$	0	1	2	3	4
Holatlar	$s$	$p$	$d$	$f$	$g$
Holatlardagi elektronlarning maksimal soni	2	6	10	14	18

Kvant soni  $\ell$  ning turli qiymatlariga to‘g‘ri keladigan har bir holatida bo‘lishi mumkin bo‘lgan elektronlarning maksimal soni  $2(2\ell+1)$  ifoda orqali aniqlanadi. Masalan,  $n=1$  va  $\ell=0$  bo‘lgan  $s$  holatda 2 ta,  $n=2$  va  $\ell=1$  bo‘lgan  $p$  holatda 6 ta,  $n=3$  va  $\ell=2$  bo‘lgan  $d$  holatda 10 ta elektron bo‘lishi mumkin va h.k. Demak,  $n$  ning berilgan qiymatida  $\ell$  qabul qilishi mumkin bo‘lgan qiymatlariga bog‘liq ravishda bir elektron qobiqda bir nechta holatlar bo‘lishi mumkin. Masalan,  $n=2$  bo‘lgan  $L$  qobiqda  $\ell=0$  va 1 bo‘lgan  $s$  va  $p$  holatlar bo‘ladi. Shuning uchun  $n$  ning berilgan qiymatidagi har bir qobiqda bo‘lishi mumkin bo‘lgan elektronlarning maksimal soni shu qobiqdagi holatlarda bo‘lgan elektronlarning yig‘indisiga teng, ya’ni

$$\sum_{\ell=0}^{n-1} 2(2\ell+1) = 2n^2. \quad (7.55)$$

Elektron holatini bildiruvchi harf va undagi elektronlar soni atom elektronlar konfiguratsiyasi deyiladi. Masalan,  $1s^2 2s^2 2p^6$  yozuv  $n=1$ ,  $\ell=0$  bo‘lgan  $s$  holatda ikkita elektron bo‘lishini va  $n=2$ ,  $\ell=1$  bo‘lgan  $p$  holatda oltita elektron bo‘lishini bildiradi.  $1s^2 2s^2 2p^6$  yozuv neonning elektron konfiguratsiyasidir. Elektron qobiqlar elektronlar bilan ketma-ket to‘ldirilishi kerak edi, har bir elektron qobiqda dastlab  $s$  holat, so‘ng  $p$ ,  $d$ ,  $f$  holatlar to‘liq ravishda to‘ldirilishi

kerak edi. Haqiqatda esa elektron qobiqlarning bunday «ideal» to'ldirilish tartibi barcha element atomlari uchun bajarilmaydi. Bunday «ideal» to'ldirilishning buzilishi asosan elektronlarning orbital harakat miqdor momentiga  $L = h\sqrt{\ell(\ell+1)}$  ega ekanligi bilan tushuntiriladi. Elektronning bog'lanish energiyasi faqat uning yadro elektr maydonidagi potensial energiyasiga, uni o'rabi turgan elektron qobig'iga bog'liq bo'lmasdan, balki markazdan qochma energiyaga ham bog'liq bo'ladi:

$$\frac{L^2}{2m_e r^2} = \frac{\ell(\ell+1)\hbar^2}{2m_e r^2}, \quad (7.56)$$

bunda  $r$  – elektronning yadroqacha bo'lgan masofasi. Markazdan qochma va elektr energiyalar qarama-qarshi ishoraga ega, shuning uchun turli tomonga ta'sir qiladi. Yoki boshqacha aytganda, elektronning orbitada aylanishidan hosil bo'ladigan markazdan qochma kuch elektronni yadrodan uzoqlashtirishga harakat qiladi. Shu sababga ko'ra,  $3d$  holatdagi 10 ta elektronidan har biri  $4s$  holatdagi ikki elektronning har birining bog'lanish energiyasiga nisbatan kichik qiymatdagi bog'lanish energiyasiga ega bo'ladi. Natijada  $4s$  holat elektronlar bilan  $3d$  holatdan oldinroq to'ladi. Markazga qochma energiya, ayniqsa, d va f holatlarda kattadir, bu holatlarda  $\ell(\ell+1)=2(2+1)=6$  va  $\ell(\ell+1)=3(3+1)=12$ . Bunday holatlarning bo'lishi holatlarning ideal to'ldirilishining buzilishiga sabab bo'ladi. Haqiqatan ham, atomdagi elektron qobiq va holatlar quyidagi tartibda to'ldiriladi:

$1s^2$	2 elektron – $K$ qobiq	$n=1$
$2s^2 2p^6$	8 elektron – $L$ qobiq	$n=2$
$3s^2 3p^6$	10 elektron – $M$ qobiq	$n=3$
$4s^2 3d^{10} 4p^6$	18 elektron – $N$ qobiq	$n=4$
$5s^2 4d^{10} 5p^6$	18 elektron – $O$ qobiq	$n=5$
$6s^2 4f^{14} 5d^{10} 6p^6$	32 elektron – $P$ qobiq	$n=6$
$7s^2 5f^{14} 6d^{10} 7p^6$	32 elektron – $F$ qobiq	$n=7$

$n=1$  bo'lgan  $K$  – elektron qobiq  $\ell=0$  bo'lgan bitta s holatdan iborat. Vodorod atomida bu holatda bitta elektron bo'ladi –  $1s^1$ . Gelyi atomida bu elektronga ikkinchi elektron qo'shiladi, va shu s

holatda ikkita elektron bo'ladi —  $1s^2$ . Bunda geliy atomida bir elektronning bog'lanish energiyasi vodorod atomi elektroni bog'lanish energiyasidan ikki marta katta. Bu esa geliy yadroси zaryadi vodorod yadroси zaryadidan ikki marta katta bo'lishi bilan tushuntiriladi. Shuning uchun normal holatdagi geliy atomi elektroni vodorod atomiga nisbatan yadrodan kichik masofada bo'ladi. Ikkinci elektronning bo'lishi birinchi elektronning bog'lanish energiyasini kamaytiradi. Vodorod va geliy elementlar sistemasining birinchi davrini hosil qiladi. Endi yadroning zaryadi birga ortgan holda atom elektronlariga yana uchinchi elektron qo'shiladi, bunda  $1s$  holat ikkita elektron bilan to'lgan bo'lib, uchinchi elektron  $2s$  ( $n=2$ , L qobiq) holatga o'tadi, ya'ni:  $1s^2 2s^1$ . Bu esa ishqoriy metall  ${}^3\text{Li}$  atomi konfiguratsiyasidir, yadroning zaryadi yana birga ortib, atom elektronlariga yana to'rtinchи elektron qo'shiladi, bu elektron  $2s$  holatni to'ldiradi:  $1s^2 2s^2$  bu esa  ${}^4\text{Be}$  atomining elektron konfiguratsiyasidir. Shunday tartibda  ${}^6\text{C}$ ,  ${}^7\text{N}$ ,  ${}^8\text{O}$ ,  ${}^9\text{F}$  atomlarining elektron konfiguratsiyalari hosil bo'ladi.  $2p$  holatning to'ldirilishi  ${}^{10}\text{Ne}$  gazi hllan tugaydi. Shunday qilib, elementlar sistemasining ikkinchi davri hosil bo'ladi.  ${}^{11}\text{Na}$  — ishqoriy elementdan boshlab  $n=3$  bo'lgan M elektron qobiq to'ldirila boshlaydi va  ${}^{18}\text{Ar}$  gazi bilan to'ldirilib bo'ladi. Bunda elementlar sistemasining uchinchi davri hosil bo'ladi. Navbatdagi  $Z=19$  elementdan boshlab atom elektron qobig'i va holatlarining yuqoridagi tartibda elektronlar bilan tuldirilishi buziladi. Dastlab  $4s$  holat to'ldiriladi, so'ng orada qolgan  $3d$  holat to'ldirilishi boshlanadi. Elementlar to'ldirilishida bunday buzilish  ${}^{19}\text{K}$  elementi atomidan boshlanadi. Elektronlar sistemasining to'rtinchи davrida vanadiy (V) elektron konfiguratsiyasi:  $1s^2 2s^2 2p^6 3s^2 3p^6 4s^2 3d^3$  dan so'ng xrom (Cr) elektron konfiguratsiyasi keladi —  $4s^1 3d^5$ , ya'ni  $3d$  holatdagi elektronlar soni birdaniga ikkitaga ortadi, bunda bir elektron  $4s$  holatdan o'tadi. Navbatdagi element marganes (Mn) konfiguratsiyasida  $1s^2 2s^2 2p^6 3s^2 3p^6 4s^2 3d^5$  yangi elektron  $3d$  holatga emas, balki  $4s$  holatga qo'shiladi. Elektron holatlar to'ldirilishda bunday buzilish  $d$ ,  $f$  holatlar to'ldirilishida ham kuzatiladi. Elementlar sistemasida har bir davr ishqoriy metall bilan boshlanadi va He, Ne, Ar, Kr, Xe, Rn inert gazlar bilan tugaydi. Ishqoriy metall atomi tashqi qobig'ida bitta elektron harakatlanadi, ularning ionlashtirish potensiali kichik. Shuning uchun bunday atomlar

tashqi elektroni boshqa atomlarga osonlikcha birikadilar, tashqi elektronini beradilar. Shuning uchun ishqoriy metallar kimyoviy faol hisoblanadilar. Inert gazlarda tashqi *s-p* holatlar sakkizta elektrondan iborat bo'lib, simmetrik va mahkam bog'langan sistemasini tashkil qiladi. Shuning uchun inert gazlar ionlashtirish potensiali katta qiymatga ega bo'ladi, shu sababdan inert gazlar kimyoviy faol bo'lmaydi, ular boshqa atomlar bilan kimyoviy birikmalar hosil qilmaydi. Elementlar sistemasida har bir yarim davr o'tish elementlari Fe, Ni, Co, Ru, Rh, Pd, Os, Ir, Pt elementlari bilan tugaydi. Bular triadani hosil qiladi: (temir, kobalt, nikel), (ruteniy, rodiy, palladiy), (osmiy, iridiy, platina). Elementlar davriy sistemasida seriyadan boshlab lyutetsiyni o'z ichiga olgan o'n to'rtta element noyob Yer elementlari yoki lantanoidlardir. Bu element atomlarida ichki *4f* holat to'ldiriladi, tashqi holatlar o'zgarishsiz qoladi. Lantanoidlar – Ce, Pr, Nd, Pm, Sm, Eu, Gd, Tb, Dy, Ho, Er, Tm, Yb, Lu larning kimyoviy xossalari bir-biriga yaqindir. Toriydan boshlab lourensiyni o'z ichiga olgan – Th, Pa, U, Np, Pu, Am, Cm, Bk, Cf, Es, Fm, Md, No, Lr elementlar *aktinoidlar* deyiladi. Ularning ko'pchiligi sun'iy yo'l bilan hosil qilingan. Bu elementlarda ichki *5f* holat to'ldiriladi, tashqi holatlar esa o'zgarmasdan qoladi. Shuning uchun lantanoidlar va aktinoidlarning kimyoviy xossalari bir-biriga yaqindir.

Elementlar davriy sistemasi 8 ustundan iborat bo'lib, bu ustunlar sakkiz guruhni tashkil etadi. Guruhlar esa jadvaldagagi yettita gorizontal qatorni tashkil etadi. Bu qatorlar davrlar deb aytildi. Har bir guruhda fizikaviy va kimyoviy xususiyatlari bir xil bo'lgan elementlar joylashtirilgan. Elementlar xususiyatlarining davriyligini o'xshash elementlar atomlarining chetki qobiqlaridagi elektron konfiguratsiyaning takrorlanishi bilan tushuntirish mumkin. Masalan, Si (kremniy) va C (uglerod) elementlari atomlarining kimyoviy xususiyatlari bir-biriga juda o'xshash, shuning uchun bu elementlar atomlaridagi oxirgi elektronlarni ifodalovchi uchta kvant son ( $n$  – bosh kvant sondan tashqari) ham aynan bir xil. Elementlar davriy sistemasi ushbu kitobning farzasida keltirilgan.

Davriy sistemadagi elementlarning kimyoviy belgisi, ionlashtirish potensiali hamda atom qobiqlari bo'yicha elektronlarning taqsimlanishi 7.5-jadvalda keltirilgan.

Element	Ionlashtirish potensiali, eV	Asosiy holat	Qobiqlar bo'yicha elektronlarning taqsimlanishi												
			K		L		M			N			O		
			1s	2s	2p	3s	3p	3d	4s	4p	4d	4f	5s	5p	5d
1	2	3	4	5	6	7	8	9	10	11	12	13	14	15	16
<sup>1</sup> H, <sup>2</sup> He	13,624,6	<sup>2</sup> S <sub>1/2</sub> <sup>1</sup> S <sub>0</sub>	1 2												
<sup>3</sup> Li	5,4	<sup>2</sup> S <sub>1/2</sub>	2	1											
<sup>4</sup> Be	9,3	<sup>1</sup> S <sub>0</sub>	2	2											
<sup>5</sup> B	8,3	<sup>2</sup> P <sub>1/2</sub>	2	2	1										
<sup>6</sup> C	11,3	<sup>3</sup> P <sub>0</sub>	2	2	2										
<sup>7</sup> N	14,6	<sup>4</sup> S <sub>3/2</sub>	2	2	3										
<sup>8</sup> O	13,6	<sup>3</sup> P <sub>2</sub>	2	2	4										
<sup>9</sup> F	17,4	<sup>2</sup> P <sub>3/2</sub>	2	2	5										
<sup>10</sup> Ne	21,6	<sup>1</sup> S <sub>0</sub>	2	2	6										
<sup>11</sup> Na	5,1	<sup>2</sup> S <sub>1/2</sub>				1									
<sup>12</sup> Mg	7,6	<sup>1</sup> S <sub>0</sub>				2									
<sup>13</sup> Al	6,0	<sup>2</sup> P <sub>1/2</sub>				2	1								
<sup>14</sup> Si	8,2	<sup>1</sup> P <sub>0</sub>				2	2								
<sup>15</sup> P	10,9	<sup>4</sup> S <sub>3/2</sub>				2	3								
<sup>16</sup> S	10,4	<sup>3</sup> P <sub>2</sub>				2	4								
<sup>17</sup> Cl	12,9	<sup>2</sup> P <sub>3/2</sub>				2	5								
<sup>18</sup> Ar	15,8	<sup>1</sup> S <sub>0</sub>				2	6								
<sup>19</sup> K	4,3	<sup>2</sup> S <sub>1/2</sub>								1					
<sup>20</sup> Ca	6,1	<sup>1</sup> S <sub>0</sub>								2					
<sup>21</sup> Sc	6,7	<sup>2</sup> D <sub>3/2</sub>							1	2					
<sup>22</sup> Ti	6,8	<sup>3</sup> F <sub>2</sub>							2	2					
<sup>23</sup> V	6,7	<sup>4</sup> F <sub>3/2</sub>							3	2					
<sup>24</sup> Cr	6,7	<sup>7</sup> S <sub>1</sub>							5	1					
<sup>25</sup> Mn	7,4	<sup>6</sup> S <sub>3/2</sub>							5	2					
<sup>26</sup> Fe	7,8	<sup>5</sup> D <sub>4</sub>							6	2					
<sup>27</sup> Co	7,8	<sup>4</sup> F <sub>9/2</sub>							7	2					
<sup>28</sup> Ni	7,6	<sup>3</sup> F <sub>4</sub>							8	2					
<sup>29</sup> Cu	7,7	<sup>2</sup> S <sub>1/2</sub>							10	1					
<sup>30</sup> Zn	9,4	<sup>1</sup> S <sub>0</sub>							10	2					
<sup>31</sup> Ga	6,0	<sup>2</sup> P <sub>1/2</sub>							10	2	1				
<sup>32</sup> Ge	8,1	<sup>3</sup> P <sub>0</sub>							10	2	2				
<sup>33</sup> As	10,5	<sup>4</sup> S <sub>1/2</sub>							10	2	3				
<sup>34</sup> Se	9,7	<sup>1</sup> P <sub>2</sub>							10	2	4				
<sup>35</sup> Br	11,8	<sup>2</sup> P <sub>3/2</sub>							10	2	5				
<sup>36</sup> Kr	14,0	<sup>1</sup> P <sub>0</sub>							10	2	6				

1	2	3	4	5	6	7	8	9	10	11	12	13	14	15	16
$^{37}\text{Rb}$	4,2	$^2\text{S}_{1/2}$											1	2	
$^{38}\text{Sr}$	5,7	$^1\text{S}_0$	Kripton konfiguratsiyasi										2	2	
$^{39}\text{Y}$	6,5	$^2\text{D}_{3/2}$								1			2		
$^{40}\text{Zr}$	7,0	$^3\text{F}_2$								2			2		
$^{41}\text{Nb}$	6,8	$^6\text{D}_{1/2}$								4			1		
$^{42}\text{Mo}$	7,1	$^7\text{S}_3$								5			1		
$^{43}\text{Tc}$	7,1	$^6\text{D}_{9/2}$								6			1		
$^{44}\text{Ru}$	7,5	$^5\text{F}_5$								7			1		
$^{45}\text{Rh}$	7,7	$^4\text{F}_{9/2}$								8			1		
$^{46}\text{Pd}$	8,1	$^1\text{S}_0$								10					
$^{47}\text{Ag}$	7,6	$^2\text{S}_{1/2}$								10			1		
$^{48}\text{Cd}$	9,0	$^1\text{S}_0$								10			2		
$^{49}\text{In}$	5,8	$^2\text{P}_{1/2}$								10			2	1	
$^{50}\text{Sn}$	7,3	$^3\text{P}_0$								10			2	2	
$^{51}\text{Sb}$	8,6	$^4\text{S}_{3/2}$								10			2	3	
$^{52}\text{Te}$	9,0	$^3\text{P}_2$								10			2	4	
$^{53}\text{I}$	10,4	$^2\text{P}_{3/2}$								10			2	5	
$^{54}\text{Xe}$	12,1	$^1\text{S}_{1/2}$								10			2	6	

### 7.7-§. Atomning nurlanishi va yutishidagi tanlash qoidalari

Agar atom uyg'ongan holatda bo'lsa, u foton nurlash bilan pastroq energetik holatga o'tishi mumkin. Aksincha, atom foton yutishi bilan yuqori energetik holatga o'tishi mumkin. Lekin atomning bunday bir holatdan ikkinchi holatga o'tishlarining hammasi ham haqiqatda amalga oshmaydi. Foton nurlash yoki yutish bilan bo'ladigan kvant o'tishlarning amalga oshish yoki oshmasligi kvant sonlar bo'yicha tanlash qoidalari bilan aniqlanadi. Tanlash qoidalari kvant o'tishlarning ruxsat etilganligini yoki taqiqlanganligini ifodelaydi. Tanlash qoidalari spektroskopiyada tajriba natijalari asosida o'rnatilgandir. Har bir tanlash qoidasi qandaydir saqlanish qonunini ifodalaydi.

Atomning nur chiqarishi yoki yutishi bilan bo'ladigan o'tishlarda ko'rila'digan asosiy tanlash qoidalari harakat miqdor momentining saqlanish qonuni natijasidir. Ikkita foton chiqarish bilan bo'ladigan o'tishlar ehtimoliyati kichik. Bitta foton chiqarish bilan bo'ladigan

o'tishlarni ko'rib chiqamiz. Atomning bitta foton nurlashida harakat miqdor momentining saqlanish qonunini quyidagicha yozish mumkin:


$$J = J' + S_F \quad (7.57)$$

(7.57) formulada  $J$  – atomning fotonni nurlashgacha bo'lgan harakat miqdor momenti ( $\hbar$  birliklarda),  $J'$  – fotonni nurlagandan keyingi harakat miqdor momenti,  $S_F$  – fotonning spin vektori. Tanlash qoidalarida  $J$ ,  $J'$  va  $S_F$  vektorlarning kvant sonlari  $J$ ,  $J'$ ,  $S$  lar asosida chiqariladi. Harakat miqdor momentining saqlanish qonuniga asosan (7.57) tenglamaning har ikki tomonida kvant sonlari bir xil bo'lishi kerak. (7.57) ning o'ng tomonidagi kvant sonlari vektorlarni qo'shish qoidasidan kelib chiqadi. Kvant mexanikasida  $J$  vektori bir qiymatda aniqlanadigan xususiy hol mavjud. Bu holda to'liq moment vektorining kvant soni  $J = 0$  bo'ladi. U vaqtida  $J$  vektorning kvadrati  $J^2 = J(J+1) = 0$ , ya'ni  $J$  vektorning o'zi va uning barcha proyeksiyalari aniqliylarga ega bo'ladi. Bunda  $J$  vektori klassik fizikadagidek qaraladi. Shuning uchun kvant soni  $J = 0$  bo'lgan kvant holatdan  $J = 0$  bo'lgan boshqa holatga o'tish, ya'ni  $0 - 0$  o'tishlar mutlaq taqiqlangan bo'ladi. Tanlash qoidalarini keltirib chiqarishda vektor diagrammalari usuli modelidan foydalanamiz. Bu usulda  $J$  va  $S$  vektorlar oddiy klassik vektorlar deb qaraladi. Bu vektorlarning uzunligi  $J$  va  $S$

kvant sonlariga teng bo'lmaysa, balki  $\sqrt{J(J+1)}$  va  $\sqrt{S(S+1)}$

kattaliklarda teng bo'ladi. Qaralayotgan  $J = J' + S$  vektor modelida atomning foton nurlashidagi impuls momentining saqlanish qonunini ifodalaydi. Atomning foton nurlanishida  $J$  va  $J'$  vektorlardan birortasi nol bo'lmaydigan holni qaraylik.  $|J'| \geq |J|$

bo'lsin. 7.7a-rasmdagi uchburchakning har bir tomoni uzunligi qolgan ikki tomoni uzunliklari yig'indisidan kichikdir.  $J$  va  $J'$  vektorlarning uzunrog'i, ya'ni  $|J'| \geq |J| + |S|$  tengsizlikdan foydalanamiz, yoki



7.7-rasm

$$\sqrt{J'}(J'+1) \leq \sqrt{J(J+1)} + \sqrt{S(S+1)}, \quad (7.58)$$

foton uchun spin kvant soni  $S=1$ , u vaqtida ikkinchi had  $\sqrt{2}$  ga teng bo‘ladi. Atomda elektronlar soni juft bo‘lganda  $J'$  va  $J$  kvant sonlari butun va elektronlar soni toq bo‘lganda, yarim butun sonlarga teng bo‘ladi.  $\Delta J = J' - J$  faqat musbat butun sonlarga teng bo‘ladi, chunki atom foton nurlashida undagi elektronlar soni o‘zgarmaydi. (7.58) formulada  $J'$  ni  $J + \Delta J$  ifoda bilan almashtirib kvadratga ko‘taramiz:

$$\Delta J^2 + (2J+1)\Delta J - 2 \leq 2\sqrt{2J(J+1)}, \quad (7.59)$$

$J$  ning ma’lum qiymatida va  $\Delta J \geq 0$  bo‘lganda, (7.59) ifodaning chap tomoni  $\Delta J$  ning ortishi bilan ortadi, chunki uning  $\Delta J$  bo‘yicha hosilasi musbatdir.  $\Delta J = 0$  bo‘lganda (7.59) tengsizlik bajariladi. (7.59) tengsizlik  $\Delta J = 1$  bo‘lganda ham bajariladi, lekin  $J \leq 2\sqrt{2J(J+1)}$  tengsizlikka aylanadi.  $\Delta J = 2$  bo‘lganda (7.59) tengsizlik bajarilmaydi va u

$$2(J+1) \leq 2\sqrt{2J(J+1)}$$

tengsizlikka aylanadi, bu tengsizlik esa to‘g‘ri emas.  $\Delta J$  ning katta qiymatlarida (7.59) tengsizlik bajarilmaydi.  $J' \leq J$  bo‘lgan holga  $J$  ni  $J'$  ning almashtirishiga olib keladi. Shunday qilib,  $J$  va  $J'$  kvant sonlaridan birortasi ham nol bo‘lmaganda, atomning foton nurlashi uchun tanlash qoidalari hosil bo‘ladi, ya’ni

$$\Delta J = J' - J = \pm 1 \quad \text{yoki} \quad 0. \quad (7.60)$$

$J$  va  $J'$  kvant sonlardan birortasi nolga aylansa, (7.60) ifodada  $\Delta J = 0$  hol amalga oshmaydi. Faqat  $\Delta J = \pm 1$  bo‘lgan o‘tishlar bo‘lishi mumkin.  $J$  va  $J'$  kvant sonlari ikkasi ham nol bo‘lgan hol bo‘lishi mumkin emas.

Atomning foton yutishidagi tanlash qoidasi foton nurlashdagi kabi hosil qilinadi. Bu holda to‘liq moment vektorlari  $J + S = J'$  bog‘lanishda bo‘ladi. Bunda 7.7b-rasmdan foydalaniladi.

Endi atomning foton nurlanishigacha yoki nurlashidan keyingi (yoki foton yutish holi uchun) to‘liq impuls momentlari vektorlari  $J$  va  $J'$  proyeksiyalari  $m_J$  va  $m_{J'}$  kvant sonlari bo‘yicha tanlash

qoidalarini ko‘raylik. Bunda tanlash qoidasini to‘g‘ridan-to‘g‘ri yozish mumkin:

$$\Delta m_j = m_j - m_j = \pm 1 \text{ yoki } 0, \quad (7.61)$$

(7.61) dagi tanlash qoidasi oldin ko‘rilgan tanlash qoidalari bilan bir vaqtida bajarilishi kerak.

Shunday qilib, atomning bir statsionar holatdan ikkinchi statsionar holatga o‘tishi energiyasi  $E = \hbar v$  bo‘lgan bitta foton chiqarish bilan sodir bo‘ladi. Fotonning orbital harakati bilan bog‘liq bo‘lmagan ichki harakat miqdori momenti *foton spin* deyiladi. Foton spini birga teng (ya’ni  $\hbar$  ga teng). Lekin to‘liq momentning o‘zi emas, balki uning proyeksiyasi  $\hbar$  birliklarda o‘lchanadi. Fotonning spini uning tarqalish yo‘nalishida ikki xil usul bilan oriyentirlanadi. Bu shuni ko‘rsatadiki, fotonning istalgan qutblangan holati ikkita holatning chiziqli kombinatsiyasidan hosil bo‘ladi. Birinchi holatda qutblanish o‘ng va ikkinchisida qutblanish chapda bo‘ladi. Shu bilan birga  $S$  vektoring istalgan yo‘nalishga proyeksiyalari bo‘lgan holatlar soni  $2S+1$  ifodaga teng. Bunda  $S$  spin kvant soni. Shuning uchun foton spini  $1/2$  bo‘lishi kerakdek tuyuladi. Lekin bunday holda foton nurlanishi va yutilishida atomning to‘liq harakat miqdor momenti vektori  $J$  ning kvant soni  $\pm 1/2$  ga o‘zgarishi kerak, ya’ni butun sondan yarim butun songa o‘tiladi va aksincha. Bu hol esa atomning foton nurlashi yoki yutishida atomda elektronlar soni o‘zgarmaydi degan mulohazaga qarama-qarshidir.  $J$  kvant soni esa elektronlar soni just bo‘lganda butun va toq bo‘lganda yarim butun songa teng bo‘ladi. Foton faqat tezligi yorug‘lik tezligiga teng bo‘lgan harakat holatida mavjud bo‘ladi. Istalgan sanoq sistemasida foton uchun bitta tanlangan yo‘nalish – harakat yo‘nalishi mavjud. Foton spini vektorining proyeksiyasi ham faqat shu yo‘nalishga bo‘ladi. Foton spini  $S=1$  bo‘lgani uchun spin shu yo‘nalishga nisbatan  $2S+1$ , ya’ni uch xil oriyentirlanishi mumkin: birinchi holda spin proyeksiyasi harakat yo‘nalishida yo‘nalan, ikkinchi holda harakatga qarshi yo‘nalan, uchinchi holda esa nolga teng. Haqiqatda elektromagnit to‘lqinlar ko‘ndalang bo‘lgani uchun uchinchi hol amalga oshmaydi. Bunday natijalar tajribalarda kuzatilgan. To‘liq harakat miqdor momenti vektori  $L$  va spin momenti vektori  $S$  bilan

bog'liq bo'lgan tanlash qoidalarini ko'raylik. Elektromagnit to'lqlarning (foton) nurlanishi elektronning elektromagnit xossalari – zaryadi va magnit momenti tufayli paydo bo'ladi. Atomning foton nurlashi zaryad harakatining o'zgarish ( $L$  vektorning o'zgarishi) yoki spin magnit momentining o'zgarishi yoki birdaniga har ikkala o'zgarish natijasida hosil bo'ladi. Spin burilishida hosil bo'ladigan nurlanish relyativistik effekt hisoblanadi. Nazariya ko'rsatadiki, optik sohada nurlanish bo'lganda fotonning elektron zaryadi bilan o'zaro ta'siri fotonning elektron magnit momenti bilan o'zaro ta'siridan kuchli bo'ladi. Bu esa foton nurlanishi spin vektori o'zgarishi bilan bog'liq emasligini ko'rsatadi, ya'ni

$$\Delta S = 0. \quad (7.62)$$

Demak, atomning nur (foton) yutishi yoki nurlashi atom holatlari spini bo'lmagandagidek sodir bo'ladi, ya'ni spinga bog'liq bo'lmaydi. Bunda atomning magnit momenti faqat orbital momentga teng deb qaraladi. Ya'ni to'liq moment  $J$  orbital moment  $L$  ga teng. U vaqtida bitta foton nurlash yoki yutish orqali bo'ladigan o'tishlar uchun orbital moment kvant soni bo'yicha tanlash qoidasi quyida-gicha bajariladi:

$$\Delta L = L - L = \pm 1 \quad \text{yoki} \quad 0. \quad (7.63)$$

$L$  va  $L'$  lardan birortasi nolga aylansa,  $\Delta L=0$  bo'lgan hol amalga oshmaydi.  $\Delta L=0$  bo'lgan hol bir valent elektroniga ega bo'lgan atomlar uchun ham amalga oshmaydi (masalan, vodorod va ishqoriy metallar atomlari uchun). Lekin o'tishlarning bunday taqiqlanishi harakat miqdorining saqlanish qonuni bilan bog'liq bo'lmasdan, balki to'lqin funksiyasi juftligining saqlanish qonuni bilan bog'liq.  $\Delta J=\pm 1$  tanlash qoidasi bajarilganda aylanma qutblangan foton nurlanadi,  $\Delta J=0$  da esa chiziqli qutblangan foton nurlanadi.

Yuqorida ko'rilmagan (7.60–7.63) formulalarda tanlash qoidalari foton xossalari bilan bog'liq bo'lib, faqat bitta foton nurlash yoki yutish bilan bo'ladigan kvant o'tishlarda to'g'ri bo'ladi. Ko'p foton nurlash yoki chiqarish bilan bo'ladigan o'tishlarga to'g'ri kelmaydi.

## 7.8-§. Atomda elektronlarning bog'lanish turlari

Atomning to'la harakat miqdori moment  $\vec{J}$  ga bir necha elektronning orbital va spin momentlari hissa qo'shsa,  $\vec{J}$  shu momentlarning vektor yig'indisi ko'rinishda aniqlanadi. Elektronlarning o'zaro ta'sirda bo'lishligi sababli ularning orbital va spin momentlarini qo'shish atom sistemasidagi mavjud o'zaro ta'sirlar xarakteri bilan aniqlanuvchi qoidalarga bo'ysinadi.

***LS bog'lanish.*** Agar elektronlar sistemasining orbital va spin momentlari o'zaro ta'siri har bir elektronning orbital va spin momentlari o'zaro ta'sirdan kuchli bo'lsa, elektronlar sistemasida *LS* bog'lanish amalga oshadi.

*LS* bog'lanish ko'pincha Rossel-Saunders yoki normal bog'lanish deb ham ataladi. Tajriba natijalarida ko'pchilik hollarda *LS* bog'lanish amalga oshishi isbotlangan. Shu sababli atom tuzilishi nazariyasida *LS* bog'lanish muhim rol o'ynaydi.

*LS* bog'lanishda alohida elektronlarning orbital momentlari qo'shilib atomning orbital momenti  $L$  ni spin momentlari qo'shilib esa atomning spin momenti  $S$  ni hosil qiladi. Ya'ni,

$$\begin{aligned}\vec{L} &= \vec{l}_1 + \vec{l}_2 + \dots \\ \vec{S} &= \vec{s}_1 + \vec{s}_2 + \dots\end{aligned}\quad (7.64)$$

Atomning to'liq momenti  $J$  uning orbital  $\vec{L}$  va spin  $\vec{S}$  momentlari yig'indisidan iborat bo'ladi.

$$\vec{J} = \vec{L} + \vec{S}. \quad (7.64a)$$

*LS* bog'lanish quyidagi formulalar ko'rinishida ham ifodalanadi:

$$\left| \begin{array}{l} \vec{L} = \sum \vec{l}_i, \\ \vec{S} = \sum \vec{s}_i, \\ \vec{J} = \vec{L} + \vec{S} \end{array} \right| \quad (7.64b)$$

$|\vec{L}|, |\vec{S}|, |\vec{J}|, L_z, S_z, J_z$  lar odatdagidaek kvantlanadi va ularga  $L, S, J, M_L, M_S$  va  $M_J$  kvant sonlari mos keladi, ya'ni

$$|\vec{L}| = \hbar\sqrt{L(L+1)}, \quad L_z = \hbar M_L, \\ M_L = -L, -L+1, \dots, L, \quad (7.65)$$

$M_L$  – atomning orbital magnit kvant soni

$$|\vec{S}| = \hbar\sqrt{S(S+1)}, \quad S_z = \hbar M_S, \\ M_S = -S, -S+1, \dots, S, \quad (7.66)$$

$M_S$  – atomning spin magnit kvant soni

$$|\vec{J}| = \hbar\sqrt{J(J+1)}, \quad J_z = \hbar M_J, \\ M_J = -J, -J+1, \dots, J, \quad (7.67)$$

$M_J$  – atomning to‘liq magnit kvant soni.

Atomda elektronlar soni juft bo‘lganda  $S$  va  $J$  kvant sonlari butun son, elektronlar soni toq bo‘lganda esa yarim butun son qiyatlarni qabul qiladi.  $LS$  bog‘lanish elektrostatik kuchlarning nisbatan kuchli ta’siri ostida yuz beradi.

***jj-bog‘lanish.*** Og‘ir atomlarda yadro zaryadi katta bo‘lganligi sababli elektronlarning orbital  $L$  va spin  $S$  momentlari o‘rtasidagi spin-orbital o‘zaro ta’sir elektronlar o‘rtasida elektrostatik o‘zaro ta’sir bilan tenglashadi. Natijada  $LS$  bog‘lanish buzilib, ayrim elektronlarning to‘la harakat miqdori momentlari to‘g‘ridan to‘g‘ri qo‘shiladi. Shu yo‘l bilan atomning to‘liq harakat miqdori momenti hosil bo‘ladi, ya’ni atomning to‘la harakat miqdor momenti alohida elektronlar to‘la harakat miqdor momentlari yig‘indisidan iborat bo‘ladi. Elektron harakat miqdori momentlarining bu xil qo‘shilishiغا, ya’ni elektronlarning bu bog‘lanishiga *jj-bog‘lanish* deyiladi. *jj-bog‘lanishda i-elektronning to‘liq momenti*

$$\vec{j} = \vec{\ell}_i + \vec{S}_i, \quad i = 1, 2, \dots, N, \quad (7.68)$$

$$\vec{J} = \sum_{i=1}^N \vec{j}_i, \quad (7.69)$$

Bu formulalarda:  $J$  – atomning to‘liq harakat miqdor momenti,  $j$  – elektronning to‘liq harakat miqdor momenti,  $\ell_i$  – elektronning orbital momenti,  $S_i$  – elektronning spin momenti. Atomda elekt-

ronlarning bunday bog‘lanishiga  $jj$ -bog‘lanish deyiladi.  $jj$  bog‘lanish LS bog‘lanishga qaraganda kam uchraydi.

Bu bog‘lanishlarga misol tariqasida  $\ell = 0, 1$  holatdagi ikkita elektronning hosil qilgan konfiguratsiyasini ko‘rish mumkin.  $\ell_1 = 0$ ,  $\ell_2 = 1$ ,  $S_1 = S_2 = 1/2$  bo‘lsin (7.8-rasm). Rassel Saunders bog‘lanishlariga binoan:

$$|\vec{L}| = \hbar\sqrt{L(L+1)}, \quad L = \ell_1 + \ell_2, \dots, |\ell_1 - \ell_2|; \quad L = 1,$$

$$|\vec{S}| = \hbar\sqrt{S(S+1)}, \quad S = S_1 + S_2, \dots, |S_1 - S_2|; \quad S = 1, 0,$$

$$|\vec{j}| = \hbar\sqrt{j(j+1)}, \quad j = L + S, \dots, |L - S|; \quad j = 1 \text{ va } j = 2, 1, 0.$$

Ya’ni, to‘rtta sath yuzaga keladi. Bu to‘rtta sath  $j=1$  va  $j=2, 1, 0$  sathlardan iborat ikkita bosh termni tashkil etadi. Ikkinchisi  $j_2$  term uchta bir-biriga juda yaqin sathlardan iborat.  $jj$ -bog‘lanishga binoan,

$$\vec{j}_i = \vec{\ell}_i + \vec{S}_i, \quad (7.70)$$


$$|\vec{j}_1| = \hbar\sqrt{j_1(j_1+1)}, \quad j_1 = \ell_1 + S_1, \dots, |\ell_1 - S_1|; \quad j_1 = \frac{1}{2};$$

$$|\vec{j}_2| = \hbar\sqrt{j_2(j_2+1)}, \quad j_2 = \ell_2 + S_2, \dots, |\ell_2 - S_2|; \quad j_2 = \frac{3}{2} \text{ va } \frac{1}{2}. \quad (7.71)$$

$\vec{j}$  va  $\vec{S}$  o‘rtasidagi kuchli o‘zaro ta’sir natijasida  $j=3/2; 1/2$  holatlari bir-biridan katta farq qiladigan energiyaga ega bo‘ladi.

$\vec{j}_1$  va  $\vec{j}_2$  o‘rtasidagi kuchsiz bog‘lanish natijasida

$$\vec{j}_i = \sum \vec{j}_l, \quad (7.72)$$



$$|\vec{j}| = \hbar \sqrt{j(j+1)},$$

$$j = j_1 + j_2, \dots, |j_1 - j_2|,$$

$$j = 2, 1 \text{ va } 0.$$
(7.73)

Demak, yana to'rtta sath hosil bo'lar ekan. 7.8-rasmida bu ikki xil bog'lanishlar beradigan energiya sathlari keltirilgan.

Shunday qilib, bu ikki xil bog'lanishda sathlar soni teng va  $j$  ning qiymatlari bir xil.

### **Nazorat savollari**

1. Qanday atomlar ko'p elektronli atomlar deyiladi? Misollar keltiring.
2. Murakkab atomlar uchun Shredinger tenglamasida elektronlarning qanday o'zaro ta'sirlari hisobga olinishi kerak?
3. Ishqoriy metallar atomlari tuzilishi qanday?
4. Effektiv yadro va effektiv zaryad hosil bo'lishini tushuntiring.
5. Ishqoriy metallar atomlarida kvant sonlar qanday bo'ladi?
6. Ishqoriy metallar atomlari energetik sathlari energiyasi qayday formula bilan aniqlanadi va bunda bosh kvant soni qaysi kattalikka bog'liq?
7. Ishqoriy metallar atomlari spektrlarida qanday seriyalar kuzatiladi?
8. Pauli prinsipining mohiyatini tushuntiring.
9. Elektron qobiqlarning elektronlar bilan to'ldirilishini tushuntiring.
10.  $^{11}Na$  elementining elektron konfiguratsiyasini yozing.
11. Tanlash qoidalarini aytинг.
12. Atomda elektronlarning qanday bog'lanish turlarini bilasiz?

## VIII BOB RENTGEN NURLARI

### 8.1-§. Rentgen nurlarining hosil qilinishi


Rentgen nurlari 1895-yilda V.Rentgen tomonidan kashf qilingan bo'lib, uning nomi bilan ataladi. Rentgen nurlari elektromagnit to'lqinlar nurlanishi bo'lib, to'lqin uzunligi  $\lambda = (10 \div 0,001) \text{ nm}$  oraliqda bo'ladi. Rentgen nurlari ikki xil bo'lishi aniqlangan: tormozlanish va xarakteristik rentgen nurlari.

Rentgen nurlari 8.1-rasmida tasvirlangan rentgen trubkasida hosil qilinadi.

Eng oddiy rentgen trubkasi ichidan havosi so'rib olinib ( $10^{-5} \div 10^{-7}$ ) mm Hg bosim hosil qilingan shisha ballon bo'lib, uning ichiga katod  $K$  va anod  $A$  elektrodlari joylashtirilgan.  $K$  katod volframdan tayyorlangan spiral bo'lib, bu spiraldan past voltli elektr toki o'tkaziladi, bunda spiral  $\sim 2000^\circ$  gacha qiziydi. Qizigan katoddan termoelektronlar ajralib chiqqa boshlaydi.  $A$  – anod metalldan tayyorlangan massiv sterjenden iborat, sterjen sirtiga galvanik yoki payvandlash usuli bilan xarakteristik rentgen nurlari tekshiriladigan element qatlami hosil qilinadi. Katod va anod orasiga bir necha o'n kilovolt tartibda potensiallar ayirmasi qo'yiladi.

Tormozlanish rentgen nurlarining hosil bo'lish mexanizmi quyidagicha: katod qizdirilgan holda bo'lganda, katod va anod orasidagi potensiallar ayirmasi oshirib boriladi. Bunda hosil qilingan elektr maydon qizigan katoddan ajralib chiqayotgan termoelektronlarni tezlatadi. Yetarlicha katta kinetik energiyaga erishgan elektronlar anod sirtiga urilib, unda tormozlanadi.


Ma'lumki, harakatdagi elektron atrofida elektr va magnit maydonlari mavjud, chunki harakatdagi elektron elektr tokiga ekvivalent. Elektronning tormozlanishi deganda, uning atrofidagi maydonning o'zgarishi tushuniladi. Magnit va elektr maydonining o'zgarishi



8.1-rasm

elektromagnit to'lqinlar nurlanishiga sabab bo'ladi. Bu nurlanish *tormozlanish rentgen nurlanishi* deyiladi.

Xarakteristik rentgen nurlarining hosil bo'lish mexanizmi quydigicha: xarakteristik rentgen nurlanishi murakkab atomlar ichki elektron qobiqlaridagi elektronlar o'tishi natijasida hosil bo'ladi. Anod va katod orasidagi potensiallar ayirmasi bilan tezlatilgan, katta energiyaga ega bo'lgan elektronlar anod materiali atomlari bilan to'qnashadi va atomning ichki ( $K, L, M, \dots$ ) qobiqlarining biridan elektronlarni urib chiqaradi yoki tashqi bo'sh qobiqqa o'tkazadi. Bo'sh qolgan o'rirlarga qo'shni qobiqlardan elektronlar o'tadi. Elektronlarning o'tishi katta energiyadagi nurlanish chiqishi bilan sodir bo'ladi. Bunday nurlanish anodni xarakterlaydi, shuning uchun ham bu nurlanish *xarakteristik rentgen nurlanishi* deyiladi. Masalan, agar  $K$  qobiqdan elektron urib chiqarilgan bo'lsa (8.2a-rasm),  $K$  qobiqda bo'sh qolgan o'ringa undan yuqorida bo'lgan  $L, M, N$  qobiqlarning biridan elektron o'tishi mumkin (8.2 b-rasm). Xuddi shunday elektron  $L$  qobiqdan urib chiqarilgan bo'lsa,  $L$  qobiqdagi bo'sh qolgan o'ringa  $M$  qobiqdan elektron o'tadi (8.2 c-rasm). Bu o'tishlarda katta energiyadagi nurlanish hosil bo'



8.2-rasm

ladi. Shu nurlanish xarakteristik rentgen nurlanishi bo'ladi. Atomning ichki qobiqlari orasida bo'ladigan elektron o'tishlarda katta miqdorda energiya ajraladi.

Rentgen trubkalarida tezlatilgan elektronlar kinetik ener-

giyasining  $\sim 0,01$  qismi rentgen nurlari energiyasiga aylanadi, energiyaning qolgan qismi anodning qizishiga sarflanadi. Quvvati yuqori bo'lgan rentgen trubkalarida anod suv bilan sovitiladi.

## 8.2-\$. Rentgen nurlarining spektrlari

Tormozlash rentgen nurlari tutash spektrni hosil qiladi. Tutash spektrning tuzilishi anod materialiga bog'liq bo'lmaydi. Tutash spektr quydagi xossalarga ega: spektrda rentgen nurlari intensivligining to'lqin uzunligiga bog'liq ravishda taqsimlanishi egri chiziqdan iborat bo'lib, to'lqin uzunligining aniq qiymatlarida egri chiziq maksimumga ega bo'ladi. Intensivlikning bu maksimumidan uzun to'lqinlar va qisqa to'lqinlar tomonga pasayishi turlicha bo'ladi;

uzun to'lqinlar tomonga pasayganda egri chiziq assimptotik ravishda nolga intiladi, qisqa to'lqinlar tomonga pasayganda esa keskin pasayadi va to'lqin uzunligining ma'lum bir qiymatida spektr keskin uzeladi. To'lqin uzunligining bu qiymati tutash spektrning qisqa to'lqinli chegarasi deyiladi va u elektronlarni tezlatuvchi potensialga bog'liq bo'ladi.


8.3-rasmda anod va katod orasidagi potensiallar farqining turli qiymatlari uchun tormozlanish rentgen nurlanishining tutash spektri keltirilgan. Rasmda tormozlanish rentgen nurlanishi intensivligining to'lqin uzunligiga bog'liqligi tasvirlangan. Anod va katod orasidagi potensiallar ayirmasi  $U_1=30$  kV bo'lqanda spektr to'lqin uzunligi ma'lum bir chegaraviyi  $\lambda_{\text{cheq}1}$  qiymatidan boshlanib, uzun to'lqin uzunlik-lar tomonidan davom etadi. Potensiallar ayirmasi yana oshirila borilsa,  $U_2=40$  kV bo'lqanda, spektrning qisqa to'lqinli chegarasi chapga siljiydi,  $\lambda_{\text{cheq}2}$  spektrning intensivligi esa ortadi.  $U_2=50$  kV bo'lqanda ham shunday bo'ladi va h.k.

Tutash spektrning qisqa to'lqinlar sohasida spektrning uzelishini kvant mexanikasi tasavvurlari asosida quyidagicha tushuntirish mumkin: elektronlar tormozlanishida hosil bo'ladigan rentgen nurlarining energiyasi tormozlangan tez elektronlarning energiyasidan katta bo'la olmaydi.

Katod va anod orasiga qo'yilgan potensiallar ayirmasi bilan tezlashtirilgan elektronlar  $eU$  kattalikdagи kinetik energiyaga erishadi. Elektronlar anod sirtiga urilib tormozlanganida kinetik energiyasining bir qismi anodni qizdirishga sarf bo'ladi, qolgan qismi hosil bo'lgan rentgen nurlanishi kvantlari energiyasiga aylanadi. U vaqtida energiya uchun quyidagi munosabat o'rini bo'ladi:

$$hv < eU. \quad (8.1)$$

(8.1) formulada  $hv$  – tormozlanish rentgen nurlanishi kvantlarining energiyasi,  $eU$  – tezlashtirilgan elektronlarning kinetik energiyasi.



8.3-rasm

Elektronlarning anodni qizdirishga sarflanadigan energiyasi har xil bo'lganligi uchun hosil bo'ladigan rentgen kvantlarining energiyasi ham har xil bo'ladi, ya'ni har xil energiyali rentgen kvantlari nurlanadi. Shuning uchun ham tormozlanish rentgen nurlanishi tutash spektrga ega bo'ladi.

Tormozlanish rentgen nurlari tutash spektrida eng qisqa to'lqin uzunligiga to'g'ri keladigan rentgen nurlanishi kvantlari  $h\nu_{\max}$  – maksimum energiyaga ega bo'ladi. Bunday katta energiyali tormozlangan rentgen nurlanishi kvantlari anodga kelib urilayotgan tez elektronlarning kinetik energiyasi to'liq ravishda tormozlangan rentgen nurlari energiyasiga aylanganida hosil bo'ladi. Shuning uchun tutash spektrning chegarasi  $\lambda_{\min}$  ni topish uchun elektronning  $eU$  kinetik energiyasini rentgen kvantining maksimal energiyasi  $h\nu_{\max}$  ga tenglashtirish kerak, ya'ni:

$$eU = h\nu_{\max}. \quad (8.2)$$

(8.2) formulada  $v_{\max} = c/\lambda_{\min}$  ekanligini hisobga olgan holda  $\lambda_{\min}$  uchun quyidagi ifodani yozish mumkin:

$$\lambda_{\min} = hc/eU. \quad (8.3)$$

(8.3) formulada

$$\lambda_{\min} = \lambda_{\text{cheq}},$$

$\lambda_{\text{cheq}}$  – tutash spektrning eng qisqa chegaraviy to'lqin uzunligi deyiladi. (8.3) formuladan ko'rindaniki, tutash rentgen spektrining chegaraviy to'lqin uzunligi faqat potensiallar ayirmasiga bog'liq bo'lib, anod materialiga bog'liq emas.

(8.3) formulada  $U$  – kilovoltlarda va  $\lambda$  – angstremlarda ifodalana-digan bo'lsa, uni quyidagi ko'rinishda yozish mumkin:

$$\lambda = \frac{12,412}{U} \text{ \AA}, \quad (8.4)$$

(8.4) formulada elektronni tezlatuvchi potensial  $U=100$  kV bo'lganda tutash spektrni chegaralagan eng qisqa chegaraviy to'lqin uzunlik  $\lambda_{\text{cheq}}=0,124 \text{ \AA}$  ga teng bo'ladi.

Rentgen spektroskopiyasida to'lqin uzunligi  $XE$  – birliklarda ifodalananadi:

$$1XE = 1,00225 \text{ \AA}. \quad (8.5)$$


(8.5) ifoda keltirilgan birliklarda hisoblangan to'lqin uzunliklar tormozlanish rentgen nurlanishi tutash spektrining qisqa to'lqinli sohasida joylashgan bo'ladi.

Karakteristik rentgen nurlari chiziqli spektrni hosil qiladi. Chiziqli spektrlar anod materialiga, uning atomi xossalariga bog'liq bo'ladi. Shuning uchun har bir element faqat o'ziga xos xarakteristik rentgen nurlari chiqaradi.


Anod va katod orasiga qo'yilgan potensiallar ayirmasining ma'lum qiymatida tezlashtirilgan elektronlarning energiyasi anod materiali atomining ichki qobiqlaridan elektronni urib chiqarishga yetarli bo'lgan holda tormozlanish rentgen nurining tutash spektri fonida xarakteristik rentgen nurlarining qisqa spektral chiziqlari hosil bo'ladi (8.4-rasm).

8.4-rasmda anod va katod orasida qo'yilgan potensiallar ayirmasining 15, 20, 25, 30 kV qiymatlarida bo'lgan tormozlanish nurlanishining tutash spektri fonida xarakteristik rentgen nurlanishining spektral chiziqlari  $K_{\alpha}$ ,  $K_{\beta}$  hosil bo'lgan.

Rentgen spektrlarida spektral chiziqlar rentgen sathlari orasida bo'ladigan elektron o'tishlari natijasida hosil bo'ladi. Elektron o'tishlar  $\Delta L = \pm 1$ ,  $\Delta j = 0, \pm 1$  tanlash qoidalari bajarilishi asosida hosil bo'ladi. Xarakteristik rentgen nurlarining spektral chiziqlari ma'lum qonuniyat bilan ketma-ket joylashadi. Spektral chiziqlar seriyalarga birlashtiriladi. Seriyalar  $K$ ,  $L$ ,  $M$ ,  $N$  harflari bilan belgilanadi. Agar spektral chiziqlar elektronlarning  $K$ -qobiqqa o'tishida hosil bo'lgan bo'lsa, spektral chiziqlar  $K$ -seriyaga tegishli bo'ladi,  $L$ -seriya chiziqlari elektronlarning  $L$ -qobiqqa o'tishidan hosil bo'lgan chiziqlardan iborat bo'ladi. Boshqa seriyadagi spektral chiziqlar ham shunday hosil bo'ladi.  $K$ -seriya spektrning eng qisqa to'lqinli sohasida,  $L$ -seriya uzun to'lqinlar sohasida,  $M$  va  $N$  seriyalar ko'zga ko'rinadigan sohada joylashgan bo'ladi. Xarakteristik rentgen spektrida  $K$ ,  $L$ ,  $M$ ,  $N$  seriyalarining hosil bo'lishi sxematik ravishda 8.5-rasmda keltirilgan seriyadagi har bir chiziq o'z belgisiga ega. Har bir chiziq qaysi seriyaga tegishli bo'lsa, shu seriya nomi bilan aytildi. Elektron qaysi qobiqdan o'tgan bo'lsa, shu qobiq indeksi bilan



8.4-rasm




8.5-rasm

indekslar bilan  $K_\alpha$ ,  $K_\beta$ ,  $K_\gamma$  yoki  $L_\alpha$ ,  $L_\beta$ ,  $L_\gamma$  va h.k. ko'rinishida yoziladi (8.5-rasm).  $K_\alpha$  elektronning yaqin qobiqdan  $K$  qobiqqa o'tishida chiqarilgan xarakteristik rentgen nuri energiyasi hosil bo'lgan spektral chiziqdirdi.  $\alpha$ ,  $\beta$ ,  $\gamma$ ,  $\delta$  – harflariga qo'yiladigan son indekslari uzun to'lqinlar spektral chiziqlardan boshlab seriyadagi chiziqlarning tartib raqamini ko'rsatadi.  $K$  – seriya o'z tuzilishiga ko'ra, eng oddiy spektr hisoblanadi. Bu seriya uchta spektral chiziqdan iborat bo'lib, ular shartli ravishda  $K_\alpha$ ,  $K_\beta$ ,  $K_\gamma$ lar bilan belgilanadi.  $K_\alpha$  – chizig'i uzun to'lqinli bo'lib, kattaroq intensivlikka ega.  $K_\alpha$  – chizig'i  $\alpha_1$  va  $\alpha_2$  komponentlardan, ya'ni  $K_{\alpha_1}$  va  $K_{\alpha_2}$  – chiziqlaridan iborat bo'lgan dublet tuzilishiga ega.  $K_\beta$  – chizig'i to'lqin uzunligi va intensivligi jihatidan  $K_\alpha$  dan keyin turadigan chiziqdirdi.  $K_\beta$  – chizig'i ham dublet tuzilishiga ega bo'lib,  $K_{\beta_1}$  va  $K_{\beta_2}$  ko'rinishida belgilanadi.  $K_{\alpha_1}$  va  $K_{\alpha_2}$  hamda  $K_{\beta_1}$  va  $K_{\beta_2}$  chiziqlari bir-biridan energiya bo'yicha juda oz farq qiladi. Bu chiziqlar rentgen spektrlarining «nozik strukturasi»ni hosil qiladi.  $K_\gamma$  – chizig'i qisqa to'lqinli chiziq hisoblanadi.  $L$ -seriya  $K$ -seriyaga qaraganda murakkab tuzilishga ega bo'ladi.

8.6a-rasmda ba'zi elementlarning  $K$ -seriya spektrlari keltirilgan. 8.6b-rasmda esa volframning  $L$ -seriya spektral chiziqlari tasvirlangan. Rasmlardan  $L$ -seriya  $K$ -seriyaga qaraganda murakkab tuzilganligini ko'rish mumkin.  $K$ -qobiqdagi elektron atom bilan kuchli bog'langan,  $L$ -elektron kuchsizroq,  $M$ -qobiqdagi elektron undan ham kuchsizroq bog'langan. Shuning uchun elektronlarning  $L \rightarrow K$  o'tishida hosil bo'ladigan xarakteristik rentgen nurlanishi kvantlarining energiyasi  $L$  va  $K$  qobiqlaridagi elektronlarning bog'lanish energiyalari farqiga teng bo'ladi. Rentgen spektrlari atomning ichki qobiqlaridagi elekt-

ko'rsatiladi. Masalan,  $K_\alpha$  yozuv elektron  $K$  qobiqqa o'tganligini bildiradi.  $\alpha$  – indeksi elektron o'tishlar yaqin qobiqdan bo'lganligini,  $\beta$  – indeksi o'tishlar yaqin qobiqdan keyingi qobiqdan bo'lganligini ko'rsatadi va h.k. Qobiqlar  $\alpha, \beta, \gamma$  –

Atomlarning harakati tufayli hosil bo'ldi. Atomning ichki qobiqlari bir xil tuzilishga ega bo'lganligi uchun rentgen nurlari spektrida davriylik kuzatilmaydi. Spektral chiziqlar chastotalarining element tartib raqami  $Z$  ning ortishi bilan qisqa to'lqinlar tomonaga monoton siljishi kuza-tildi. Rentgen nurlari spektrida chiziqlar soni juda kam bo'lib, chiziqlar bir xil tuzilishga ega bo'ladi. Umuman rentgen nurlari spektrlari oddiy va bir xil tuzilishga ega. Rentgen spektrlari atomga tegishli xossalalar mayjud bo'ladi. Shuning uchun ham rentgen nurlarining chiziqli spektrlari atomlarning murakkab elektron qobiqlari tuzilishini aniqlashga imkon beradi.



8.6-rasm

### 8.3-§. Mozli qonuni

Zaryadi  $+Ze$  bo'lgan yadroning Kulon maydonidagi energiyasi:

$$E_n = AZ^2 \frac{1}{n^2}.$$

Atomning biror qobig'idagi elektronning energiyasini quyidagi-cha ifodalash mumkin:

$$E_n = A(Z - \sigma_{nl})^2 \frac{1}{n^2}. \quad (8.6)$$

Bu formula vodorodsimon atomlar energetik sathlari energiyasini hisoblash formulasi kabi bo'lib, bunda  $\sigma_{nl}$  — tuzatma kiritilgan.  $\sigma_{nl}$  — ekranlash doimiyligi deyiladi.  $\sigma_{nl}$  — yadro maydonini ichki elektronlar va boshqa elektronlar bilan ekranlashini hisobga oladi ( $\sigma_{nl} \ll Z$ ). Atomlarning ichki elektron qobiqlarining tuzilishi bir xil bo'lganligi uchun berilgan qobiq uchun (berilgan  $n$  uchun)  $\sigma_{nl}$  bir xil bo'ladi.  $K$ -qobiqdagi elektronlarga asosan ikkinchi elektron

ekranlovchi ta'sir ko'rsatadi, bunday holda ekranlash doimiyligi  $\sigma=1$  bo'ladi.  $L$ -qobiqdagi elektronlar uchun esa  $\sigma=8$ .  $\sigma_{nl}$  ning aniq qiymatlari tajribalarda aniqlanadi va fizikaviy doimiyliklar jadvallarida keltiriladi. (8.6) formula vodorodsimon atom energiyasini topish

formulasidan ( $E_n = -\frac{mZ^2 e^4}{2h^2} \cdot \frac{1}{n^2}$ ) ishorasi bilan farq qiladi. (8.6) formulada ishora musbat, chunki elektroni yo'qotilgan atom energiyasi musbat bo'ladi.

Rentgen nurlari kvantlarining energiyasi energiyaning saqlanish qonuniga asosan atomning boshlang'ich va oxirgi holatlari energiyalari farqiga teng:

$$h\nu = E_{n_1} - E_{n_2} = A(Z - \sigma_1)^2 \frac{1}{n_1^2} - A(Z - \sigma_2)^2 \frac{1}{n_2^2}, \quad (8.7)$$

(8.7) formulada  $E_{n_1}$  — atomning boshlang'ich holati energiyasi,  $E_{n_2}$  — atomning oxirgi holati energiyasi,  $A$  — sath energiyasi,

$$A = \frac{me^4}{2h^2} = 13,6 \text{ eV}, \quad n \text{ — bosh kvant soni}, \quad \sigma \text{ — ekranlash doimiyligi}.$$

Ekranlash doimiyligi  $\sigma$  ni energetik sathlar uchun emas, spektral chiziqlar uchun hisobga olish mumkin. U vaqtida (8.7) formulani quyidagi ko'rinishda yozish mumkin:

$$h\nu = A(Z - \sigma)^2 \left( \frac{1}{n_1^2} - \frac{1}{n_2^2} \right). \quad (8.8)$$

Turli atomlar spektlaridagi bir xil spektral chiziqlar uchun  $\sigma$  ning qiymati deyarli doimiy bo'ladi. Masalan,  $20 < Z < 30$  bo'lgan barcha atomlarning  $K_\alpha$  chizig'i uchun  $\sigma = 1,13$ .

(8.8) formuladan ko'rindiki, rentgen spektral chiziqlarining chastotasi (rentgen nurlari chastotasi) elementdan elementga o'tishda amalda  $Z^2$  ga proporsional ravishda ortadi. Bu qonuniyat 1913-yilda Mozli tomonidan tajriba orqali kashf etildi. Mozli turli elementlar xarakteristik rentgen spektral chiziqlarining chastotasini o'rganib, rentgen nurlari chastotasidan chiqarilgan kvadrat ildiz elementining tartib raqami  $Z$  ga chiziqli bog'lanishda ekanligini aniqladi, ya'ni

$$\sqrt{v} = a(Z - \sigma_n), \quad (8.9)$$

(8.9) formulada  $v$  – xarakteristik rentgen nurlari chastotasi,  $\sigma_n$  – ekranlash doimiyligi,  $Z$  – antikatod (anod) yasalgan elementning tartib raqami,  $a$  – ayni seriya spektral chiziqlari uchun doimiy miqdor bo‘lib, quyidagicha aniqlanadi:

$$a = \sqrt{Rc \left( \frac{1}{n^2} - \frac{1}{m^2} \right)},$$

bunda  $R$  – Ridberg doimiyligi,  $c$  – yorug‘likning vakuumdagi tezligi,  $m$  va  $n$  lar elektron orbitalarining tartib raqami.

(8.9) formula Mozli qonunini ifodalaydi. Mozli qonuni Mendeleyevning elementlar davriy sistemasida elementlar tartib raqamini to‘g‘ri aniqlashda muhim o‘rin tutadi.

Elementlar davriy sistemasining turli qismlarida hali kashf etilmagan elementlarga tegishli ochiq qolgan joylar mavjud edi.  $Z=58$  dan  $Z=71$  gacha bo‘lgan oraliqdagi elementlarning to‘g‘ri joylashtirilgанилиги ishonchsiz edi. Chunki bu elementlarning kimyoviy xossalari bir-biridan juda kam farq qiladi. Ularning atom og‘irliklari ishonchli aniq emas edi, shuning uchun ularni tartib bo‘yicha joylashtirilganiga ishonish qiyin bo‘lgan. Mozli bu qiyinchiliklarni bartaraf qildi. Mozli vodorod (H) bilan uran (U) orasida tartib raqamlari har xil bo‘lgan 92 xil atom mavjud bo‘lishini ko‘rsatib, hali kashf etilmagan elementlarning sonini aniq aytib berdi. Mozli birinchi bo‘lib elementlarning fizika-kimyoviy xossalari atom og‘irligi emas, balki elementning tartib raqami (yadro zaryadi) belgilashini ko‘rsatdi. Bu xulosa izotoplarning kashf etilishi bilan yanada tasdiqlanadi.


#### 8.4-§. Rentgen nurlarining difraksiyasи

1912-yilda M.Laue tomonidan rentgen nurlari difraksiyasini o‘rganish bo‘yicha o‘tkazilgan tajribalar natijasida rentgen nurlari elektromagnit to‘lqinlardan iborat ekanligi aniqlandi. Bu tajribalar rentgen nurlarining nafaqat to‘lqin tabiatiga ega ekanligini ko‘rsatdi, balki ularning to‘lqin uzunliklarini o‘lchashga ham imkon berdi.

**Bregg – Vulf formulasи.** Kristall fazoviy panjara tugunlarida ma’lum qonuniyat va tartib bilan joylashgan atom va molekulalar

to'plamidan iborat bo'ladi. To'lqinlar tabiat Gyugens-Frenel prinsini orqali tahlil qilinadi. Bu prinsipga asosan to'lqin frontining har bir nuqtasi ikkilamchi to'lqinlar manbai hisoblanadi. Ikkilamchi manbalardan chiqqan to'lqinlar fazaviy munosabatlar hisobga olinganda interferensiya hodisasini hosil qiladilar. To'lqinlarning tekis sirdan qaytishi shunga olib keladiki, sirtning har bir nuqtasi ikkilamchi to'lqinlar manbayi bo'lib qoladi. Bu manbalardan chiqqan to'lqinlar o'zaro interferensiyalashib, ma'lum qaytish burchagi ostida qaytgan to'lqinlarni hosil qiladi, qaytish burchagi tushish burchagiga teng bo'ladi.

Kristallga to'lqinlar tushganida kristall panjara tugunlari ikkilamchi to'lqinlar manbayi bo'ladi. Agar tugunlar bir tekislikda joylashgan bo'lsa, u vaqtida tekislikdan to'lqinlarning tushish burchagiga teng bo'lgan qaytish burchagi ostida qaytishi sodir bo'ladi. Qaytgan to'lqinlarning intensivligi kristall panjaraning tugunlari tekislikda qanchalik zich joylashishiga bog'liq: tekislikda tugunlar joylashishi zichligi kamaysa, qaytgan to'lqinlar intensivligi ham kamayadi. Fazoviy kristall panjara tugunlari orqali ko'p sondagi tekisliklir o'tkazish mumkin. Bu tekisliklarning har biri to'lqinlarni shunday yo'nalishda qaytaradiki, qaytish burchagi tushish burchagiga teng bo'ladi. Lekin bu shart to'lqin uzunligiga bog'liq bo'lmaydi, to'lqin uzunligi har xil bo'lgan to'lqinlar bir xilda qaytadi. Har xil tekisliklardan qaytgan to'lqinlar o'zaro kogerentdirlar, chunki ular asli bir xil to'lqindan kelib chiqqan ikkilamchi to'lqinlardir. Ikkilamchi to'lqinlar fazalari farqi  $2\pi$  ga karrali bo'lsa, bu to'lqinlar bir-birini kuchaytiradi va qaytish burchagi ostida haqiqatdan ham qaytgan to'lqinlar tarqaladi. To'lqinlarning parallel tekisliklar sistemasiidan qaytish sharti Bregg – Vulf sharti deyiladi. Bu shartni quyidagicha chiqarish mumkin. 8.7-rasmida qo'shni parallel tekisliklardan qaytgan 1 va 2 to'lqinlar tasvirlangan. Bu to'lqinlar yo'llari orasidagi farq quyidagicha aniqlanadi:



8.7-rasm

$$\Delta = |AB| + |BC| - |AD|. \quad (8.10)$$

### 8.7-rasmdan

$$|AB| + |BC| = 2d / \cos\theta,$$

$$|BC| = 2dtg\theta \sin\theta,$$

ekanligi hisobga olinsa quyidagi ifoda hosil bo‘ladi:

$$\Delta = \frac{2d}{\cos\theta} + \frac{2d \sin^2 \theta}{\cos\theta} = 2s \cos\theta. \quad (8.11)$$

Qo‘shni tekisliklardan qaytgan to‘lqinlar fazalari farqi quyidagi kattalikka teng bo‘ladi:

$$\delta = k\Delta = (2\pi / \lambda)\Delta.$$

Bu qaytgan to‘lqinlarning interferensiyasi:

$$\delta = 2\pi m, \quad (m = 1, 2, 3, \dots)$$

shart bajarilganda sodir bo‘ladi. Demak, to‘lqinlarning parallel tekisliklardan qaytish shartini (8.11) formulaga asosan quyidagi ko‘rinishda yozish mumkin:

$$2d \cos\theta = m\lambda. \quad (8.12)$$

(8.12) formulada  $d$  – parallel tekisliklar orasidagi masofa,  $\lambda$  – to‘lqin uzunlik. Bu formulani tushish burchagi  $\theta$  bilan emas, balki siljish burchagi  $\alpha=\pi/2-\theta$  orqali ifodalash ham mumkin, ya’ni


$$2d \sin\alpha = m\lambda. \quad (8.13)$$

(8.12) va (8.13) formulalar Bregg – Vulf shartini ifodalaydi. Agar parallel tekisliklar sistemasiga monoxromatik to‘lqinlar kelib tushsa, uning (8.12) shartni qanoatlantiradigan qismi qaytadi. Agar tushgan to‘lqinning (8.12) shartni qanoatlantiradigan qism bo‘lmasa, qaytish sodir bo‘lmaydi. Parallel tekisliklar sistemasida (8.12) shartni qanoatlantirgan monoxromatik to‘lqinlar qaytishi mumkin.

Shunday qilib, parallel tekisliklar sistemasidan qaytgan to‘lqinlar interferensiyasi maksimumlarini kuzatish kristall tuzilishi ma’lum bo‘lsa, to‘lqin uzunligi haqida, agar to‘lqin uzunligi ma’lum bo‘lsa, kristall tuzilishi haqida ma’lumot olishga imkon beradi. (8.12)dagi Bregg – Vulf formulasida to‘lqinlarning kristallga kirishi va chiqishi-dagi sinishi hisobga olinmagan. Lekin rentgen nurlari to‘lqinlari uchun sindirish koeffitsienti birdan juda kam farq qiladi.

**Kristallarda to‘lqinlar difraksiyasini kuzatish usullari.** Kristallarda to‘lqinlar difraksiyasini kuzatishning uch xil usuli ma’lum:

**1. Laue usuli.** Monokristall rentgen nurlari bilan nurlantiriladi. Monokristall tugunlaridan o'tgan parallel sirtlar sistemasidagi har bir sirt tegishli yo'nalishlarda ma'lum bir uzunlikdagi to'lqinlarni qaytaradi. Qaytgan nurlar intensivligi qaytaruvchi tekislikdagi atomlar joylashishi zinch bo'lganda sezilarli darajada bo'ladi. Agar turli tekisliklar sistemasidan qaytgan nurlar yo'liga fotoplastinka qo'yilsa, fotoplastinkada dog'lar sistemasi hosil bo'ladi. Bu dog'lar sistemasiga *lauegramma* deyiladi (8.8-rasm). Tajriba geometriyasini bilgan holda lauegrammadan, kristall tuzilishi hamda to'lqin uzunligi orasidagi bog'lanishni aniqlash mumkin.




8.8-rasm



8.9-rasm

**2. Bregg usuli.** Kristall monoxromatik rentgen nurlari bilan nurlantiriladi. Nurlarning parallel tekisliklar sistemasidan qaytishi monokristall aylantirib turilgan holda tekshiriladi. (8.13) formulaga asosan siljish burchagining ma'lum qiymatlarida qaytish sodir bo'ladi. Siljish burchagini o'chab,  $\lambda$  ni bilgan holda (8.13) formuladan qaytaruvchi parallel tekisliklar sistemasi uchun  $d$  ni hisoblash mumkin. Tajribalarda amalda kristallni aylantirish o'mriga kristallga tushayotgan rentgen nurlari yo'nalishini o'zgartirish qulay bo'ladi. Bunda kristall qo'zg'almas bo'ladi (8.9-rasm).

**3. Debay – Sherer usuli.** Katta o'chamdagagi monokristallarni hosil qilish qiyinchilik tug'diradi. Mayda monokristalдан iborat bo'lgan monokristall poroshogini hosil qilish oddiyroq va yengilroq. Bundan tashqari, ko'p vaqtarda polikristallarni tekshirish talab qilinadi. Bunday vaqtarda Debay – Sherer usuli ishlataladi. Agar polikristall kukuni (poroshogi) monoxromatik rentgen nurlari bilan nurlantirilsa, poroshokni tashkil qilgan monokristallar orasida tushayotgan nurlar dastasiga nisbatan oriyentasiyalari (8.13) formuladagi Vulf – Bregg shartini qanoatlantiradigan monokristallar bo'ladi. Agar kristallga tushayotgan rentgen nurlari



8.10-rasm

yo‘nalishiga fotoplastinka qo‘yilsa, qaytgan nurlar fotoplastinkada halqa shaklidagi izlar qoldiradi (8.10-rasm). Turli sirtlar sistemasiidan qaytishlar bir vaqtda sodir bo‘ladi va fotoplastinkada halqalar sistemasi paydo bo‘ladi. Tajriba geometriyasini, tushayotgan rentgen nurlari to‘lqin uzunligini va fotoplastinkada halqalar joylashishini bilgan holda monokristallning tuzilishi yoki monokristall tuzilishi ma’lum bo‘lganda, rentgen nurlari to‘lqin uzunligi to‘g‘risida ma’lumot olish mumkin. Yuqorida qaralgan bu uch usul rentgen nurlari difraksiyasini o‘rganishda muvaffaqiyatli qo‘llanildi. Rentgen nurlari difraksiyasi rentgen nurlarining elektronnichka to‘lqin tabiatiga ega ekanligini tajribada tasdiqlashga, rentgen nurlari to‘lqin uzunligini aniqlashga imkon berdi. Kristall atomlari orasidagi masofa  $d$  ni difraksiyaga bog‘liq bo‘lmagan ravishda solishtirma massa va atom massasini bilgan holda ham aniqlash mumkin. Bu esa rentgen nurlari to‘lqin uzunligi atom o‘lchamiga yaqin tartibda ekanligini ko‘rsatdi. Shuning uchun rentgen nurlari interferensiyasini kuzatish tajribalarini qo‘yish ma’lum qiyinchiliklar tug‘diradi.

Shunday bo‘lsada, keyinroq bunday tajribalar qo‘yilgan. Difraksiyon hodisalar asosida rentgen nurlari to‘lqin uzunligini yuqori aniqlikda o‘lchashga imkon beradigan qurilmalar yasaldi. Modda tuzilishini aniqlashning rentgenostruktura tahlili usuli ishlab chiqildi.

**Rentgen nurlari sinishini hisobga olish.** Rentgen nurlarining sinishi, ularning turli muhitda va vakuumda turli xil tezliklar bilan tarqalishidan kelib chiqadi. To‘lqinlarning fazaviy tezliklari farqi (8.11) Bregg – Vulf shartining o‘zgarishiga olib keladi. Bu vaqtda tushish burchagi ( $\theta_{tush}$ ), sinish burchagi ( $\theta_{sin}$ )ga teng bo‘lmaydi, shuning uchun to‘lqinlar yo‘llari farqi (8.10) formulaga muhitning sindirish ko‘rsatkichi  $n$  ni kiritish kerak bo‘ladi. Ya’ni

$$\Delta = n(|AB| + |BC| - |AD|) \dots \quad (8.14)$$

(8.14) formula  $n > 1$  va  $n < 1$  bo‘lgan hollar uchun ham to‘g‘ri bo‘ladi. Rentgen nurlari uchun  $n < 1$ .

$$|AB| + |BC| = 2d / \cos \theta_{sin}$$

va

$$|AD| = 2dtg\theta_{sin} \cdot \sin \theta_{tush}$$

ekanligini va sinish qonunini  $n = \frac{\sin \theta_{\text{sin}}}{\sin \theta_{\text{tush}}}$  hisobga olgan holda (8.11) formulani quyidagi ko'rinishda yozish mumkin:

$$\Delta = \frac{2dn}{\cos \theta_{\text{sin}}} + \frac{2dn \sin^2 \theta_{\text{sin}}}{\cos \theta_{\text{sin}}} = 2nd \cos \theta_{\text{sin}}.$$

Demak, yo'llar farqi:

$$\Delta = 2nd \cos \theta_{\text{sin}}.$$

U vaqtida rentgen nurlarining (8.12) formulada keltirilgan qaytish sharti

$$2nd \cos \theta_{\text{sin}} = m\lambda \quad (8.15)$$

ko'rinishda ifodalanadi. Bunda  $\lambda$  – vakuumdagи to'lqin uzunlik,  $\theta_{\text{sin}}$  – sinish burchagi.

### 8.5-§. Rentgen nurlarining moddada yutilishi

Rentgen nurlarining o'ziga xos xususiyatlaridan biri uning moddalarda yutilishidir. Rentgen nurlarini moddalarda yutilishi moddaning optik xususiyatlariiga bog'liq emas. Masalan, yorug'lik uchun rangsiz va shaffof bo'lga qo'rg'oshinli (Pb) shisha rentgen nurlarini butunlay yutadi. Shuning uchun ham qo'rg'oshinli shisha rentgen qurimalari bilan ishlovchi mutaxassislarni himoyalashda qo'rg'oshinli shishalar ishlatiladi. Aksincha, yorug'lik uchun shaffof bo'lman yepqa alyuminiy (Al) varag'i rentgen nurlarini juda kam yutadi.

Rentgen nurlarining tibbiyotda va texnikada yoritib ko'rishda ishlatilishi rentgen nurlarining quyidagi yutilish qonunlariga asoslanadi: agar rentgen nurlarining parallel dastasi modda qatlamidan o'tsa, u holda dasta kuchsizlanadi, ya'ni intensivligi kamayadi. Bu kuchsizlanishga ikki jarayon sabab bo'ladi: sochilish hamda yutilish. Bu jarayonlar bir-biridan tubdan farq qiladi.

Sochilish natijasida nurlar dastasining kuchsizlanishiga nurlarining bir qismi chetga og'ishi (8.11-rasm) va shuning uchun parallel dastadan chiqib ketishi sabab bo'ladi. Bu hodisa yorug'likning xira muhitdan o'tishidagi sochilishiga o'xshaydi. Bunda farq shundaki,

muhitning yorug'likka shaffof bo'lmasligi unda sindirish ko'r-satkichi muhitning sindirish ko'r-satkichidan farq qiladigan ancha yirik zarralarning muallaq holda bo'lishidadir. Rentgen nurlarining to'lqin uzunliklari juda qisqa bo'l-ganligi tufayli yorug'likka shaffof bo'lgan har qanday muhit rentgen

nurlari uchun noshaffof hisoblanadi. Bu holda sochuvchi markazlar modda atomi yoki molekulasing o'zi bo'ladi. Bunga o'xshagan molekulyar sochilish yorug'likda ham kuzatiladi. Rentgen nurlari dastasi qalinligi 5 sm bo'lgan suv qatlami-da faqat sochilish hisobiga  $\approx 2,7$  marta kuchsizlanadi.

Yutilish yoki absorbsiya natijasida kuchsizlanish sababi shundaki, rentgen nurlari energiyasining bir qismi moddada haqiqatdan ham yutiladi, issiqlikka aylanadi.

Agar rentgen nurlarining parallel dastasi monoxromatik bo'lsa, ya'ni ayni bir xil to'lqin uzunlikdagi nurlardan iborat bo'lsa, u holda moddaning qalinligi  $d$  bo'lgan cheksiz yupqa qatlamida dastaning kuchsizlanishi quyidagi qonun asosida bo'ladi:

$$-dI = \mu Idx$$


bu ifodada  $I$  — qatlamga tushayotgan rentgen nurlari dastasining intensivligi,  $\mu$  — kuchsizlanish koeffitsienti. Bu tenglamani integrallab rentgen nurlarining moddaning chekli  $d$  qalinlikdagi qatlamida kuchsizlanish qonunini hosil qilish mumkin:

$$I = I_0 e^{-\mu d} \quad (8.16)$$

(8.16) ifodada  $I_0$  — rentgen nurlar parallel dastasining modda qalinligi  $d=0$  bo'lqandagi intensivligi. Yutilish koeffitsienti  $\mu$  ning o'chamligi ( $\text{sm}^{-1}$ ).

Dastaning yutilish va sochilish hisobiga kuchsizlanishida kuchsizlanish koeffitsienti ( $\mu$ ) ikkita koeffitsientlarning: yutilish koef-fisiyenti ( $\tau$ ) va sochilish koeffitsienti ( $\sigma$ )ning yig'indisidan iborat bo'ladi:

$$\mu = \tau + \sigma, \quad (8.17)$$



8.11-rasm

$\tau$  va  $\sigma$  koeffitsientlar va  $\mu$  moddaning massasiga proporsional bo‘ladi. Shuning uchun ham *massali koeffitsientlar* deb ataluvchi koeffitsientlardan, ya’ni  $\mu/\rho$ ,  $\tau/\rho$  va  $\sigma/\rho$  nisbatlardan foydalanish qulay bo‘lib,  $\rho$  – moddaning zichligini bildiradi. Shunga asoslanib (8.17) ifodani quyidagicha yozish mumkin:

$$I = I_0 \cdot e^{\frac{\mu}{\rho} \cdot pd}, \quad (8.18)$$

$\rho d$  ko‘paytma kesimi  $1 \text{ sm}^2$  va qalinligi  $d$  bo‘lgan modda ustunining massasi,  $\mu/\rho$  ning o‘lchamligi [ $\text{g}^{-1} \cdot \text{sm}^2$ ]. Agar  $\rho d=1$  bo‘lsa, u holda  $I=I_0 e^{-\mu/\rho}$  bo‘ladi. Bundan  $\mu/\rho$  nisbat rentgen nurlarining har bir kvadrat santimetrda  $1 \text{ g}$  moddaga ega bo‘lgan qatlamda kuchsizlanishini ifodalashi ko‘rinadi.

Odatda, nazariy hisoblashlarda atom koeffitsientlari deb ataluvchi  $\mu_a$ ,  $\tau_a$ ,  $\sigma_a$  koeffitsientlardan foydalaniladi. Bu koeffitsientlar ma’lum bir element uchun  $\mu/\rho$ ,  $\tau/\rho$  va  $\sigma/\rho$  qiymatlarini atomning absolyut massasiga, ya’ni mazkur elementning gramm-atomni  $A$  ning Avogadro doimiysi  $N$  ga nisbatiga ko‘paytirib topiladi.

$$\mu_a = \frac{\mu}{\rho} \cdot \frac{A}{N}; \quad \tau_a = \frac{\tau}{\rho} \cdot \frac{A}{N}; \quad \sigma_a = \frac{\sigma}{\rho} \cdot \frac{A}{N}. \quad (8.19)$$

Demak,  $\mu_a$  kattalik bir  $\text{sm}^2$  yuzada bir atomi bo‘lgan qatlamdagi kuchsizlanishni ifodalaydi. Bu koeffitsientlarni atomning mos ravishda rentgen nurlarini kuchsizlantirish, yutish yoki sochishdagi effektiv kesimida hisoblasa bo‘ladi.

$\tau_a$  uchun empirik yo‘l bilan aniqlangan va amalda ancha to‘g‘ri bo‘lgan quyidagi munosabatni keltirish mumkin:

$$\tau_a = c Z^4 \lambda^3, \quad (8.20)$$

bu yerda:  $c$  – doimiy kattalik,  $Z$  – moddaning atom tartib raqami va  $\lambda$  – to‘lqin uzunlik. (8.20) ifodadan foydalanib, yutilishning massali koeffitsientini aniqlash mumkin:

$$\frac{\tau}{\rho} = \frac{\tau_a N}{A} = \frac{c N}{A} Z^4 \lambda^3, \quad (8.21)$$

yoki

$$\frac{\tau}{\rho} = \frac{c}{A} Z^4 \lambda^3, \quad (c' = c \cdot N). \quad (8.22)$$

va (8.22) formulalardan aytish mumkinki, muayyan bir to'lqin uzunlikdagzi nurlarning yutilishi atom tartib raqamining ( $\lambda$ ) ortishi bilan juda tez ortar ekan.


Rentgen nurlari yutilishining ikkinchi xususiyati yutilishning atomga xosligidir. Shuning uchun yutilishning molekulyar koefitsiyenti mazkur molekula tarkibiga kiruvchi elementlarning atom koefitsientlarini additiv qo'shish bilan topiladi. Shu tufayli har xil kimyoviy birikmalarning molekulyar koefitsientlarini hisoblash uchun elementlar yutishining atom koefitsientlarini bilish yetarlidir.

(8.21) va (8.22) formulalar va rentgen nurlari yutilishining additivligi bu nurlardan yoritib ko'rishda foydalanishda asos qilib olingan. Masalan, inson suyagi va to'qimalarining yutish koefitsientlarini taqqoslab ko'raylik. Suyakning moddasi kalsiy fosfat  $\text{Ca}_3(\text{PO}_4)_2$ ; to'qimaning yutishi, asosan uning tarkibidagi suvga ( $\text{H}_2\text{O}$ ) bog'liqidir. Ca, P, O va H larning tartib raqamlari mos ravishda 20; 15; 8 va 1 ga teng ekanligini hisobga olib, ikkala modda yutishining atom koefitsientlari nisbati:

$$\frac{3 \cdot 20^4 + 2 \cdot 15^4 + 8 \cdot 8^4}{2 + 8^4} \approx 3 \cdot \left(\frac{5}{2}\right)^4 + 2 \cdot \left(\frac{15}{2}\right)^4 + 8,$$

ya'ni  $\text{Ca}_3(\text{PO}_4)_2$  ning yutish koefitsienti suvning (to'qimaning) yutish atom koefitsientlaridan  $\sim 150$  marta katta ekanligini aniqlash mumkin. Ammo amaliy maqsadlarda massa koefitsientlarining nisbatini bilish muhimroq. Agar bizni qiziqtiradigan holda (8.21) formulani qo'llasak, nisbat  $\sim 68$  ga teng bo'lib chiqadi. Bu esa rentgenogrammalarda nima uchun suyakning soyasi aniq ajralib turishini tushuntirib beradi.

(8.20) va (8.21) formulalar to'lqin uzunlik ortganda, rentgen nurlarining yutilishi tez ortishini ko'rsatadi. To'lqin uzunlik qancha katta bo'lsa, rentgen nurlarining o'tuvchanlik qobiliyati shuncha kam bo'ladi. Agar to'lqin uzunliklari bilan  $\sqrt[3]{\tau/\rho}$  qiymatlari orasidagi bog'lanish chizilsa, u holda (8.20) va (8.21) formulalarga asosan mazkur element uchun yutilishning  $\lambda$  ga bog'lanish grafigi to'g'ri chiziq bilan tasvirlanadi (8.12-rasm). Ammo muayyan bir to'lqin uzunlikda yutilishda birdan sakrash yuz beradi, keyin yana chiziqli qonun bo'yicha o'zgaradi.



8.12-rasm

8.12-rasmda mis (Cu) uchun bunday sakrash  $\lambda=1,3785\text{\AA}$  da, kumushda (Ag) esa  $\lambda=0,485\text{\AA}$  da yuz berishi ko‘rinib turibdi. To‘lqin uzunliklarining bunday kritik qiymatlarining ma’nosи quyida-gilardan iborat: agar biror element to‘lqin uzunligi qisqarib boruvchi monoxromatik rentgen nurlari bilan yoritilsa, rentgen nurlarining qat’iy aniq bir to‘lqin uzunligidan boshlab element o‘zidan *fluores-sensiya nurlanishi* ko‘rinishida xususiy nurlanish chiqaradi. Yutilishda sakrash yuz beradigan kritik to‘lqin uzunliklar mazkur to‘lqin uzunlikdagi fluoressensiya xarakteristik nurlanishining kritik to‘lqin uzunliklari bilan mos keladi. Yutilishda sakrash yuz berishi (8.20) va (8.21) formulalarda shu bilan hisobga olinadiki,  $c$  koefitsient kritik to‘lqin uzunlikning ikki tomonida har xil qiymatlarga ega bo‘ladi.

### 8.6-§. Rentgen nurlarining moddada sochilishi

Rentgen nurlarining moddada sochilishida spektrning optik qismidagi yorug‘likning sochilish qonunlaridan farqi borligi ko‘rina-di. Ma’lumki, spektrning to‘lqin uzunligi  $10-5$  sm tartibida, ya’ni atom o‘lchamlaridan ( $10-8$  sm) ancha katta bo‘lgan optik qismida sochilish to‘lqin uzunligining to‘rtinchи darajasiga teskari propon-sionaldir. Bu osmonning zangori bo‘lib ko‘rinishini tushuntiruvchi Reley qonunidir. Rentgen nurlari sohasida to‘lqin uzunlik bilan

atomning o'lchamlari tartibi bir xildir. Bu yerda sochilish qonuni ham boshqacha bo'ladi. Rentgen nurlarining sochilishi to'lqin uzunlikka bog'liq emas. Rentgen nurlarining xossalarini o'rganishda J. Tomson sochilishni tushuvchi rentgen nurlarining elektromagnit maydoni ta'sirida elektronlarning majburiy tebranma harakatining natijasi deb qarab, sochilishning atom koeffitsienti uchun quyidagi formulani taklif qilgan:

$$\sigma_a = \frac{8\pi}{3} \frac{e^4}{m^2 c^4} Z, \quad (8.23)$$

bu yerda  $e$  va  $m$  lar elektronning zaryadi va massasi,  $c$  – yorug'lik tezligi. Elementning bu formulaga kiruvchi atom tartib raqami –  $Z$  neytral atomdagi elektronlar soniga teng. Yuqorida keltirgandek,  $\sigma_a$  ning o'lchami yuz o'lchami bilan bir xil.

Shunday qilib,

$$\frac{\sigma_a}{Z} = \frac{8\pi}{3} \frac{e^4}{m^2 c^4}$$

nisbatni bitta elektronning rentgen nurlarni sochishining effektiv kesimi deb qarasa bo'ladi. Bunga  $e=4,8 \cdot 10^{-10}$ ; SGSE $q$ ;  $e/mc=1,760 \cdot 10^7$ ;  $c=2,997 \cdot 10^{10}$  sm/s qiymatlarni qo'yib, elektronning effektiv kesimini topamiz. U holda

$$\sigma_a = \frac{8\pi}{3} \frac{e^4}{m^2 c^4} = 6,57 \cdot 10^{-25} \text{ sm}, \quad (8.24)$$

Bu effektiv kesimning o'lchami:

$$r_0 = 4,57 \cdot 10^{-13} \text{ sm}. \quad (8.25)$$

Bu kattalikning tartibi *elektronning klassik o'lchami* tartibi bilan bir xildir.

J.Tomson atomdagi elektronlar sonini aniqlashga (8.23) formula ni quyidagi yo'l bilan tatbiq etgan: atom koeffitsientlarining (8.20) ifodadagi ta'rifiga muvofiq

$$\sigma_a = \frac{\sigma}{P} \frac{A}{N}$$

bo'lgani uchun sochilishning massa koeffitsientini (8.23) formuladan topamiz:

$$\frac{\sigma}{\rho} = \frac{8\pi}{3} \frac{e^4}{m^2 c^4} \frac{NZ}{A}. \quad (8.26)$$

(8.23) ifodadan foydalanib quyidagiga ega bo'lamiz:

$$\frac{\sigma}{\rho} = 6,57 \cdot 10^{-25} \cdot 6,02 \cdot 10^{23} \frac{Z}{A} \approx 0,40 \frac{Z}{A}. \quad (8.27)$$

J.Tomsonning (8.23) formulasini tajribada tekshirish bu formula yengil elementlar uchun ancha to'g'ri ekanligini isbotladi. Tajribada topilgan  $\sigma/\rho$  kattalik to'lqin uzunlikka bog'liq emas, uning qiymati 0,20 ga teng. Bu qiymatni (8.27) ifodaga qo'yilganda:

$$0,20 = 0,40 \frac{Z}{A} \quad \text{yoki} \quad \frac{Z}{A} = \frac{1}{2}, \quad (8.28)$$

ya'ni, yengil elementlarning (H dan tashqari) atom tartib raqamlari atom og'irligining yarmiga teng bo'lishi kerak. Bu munosabat haqiqatda davriy sistemasining boshida taqriban to'g'ri bo'lib chiqadi.

### **8.7-§. Rentgen nurlarining to'lqin uzunligini aniqlash**

Rentgen nurlarining interferension qaytishi uchun quyidagi shart bajarilishi kerak:

$$2d \sin \theta = n\lambda, \quad n = 1, 2, 3, \dots$$

Bu formula Vulf – Bregg formulasidir. Bu ifoda rentgen nurlarining spektroskopiyasiga asos qilib olingan bo'lib, rentgen nurlarining to'lqin uzunligini qaytish burchagi bo'yicha aniqlash imkonini beradi. Ammo bunda kristalldagi qo'shni atom tekisliklari orasidagi  $d$  masofa ma'lum bo'lishi kerak. Bu masofani quyidagicha topish mumkin. Elementar yacheykasi kub shaklida bo'lgan kristall mavjud bo'lsin. Bunga misol qilib NaCl kristallini olaylik (8.13-rasm). NaCl ning bir gramm-molekulasingin massasi  $M=58,584$  g. undagi NaCl molekulalari soni Avogadro doimiysi ( $N$ ) ga teng. Shuning uchun undagi  $\text{Na}^+$  va  $\text{Cl}^-$  ionlari soni  $2N$  bo'ladi. NaCl kristallining elementar yacheykasini tekshiraylik. Bu kristall strukturasini o'rGANISH elementar kubning uchlarida NaCl molekulalari emas, balki  $\text{Na}^+$  va  $\text{Cl}^-$  ionlari joylashishini ko'rsatadi. Shunday

qilib, kub yacheykaning 8 ta uchida 8 ion joylashadi, ammo uchlardan har biri 8 ta qo'shni yacheyka uchun umumiy bo'lgani tufayli, har bir yacheykaga bittadan ion to'g'ri keladi. Agar yacheyka qirrasining uzunligi  $d$  ga teng bo'lsa, hajmi  $d^3$  bo'ladi va ichida  $2N$  ioni bo'lgan bir gramm molekulaning butun hajmi  $2Nd^3$  bo'ladi. Bu hajm  $M$  massanining kristall zichligi  $\rho$  ga nisbatiga teng. Bunday shartga asosan, quyidagini yozish mumkin:

$$2Nd^3 = M/\rho$$

yoki

$$d = \sqrt[3]{\frac{M}{2N\rho}}. \quad (8.29)$$

(8.29) formulada  $\rho$  – kristall zichligi.

$\lambda$  ni to'g'ri topish atom fizikasida muhim ahamiyatga ega. NaCl uchun  $d_{\text{NaCl}} = 2,81400 \text{\AA}$ . Mis anodli rentgen trubkasidan foydalanyl-ganda misning (Cu) $K_a$  chizig'inining to'lqin uzunligi:

$$\lambda = 1,53302(31) \cdot 10^{-8} \text{ sm}$$


ekanligini topish mumkin. Bundan ko'rinish turibdiki,  $\lambda$  ni juda yuqori aniqlik bilan topish mumkin.

## 8.8-§. Elektronning solishtirma zaryadini aniqlash

Rentgen spektrlarini o'rganish elektronning solishtirma zaryadini ( $e/m$ ) aniqlash uchun yangi imkoniyatlar yaratdi. Dispersiyaning elektron nazariyasidan, zaif bog'langan elektronlar va yetarlicha katta energiyali rentgen nurlari bo'lgan holda sindirish ko'rsatgichi quyidagicha topiladi:

$$\mu = 1 - \frac{ne^2}{2\pi mv^2}, \quad (8.30)$$

bunda:  $n$  – bir  $\text{sm}^3$  hajmdagi elektronlar soni va  $v$  – rentgen nurlari chastotasi.



8.13-rasm

Elektronlar sonini quyidagicha ifodalash mumkin: atom tartib raqami  $Z$  bo'lgan moddaning bir molidagi elektronlar soni  $NZ$  ga teng,  $1 \text{ sm}^3$  hajmdagi soni esa:

$$n = \frac{NZ}{M} \rho, \quad (8.31)$$

bunda:  $M$  – atom massasi. Agar  $e$  elektrostatik birliklarda,  $F$  – Faradey soni elektromagnit birliklarda ifodalangan bo'lsa, u holda,  $Ne=Fc$  bo'ladi;  $v$  ni  $c/\lambda$  bilan almashtirib, (8.30) va (8.31) ifodalardan quyidagini topamiz:

$$\mu = 1 - \frac{FZ \rho \lambda^2}{2\pi M} \frac{e}{mc},$$

bunda  $\delta = 1 - \mu$  deb belgilab,  $e/m$  aniqlanadi:

$$\frac{e}{m} = \frac{2\pi M}{FZ \rho} \frac{\delta}{\lambda^2} \text{ CGSM} \cdot \text{g}^{-1}. \quad (8.32)$$

(8.29) formuladan  $e/m$  ni, ya'ni elektronning solishtirma zaryadini elektromagnit birliklarda aniqlash uchun  $\delta$  va rentgen nurlari to'lqinning absolyut uzunligini aniq bilish kerak. (8.31) formuladan foydalanib, Berden  $e/m$  ning quyidagi qiymatini topgan:

$$e / mc = 1,7601(3) \cdot 10^7 \text{ CGSM} \cdot \text{g}^{-1}.$$

Bu qiymat boshqa usullar bilan topilgan qiymatga juda yaqin.

### **8.9-§. Rentgen nurlarining xossalari va ular dan foydalanish**

Rentgen nurlarining fizik xossalari ko'zga ko'rindigan yoki ultrabinafsha nurlar xossalari kabitdir. Rentgen nurlari ham korpus-kulyar, ham to'lqin xossalari ega. Ko'pgina ko'rindigan nurlardan farqi shundaki, rentgen nurlari to'lqin uzunligi juda kichik ( $\lambda=10 \div 10^{-2}$  nm), lekin gamma-nurlar to'lqin uzunligi rentgen nuri to'lqin uzunligidan ham kichik. Rentgen nurlari ko'zga ko'rindigan yoki ultrabinafsha nurlarini moddalarga ta'siridan bilish va tadqiq qilish mumkin.

Ko'zga ko'rindigan rentgen nurlari tabiiy kristall moddalarda va sun'iy yo'l bilan tayyorlangan kukunlarga tushganida ko'zga

ko'rinadigan yorug' fluoresiyensiya hosil qiladi. Fotoplastinkaga ta'sir qilib, uni qoraytiradi, gazlarni ionlashtiradi. Rentgen nurlari kuchli o'tuvchanlik qobiliyatiga ega, chunki ularning yutilish koefitsienti kichik. Rentgen nurlarining yutilishi modda zichligi va tushayotgan rentgen nuri to'lqin uzunligiga bog'liq. Yutilish koefitsienti atom tartib raqami kubiga to'g'ri proporsional va  $v^3$  ga teskari proporsional. Shu sababdan ham rentgen nurlari uchun yengil moddalar og'ir moddalarga nisbatan shaffof hisoblanadi. Rentgen trubkasida anod va katod orasiga qo'yilgan kuchlanish qancha katta bo'lsa, hosil bo'ladigan rentgen nurlari shunchalik o'tuvchan (energiyasi katta bo'ladi, yoki qattiq rentgen nurlari deyiladi) bo'ladi. Bunday rentgen nurlari tibbiyotda, metallurgiyada, mashinasozlikda hamda fan-texnikaning boshqa sohalarida jismalarni nurlantirib tekshirish ishlarida keng qo'llaniladi. Zich moddalarni o'rghanish uchun anod va katod orasiga  $U=(100\div 200)\text{kV}$  kuchlanish qo'yiladigan rentgen qurilmalari ishlatiladi. Odam tanasining turli qismlarini yoritishda 30–60 kV kuchlanishli rentgen qurilmalari ishlatiladi.

### **Nazorat savollari**

1. Rentgen nurlarining hosil qilinishini tushuntiring. To'lqin uzunliklari qanday oraliqda bo'ladi?
2. Tormozlanish va xarakteristik nurlanishning hosil bo'lish jarayonlarini tushintiring.
3. Mozli qonuni qaysi kattaliklar orasidagi bog'lanishni ifodalaydi va undan foydalanib qanday fizik kattalikni aniqlash mumkin?
4. Tormozlanish va xarakteristik rentgen nurlanishlarining spektrlari bir-biridan qanday farq qiladi? Spektrlarini chizib tushuntiring.
5. Rentgen nurlarining difraksiyasi qaysi olimlar usullari orqali kuzatilgan?
6. Rentgen nurlari difraksiyasidan qanday fizik kattaliklar aniqlangan?
7. Rentgen nurlarining moddada yutilishi va sochilishi jarayonlarini tushuntiring.
8. Oje effekti qanday vaqtda hosil bo'ladi?
9. Rentgen nurlari spektral chiziqlarining to'lqin uzunligi qanday aniqlanadi?
10. Rentgen nurlarining to'lqin uzunligini o'chash orqali solishtirma zaryad ( $e/m$ ) aniqlanganda qaysi formuladan foydalaniladi?
11. Rentgen nurlarining xususiyatlari va ulardan foydalanish sohalarini ayting.

## IX BOB

# ATOM TASHQI KUCHLAR MAYDONIDA

---

### 9.1-§. Zeemannning oddiy va murakkab effektlari

Magnit maydoniga joylashtirilgan yorug'lik manbaining optik spektri magnit maydon bo'limgandagiga qaraganda murakkab tuzilishga egadir. Spektrdagи har bir chiziq bir necha komponentadan iborat. Magnit maydonda spektral chiziqlarning komponentalarga ajralishi birinchi marta 1896-yilda Zeeman tomonidan kuzatildi. Shuning uchun magnit maydonda spektral chiziqlarning ajralish hodisasiga *Zeeman effekti* deyiladi.

Zeemannning effekti oddiy (normal) va murakkab (anomal) effektlari kuzatilgan. Agar spektrdagи har bir spektral chiziq uchta komponentaga ajralsa, Zeemannning oddiy effekti, agar har bir spektral chiziq uchtdan ko'п sondagi komponentalarga ajralsa Zeemannning murakkab effekti hosil bo'ladi. Zeemannning oddiy va murakkab effektlari kvant fizikasi nuqtai nazaridan tushuntiriladi. Magnit maydoniga joylashtirilgan atom energetik sathlari energiyasini hisoblash uchun Shredinger tenglamasini yechish kerak. Bunda Shredinger tenglamasiga kiradigan energiya operatori bir necha haddan iborat bo'ladi:

$$\hat{E} = \hat{T} + \hat{U}_k + \hat{U}_{SL} + \hat{U}_{SH} + \hat{U}_{HL}. \quad (9.1)$$

(9.1) formulada  $\hat{E}$  – magnit maydondagi atom energetik sathining energiyasi,  $\hat{T}$  – elektronlar kinetik energiyasi bo'lib, barcha elektronlar uchun kattaliklar yig'indisiga teng.  $\hat{U}_k$  – elektronlarning yadroga tortilishidagi va ularning bir-biridan itarishishidagi potensial energiyasi  $\hat{U}_{SL}$  – spin orbital o'zaro ta'sirga bog'liq bo'lган energiya bo'lib, sathlarning odatdagи (magnit maydon bo'limgandagi) nozik strukturasini aniqlaydi. Bu uchta had tashqi magnit maydon bilan bog'liq emas. (9.1) formuladagi oxirgi ikkita had elektronlarning

spin va orbital momentlarining tashqi magnit maydoni bilan o'zaro ta'sir energiyasidir. Energiyaning (9.1) ko'rinishdagi ifodasi bilan Shredinger tenglamasini umumiy holda yechish juda qiyinchilik tug'diradi. Shuning uchun bu masalani yechishda energiyaning muhim xususiy hollarini ko'rib chiqamiz.

**Zeemannning murakkab effekti.** Kuchsiz magnit maydonda atomning nurlanish spektridagi har bir spektral chiziqning uchtadan ortiq ko'p sondagi chiziqlarga ajralishiga *Zeemannning murakkab effekti* deyiladi. Maydon kuchsiz bo'lganda (9.1) formulada  $U_{HL}$  va  $U_{SH}$  hadlar  $U_{SL}$  hadga qaraganda juda kichik bo'ladi, ya'ni orbital va spin magnit momentlarining tashqi magnit maydon bilan o'zaro ta'sir energiyasi spin-orbital o'zaro ta'sir energiyasidan kichik. Bu vaqtida energetik sathlarning magnit maydon bo'limgandagi spin-orbital o'zaro ta'sir energiyasi tufayli bo'ladigan ajralishi hosil bo'ladi.

Nozik struktura alohida komponentalarining tashqi magnit maydonda ajralishini ko'raylik. Magnit maydon bo'limganda atomning har bir energetik sathi  $L$ ,  $S$ ,  $J$  kvant sonlari bilan xarakterlanadi. Bu uchta sonning berilishi atomning magnit momenti  $-\mu$  ni aniqlaydi. Atom magnit momenti  $-\mu$  ning tashqi magnit maydoni bilan o'zaro ta'siri natijasida  $H$  va  $\mu$  ga bog'liq bo'lgan qo'shimcha energiya hosil bo'ladi:

$$U_H = -\mu H, \quad (9.2)$$

$$\mu = -gM_B J.$$

U vaqtida (9.2) ifodadan:

$$U_H = gM_B J H = gM_B m_J H. \quad (9.3)$$

(9.3) formulada  $m_J$  – atomning to'liq momenti  $J$  ning magnit maydon yo'naliishiga bo'lgan proyeksiyasidir, ya'ni to'liq moment kvant soni  $m_J$ , ijozat etilgan  $2J+1$  qiymatlardan faqat bittasini qabul qilishi mumkin:

$$m_J = \pm J; \pm(J-1); \pm(J-2).$$

(9.3) formuladan ko'rindiki, to'liq momenti  $J$  bo'lgan atomning energiyasi  $J$  ning maydon yo'naliishiga nisbatan oriyentasiyasiga bog'liq. Shuning uchun magnit maydon ta'sirida to'liq impuls momenti  $J$  bo'lgan atom energetik sathlari energiyalari turlicha bo'lgan

$(2J+1)$  sathlarga ajraladi. Har bir ajralgan sathning energiyasi quyidagi formula orqali aniqlanadi:

$$E = E_0 + U_H = E_0 + gM_B m_J H, \quad (9.4)$$


(9.4) formulada

$$U_H = gM_B m_J H,$$

$U_H$  – atom magnit momentining tashqi magnit maydoni bilan o‘zaro ta’siri natijasila hosil bo‘lgan qo‘sishimcha energiya;  $E_0$  – magnit maydon bo‘lganida atom energiyasi. Har bir ajralgan sath uchun  $m_J$  ham turlichcha bo‘ladi. Ajralgan energetik sathlar orasidagi energiya farqi:

$$\Delta U_H = gM_B H, \quad (9.5)$$

(9.5)dan ko‘rinadiki,  $H$  doimiy bo‘lganda  $\Delta U$  Lande faktori  $g$  ga bog‘liq va har xil sathlar uchun har xildir. Zeemannning murakkab effektini natriyning rezonans dubleti misolida ko‘rish mumkin (9.1-rasm).



9.1-rasm.

9.1-rasmda chap qismida magnit maydon bo'lmaganda natriyning rezonans dubletining hosil bo'lishi ko'rsatilgan. Rasmning o'ng qismida esa  $3P_{3/2}$ ,  $3P_{1/2}$  va  $3S_{1/2}$  sathlar o'rniga kuchsiz magnit sathlar va ular orasidagi tanlash qoidasida ruxsat berilgan o'tishlar maydonda ajratilgan holda ko'rsatilgan. Ajratilgan sathchalar orasida bo'ladigan elektron o'tishlar  $\Delta m_J$  bo'yicha

$$\Delta m_J = \pm 1, 0 \quad (9.6)$$

tanlash qoidasiga bo'ysunadi. Bunday tanlash qoidasi asosida bitta  $3P_{1/2} - 3S_{1/2}$  o'tish o'rniga magnit maydonida to'rtta o'tish,  $3P_{3/2} - 3S_{1/2}$  o'tish o'rniga esa oltita o'tish hosil bo'ladi. Shuning uchun kuchsiz magnit maydoniga joylashtirilgan natriy atomi spektrida magnit maydon bo'lmagandagi rezonans dublet o'rnida o'nta bir-biriga yaqin spektral chiziqlar kuzatiladi. Bu spektral chiziqlar hosil bo'lishidagi elektron o'tishlarda atom chiqaradigan nurlanish energiyasi va chastotasi quyidagicha aniqlanadi:

$$\begin{aligned} \hbar\omega &= E_2 - E_1 = [(E_{02} + g_2 M_B m_{J_2} H) - (E_{01} + g_1 M_B m_{J_1} H)] = \\ &= (E_{02} - E_{01}) + (g_2 m_{J_2} - g_1 m_{J_1}) M_B H. \end{aligned} \quad (9.7)$$

(9.7) formuladan magnit maydondagi atomning nurlanish chastotasi topiladi, ya'ni:

$$\omega = \frac{E_{02} - E_{01}}{\hbar} + (g_2 m_{J_2} - g_1 m_{J_1}) \frac{M_B H}{\hbar}, \quad (9.8)$$

Magnit maydon bo'lmagandagi asosiy spektral chiziq chastotasi —  $\omega_0$  bilan belgilanadi:

$$\omega_0 = \frac{E_{02} - E_{01}}{\hbar},$$

u vaqtida (9.8) formuladan

$$\omega = \omega_0 + \frac{M_B H}{\hbar} (g_2 m_{J_2} - g_1 m_{J_1}). \quad (9.9)$$

Ajralish kattaligi energetik birliklarda  $M_B H$  ko'paytuvchi bilan yoki chastota birliklarda  $M_B H/\hbar$  ko'paytuvchi bilan aniqlanadi. (9.9) formulada  $M_B$  — Bor magnitonini bo'lib,  $M_B = 0,927 \cdot 10^{-20}$  erg Ersted<sup>-1</sup>.

U vaqtida (9.5) formulaga asosan:

$$\Delta U \equiv M_B H = \frac{0,927 \cdot 10^{-20} \text{ erg} \cdot \text{Ers.}^{-1} \cdot H \cdot \text{Ers.}}{1,6 \cdot 10^{-12} \text{ erg} \cdot \text{eV}^{-1}} = 5,8 \cdot 10^{-9} \cdot H \text{ eV.} \quad (9.10)$$

Magnit maydon bo'lmagandagi rezonans dubleti chiziqlari orasi-dagi energiya farqi uchun:

$$\Delta U \approx 2 \cdot 10^{-3} \text{ eV,} \quad (9.11)$$

(9.10) va (9.11) ifodalardagi energiya farqlarini taqqoslashdan ko'rindaniki, magnit maydonda ajralgan sathlar orasi kichik. Shuning uchun kuchsiz magnit maydonda hosil bo'lgan Zeeman effektini kuzatish uchun ajrata olish qobiliyati kuchli bo'lgan spektroskopik qurilmalar talab qilinadi. Shunday qilib, kuchsiz magnit maydonda atom spektridagi spektral chiziqlarning uchdan ortiq ko'p sondagi spektral chiziqlarga ajralishi Zeemannning murakkab effekti deyiladi. *Zeemannning murakkab effekti* kuchsiz magnit maydonlarda hosil bo'lishi kuzatildi. Atom energetik sathlarining maydon bo'lmagan-dagi spin-orbital o'zaro ta'sir natijasida bo'ladigan ajralishi, magnit maydon ta'sirida bo'ladigan ajralishidan katta bo'lsa, magnit maydoni kuchsiz hisoblanadi. Bunda (9.1) formulada  $U_{SL}$  kattalik  $U_{SH}$  va  $U_{HL}$  kattaliklardan katta bo'ladi.

**Zeemannning oddiy effekti.** Kuchli magnit maydoniga joylash-tirilgan atom spektridagi har bir spektral chiziqning uchta komponentaga ajralishi *Zeemannning oddiy effekti* deyiladi.  $S=0$ ,  $J=L$  bo'lgan energetik sathlar orasidagi o'tishlarda Zeeman effekti magnit maydon kuchlanganligi kattaligiga bog'liq bo'lmagan ravishda kuzatiladi.


Magnit maydonda bu sathlardan har biri  $2L+1$  energetik sath-larga ajraladi. Ajralgan energetik sathchalar oraliq'i (energiya farqlari) bir xil bo'ladi. Chunki  $S=0$  da Lande faktori  $g=1$  ga teng. U vaqtida (9.9) formulani quyidagi ko'rinishda yozish mumkin:

$$\omega = \omega_0 + \frac{M_B H}{\hbar} (m_{J_2} - m_{J_1}). \quad (9.12)$$

Bunda  $\omega_0$  — tashqi magnit maydon bo'lmaganda atomning nurlanish chastotasi. (9.6)dagi tanlash qoidasiga asosan (9.12) formuladan uchta chastota hosil bo'ladi:

$$\omega_0 \text{ va } \omega_0 \pm \frac{M_B H}{\hbar}.$$

Magnit maydonida ajralgan  $S_i=0$ ,  $J_i=L_i=1$  va  $S_i=0$ ,  $J_i=L_i=2$  bo‘lgan energetik sathlar orasida tanlash qoidasi asosida bo‘ladigan o‘tishlar 9.2-rasmda tasvirlangan. Rasmdan ko‘rinadiki, bu energetik sathlar orasida to‘qqizta o‘tish bo‘lishi mumkin, lekin 2 va 8 o‘tishlar energiyasi asosiy o‘tish 5 ning energiyasi bilan mos tushadi, 1, 3, 6 o‘tishlar energiyasi esa 4, 7, 9 o‘tishlar energiyasi bilan mos tushadi. Shunday qilib, magnit maydonda  $S$ ’lari nolga teng bo‘lgan, ya’ni  $S=0$  bo‘lgan energetik sathlar orasidagi o‘tishlar triplet bo‘lishi kerak. Demak, magnit maydonda har bir spektral chiziqning har bir nurlanish chizig‘i uchta komponentaga ajralishi aniqlangan. Bu hodisa tajribada ham kuzatilgan. Zeemannning oddiy effekti kuchli magnit maydonidagi atomlarda hosil bo‘ladi. Atom energetik sathlarining magnit maydon ta’siridagi ajralishi maydon bo‘lmagandagi spin-orbital o‘zaro ta’sir natijasida ajralishidan katta bo‘lsa, magnit maydon kuchli hisoblanadi. Maydon kuchli bo‘lganda (9.1) formulada  $U_{SL}$  kattalik  $U_{SH}$  va  $U_{HL}$  kattaliklardan kichik bo‘ladi va uni hisobga olmaslik mumkin. Bunday holda kuchli maydonda L va S vektorlari orasidagi bog‘lanish uziladi. Shunday qilib, kuchli magnit maydonda ajralgan energetik sathlar energiyasi quyidagicha aniqlanadi:



9.2-rasm

(9.13) ifodadagi Lande faktori  $g$  ni

$$g = \ell + \frac{j(j+1) + s(s+1) - \ell(\ell+1)}{2j(j+1)}$$

formula orqali hisoblaganda,  $g=1$  va  $g=2$  ekanligi kelib chiqadi. U vaqtda (9.13)ni formulani quyidagi ko‘rinishda yozish mumkin.

$$E = E_0 + U_H; U_H = M_B H(m_L + 2m_S), \quad (9.14)$$

yoki

$$E = E_0 + M_B H(m_L + 2m_S). \quad (9.15)$$


9.3-rasmda natriy (Na) atomi sathlarining kuchli maydonda ajralishi ko'rsatilgan. Ajralgan sathlar energiyalari endi  $m_l + 2m_s$  kattalikka bog'liq bo'ladi. Magnit maydon bo'limgandagi bitta  $3S_{1/2}$  sath o'rniga magnit maydon ta'sirida ikkita sath hosil bo'ladi,  $3P_{3/2}$  va  $3P_{1/2}$  sathlar o'rniga esa beshta sath hosil bo'ladi.

Rasmda yuqori qismdan ajralgan energetik sathlar orasidagi masofa  $M_B H$  birliliklarda birga teng, pastki qismdag'i ajralgan energetik sathlar orasidagi masofa esa ikkiga teng. Rasmda  $\Delta m = 0, \pm 1$  va  $\Delta m = 0$  tanlash qoidasi bajarilganda mumkin bo'lgan o'tishlar ko'rsatilgan. Bunday o'tishlar soni oltita. Bu o'tishlarda ikkinchi va beshinchi o'tishlar energiyalari (chastotalari) bir xil bo'lib, bu o'tishlar magnit maydoni bo'limgandagi asosiy o'tish bilan mos tushadi. Birinchi va to'rtinchi, uchinchi va oltinchi o'tishlar jufti ham bir xil energiyaga ega bo'ladi. Bu o'tishlarning chastotasi siljimagan o'tish chastotasidan  $\Delta\omega$  ga farq qiladi:

$$\Delta\omega = \frac{M_B H}{\hbar} = \frac{e}{2mc} \cdot H. \quad (9.16)$$

(9.15) formula kuchli magnit maydonida har bir energetik sath uchta komponentaga ajralishi mumkinligini ko'rsatadi. Haqiqatdan ham atom energiya nurlaganda elektron o'tishlar  $m_s$  lari bir xil bo'lgan energetik sathlar orasida bo'ladi.

Elektron o'tishlarda atom nurlantirgan kvant energiyasi quyidagicha aniqlanadi:



9.3-rasm

$$\hbar\omega = [E_{02} + M_B H(m_{L_2} + 2m_S)] - [E_{01} + M_B H(m_{L_1} + 2m_S)] = \\ = (E_{02} - E_{01}) + M_B H(m_{L_2} - m_{L_1}). \quad (9.17)$$

Tanlash qoidasi  $m_L$  ning faqat birga o'zgarishiga ruxsat beradi.


Zeemannning oddiy effekti murakkab effektining xususiy holidir. Oddiy effekt to'liq spini nolga teng bo'lgan atomlarda kuzatiladi, ya'ni singlet chiziqlar bo'lgan spektrlarda kuzatiladi.

Shunday qilib, magnit maydon kuchlanganligi ortishi bilan Zeemannning murakkab effekti oddiy (triplet) effektiga aylanadi. Bu hodisa 1912-yilda Pashen va Bak tomonidan ochilgan bo'lib, *Pashen va Bak effekti* deyiladi.

## 9.2-§. Pashen va Bak effekti

**Kuchli maydon.** Zeemannning murakkab effekti kuchsiz magnit maydonida kuzatiladi. Kuchsiz magnit maydonida atomning magnit momenti bilan tashqi magnit maydon orasidagi o'zaro ta'sir energiyasi spin-orbital o'zaro ta'sir energiyasidan kichik bo'ladi. Agar magnit maydon induksiyasi yetarlicha katta bo'lsa, u vaqtida atom magnit momentining magnit maydoni bilan o'zaro ta'sir energiyasi spin-orbital o'zaro ta'sir energiyasidan katta bo'ladi. Shuning uchun orbital va spin momentlari orasidagi bog'lanish uziladi. Bu vaqtida atomning spin magnit momenti va orbital magnit momenti tashqi magnit maydon bilan har biri alohida ta'sirlasha boshlaydi, ya'ni har biri mustaqil ravishda magnit maydon kuchlanganligi yo'nalishi atrofida presession harakat qiladi (9.4-rasm). Kuchli magnit maydonida spin-orbital bog'lanishning uzilishi *Pashen va Bak effekti* deyiladi.

**Sathlar ajralishi.** Atomning orbital va spin magnit momentlari tashqi magnit maydoni bilan mustaqil ta'sirlashgani uchun atomning tashqi magnit maydoni bilan o'zaro ta'sir energiyasi orbital va spin magnit momentlarining tashqi magnit maydon bilan o'zaro ta'sir energiyalarining yig'indisiga teng bo'ladi. Shuning uchun atomning tashqi magnit maydondagi to'liq energiyasi quyidagi ko'rinishda



9.4-rasm

aniqlanadi:

$$E = E_0 - \mu_L H - \mu_S H. \quad (9.18)$$

(9.18)da  $(-\mu_L H)$  – atomning orbital magnit momenti  $\mu_L$  ning tashqi magnit maydoni bilan o'zaro ta'sir energiyasi,  $(-\mu_S H)$  – atomning spin magnit momenti  $\mu_S$  ning tashqi magnit maydoni bilan o'zaro ta'sir energiyasi.  $E_0$  – magnit maydon bo'limganda atomning ichki energiyasi yoki atomning magnit momentini ifodalovchi:

$$\mu = -g\mu_B J = -g\mu_B M_J; \quad \mu = -g\mu_B m_J$$

formulaga asosan (9.18) formulada:

$$\mu_L = -g_L M_B m_L \quad \text{va} \quad \mu_S = -g_S M_B m_S,$$

yoki  $g_L=1$  va  $g_S=2$  ekanligidan:

$$\mu_L = -M_B m_J \quad \text{va} \quad \mu_S = -2M_B m_S.$$


$m_J$  va  $m_S$  har doim butun qiymatlarga teng. Demak, kuchli magnit maydonda atom termlari bir-biridan normal siljish  $M_B H$  ga karrali oraliqlarga siljigan termlarga ajraladi.

Kuchli magnit maydonda atom energetik sathlarining ajralishi sathlarning tabiiy multiplet ajralishidan katta bo'ladi.

Misol tariqasida kuchli magnit maydonda natriy atomi  $^2S$  va  $^2P$  sathlarning ajralishini ko'raylik. Bu ajralish 9.5-rasmida keltirilgan. Spin-orbital bog'lanishning uzilganligi uchun atomning to'liq momenti o'z ma'nosini yo'qotadi. Shuning uchun  $^2P_{1/2}$  sath  $^2P_{3/2}$  sathdan farq qilmaydi, chunki endi bu sathlar  $L=1$  bo'lgan bir xil

qiymatli sathlar kabi xarakterlanadi.

$L=1$  bo'lгanda atomning orbital momenti magnit maydon kuchlanganligi yo'nalishiga nisbatan uch xil usul bilan oriyentatsiyalanadi.  $\mu_L=1, 0, -1$ , bu esa o'zaro ta'sir energiyasining uch xil qiymatga ega bo'lishiga va  $P$  sathning uchta sathga ajralishiga olib keladi. Orbital magnit momentining har bir oriyentatsiyasida spin magnit momenti bir-biriga bog'liq bo'limgagan ikki xil usul bilan oriyentirlanishi mumkin. Shuning uchun



9.5-rasm

uchta orbital sathlarning har biri ikkita spin sathlarga ajraladi. Natijada, kuchli magnit maydonda  $^2P$  sath oltita sathga ajraladi.  $L=0$  bo‘lgani uchun  $^2S$  sathining ajralishi spin magnit momenti oriyentatsiyasi natijasida hosil bo‘ladi, ya’ni ikkita sathga ajraladi.

**Nurlanish chiziqlarining ajralishi.**  $\Delta L=\pm 1$  va  $\Delta S=0$  tanlash qoidalardan foydalangan holda ruxsat etilgan o‘tishlarni topish mumkin. 9.5-rasmda strelkalar bilan natriy atomining bosh seriyasi-dagi mumkin bo‘lgan o‘tishlar ko‘rsatilgan. Hammasi bo‘lib oltita nurlanish chizig‘i hosil bo‘ladi. Tashqi magnit maydonida spinning oriyentatsiyasi tufayli hosil bo‘lgan ajralish  $P$  holatda ham  $S$  holatda ham bir xil. Bu oltita chiziq juft-juft bo‘lib, bir-biri bilan ustma-ust tushadi. Natijada, nurlanish spektrida triplet hosil bo‘ladi. Tanlash qoidalari hisobga olgan holda (9.18) formula orqali nurlanish chiziqlarining ajralishini hisoblash mumkin. Qulaylik uchun (9.18) formulani quyidagicha yozamiz:

$$E = E_0 - \mu_{L_Z} H - \mu_{S_Z} H,$$

yoki

$$\hbar\omega_{1,2} = \hbar\omega - (\mu_{L_1Z} - \mu_{L_2Z})H - (\mu_{S_1Z} - \mu_{S_2Z})H, \quad (9.19)$$

$$\mu_{L_Z} H = \hbar\omega_L m_L;$$

$$\mu_{S_Z} H = 2\hbar\omega_L m_S$$

ekanligi va tanlash qoidalari

$$\Delta m_L = 0, \pm 1 \quad \text{va} \quad \Delta m_S = 0$$

hisobga olinsa, (9.19) formuladan

$$\Delta\omega = \omega_{12} - \omega = \omega_L \begin{pmatrix} 1 \\ 0 \\ -1 \end{pmatrix} = \begin{pmatrix} \omega_L \\ 0 \\ -\omega_L \end{pmatrix}.$$

Ya’ni uchta chastota hosil bo‘ladi. Demak, nurlanish chiziqlarining ajralishi oddiy Zeeman ajralishiga teng bo‘ladi. Shunday qilib, kuchli magnit maydonda murakkab Zeeman effektining oddiy effektiga aylanishiga Pashen-Bak effekti deyiladi. Demak, kuchli magnit maydonda spektr chiziqlari uchta komponentaga ajraladi.

### 9.3-§. Elektron paramagnit rezonans

Zeeman effektini tahlil qilishda Zeeman ajralishida turli elektron holatlarga tegishli bo'lgan komponentalar orasida bo'ladigan kvant o'tishlar qaraladi. Bunda spektral chiziqlarning ajralishi turli energetik sathlardan ajralgan sathchalar orasidagi kvant o'tishlar natijasida hosil bo'ladi. Qator yillar davomida turli mamlakatlar olimlari tomonidan aynan bir energetik sathdan ajralgan energetik sathchalar orasida bo'ladigan kvant o'tishlarni magnit maydonda aniqlash masalasi ustida izlanishlar olib borildi. Izlanishlarning taqribi natijalari ajralgan energetik sathchalar orasida bo'ladigan kvant o'tishlarni magnit maydonda aniqlash uslubi orqali atomlarning xossalari to'g'risida to'liq ma'lumot olish mumkinligini ko'rsatdi.

Agar atomning to'liq mexanik momenti nolga teng bo'lmasa, ya'ni  $J \neq 0$  bo'lganda, magnit maydonda atomning har bir energetik sathi bir nechta sathchalarga ajraladi, agar  $J=0$  bo'lsa, energetik sathlar ajralishi bo'lmaydi. Zeeman ajralishida komponentalar orasidagi kvant o'tishlar tekshirilganda, atomning asosiy elektron holati uchun  $J \neq 0$  bo'lgan moddalardan foydalanish qulay. Bunday moddalar paramagnit moddalardir. Magnit maydon bo'lmaganda atomning magnit momenti noldan farq qiladigan moddalar paramagnit moddalar deb aytildi.

Zeeman ajralishidagi komponentalar orasida bo'ladigan kvant o'tishlar birinchi marta Ye.K. Zavoyskiy tomonidan kuzatildi. Tekshiriladigan namuna sifatida temir guruhi elementlarining tuzlaridan foydalanildi. Zavoyskiy tomonidan kashf etilgan ajralgan komponentalar orasida bo'ladigan kvant o'tishlarni kuzatish metodi elektron paramagnit rezonans (EPR) deb ataldi. Bunday deyilishining sababi Zeeman ajralishidagi komponentalar orasida bo'ladigan kvant o'tishlar  $J \neq 0$  bo'lgan elektron holatlar (energetik sathlar) orasida amalga oshadi, ya'ni paramagnit moddalarda amalga oshadi. Bunday hodisaning rezonans deb aytishiga sabab, bu hodisani kuzatish tajribalarida yuzaga keladigan rezonans jarayonidir. Paramagnit modda magnit maydoniga joylashtirilganda, modda atomining har bir energetik sathi  $2J+1$  ta energetik sathchalarga ajraladi. Bir energetik sathdan ajralgan sathchalar bir-biridan magnit kvant  $m_J$  ning qiymatlari bilan farq qiladi ( $m_J$  to'liq moment  $\vec{J}$  vektorining


magnit maydon yo‘nalishiga proyeksiyasini bildiradi). Bir energetik sathdan ajralgan sathchalar orasidagi spontan kvant o‘tishlarning ehtimolligi kichik bo‘lib, bu ehtimollikni sathchalar oralig‘ining kubiga proporsional. Bundan tashqari, atomda valent elektron bitta bo‘lganda, sathchalar orasidagi kvant o‘tishlar  $\Delta L \neq 0$  tanlash qoidasi bilan man qilinadi. Lekin tashqi kuchlar maydoni ta’sirida tanlash qoidasi bajarilmaganda ham ajralgan energetik sathchalar orasida majburiy o‘tishlar sodir bo‘ladi. Agar kuchlanganligi  $H_0$  bo‘lgan doimiy magnit maydoniga ko‘ndalang ravishda kuchlanganligi  $H$  bo‘lgan sekin o‘zgaruvchan magnit maydoni qo‘yilsa, doimiy magnit maydonda ajralgan energetik sathchalar orasida bo‘ladigan kvant o‘tishlarning ehtimolligi ortadi. Ayniqsa, doimiy magnit maydonda aynan bir energetik sathdan ajralgan sathchalar orasida bo‘ladigan kvant o‘tishlarning tezligi sezilarli darajada ortadi.

Atom yuqoriroq energetik sathchadan quyiroq energetik sathchaga o‘tsa, shu yuqoriroq va quyiroq sathchalar farqiga teng bo‘lgan energiya chiqarilishi kerak. Lekin atom quyiroq energetik sathchadan yuqoriroq energetik sathchaga tashqi elektromagnit nurlanish ta’sirida o‘tadi. Bunday o‘tishlar amalga oshishi uchun tashqi elektromagnit nurlanish kvantining energiyasi (chastotasi) ajralgan energetik sathchalar oralig‘l energiyasiga (chastotasiga) teng bo‘lishi kerak, ya’ni rezonans yuzaga kelishi kerak. Bunday holda quyidagi rezonans sharti bajariladi:

$$\hbar\omega = gM_B H_0. \quad (9.20)$$


(9.20) formulada  $\hbar\omega$  – elektromagnit maydon energiyasi,  $gM_B H_0$  – kattalik ajralgan sathchalar oralig‘l (sathchalar energiyalarining farqi),  $M_B$  – Bor magnetoni,  $g$  – giromagnit nisbat,  $H$  – elektromagnit maydon kuchlanganligi.

(9.20) ifodadagi rezonans sharti bajarilganda, paramagnit modda-da elektromagnit nurlanishning intensiv yutilishi kuzatiladi. Bu yutilish rezonans xarakterga ega bo‘lganligi sababli, bunday hodisani paramagnit rezonans (EPR) hodisasi deyiladi. Elektromagnit nurlanishning bunday intensiv yutilishini radiotexnik qurilma qayd qiladi yoki ossillograf ekranida ham kuzatish mumkin. Paramagnit modda-da elektromagnit nurlanishning keskin yutilishida modda atomi yuqoriroq energetik sathchaga o‘tadi.



9.6-rasm

Elektron paramagnit rezonans hodisasini kuzatishda Zeeman ajralishidagi komponentalar oralig'i odatda ishlatiladigan magnit maydonlari uchun bo'lgan  $10^8 \div 10^{11}$  Hz ni tashkil etadi. Chastotining bunday diapazoniga tegishli bo'lgan elektromagnit nurlanishlar chastotasini o'zgartirish tajribalarda texnik jihatdan qiyinchilik tug'diradi. Shuning uchun magnit maydonni o'zgartirish kerak bo'ladi. Magnit maydon o'zgarganda ajralgan komponentalar oralig'i ham o'zgaradi. Paramagnit rezonans hodisasini kuzatish qurilmasining sxemasi elektromagnit va radioapparaturadan iborat (9.6-rasm). Tekshiriladigan paramagnit modda elektromagnit qutblari  $N$  va  $S$  orasidagi  $R$  rezonator ichiga joylashtiriladi. Klistronli generator ( $K$ ) yordamida rezonatorda radiochastotali elektromagnit maydon tebra-nishlari hosil qilinadi. Hosil qilingan elektromagnit nurlanish paramagnit moddaga tushadi. Moddadan o'tgan nurlanish  $D$  detektor va  $RQ$  radioqurilma yordamida qayd qilinadi. Tajribalar monoxromatik nurlanish yordamida amalga oshiriladi, ya'ni klistronli generator chiqarayotgan elektromagnit nurlanish chastotasi o'zgarmas saqlanadi. Magnit maydon esa asta-sekin o'zgartirib boriladi. Magnit maydonining biror rezonans qiymatida paramagnit moddada nurlanishning yutilishi keskin ortadi. Natijada, paramagnit moddadan o'tib detektorga yetib kelayotgan nurlanish intensivligi keskin kamayadi. Buni 9.7-rasmda tasvirlangan nurlanish intensivligi ( $J$ ) va o'zgaruvchan magnit maydon kuchlanganligi ( $H$ ) orasidagi rezonans xarakterdagи bog'lanish egri chizig'inining minimumga ega bo'lishida ko'rish mumkin. Paramagnit moddada nurlanishning bunday yutilishi paramagnit rezonans hodisasidir.



9.7-rasm

Umuman ajralgan energetik sathchalar orasida bo'ladiqan kvant o'tishlarni magnit maydonda aniqlashning magnit rezonans metodi magnit momenti aniqlanadigan zarraning turiga bog'liq ravishda elektron paramagnit rezonansi

(EPR) va yadro magnit rezonansi (YaMR) deb aytildi. Magnit rezonans hodisasi yordamida atom va yadrolarning magnit momentlari, molekula va kristallarning tuzilishi, kimyoviy reaksiyalar kinetikasi, atomlar orasidagi bog'lanishlar, moddada elektronlarning holati haqida ma'lumotlar olish mumkin.

#### 9.4-§. Shtark effekti

Atom spektrida spektral chiziqlarning kuchli elektr maydonda ajralishi 1913-yilda I.Shtark tomonidan kashf qilindi. Elektr maydonida atom energetik sathlarining ajralishi va bu ajralish bilan bog'liq bo'lgan spektral chiziqlarning ajralish hodisasi *Shtark effekti* deyiladi. Bu hodisani atom, molekulalarning chiqarish va yutilish spektrlaridagi spektr chiziqlarining ajralishi va siljishida kuzatish mumkin. Atom energetik sathlarining ajralishi bir jinsli va bir jinsli bo'lmanan elektr maydonlarida sodir bo'ladi. 1913-yilda Shtark vodorod atomi Balmer seriyasidagi spektral chiziqlar ajralishini batafsil tushuntirdi. Keyinchalik boshqa atomlar spektr chiziqlarida ham Shtark effekti kuzatildi. Bir jinsli elektr maydon kuchlanganligining ortishi bilan ajralgan energetik sathlar oralig'i (ajralgan sathlar energiyalarining farqi) ham ortadi. Shtark effekti chiziqli va kvadratik effektlardan iborat. Agar ajralgan energetik sathlar oralig'i elektr maydon kuchlanganligiga ( $E$ ) proporsional bo'lsa, chiziqli Shtark effekti, agar maydon kuchlanganligi kvadratiga ( $E^2$ ) proporsional bo'lsa, kvadratik Shtark effekti hosil bo'ladi. Kvadratik effekt barcha atomlarda kuzatiladi, chiziqli effekt esa vodorod va vodorod-simon ionlarda kuzatiladi. Shtarkning kvadratik effekti vodorod atomi uchun nisbatan kuchsiz elektr maydonlarda chiziqli Shtark effekti fonida sezilarli bo'lmaydi. Atomni chiziqli ossillyatorlar to'plamiga taqqoslab tushuntiradigan klassik nazariya atom energetik sathlarining elektr maydonda ajralishini tushuntira olmadi.

Shtark effektining nazariyasi Borning yarim klassik nazariyasiga asoslangan holda K. Shvarsshild va A. Eynshteyn tomonidan 1916-yilda berildi. Ularning asosiy natijalari 1926-yilda Shredinger rivojlantirgan kvant mexanikasi nazariyasi orqali tushuntirildi. Shtark effekti elektr maydonda atom zaryadlarining siljishi oqibatida atom elektr qutblangan bo'lib qolishida yuz beradi. Elektr maydon bo'lma-

ganda atomda xususiy elektr dipol momenti mavjud bo‘lishi yoki bo‘lmasligiga bog‘liq ravishda Shtark effekti turli ko‘rinishda bo‘ladi. Birinchi holda, ya’ni atom xususiy elektr dipol momentiga ega bo‘lganda elektr maydoni qo‘yilsa, maydon bo‘ylab chiziqli kattaliklargina hisobga olinganda, atom elektr maydon kuchlanganligi e ning birinchi darajasiga porporsional bo‘lgan qo‘shimcha ( $-P_\varepsilon$ ) energiya oladi. Bunda atom spektrida spektral chiziqlarning siljishi va ajralishi (atom energetik sathlarining siljishi va ajralishi) ham elektr maydon kuchlanganligining birinchi darajasi  $\varepsilon$  ga proporsional bo‘ladi. Bunday effekt Shtark tomonidan aniqlangan bo‘lib, *chiziqli Shtark effekti* deyiladi.

Ikkinci holda, ya’ni atomda xususiy elektr dipol momenti yo‘q. Bunda elektr maydon qo‘yilganda, atomda induksiyalangan dipol momenti paydo bo‘ladi, ya’ni

$$P = \alpha \varepsilon, \quad (9.21)$$

bunda  $\alpha$  – atomning elektr qutblanuvchanligi bo‘lib, uni kvant mexa-nikasi metodlaridan foydalanib hisoblash mumkin. Qo‘yilgan elektr maydoni 0 dan  $\varepsilon$  gacha oshirib borilganda, atomning elektr dipol momenti ham 0 dan  $P$  gacha ortib boradi. Bunda atom ustida ( $P_\varepsilon$ )/2 =  $\alpha \varepsilon^2 / 2$  ish bajariladi. Bu ish elektr maydonida atomning potensial energiyasini oshirishga sarflanadi ( $1/2$  koeffitsient potensial energiyani elastik deformatsiyalangan jismning potensial energiyasini Guk qonuni bo‘yicha hisoblagandagidek hisoblashdan kelib chiqadi). Bunday holda atom spektrida spektral chiziqlarning siljishi va ajralishi (atom energetik sathlarining siljishi va ajralishi) elektr maydon kuchlanganligining kvadrati  $\varepsilon^2$  ga proporsional bo‘ladi. Shtark tomonida kuzatilgan bunday effekt *Shtarkning kvadratik effekti* deyiladi. Bu effekt chiziqli effektga qaraganda kamroq kuzatiladi. Shuning uchun keyinroq ochilgan.

Xususiy elektr dipol momentiga ega bo‘lgan atom elektr maydonida qo‘shimcha dipol momentini oladi. Birinchi yaqinlashishda bu qo‘shimcha elektr dipol momentini elektr maydon kuchlanganligiga proporsional deb hisoblash mumkin. U vaqtida Shtarkning chiziqli va kvadratik effektlari ustma-ust tushadi. Bunda atom energetik sathlari-ning ajralishi nosimmetrik bo‘ladi: barcha sathchalar kichik energiyali tomonga siljigan bo‘ladi, bunda sathchalar qancha

yuqorida joylashgan bo'lsa, shuncha kuchli siljiydi. Spektral chiziqlar o'zлari spektrning qizil tomoniga siljigan bo'ladi. Lekin bu siljish katta emas. Masalan, Shtark komponentalaridan biri  $H_a$  chizig'inining qizil tomonga siljishi  $1 \text{ sm}^{-1}$  ga teng, bu chiziqning chetki Shtark komponetalari bilan oralig'i esa  $200 \text{ sm}^{-1}$  ni tashkil qiladi. Elektr maydon kuchlanganligi  $10^5 \text{ V/sm}$  dan ortiq bo'imagan elektr maydonlarida vodorod atomida kvadratik Shtark effektini hisobga olmaslik mumkin. Vodorod atomida kvadratik Shtark effekti elektr maydon kuchlanganligi yetarlicha katta bo'lganda namoyon bo'ladi. Elektr maydon kuchlanganligi taqriban  $4 \cdot 10^5 \text{ V/sm}$  dan ortiq bo'lgan maydonlarda spektral chiziqlarning ajralishi (atom energetik sathlarining ajralishi) elektr maydon kuchlanganligining uchinchi darajasi  $\varepsilon^3$  ga proporsional bo'lishi kuzatiladi. Lekin bunday holda ham hisoblash-lar  $\varepsilon^3$  dagidek o'tkaziladi.  $\varepsilon^2$  va  $\varepsilon^3$  hadlarni hisobga olgan holda Shtark effekti nazariyasi tajriba natijalari bilan mos keladi, hatto maydon  $10^6 \text{ V/sm}$  bo'lganda ham. Hozirgi vaqtida kuchlanganligi  $10^6 \text{ V/sm}$  bo'lgan maydonga erishilgan.

Atom elektr dipol momentining tashqi elektr maydoni bilan o'zaro ta'sirlashuvi natijasida hosil bo'lgan qo'shimcha energiyani, ya'ni atomning tashqi elektr maydonidagi qo'shimcha energiyasi quyidagi formula orqali aniqlanadi:

$$\Delta E = -(\vec{P}_{el} \cdot \vec{\varepsilon}) = - \int_0^{\varepsilon} \alpha \varepsilon d\varepsilon = -\frac{\alpha \varepsilon^2}{2}. \quad (9.22)$$

$P_{el}$  ning  $z$  o'qiga bo'lgan proyeksiyasi:

$$P = P_z = \alpha \vec{\varepsilon}. \quad (9.23)$$

Qo'shimcha energiyaning qiymati maydon yo'nalishiga bog'liq emas. Bunday hol murakkab atomlarda kuzatiladi. Elektr maydonda atom sathlarining ajralishini atomning vektor modeliga asosan tushuntirish mumkin.

Ma'lumki, murakkab atomlarda  $\bar{J}$  vektor,  $\bar{L}$  va  $\bar{S}$  larning vektor yig'indisidan iborat. Agar tashqi maydon ta'sirida  $\bar{L}\bar{S}$  bog'lanish uzilmasa,  $\bar{J}$  vektorining tashqi elektr maydoni yo'nalishidagi proyeksiyasi  $m=-J, -J+1, \dots, J-1, J$  ga teng qiymatlar qabul qiladi. Elektr maydonning ta'siri atom harakat miqdori momenti  $\bar{J}$  ning

maydon yo‘nalishiga bog‘liq bo‘lishi sababli, tashqi elektr maydon atom energetik sathlarining ajralishiga olib keladi. Lekin, sathlarning magnit maydon ta’siridagi ajralishidan farqli ravishda, termrlarning elektr ajralish komponentalari soni  $2J+1$  ga teng emas, chunki (qo‘sishimcha energiyaning elektr maydon yo‘nalishiga bog‘liq bo‘lmaganidek) magnit momentlarining qarama-qarshi yo‘nalganligi bilan farqlanuvchi ikki holatda ham atomning qo‘sishimcha energiyalari teng bo‘ladi. Boshqacha aytganda, faqat  $m_j$  va  $-m_j$  bilan farqlanuvchi holatlar energiya sahtlari ustma-ust tushgan bitta sathdan iborat bo‘ladi, ya’ni tashqi elektr maydon atom sathlarining ayniganligini to‘la yo‘qotmaydi. Shu sababdan, energiya sathlari to‘la momentning butun son qiymatli holida  $J+1$  ta, yarim butun son qiymatida esa  $J+1/2$  ta komponentalarga ajraladi. Bu komponentalarning har biri kuchsiz magnit maydonda (ya’ni tashqi elektr maydon ustiga magnit maydoni ham qo‘yilsa) yana ikitaga ajraladi, chunki magnit maydonda  $m_j$  va  $-m_j$ , holatlari ekvivalent emas.

**Vodorod atomida Shtark effekti.** Tashqi elektr maydondagi vodorod atomi uchun Shredinger tenglamasini aniq yechish mumkin. Agar tashqi elektr maydonining yo‘nalishini  $z$  o‘qiga mos yo‘nalishda olsak, elektronning atomdagi ichki potensial energiyasi  $U = -e^2/(4\pi\varepsilon_0 r)$ ga atomning tashqi elektr maydonda olgan potensial energiyasi  $e\varepsilon_z$  qo‘shiladi. Odatda, atomning ichki elektr maydoni tashqi maydonga nisbatan juda katta bo‘ladi. Masalan, vodorod atomida birinchi Bor orbitasi ( $a_1$ ) uchun Kulon maydonining kuchlanganligi

$$\varepsilon_0 = \frac{e}{4\pi\varepsilon_0 a_1^2} \approx 5 \cdot 10^{11} \text{ V/m.}$$

Shuning uchun atomning tashqi elektr maydonda olgan qo‘sishimcha potensial energiyasi

$$\Delta E = e\varepsilon_z, \quad (9.24)$$

uning maydon bo‘lmagandagi to‘la energiyasi

$$E_0 = \frac{P^2}{2m_e} - \frac{e^2}{4\pi\varepsilon_0 r} \quad (9.25)$$

ga tuzatma tarzida qarash mumkin. Kvant mexanikasida bu xil masalalar g‘alayonlanish nazariyasiga asoslangan usul bilan yechila-

di. G‘alayonlanish nazariyasi kvant mexanikasiga oid maxsus darsliklarda beriladi.

Tashqi elektr maydondagi vodorod atomi uchun Shredinger tenglamasini g‘alayonlanish nazariyasi bo‘yicha yechish g‘alayonlanmagan holatning to‘la energiyasiga ikkinchi tartibli yaqinlashishdagi tuzatmani o‘z ichiga olgan quyidagi ifodani beradi:

$$E = E_0 + E^{(1)} + E^{(2)} = -\frac{R\hbar}{n^2} + 3e\varepsilon a_l(n_1 - n_2)\frac{n}{2} - a_l^3 \varepsilon^3 \left[ 17n^2 - 3(n_1 - n_2)^2 - 9m_l^2 + 19 \right] \left(\frac{n}{2}\right)^2, \quad (9.26)$$

bu yerda:  $n$  – bosh kvant soni;  $n=1+|m_l|+n_1+n_2$ ,  $n_1$  va  $n_2$  lar butun musbat sonlar,  $m_l$  – orbital magnit kvant soni.  $E_0$  – atomning  $\varepsilon=0$  holdagi to‘la energiyasi,  $E^{(1)}$  va  $E^{(2)}$  lar g‘alayonlanmagan holatning to‘la energiyasi  $E_0$  ga birinchi va ikkinchi tartibli yaqinlashish tuzatmasi. Birinchi yaqinlashish elektr maydon kuchlanganligiga ( $\varepsilon$ ) nisbatan birinchi tartibli Shtark effektiga olib keladi:  $E=E_0-E^{(1)}$ , ikkinchi yaqinlashish esa  $\varepsilon^2$  nisbatan ikkinchi tartibli Shtark effektini beradi.  $\varepsilon$  va  $\varepsilon^2$  oldidagi doimiy koefisiyeniarni hisoblab,

$$\frac{3}{2}ea_l = \frac{3\hbar^2}{8\pi^2 m_e e} = 1,28 \cdot 10^{-28} \frac{\text{erg}}{\text{V/sm}} = 6,42 \cdot 10^{-5} \frac{\text{sm}^{-1}}{\text{V/sm}};$$

$$\frac{a_l^3}{16} = \frac{-h^6}{16(2\pi e)^6 m_e^3} = -1,04 \cdot 10^{-31} \frac{\text{erg}}{\text{V/sm}} = -5,22 \cdot 10^{-16} \frac{\text{sm}^{-1}}{\text{V/sm}},$$

bunda birinchisi ikkinchisidan taxminan  $10^{11}$  marta katta ekanligi aniqlanadi. Xulosa qilish mumkinki, uncha kuchli bo‘lmagan elektr maydonlarda chiziqli Shtark effekti kuzatilar ekan.

Vodorod atomi sathlarining tashqi elektr maydon ta’sirida ajralishini ko‘rish mumkin.  $n$  – bosh kvant soni va  $n_1$ ,  $n_2$  lar musbat butun sonlar o‘rtasidagi munosabatlardan  $0 \leq n_1 \leq n-1$ ,  $0 \leq n_2 \leq n-1$  va  $|m_l| \leq n-1$  ekanligi kelib chiqadi. Chiziqli Shtark effektida vodorod atomining birinchi to‘rt terminating ajralishi 9.1-jadvalda keltirilgan.

n		$n_1$	$n_2$	$c(n_1 - n_2)n$	n			$n_1$	$n_2$	$c(n_1 - n_2)n$
1	0	0	0	0	4	3	0	0	0	0
2	1	0	0	0	4	2	1	0	4c	
2	0	1	0	2c	4	2	0	1	-4c	
2	0	0	1	-2c	4	1	2	0	8c	
3	2	0	0	0	4	1	0	0	-8c	
3	1	1	0	3c	4	1	1	1	0	
3	1	0	1	-3c	4	0	3	0	12c	
3	0	2	0	6c	4	0	0	3	-12c	
3	0	0	2	-6c	4	0	2	1	4c	
3	0	1	1	0	4	0	1	2	-4c	

$$C = \frac{3\hbar\varepsilon}{8\pi^2 m_e e} = \frac{E^{(1)}}{[\hbar(n_1 - n_2)n]}.$$

Bosh kvant son  $n=1+|m_\ell|+n_1+n_2$ ;  $m_\ell$  – orbital magnit kvant soni.  $E^{(1)}$  – g‘alayonlanmagan holatda birinchi yaqinlashishdagi energiya tuzatmasi. Shunday qilib, tashqi elektr maydoni ta’sirida atom sathlari ajralishidan quyidagi natijalarga kelish mumkin:

1. Bosh kvant sonining ortishi bilan ajralgan komponentalar soni juda tez o‘sadi.  $n=1$  sath butunlay ajralmaydi;  $n=2$  cath uchtaga ajraladi;  $n=3$  sath oltitaga;  $n=4$  sath o‘ntaga ajraladi. Oxirgi ikki holda ba’zi komponentalar energiyasi teng va tegishli sathlar ajralma-gan.  $n=3$  da birinchi va oxirgi komponentalar energiyasi nolga teng va ularning sathlari  $\varepsilon=0$  dagi o‘rnidan siljimagan,  $n=4$  da esa birinchi va beshinchi, ikkinchi va to‘qqizinchi, uchinchi va o‘ninchi komponentalar energiyalari o‘zaro teng. Shunday qilib, berilgan  $n$  da sathlarning ajralish komponentalar soni  $(2n-1)$  ta bo‘ladi.

2.  $n$  sathning  $(2n-1)$  ta komponentasi bilan  $n'$  sathning  $(2n'-1)$  ta komponentasi o‘rtasidagi o‘tishlarning maksimal soni  $(2n-2)(2n'-1)$  taga teng chiziqni berishi kerak.  $(2n-1)(2n'-1)$  o‘tishlarning ba’zilari  $\Delta|m|=0,\pm 1$  tanlash qoidasi bilan taqiqlangan bo‘lishi mumkin.

3. Chiziqli Shtark effektida komponentalarning o‘zaro siljish kattaligi magnit soni  $m_l$  ga bog‘liq bo‘lmasdan ( $n_1 - n_2$ ) ayirmaga bog‘liqdir. Siljish kattaligining qiymati


$$\frac{3ea_1\epsilon(n_1 - n_2)n}{2} = \frac{3ea_1\epsilon(n-1)n}{2n^2}$$

ga proporsional, chunki ( $n_1 - n_2$ ) kattalik ( $n-1$ ) dan ( $n+1$ ) gacha o‘zgaradigan qiymatlar qabul qiladi. Demak, vodorod atomida chiziqli Shtark effekti hosil bo‘lganda, yuqori sathlarning bir-birini qoplashi kuzatilishi kerak. Tashqi elektr maydon kuchlanganligining  $10^6$  V/sm qiymatlaridan boshlab, kvadratik Shtark effekti sezilarli bo‘ladi. Ajralgan har bir chiziq yuqorisidagi chizig‘iga qaraganda ko‘proq siljiydi. Natijada spektr chiziqlari chastotasining ortishi va spektrning qizil tomonga siljishi kuzatiladi.

**Murakkab atomlarda Shtark effekti.** Kuchsiz tashqi elektr maydonida vodorod atomi uchun to‘g‘ri bo‘lgan chiziqli Shtark effekti orbital kvant son ( $\ell$ ) ga nisbatan «aynishga» ega bo‘lmagan sathlarda (vodorodsimon va murakkab atomlarda) yo‘qoladi. Shuning uchun vodorodsimon va boshqa murakkab atomlarda sathlarning kuchsiz tashqi elektr maydoni ta’sirida maydon kuchlanganligining kvadratiga ( $\epsilon^2$ ) proporsional ravishda ajralishi kuzatiladi va bu hol esa (9.24) formulada ifodalangan.

Kuchsiz elektr maydonlaridan kuchli maydonlarga o‘tishda kvadratik Shtark effekti asta-sekin chiziqli effektga o‘tadi.

Ishqoriy metallarning  $D$  chizig‘i uchun Shtark effektini ko‘rish mumkin (9.8-rasm).  $D$  chiziq sathlari  $^2P_{3/2}$ ,  $^2P_{1/2}$  va  $^2S_{1/2}$  tashqi kuchsiz elektr maydonida, to‘la momentning yarim butun son qiymatiga mos.  $I+1/2$  ta komponentalarga ajraladi, ya’ni  $^2P_{3/2}$  sath  $I+1/2=3/2+1/2=2$  taga ajraladi,  $^2P_{1/2}$  va  $^2S_{1/2}$  uchun esa  $I+1/2=1$  ajralmaydi. Bundan tashqari, (9.23) formulaga mos holda sathlarning



9.8-rasm

hammasi har xil qiymatga, energiyasi kichik tomonga siljiydi. Bu holat 9.8-rasmida ko‘rsatilgan. Shunday qilib,  $^2P$  termlar uchta termga ajraladi:  $^2P_{3/2}$  ikitaga va  $^2P_{1/2}$  ning o‘zi.  $^2P$  ning bu uchta komponentalaridan  $^2S_{1/2}$  sathga o‘tishlar uchta chiziqni beradi:

$$^2P_{3/2} \rightarrow ^2S_{1/2}, \quad |m_I| = 3/2 \rightarrow 1/2; \quad ^2P_{3/2} \rightarrow ^2S_{1/2},$$

$$|m_I| = 1/2 \rightarrow 1/2; \quad ^2P_{1/2} \rightarrow ^2S_{1/2}, \quad m_I = 1/2 \rightarrow 1/2.$$

Kuchli elektr maydonga o‘tishda, sathlarning elektr ajralishi shu sathning  $\vec{L}\vec{S}$  o‘zaro ta’siri ostida ajralishi bilan tenglashadi. Tashqi maydon kuchlanganligining ortishida  $\vec{L}$  va  $\vec{S}$  vektorlarning o‘zaro ta’sirini kichik deb, bu ta’sirning energiyasini atom energiya-siga tuzatma sifatida qarash mumkin. Natijada,  $\vec{L}\vec{S}$  bog‘lanish uziladi va  $\vec{L}$  vektorning tashqi kuchli maydonda mustaqil kvantlanishi yuz beradi. Berilgan  $\vec{L}$  bilan aniqlanadigan term  $2L+1$  komponentalarga ajraladi, lekin  $\ell+1$  ta komponentagini har xil energiyaga ega bo‘ladi.

Shunday qilib, chiziqli Shtark effekti kuchli elektr maydonda, kvadratik Shtark effekti esa kuchsiz elektr maydonida hosil bo‘ladi.

### *Nazorat savollari*

1. Zeeman effekti qanday hodisa va u qachon kashf qilingan?
2. Kuchli va kuchsiz magnit maydonlari haqida tushuncha bering.
3. Zeemannning murakkab effektini ayting va uni natriy (Na) dubleti misolda tushuntiring.
4. Magnit maydonidagi atom energetik sathlarining energiyasi formulasida qanday energiyalar hisobga olingan?
5. Zeemannning oddiy effektini ayting va spektral chiziqlar chastotalarini yozib tushuntiring.
6. Pashen va Bak effekti qanday hodisa va qaysi vaqtida sodir bo‘ladi?
7. Qanday moddalar paramagnit moddalar deyliladi?
8. Ajralgan energetik sathchalar orasidagi kvant o‘tishlar qaysi vaqtida sodir bo‘ladi?
9. Paramagnit rezonans qanday hodisa?
10. Shtark effektining hosil bo‘lishini tushuntiring.
11. Chiziqli Shtark effekti qanday effekt, uning hosil bo‘lishi qanday kattalikka bog‘liq va qanday atomlarda kuzatiladi?
12. Kvadratik Shtark effekti qanday kattalikka bog‘liq va u qanday atomlarda kuzatiladi?

## X BOB MOLEKULALAR

### 10.1-§. Molekulalar va ularning hosil bo‘lishi. Kimyoviy bog‘lanish turlari

Molekula – bir jinsli moddaning eng kichik zarrasi bo‘lib, shu moddaning asosiy kimyoviy xossalariiga ega bo‘ladi. «Molekula» tushunchasi fanga 1860-yilda kiritilgan bo‘lib, uning mavjudligi 1906-yilda J. Perren tomonidan tajribada tasdiqlangan. Molekula atomlar orasidagi kimyoviy bog‘lanishlar orqali o‘zaro birlashgan bir xil yoki turli xil atomlardan tashkil topgan barqaror tizimdir. Masalan, vodorod molekulasi ( $H_2$ ), kislorod molekulasi ( $O_2$ ), azot molekulasi ( $N_2$ ), bir xil atomlardan tashkil topgan ikki atomli molekulalardir. Osh tuzi molekulasi ( $NaCl$ ) ikki xil atomlardan tashkil topgan ikki atomli molekuladir. Molekulalar ( $H_2$ ,  $C_6H_6$ ,

$NH_3$ ), atomlar, ionlar ( $SO_4^-$ ,  $BF_4^-$ ,  $NO_3^-$ ), radikallar ( $CH_3$ ,  $OH$ ,  $C_5H_5$ ) orasida kimyoviy kuchlar ta’sir qiladi. Bu kuchlar molekulalarning erkin, ya’ni boshqa zarralardan ajralgan alohida holatidagi barqarorligini ta’minlaydi. Masalan,  $C_2$ ,  $CH_3$ ,  $I_2$  molekulalari erkin, alohida holatda keraklicha uzoq vaqt mavjud bo‘la oladi. Lekin ular bir-biri bilan birlashsa, oddiy sharoitda ham tegishlicha grafit, etan, yod kristalliga aylanadi. Bunday molekulalar atomlar orasidagi kimyoviy bog‘lanishlar tufayli mustaqil mavjud bo‘la oladi. Kimyoviy bog‘lanishlar – ikki yoki bir nechta atomlarning o‘zaro ta’sirlashuv natijasida kimyoviy barqaror tizimlar (molekulalar, radikallar, kristallar va b.) hosil bo‘lishidir. Atomlar orasidagi kimyoviy bog‘lanishlar atomning tashqi qobig‘idagi elektronlarning (valent elektronlarning) turli xil o‘zaro ta’sirlari orqali tushuntiriladi.

Ichki qobiq elektronlari atomning kimyoviy xossalariiga ta’sir qilmaydi. Elementlarning kimyoviy xossalari tashqi qobiq elektronlari bilan aniqlanadi. Atomlardan molekulalar hosil bo‘lishida ta’sir qiladigan kuchlar musbat zaryadlangan yadro va manfiy zaryadlangan elektronlar orasidagi elektrostatik o‘zaro ta’sir kuchlaridan iboratdir. Atom spektrlarini tahlil qilish, spektrlarda kuzatiladigan

asosiy qonuniyatlar atom elektron qobig'i tuzilishi va atom elektron holatlari bilan bog'liqligini ko'rsatadi. U yoki bu molekulaning hosil bo'lishida atomlarning muhim bo'lgan kimyoviy xossalari ham elektron qobiqlar xossalari bilan tushuntiriladi. Lekin atomlarning kimyoviy xossasi bitta atomda emas, balki o'zaro ta'sirlashib molekula hosil qiladigan atomlar to'plamida namoyon bo'ladi. Bu esa molekulani tashkil etuvchi atomlar o'zaro ta'sirlashuvchi kuchlar bilan bog'langanligini ko'rsatadi. Molekulani atomlarga ajratish uchun ma'lum miqdorda ish bajarish kerak, ya'ni energiya sarflash kerak. Aksincha, molekula hosil bo'lish jarayonida energiya ajraladi. Bu esa molekula atomlarini bog'lab turuvchi kuch mavjudligini ko'rsatadi. Molekula hosil bo'lishida ajraladigan energiya molekulada atomlarni bog'lab turadigan o'zaro ta'sir kuchi o'lchovi hisoblanaadi. Molekulalar ikki atomdan, uch atomdan va ko'p sondagi atomlar-dan tuzilgan bo'lishi mumkin. Masalan, osh tuzi bir natriy atomidan va bir xlor atomidan tuzilgan, ya'ni osh tuzi molekulasi ikki atomli molekuladir. Suv molekulasi ikki vodorod atomidan va bir kislorod atomidan tuzilgan, ya'ni uch atomli molekulani hosil qiladi. Molekulalar o'lchami turli moddalar molekulalari uchun turlichcha bo'ladi. Masalan, vodorod molekulasi ( $H_2$ ) o'lchami  $2,47 \cdot 10^{-8}$  sm, kislorod molekulasi ( $O_2$ ) o'lchami  $2,98 \cdot 10^{-8}$  sm, suv molekulasi ( $H_2O$ ) o'lchami  $2,72 \cdot 10^{-8}$  sm va h.k. Molekulalar o'lchami diffuziya, issiqlik o'tkazuvchanlik, ichki ishqalanish hodisalari asosida aniqla-nadi. Atomlarning molekulaga birikishi to'ldirilmagan tashqi elektron qobiq bilan bog'liq.

Molekuladagi atomlar aniq bir tartib bilan o'zaro bog'langan va fazoda ma'lum tartibda joylashgan bo'ladi. Molekula tuzilishi fazoda va vaqt oraliq'ida barqarorligi bilan xarakterlanadi. Molekulaning barqarorligi uning boshqa zarralar bilan o'zaro ta'siriga, temperaturega, bosimga va boshqa tashqi faktorlarga bog'liq bo'ladi. Masalan, juda yuqori temperaturalarda ko'pchilik molekulalar atomlarga ajraladi, ya'ni molekulyar tuzilishi buziladi. Molekulaning asosiy xarakteristikasi bu uning ichki energiyasi bo'lib, faqat kvantlangan qiymatlarni qabul qiladi. Molekula hosil bo'lishida atomlar orasidagi kimyoviy bog'lanishlarda atomlarning o'zaro bog'lanish sohasida elektronlar zichligining qayta taqsimlanishi muhim o'rinn tutadi. Atomlarning o'zaro bog'lanishi elektronlar zichligi taqsimlanishining

qandayligiga bog‘liq ravishda asosan uch tur kimyoviy bog‘lanish-larni tashkil qiladi – kovalent (gomepolyar), ion (geteropolyar) va metall bog‘lanishlar. Bu bog‘lanishlarning har birining o‘z nazariyasi mavjud.

## 10.2-§. Ion bog‘lanish


Elektrostatik tortishuv tufayli ionlar orasida vujudga keladigan kimyoviy bog‘lanish *ion bog‘lanish* deyiladi. Ionlarning o‘zaro tortishish yo‘li bilan hosil bo‘lgan molekulalar *ion yoki geteropolyar molekulalar* deb ataladi. Ionli molekulalar hosil bo‘lishi asosida tashqi qobiqchalari turlichra to‘ldirilgan, ya’ni elektromanfiyliги bir-biridan keskin farq qiladigan atomlarning o‘zaro ta’sirlashuvi turadi. Bunday atomlar o‘zaro ta’sirlashganda, elektron buluti elektromanfiyliги kuchli bo‘lgan atomga tomon siljiydi, ya’ni qutblanadi. *Qutblanish* – elektr maydoni ta’sirida elektr zaryadi elektron zichligining siljishidir. Eng ko‘p bir tomonlama qutblanish ion bog‘lanishda hosil bo‘ladi. Elektromanfiylik bog‘langan atomning boshqa atomlar elektron qobig‘idan elektronni tortish xususiyatidir.

Elementlar davriy sistemasida I va II guruhlar metallari va tipik metallmaslar – galogenlar ionli molekulalarni hosil qiladi. Masalan,  $\text{NaCl}(\text{Na}^+, \text{Cl}^-)$ ,  $\text{CsI}(\text{Cs}^+, \text{I}^-)$ ,  $\text{LiF}(\text{Li}^+, \text{F}^-)$  va boshqa molekulalar ionli molekulalarga misol bo‘ladi. Ishqoriy metallarda tashqi elektron qobiqdagi s holat elektronlari yadro bilan kuchsiz bog‘langan, ular kimyoviy reaksiyalarda o‘z atomidan yengilgina ajraladi. Masalan, natriy ( $\text{Na}$ ) atomida (natriyning elektron konfiguratsiyasi  $1s^2 2s^2 2p^6 3s^1$ )  $3s^1$  holatdagi bir elektron o‘z atomidan yengilgina ajraladi. Bunda bir elektroni ajralgan natriy atomi natriyning musbat  $\text{Na}^+$  ioniga aylanadi. Aksincha, metallmaslar – galogenlar atomlarida tashqi elektron qobiq elektronlari yadro bilan kuchli bog‘langan bo‘lib, kimyoviy reaksiyalarda boshqa elektronni biriktirib oladi. Masalan, xlor ( $\text{Cl}$ ) atomining (xlorning elektron konfiguratsiyasi  $1s^2 2s^2 2p^6 3s^2 3p^5$ ) tashqi qobig‘ida  $3p^5$  holat elektron bilan to‘lishiga bir elektron yetmaydi, u yana bir elektronni biriktirib oladi,  $3p$  holat to‘ladi. Bunda xlorning manfiy ionii  $\text{Cl}^-$  hosil bo‘ladi. Demak, xlorning elektron manfiyligi yuqori.

Ikki xil ishorali  $\text{Na}^+$  va  $\text{Cl}^-$  ionlar orasida vujudga keladigan kulon elektrostatik tortishish kuchi tufayli ionli  $\text{NaCl}$  molekula hosil bo'ladi.

Ionli molekulalar umumiy nazariyasini 1925-yilda M.Born va V.Geyzenberglar klassik tasavvurlar asosida ishlab chiqdilar. Bunda bog'lanish energiyasini hisoblashda elektrostatik tasavvurga asoslangan holda yarimempirik hisoblash usulidan foydalanildi. Bir-biridan yetarlicha masofada uzoqlashtirilgan ikki ion (masalan,  $\text{Na}^+$  va  $\text{Cl}^-$  ionlari) birinchi yaqinlashishda bir-biri bilan nuqtaviy zaryadlar kabi Kulon qonuni bo'yicha tortishadi. Bunday o'zaro ta'sir energiyasi quyidagicha aniqlanadi:

$$U_e = -\frac{e^2}{4\pi\epsilon_0 r}. \quad (10.1)$$



10.1-rasm

Keyingi yaqinlashishda ionlarning o'zaro qutblanishini hisobga olish kerak. Molekulada ionlarning har biri qo'shni ionning elektr zaryadi ta'sirida qutblanadi, ya'ni ionlarda manfiy va musbat zaryadlarning siljishi hosil bo'ladi. Natijada har bir ionning induksiyalangan  $P_1$  va  $P_2$  dipol momentlari hosil bo'ladi. Bu dipol momentlari molekulaning ionlar hosil qilgan dipol momenti  $P$  ga qarama-qarshi yo'nalган bo'ladi. Ionlarning qutblanishi natijasida ularning elektron buluti deformatsiyalanadi. Buni har bir ionning yadrosi va elektron bulutining  $d$  masofaga nisbiy siljishi deb qarash mumkin (10.1-rasm).

Har bir ionning induksiyalangan dipol momentining kattaligi elektr maydoni kuchlanganligi orqali aniqlanadi:

$$P = ed = \epsilon_0 \alpha E. \quad (10.2)$$

Bunda  $\alpha$  — ion elektron bulutining deformatsiyalish xususiyatini ifodalaydi va unga *qutblanuvchanlik* deyiladi. U vaqtida (10.1) formuladagi Kulon o'zaro ta'sir energiyasiga yana har bir ion dipol momentining qo'shni ion yig'indi zaryadi bilan o'zaro ta'sir energiyasi ( $UP$ )ni qo'shish kerak bo'ladi:

$$U_P = -\frac{e}{4\pi\epsilon_0 r^2} (P_1 + P_2). \quad (10.3)$$

(10.3) ifodadagi energiyaga dipollarning hosil bo‘lishiga sarflangan energiya ( $U_\alpha$ ) ni ham qo‘shish kerak bo‘ladi. Bu energiyani zaryadlarning siljishi uchun bajarilgan ish deb ham qarash mumkin, ya’ni:

$$U_\alpha = \varepsilon_0 \int_0^{E_1} \alpha_1 E_1 dE_1 + \varepsilon_0 \int_0^{E_2} \alpha_2 E_2 dE_2 = \frac{P_1^2}{2\varepsilon_0\alpha_1} + \frac{P_2^2}{2\varepsilon_0\alpha_2}. \quad (10.4)$$

Endi dipollarning o‘zaro ta’sir energiyasi ( $U_{P_1 P_2}$ )ni ham hisobga olish kerak bo‘ladi:

$$U_{P_1 P_2} = -\frac{P_1 P_2}{2\pi\varepsilon_0 r^3}. \quad (10.5)$$

Faqat ionlarning o‘zaro tortishishi to‘liq ravishda qoplashga olib kelishi kerak edi. Lekin bunday bo‘lmaydi, chunki kichik masofalarда ionlar qobiqlari ustma-ust tushadi va bunda itarishish kuchlari yuzaga keladi. Bu kuchlarning tabiatini yetarlicha murakkab bo‘lib, klassik mexanikada itarishish kuchlari energiyasini aniqlashda quyidagi empirik formuladan foydalaniladi:

$$U_n = \frac{B}{r^n}. \quad (10.6)$$

Kvant mexanikasida itarilish to‘ldirilgan elektron qobiqlarning almashtirish integrali sifatida namoyon bo‘ladi. Ionlar elektron qobiqlarining o‘zaro singishlarida har bir yadro maydoniga qo‘shimcha elektronlar tushadi.

Birinchi yaqinlashishda ionli molekulaning bog‘lanish energiyasini hisobga olmagan holda (10.1) va (10.6) formulalardan aniqlash mumkin:

$$U = U_e + U_n = -\frac{e^2}{4\pi\varepsilon_0 r} + \frac{B}{r^n}. \quad (10.7)$$

Muvozanat holatda  $U$  energiya minimal bo‘ladi va  $r=r_0$ . Shuning uchun

$$\left( \frac{dU}{dr} \right)_{r=r_0} = \frac{e^2}{4\pi\varepsilon_0 r_0^2} - \frac{nB}{r_0^{n+1}} = 0.$$

Bundan

$$B = \frac{e^2}{4\pi\varepsilon_0 n} \cdot r_0^{n-1}.$$

Shunday qilib,  $r=r_0$  bo'lganda ionli molekulaning bog'lanish energiyasi quyidagicha aniqlanadi:

$$U_{r=r_0} = -\frac{e^2}{4\pi\varepsilon_0 r_0} \left(1 - \frac{1}{n}\right), \quad (10.8)$$

bunda  $r_0$  va  $n$  kattaliklar molekulaning boshqa xususiyatlarini tekshiradigan tajribalardan aniqlanadi. Odatda, kristallar uchun  $r_0$  rentgenografiya yoki elektronografiya usullari orqali topiladi,  $n$  kristallarning siqilishiga qarab aniqlanadi. Barcha aniq kristall panjaralar uchun  $n$  ning qiymati 6 dan 10 gacha bo'ladi va ionda elektronlar sonining ortishi bilan ortib boradi.  $r_0$  ning son qiymatidan foydalangan holda (10.8) ifodadan bir qator ionli molekulalarning bog'lanish energiyasini aniqlash mumkin. Olingan natijalar 5–10% aniqlikda tajriba natijalari bilan mos keladi.

### 10.3-§. Kovalent bog'lanish. Vodorod molekulasingin kvant nazariyasi

Kovalent bog'lanishda molekula bir xil element atomlaridan tashkil topgan bo'ladi. Bunday molekula hosil bo'lishidagi bog'lanish kovalent bog'lanish yoki gomopolyar (grekcha «gomeo» degan so'zdan olingan bo'lib, «bir xil» degan ma'noni bildiradi) bog'lanish deyiladi.


Kovalent bog'lanish kvant mexanikasi nuqtai nazaridan tushuntiriladi. Kovalent bog'lanishni ikkita vodorod atomidan tashkil topgan vodorod molekulasi hosil bo'lishi misolida ko'rish mumkin. O'zaro ta'sirlashmaydigan masofada joylashgan ikkita vodorod atomi bo'lsin. Birinchi atomdagi elektronning ham, ikkinchi atomdagi elektronning ham yadrodan biror masofa uzoqlikda bo'lishining ehtimoliyati (elektronning to'lqin funksiyasining kvadrati) aynan bir xil bo'ladi.

Eng oddiy hol elektron  $\ell=0$  bo'lgan  $s$  holatda bo'lganda ehtimoliyat sferik-simmetrik bo'ladi, ya'ni elektron bulut biror radiusli sferadan iborat bo'ladi. Endi har ikki atomni bir-biri bilan ta'sirlashadigan masofaga joylashtirilganda, ikkala atomning elektron bulutlari tutasha

boshlaydi. Buni quyidagicha tushuntirish mumkin: har ikki atom o'zaro ta'sirlashmaydigan masofada joylashtirilganda atomlarda elektronlar faqat o'z yadrolari atrofida harakatlanar edi. Atomlar bir-biriga yaqinlashganda esa birinchi atom elektronini ikkinchi atom yadrosi atrofida, ikkinchi atom elektroni esa birinchi atom yadrosi atrofida qayd qilish ehtimoliyati noldan farqli bo'ladi. Atomlar yanada yaqinlashganda, ularning elektron bulutlari shunchalik tutashib ketadiki, bunda birinchi atom elektroni yoki ikkinchi atom elektroni degan so'zlarga o'rinn qolmaydi. Bunda kvant mexanikasidagi bir xil zarralarni farq qilib bo'lmaslik prinsipini hisobga olish kerak bo'ladi, chunki har ikki atom elektronlari bir-biridan farq qilmaydi, ikkala elektronning ham zaryadi, massasi, spini bir xil. Bunday holda har bir elektron bir vaqtning o'zida ikkala atomga ham tegishli bo'ladi. Ikkala elektronning umumiylashgani uchun ikki yadro oralig'ida elektron buluti zichligi ortadi, bu esa yadrolarni bir-biriga maksimal yaqinlashtiradi. Yadrolar orasidagi masofaning biror  $r_0$  qiymatida kovalent bog'lanishda ikki atomli barqaror molekula hosil bo'ladi.

Kovalent bog'lanishga vodorod molekulasingin hosil bo'lishi misol bo'la oladi. 1927-yilda V. Gaytler va F. London birinchi marta vodorod molekulasi ( $H_2$ )ning asosiy holati uchun kvant mexanik hisoblashlarni o'tkazdilar. Bu esa kvant kimyosining rivojlanishiga asos bo'ldi. Gaytler va London ishlarida gomepolyar bog'lanishning fizikaviy tomonlarini ko'rib chiqildi. Hamma molekulalar atom yadrolaridan va elektronlardan tuzilgan. Yadro va elektron massalari bir-biridan katta farq qilgani uchun yadroning nisbiy harakati elektron harakatidan yuz martalab kichik deb hisoblash mumkin. Shuning uchun statsionar holat masalasini yadro harakatini hisobga olmay balki, kuch markazi maydonida faqat elektronlar harakatini hisobga olgan holda yechish mumkin. Kuch markazlarining (atom yadrolarining) nisbiy joylashishi molekulaning fazoviy konfiguratsiyasini aniqlaydi, bunda turg'un muvozanat molekulaning eng kichik energiyasiga tegishli bo'ladi. Kvant mexanikasida Shredinger tenglamasidan foydalilaniladi, bu tenglanaming ko'rinishi molekulaning murakkabligiga bog'liq bo'ladi. Vodorod –  $H_2$  molekulasi uchun Shredinger tenglamasini quyidagicha yozish mumkin:

$$\sum_{i=1}^2 \left( \frac{\partial^2 \psi}{\partial x_i^2} + \frac{\partial^2 \psi}{\partial y_i^2} + \frac{\partial^2 \psi}{\partial z_i^2} \right) + \frac{2m}{\hbar^2} (E - U) \psi = 0. \quad (10.9)$$



langan. Agar protonlar orasidagi masofa juda katta bo'lmasa, molekulani tashkil qilgan atomlar to'lqin funksiyalari bir-birini qoplaydi. Bunda har bir elektron har ikki atomga tegishli bo'lib, atomlar orasida elektronlar almashinishi bo'ladi, bunda almashinish kuchlari paydo bo'ladi. Bu esa kovalent bog'lanishni hosil qiladi. (10.9) ifodadagi Shredinger tenglamasida  $U$  molekulaning potensial energiyasi bo'lib, u uch haddan iboratdir, ya'ni

$$U = U_1 + U_2 + U', \quad (10.10)$$

bunda:  $U_1 = -e^2 / 4\pi\epsilon_0 r_{a_1}$  –  $a$  yadro maydonidagi birinchi elektronning energiyasi,  $U_2 = -e^2 / 4\pi\epsilon_0 r_{b_2}$  –  $b$  yadro maydonidagi ikkinchi elektronining (10.1-rasm) energiyasi,  $U'$  – yadro va elektronlar orasidagi o'zaro ta'sir energiyasi.

$$U' = - \left( \frac{1}{r_{a_2}} + \frac{1}{r_{b_1}} - \frac{1}{r_{12}} - \frac{1}{R} \right), \quad (10.11)$$

(+) ishoraga ega bo'lgan hadlar elektronlar va yadrolarning o'zaro itarishish energiyasini bildiradi,  $R$  protonlar orasidagi masofa. Tizimning to'lq energiyasi ( $E$ ) kimyoviy bog'lanishlar o'chovi deb hisoblanadi. Potensial energiya  $R$  va  $r$  masofalarning uzlusiz funksiyasi bo'lsa, to'lq energiya  $E$  aniq masofalar uchun aniq qiymatlarni qabul qiladi. Bu energiya qiymatlaridan tizimning turg'un holatiga tegishli bo'lgan eng kichik qiymati muhimdir. (10.9) tenglamani aniq yechish mumkin bo'lmaganligi uchun yaqinlashish usulidan foydalilanadi.

Nolinchi yaqinlashishda vodorod molekulasi o'zaro ta'sirlashmaydigan ikki vodorod atomidan tashkil topgan bo'lib,  $1s$  ( $R=\infty$ ) holatda deb qaraladi. Shuning uchun nolinchi yaqinlashishda potensial energiya  $U=U_1+U_2$  kattalikka teng bo'ladi. Birinchi va ikkinchi atomlar o'zlarining  $\psi_a(1)$  va  $\psi_b(2)$  to'lqin funksiyalari bilan xarakterlanadi. O'zaro ta'sirlashmaydigan ikki atomdan iborat sistemaning to'lqin funksiyasi shu atomlar funksiyalari ko'paytmasidan iborat:

$$\Psi_1 = \psi_a(1) \psi_b(2), \quad (10.12)$$

nolinchi yaqinlanishda sistemasining to'liq energiyasi ikkita vodorod atomining  $1s$  holatidagi bir xil energiyalari yig'indisiga teng:

$$E^{(0)} = E_1 + E_2 = 2E_0. \quad (10.13)$$

$\psi_i$  ikki atomdan iborat sistemasi uchun yagona funksiya emas. Bu funksiyaning kvadrati birinchi elementlari  $a$  — yadro atrofida va bir vaqtida ikkinchi elektronning  $b$  — yadro atrofida topilish ehtimoliyatini bildiradi. Elektronlar to'lqin xossasiga ega bo'lgani uchun bir tizimga tegishli bo'lgan elektronlarni bir-biridan ajratib bo'lmaydi. Shuning uchun elektronlar o'rnlari almashtirilganda, tizimda hech qanday o'zgarish bo'lmaydi. Elektronlar o'rnlari almashtirilgandagi

$$\Psi_2 = \psi_a(2) \psi_b(1) \quad (10.14)$$

to'lqin funksiyasi ham nolinchi yaqinlashishda tenglama yechimi bo'la oladi. Bu to'lqin funsiyasiga to'g'ri keladigan energiya  $E^{(0)}=2E_0$  kattalikka teng. Energianing  $E^{(0)}$  qiymatiga ikkita xususiy funksiya, ikkita holat to'g'ri keladi. Bunday holatlar *aynigan holatlar* deyiladi. Qaralgan bunday holatda aynish *almashilgan aynish* deyiladi. Ko'rilgan holatlar molekulaning real holatini ifodalamaydi. Nolinchi yaqinlashishning  $\Psi_1$  va  $\Psi_2$  funksiyalari energiyasi bir xil  $E^{(0)}$  bo'lgan holatlarga tegishlidir. Bu vaqtida  $\Psi_1$  va  $\Psi_2$  funksiyalar ixtiyoriy chiziqli tenglamaning nolinchi yaqinlashishdagi yechimi bo'la oladi. Shunday qilib, Shredinger tenglamasining yechimini quyidagicha ifodalash mumkin:

$$\Psi(1,2) = C_1 \Psi_1 + C_2 \Psi_2 = C_1 \psi_a(1) \psi_b(2) + C_2 \psi_a(2) \psi_b(1). \quad (10.15)$$

(10.15) da  $C_1$  va  $C_2$  lar masalaning fizikaviy shartlarini qanoatlantiradigan koeffitsientlardir. Haqiqatdan ham  $\Psi(1,2)$  funksiyaning kvadrati birinchi va ikkinchi elektronning yadrodan u yoki bu masofada

bir vaqtda topilish ehtimolligi zichligini ifodalaydi. Elektronlar bir-biridan farq qilinmaganligi uchun quyidagi shart bajarilishi zarur:

$$\Psi^2(1,2) = \Psi^2(2,1). \quad (10.16)$$

Bu holat  $C_2^1 = C_2^2$  bo'lganda o'rinali bo'ladi. U vaqtda  $\psi(1,2)$  funksiyasi uchun ikkita qiymat mavjud:

$$\begin{aligned} \Psi_+(1,2) &= C(\Psi_1 + \Psi_2) = C[\psi_a(1)\psi_b(2) + \psi_a(2)\psi_b(1)], \\ \Psi_-(1,2) &= C'(\Psi_1 - \Psi_2) = C'[\psi_a(1)\psi_b(2) - \psi_a(2)\psi_b(1)]. \end{aligned} \quad (10.17)$$

$C_1$  va  $C_2$  ning boshqa qiymatlarida (10.16) shart bajarilmaydi.  $\Psi^+$  funksiya simmetrik bo'lib, elektronlar o'rirlari almashganda o'z qiymatini saqlaydi:

$\Psi_-(1,2)$  funksiya assimmetrik bo'lib, elektronlar o'rinali almashganda o'z ishorasini o'zgartiradi:

$$\Psi_+(1,2) = \Psi_+(2,1).$$

Har ikkala funksiyalar kvadrati (10.16) shartni qanoatlantiradi. Boshlang'ich  $\Psi_1$  va  $\Psi_2$  funksiyalar o'mniga  $\Psi_+(1,2)$  va  $\Psi_-(1,2)$  funksiyalar hosil bo'ladi. Bu funksiyalar masalaning fizikaviy mazmunini qanoatlantiradi. Endi o'zaro ta'sir potensial energiyasi  $U_1$  ni hisobga oladigan yaqinlashishga o'tamiz. Variatsiya usuli bilan o'tkazilgan hisoblashlar ko'rsatadiki, o'zaro ta'sir natijasida  $\Psi_+$  va  $\Psi_-$  funksiyalarga to'g'ri keladigan energiya qiymatlari turlicha bo'ladi. Simmetrik funksiya  $\Psi_+$  uchun energiya quyidagicha aniqlanadi:

$$E_+ = 2E_0 + \frac{K + A}{1 + S^2}, \quad (10.18)$$

antisimmetrik funksiya  $\Psi_-$  uchun esa

$$E_- = 2E_0 + \frac{K - A}{1 - S^2}. \quad (10.19)$$

Bu formulalarda

$$K = \frac{e^2}{4\pi\varepsilon_0} \iint \psi_a^2(1) \left( \frac{1}{R} + \frac{1}{r_{12}} - \frac{1}{r_{b_1}} - \frac{1}{r_{a_2}} \right) \psi_a^2(2) d\vartheta_1 d\vartheta_2,$$


bunda:  $K$  – Kulon integrali elektronlar bilan yadro orasidagi elektrostatistik o'zaro ta'sirni xarakterlaydi.

$$A = \frac{e^2}{4\pi\epsilon_0} \iint \psi_a(1) \psi_b(1) \left( \frac{1}{R} + \frac{1}{r_{12}} - \frac{1}{r_{b_1}} - \frac{1}{r_{a_2}} \right) \psi_a(2) \psi_b(2) d\theta_1 d\theta_2$$

kattalikni *almashinish integrali* deyiladi. Almashinish integrali elektronlarni bir-biridan farq qilib bo'lmasligi va Pauli prinsipini hisobga olib, simmetrik va antisimetrik yaqinlashgan to'lqin funksiyalari kiritilishi natijasida hosil bo'ladi. Simmetrik va antisimetrik to'lqin funksiyalari elektron koordinatalarining almashirilishi bilan bir-biridan farq qiladi. Elektronlarni bir-biridan ajratib bo'lmasligi natijasida quyidagi qoplash integrali hosil bo'ladi:

$$S = \int \psi_a(1) \psi_b(1) d\theta_1 = \int \psi_a(2) \psi_b(2) d\theta_2,$$

*S* – kattalik qoplash integrali deyiladi. *K* va *A* kattaliklar muvozanatli masofada manfiydir. *S* o'lchamsiz kattalik bo'lib, muvozanatli yadroviy masofalarda 0,56 ga teng. Absolyut qiymat jihatdan  $|A| > |S|$ . Antisimetrik va simmetrik holatlar uchun (10.18) va (10.19) formulalar bilan hisoblangan energiyalarning atomlar orasidagi masofaga bog'liqligi 10.3-rasmda keltilrilgan. *A* ning oldidagi turli ishoralar har ikkala holatni sifat jihatdan farq qilinishiga olib keladi. Antisimetrik to'lqin funksiyasiga  $\Psi_-$  tegishli bo'lgan  $E_-$  egri chizig'i ixtiyoriy *R* masofada atomlarning itarilishini ko'rsatadi.  $E_+$  egri chizig'i  $R_0$  nuqtada minimumga ega bo'lib,  $R_0$  dan kichik masofalarda atomlarning itarishishini va  $R_0$  dan katta masofalarda esa tortishishini xarakterlaydi. *R* ning ortishi bilan har ikkala egri chiziq  $2E_0$  qiymatga assimptotik yaqinlashadi, chunki katta masofalarda atomlar orasidagi o'zaro ta'sir yo'qoladi, energiya esa alohida atomlar energiyalari yig'indisiga teng bo'ladi.  $E_+$  va  $E_-$  egri chiziqlarni taqqoslash shuni ko'rsatadiki, gomeopolyar bog'lanish almashinish integrali bilan tushuntiriladi. Bundan tashqari, bog'lanish energiyasi kattaligi amalda almashinish integrali kattaligiga teng. (10.18) va (10.19) formulalarda almashinish integrali *A* va qoplash integrali *S* ni hisobga olmasdan, faqat Kulon o'zaro ta'sir



10.3-rasm

hadi  $K$  gina hisobga olinsa, tegishli hisoblashlardan hosil qilinadigan natija  $EK$  10.3-rasmda punktir egri chiziq'i bilan ifodalangan. Bu egri chiziq  $R_0$  yaqinida minimumga ega. Bu esa kovalent bog'lanishning kvant xarakterga ega ekanligini ko'rsatadi.

Vodorod molekulasida elektronlarning fazoviy taqsimlanishini ko'raylik. Elektronning biror hajmining ixtiyoriy sohasida topilish ehtimoliyati zichligi

$$\Psi_{\pm}^2(1,2) = \Psi_{\pm}^2(2,1) \quad (10.20)$$


kattalik bilan aniqlanadi. (10.17) ifodaga asosan

$$\Psi_{+}^2 = C^2 (\Psi_1^2 + \Psi_2^2 + 2\Psi_1\Psi_2),$$

$$\Psi_{-}^2 = C^{-2} (\Psi_1^2 + \Psi_2^2 - 2\Psi_1\Psi_2).$$

Vodorod ikki atomining o'zaro ta'siri natijasida elektron zichligi holatga bog'liq ravishda  $2\Psi_1\Psi_2$  kattalikka kamayadi yoki ortadi.

$\Psi_1^2 + \Psi_2^2$  kattalikka qaraganda  $\Psi_1\Psi_2$  kattalik vodorod yadrolari orasidagi fazoda eng katta qiymatga ega bo'ladi. Bog'lanish hosil bo'lganda ( $\Psi_+$ ) funksiya yadrolar orasidagi sohada elektron buluti zichligi ortadi, itarishishda ( $\Psi_-$ ) funksiya esa kamayadi. Elektron zichligining taqsimlanishida  $\Psi^2$  ning qiymatlari 10.4 va 10.5-rasmlarda ifodalangan.



Bunda  $\Psi^2$  ning bir xil qiymatlarining chiziqlari (bir xil zichliklar) ko'rsatilgan. Chiziq oldidagi katta son qiymati elektron topilish ehtimoliyati zichligining kattaligini bildiradi. Rasmdan ko'rindaniki, vodorod atomlaridan  $H_2$  molekulasingin hosil bo'lishi yadrolar orasidagi elektron buluti zichligining ortishi bilan amalga oshadi.

## 10.4-§. Molekulalar spektrlari

Molekulalar spektri o‘z tabiatи bilan atomlarning chiziqli spektri dan farq qiladi. Molekulalar spektrлari o‘z xarakteriga ko‘ra yo‘l-yo‘l spektrлar deb ataladi. Spektrda yo‘llar ma’lum bir tartibda joylashgan bo‘lib, yo‘llar seriyalarni tashkil qiladi. Spektrda bir qator seriyalar kuzatiladi. Molekulalar spektri atom spektrига qaraganda murakkab tuzilgan, bu esa molekulalarning tuzilishi murakkab ekanligini ko‘rsatadi.


Molekulalar nurlanishi spektrining hosil bo‘lishini quyidagicha tushuntirish mumkin: molekulalar nurlanishi molekulaning bir statsionar energetik sathdan undan quyiroqda joylashgan sathga o‘tishida hosil bo‘ladi. Molekula statsionar holatining energiyasi bir necha faktorlarga bog‘liq. Masalan, ikki atomdan tashkil topgan molekulaning energiyasi uch qismdan iborat: 1. Molekulaning elektron qobig‘ining energiyasi  $E_{elek}$ ; 2. Molekula tarkibidagi atomlar yadrolarining tebranish energiyasi  $E_{tebr}$ ; 3. Molekula o‘zining biror o‘q atrofida aylanish energiyasi  $E_{ayl}$ .

Molekulaning bu uch xil energiyasidan hosil bo‘ladigan energetik sathlar 10.6-rasmда tasvirlangan. Rasmда molekulaning tebranma, aylanma, elektron energetik sathlari ko‘rsatilgan. Molekulaning tebranma energiyasi elektron bulut energiyasini orttiradigan qoshimcha kattalik qaralishi mumkin. Molekulaning aylanishi esa har bir tebranish energetik sathini bir necha bir-biriga yaqin joylashgan sathlarga ajralishiga olib keladi. Bu sathlar *aylanma sathlar* deb ataladi.

Yuqoridagi mulohazalarga asosan molekulaning to‘liq energiyasi quyidagi energiyalar yig‘indisidan iborat bo‘ladi:

$$E = E_{elek} + E_{tebr} + E_{ayl}.$$

Molekula bir energetik holatdan ikkinchi energetik holatga o‘tganda energiyasining uchala qismi ham bir vaqtning o‘zida o‘zgarishi mumkin. Energiya-



10.6-rasm

ning bunday o‘zgarishida chiqadigan nurlanish chastotasi Bor chas-talar qoidasi asosida aniqlanadi, ya’ni:

$$\Delta E = E_2 - E_1 = h\nu.$$

Bu formulaga asosan molekula nurlanishi kvantining chastotasi quyidagicha ifodalanadi:

$$v = \frac{\Delta E}{h} = \frac{\Delta E_{elek}}{h} + \frac{\Delta E_{tebr}}{h} + \frac{\Delta E_{ayl}}{h}, \quad (10.21)$$

(10.21) formulada  $\Delta E_{elek}$ ,  $\Delta E_{tebr}$ ,  $\Delta E_{ayl}$  kattaliklar  $E_{elek}$ ,  $E_{tebr}$ ,  $E_{ayl}$  energiyalarning o‘zgarishini bildiradi.  $E_{elek}$ ,  $E_{tebr}$ ,  $E_{ayl}$  energiyalar diskret qiymatlarni qabul qiladi. Molekulalar spektrining turli qismlarida yo‘l-yo‘llar hosil qiladigan zinch joylashgan chiziqlarning paydo bo‘lishi quyidagi munosabat bilan tushuntirilishi mumkin:

$$\Delta E_{ayl} \ll \Delta E_{tebr} \ll \Delta E_{elek}.$$

Spektrning infraqizil qismida ( $\lambda=0,1\div1 \text{ mm}$ ) molekulaning bir aylanma energetik sathdan boshqasiga o‘tishida molekulaning aylanma spektrining spektral chiziqlari hosil bo‘ladi. Molekulaning bir tebranma energetik sathdan ikkinchisiga o‘tishida spektrning infraqizil qismida molekulaning tebranma spektri chiziqlari hosil bo‘ladi. Molekulaning tebranma energetik sathlari energiyasi o‘zgarishida, bir vaqtida uning aylanma energetik sathlari energiyasi ham o‘zgaradi. Shuning uchun molekulaning tebranma energetik sathlari orasidagi o‘tishlari tebranma-aylanma o‘tishlar deb qaratadi. Bundan esa molekulaning chastotasi  $v_{tebr-ayl}$  bo‘lgan tebranma-aylanma spektri hosil bo‘ladi. Bu spektr bir-biriga yaqin chiziqlar guruhlaridan iborat bo‘ladi va berilgan tebranma o‘tishlar aylanma o‘tishlar bilan bir vaqtida bo‘lishi orqali aniqlanadi. Molekulalar spektrining ko‘rinadigan va ultrabinafsha sohalari molekulaning elektron energetik sathlari orasidagi o‘tishlarda hosil bo‘ladi. Har bir elektron energetik sathga molekuladagi yadrolarning mumkin bo‘lgan turli tebranishlari to‘g‘ri keladi, ya’ni tebranuvchi energetik sathlar to‘plami to‘g‘ri keladi. Elektron tebranma sathlar orasidagi o‘tishlar molekulaning elektron tebranma spektrini hosil qiladi, bu spektr chastotasi nelek-tebr bo‘lgan alohida chiziqlardan iborat bo‘ladi. Har bir tebranma energetik holatga aylanma sathlar sistemasi tegishli bo‘ladi, u vaqtida har bir elektron-tebranma o‘tishlarga spektrda qandaydir yo‘l-yo‘llar to‘g‘ri keladi. Molekula spektrining ko‘rinadigan sohasida elektron-

tebranma spektri bir necha yo'llar guruhidan iborat tizimni hosil qiladi. Molekuladagi tebranma-aylanma o'tishlarda molekulaning elektron holati o'zgarmaydi. Aylanma energetik sathlar oralig'i kichik bo'lib (energiya hisobida),  $10^{-3}$  eV tartibidadir. Bu sathlar orasidagi o'tishlarda chiqariladigan nurlanishlar to'lqin uzunligi 0,1 mm dan 1 sm gacha yetadi. Tebranma energetik sathlar oralig'i 0,1 eV ga teng. Bu sathlar orasidagi o'tishlarda chiqariladigan nurlanishlar to'lqin uzunligi 1 mkm dan 0,1 mm gacha bo'ladi. Valent elektronlar energetik sathlari oralig'i bir necha elektronvolt ni tashkil qiladi, bu spektrning ko'rindigan va ultrabinafsha qismidagi spektral chiziqlarning to'lqin uzunligiga to'g'ri keladi. Eng oddiy molekula ikki atomdan iborat molekuladir. Ikki atomli molekulani ikki atom massa markazi atrofida aylanuvchi gantel shaklidagi qattiq rotator deb qarash mumkin (10.7-rasm). Bunday tizimning inersiya momentini quyidagicha ifodalash mumkin:

$$I = \mu r^2, \quad (10.22)$$

(10.21) formulada

$$\mu = \frac{m_1 m_2}{m_1 + m_2}$$

kattalik keltirilgan massani ifodalarydi,  $r=r_1+r_2$ . Aylanma harakat qilayotgan ikki atomli molekulaning impuls momenti kvantlangan bo'lib, quyidagicha aniqlanadi:


$$L_{rot} = \sqrt{J_R(J_R+1)} \hbar. \quad (10.23)$$

Bu formulada  $J_R$  – aylanma kvant soni bo'lib, mumkin bo'lgan butun son qiymatlarini qabul qiladi, ya'ni  $J_R=0,1,2,3,\dots$ . Impuls momenti  $L=I\omega$  bo'lgan molekulaning aylanma kinetik energiyasi quyidagicha ifodalanadi:

$$K_{rot} = \frac{1}{2} I \omega^2 = \frac{(I\omega)^2}{2I} = \frac{L^2}{2I}. \quad (10.24)$$

Bunda  $K_{rot}$  kvantlangan bo'ladi, ya'ni

$$K_{rot} = J_R(J_R+1) \frac{\hbar^2}{2I}, \quad (10.24a)$$



Qo'shni aylanma sathlar energiyalari farqi quyidagicha aniqlanadi:

$$K_{rot(J_R+1)} - K_{rot(J_R)} = \Delta K_{rot} = \frac{\hbar^2}{I} (J_R + 1). \quad (10.25)$$

(10.24) formuladan ko'rindiki, aylanma molekulyar spektr bir-biridan teng oraliqlarda joylashgan chiziqlar seriyasini hosil qiladi.

Qo'shni energetik sathlar oraliq'i  $\frac{\hbar^2}{I} (J_R + 1)$  kattalikka teng. Bunday o'tishlar  $\Delta J_R = \pm 1$  tanlash qoidasi bilan amalga oshadi. Tanlash qoidasi bajarilganda bo'ladigan o'tishlarda chiqarilgan fotonlar energiyasi quyidagicha aniqlanadi:


$$\hbar\nu_R = \frac{\hbar^2}{I} (J_R + 1). \quad (10.25a)$$

Bu o'tishlarda hosil bo'lgan spektral chiziqlar spektrning infraqizil sohasida va mikroto'lqinli sohasida joylashgan bo'ladi.

Ikki atomli molekulaga yetarlicha energiya berilganda, u uyg'ongan holatga o'tadi, molekulaning tebranma va aylanma harakati vujudga keladi. Energiyaning minimal qiymatida tebranma spektr energiyasi quyidagi munosabat orqali aniqlanadi:

$$K_n = \left( n + \frac{1}{2} \right) \hbar\nu_0,$$

bunda  $n$  — sathlar tartib raqami,  $n=0,1,2,\dots$  Minimal tebranishning minimal energiyasi  $\frac{1}{2} \hbar\nu_0$  kattalik bilan aniqlanadi. Tebranma o'tishlar aylanma o'tishlar bilan birga bo'ladi. Bu o'tishlar natijasida spektrning infraqizil sohasi spektral aylanma yo'llar deyiladi.




Vodorod-bromid molekulasingin tebranma-aylanma molekulyar spektri 10.8-rasmida keltirilgan. Bunda vodorod bromid bilan to'ldirilgan ampulladan uzluksiz ravishda infraqizil nurlanishni o'tkazish orqali hosil bo'lgan yutilish spekttri qayd qilingan. Agar bildiril-

gan energiya molekulaning uyg'ongan holatda bo'lishi uchun yetarli bo'lsa, bunda aylanma-tebranma elektron o'tishlar hosil bo'lishi mumkin. Bunday o'tishlarda energiyasi

$$\begin{aligned} h\nu &= h\nu_e + (E_g^* - E_g) + (E_{rot}^* - E_{rot}) = \\ &= h\nu_e + \frac{1}{2} h\nu_0 + J_R (J_R + 1) \frac{\hbar^2}{I} \end{aligned} \quad (10.25b)$$

formula bilan aniqlanadigan fotonlar (nurlanish) chiqariladi. Molekulani hosil qilgan atomlarning tashqi qobiqlardagi elektronlar o'tishida spektrning ko'rindigan va ultrabinafsha sohalarida yo'l- yo'l elektron spektr hosil bo'lishiga yetarli energiya ajraladi. Molekulalar energetik sathlarning nisbiy joylashishi 10.9-rasmda keltirilgan. Har bir elektron holat uchun u bilan bog'liq bo'lgan tebranma holat va har bir tebranma holat uchun u bilan bog'liq bo'lgan aylanma sathlar mayjud bo'ladi. Tanlash qoidasi  $\Delta J_R = 0$  bo'lgan o'tishlarni man qiladi. 10.9-rasmda ikki guruh spektral chiziqlari tanlash qoidalari  $\Delta J_R = -1$  va  $\Delta J_R = +1$  larning bajarilishi bilan hosil bo'ladi.

Ayni bir tebranma o'tishga tegishli aylanma chiziqlar to'plami tebranma-aylanma yo'l deyiladi. Tebranma-aylanma yo'llar joylashadigan soha taqriban 8000 Å dan 50000 Å (0,8–5 mk) gacha



10.9-rasm

boradi. Tebranma-aylanma yo'lining komponentalari orasidagi masofa molekulalarning inersiya momentiga bog'liq bo'ladi.

### 10.5-§. Molekulalar energiyasi

Molekulaga birikkan atomlar va ular elektronlarining, yadrolarining harakatini molekula massa markaziga nisbatan qarash mumkin. Ushbu sanoq sistemasida yadro o'z massasining elektron massasiga nisbatan cheksiz kattaligi tufayli juda sekin harakatlanadi. Shu sababdan, yadro harakati bilan bog'liq energiya elektronning yadro atrofida aylanish energiyasidan ko'p marta kichik, biroq yadroning molekula bo'ylab aylanish davri elektronnikiga nisbatan juda katta. Demak, elektronlar harakatini hisoblashda yadroni qo'zg'almas deb hisoblash mumkin. Shunday qilib, yadroning o'rni bilan elektronlarning harakati moslangan.

Yadro harakatini ilgarilanma, aylanma va muvozanat holat atrofida tebranma harakatlarga ajratish mumkin. Ilgarilanma harakat kvant effektlariga olib kelmaydi va spektr chiziqlarini vujudga keltirmaydi. Shunday qilib, molekulaning energetik sathini uch turga ajratish mumkin: elektronlar energetik sathlariga, tebranish va aylanish energetik sathlariga. Bu energetik sathlarning nisbiy kattaliklarini aniqlash unchalik murakkab emas. Aytaylik, molekulaling chiziqli o'lchami  $a$  ga teng bo'lsin. Ma'lumki, atomlarni molekulaga biriktiruvchi valent elektronlar molekulyar orbita bo'ylab harakat qilib, o'z harakatida to'ldirilgan elektron qobiqlar sohasidan tashqari molekulaning butun sohasini o'tadi. Shuning uchun valent elektronning harakat energiyasi tartibi jihatdan  $m_e$  massali elektronning  $a$  radiusli aylanma orbita bo'ylab harakat energiyasiga teng, ya'ni

$$E^e \approx \frac{\hbar^2}{m_e a^2}, \quad (10.26)$$

bunda  $a$  bir necha angstromga teng. Ushbu energiya miqdoriga mos keluvchi chastota spektrining ko'rinvuvchi va ultrabinafsha sohasi chastotasiga to'g'ri keladi.

Tebranish energiyasini hisoblash uchun molekulada atomlar elastik bog'langan va o'zlarining muvozanat vaziyati atrofida tebra-

nadi, deb faraz qilinadi. Ma'lumki, har qanday tebranishni garmonik tebranishlar yig'indisi orqali tasvirlash mumkin. Birinchi yaqinlashishda atomlar tebranishini  $M$  massaning  $K_0$  elastiklik koefisiyentli garmonik tebranishi sifatida qaraladi.  $M$  massa taxminan yadro massasiga teng. Atom tebranishi yadro tebranishi bilan xarakterlanadi, chunki elektronlarning yadro atrofidagi harakati shunchalik tezki, ular yadroning siljishida har doim ulguradi va o'zini yadro bilan mahkam bog'langandek tutadi. Demak, atom tebranishida elektronlar buluti o'zgarmaydi. Atom tebranishining elastiklik koeffitsienti kimyoviy bog'lanishning tarangligini xarakterlaydi.  $K_0$  ni quyidagicha aniqlash mumkin. Agar tebranish bo'yicha  $a$  masofaga (molekula o'lchami) siljish yuz bersa, molekula energiyasi albatta  $E^e$  ga o'zgaradi, chunki bunday katta masofaga siljish molekulyar orbitadagi elektron harakatining buzilishiga olib keladi, ya'ni

$$E^e \approx -Fa \approx K_0 a^2, \quad (10.27)$$

bu yerda  $F = -k_0 r$  – har doim atomning muvozanat vaziyatiga yo'nalan-  
gan va siljishi  $r$  ga proporsional kuch. Shunday qilib, elastiklik koeffitsienti taqriban quyidagiga teng:

$$K_0 \approx E^e / a^2. \quad (10.28)$$

U holda molekulaning kichik uyg'ongan holatiga mos keluvchi muvozanat vaziyati atrofida atomning kichik garmonik tebranishi bilan bog'liq energiyasi garmonik tebranish chastotasi bilan elastiklik koeffitsienti orasidagi quyidagi munosabat

$$\omega^2 = \frac{K_0}{M} \quad (10.29)$$

hisobga olinganda, molekulaning tebranma harakati energiyasi quyidagicha aniqlanadi:

$$E^T \approx \hbar\omega = \hbar \left( \frac{K_0}{M} \right)^{1/2} = \frac{\hbar}{a} \left( \frac{E^e}{M} \right)^{1/2} = \frac{\hbar^2}{a^2} \cdot \frac{1}{\sqrt{Mm_e}} = \sqrt{\frac{m_e}{M}} E^e, \quad (10.30)$$

bu yerda  $M$  – taxminan protonlar massasi va  $m_e/M \approx 10^{-4}$  tartibga ega. Demak,  $E^T$  energiya  $E^e$  energiyaga qaraganda taxminan ikki tartibga kichik va u spektr chizig'ining infraqizil sohasi chastotasiga mos keladi. Tebranish kvant soni  $\vartheta$  tanlash qidasiga bo'ysunadi:

$\nabla \theta = \pm 1$ . Shuning uchun ossillyator energiyasi faqat  $\hbar\omega_\theta$  ulushlar bilan o'zgarishi mumkin. Molekulaning aylanma harakat energiyasini hisoblash uchun uning inersiya momentidan foydalaniladi. Klassik nazariyaga binoan molekulaning inersiya momenti  $M^2$  ga proporsional

$$I \sim M^2. \quad (10.31)$$

Kvant nazariyasiga asosan rotasion aylanma holat energiyasi:

$$E^A = J(J+1) \frac{\hbar}{2I} = B_0 J(J+1). \quad (10.32)$$

Bu yerda  $J$  – *rotatsion kvant soni* deyiladi va  $0, 1, 2, \dots$  butun musbat son qiymatlarni qabul qiladi. U holda, molekulaning aylanma harakat energiyasi tartib jihatidan quyidagicha aniqlanadi:

$$E^A = \frac{\hbar^2}{Ma^2} = \frac{m_e}{M} E^e. \quad (10.33)$$

Demak,  $E^e$  dan to'rt tartibga kichik. Aylanma harakat energiyasining chastotasi spektr chizig'inining mikroto'lqinlar sohasi chastotasiiga to'g'ri keladi. Shunday qilib, (10.26), (10.30) va (10.33) ifodalarga asosan, elektronlar energetik sathlarini, tebranish va aylanish energetik sathlarini kichik parametr  $(me/M)^{1/2}$  bo'yicha ketma-ket yoyilgan hadlar qatori sifatida qarash mumkin. Ushbu mulohazada molekula energiyasi qatorida nolinchi had yoyilmasi elektron energetik sathlari bilan, birinchi had yoyilmasi tebranish energetik sathlari bilan, ikkinchi had yoyilmasi esa aylanish energetik sathlari bilan ifodalanadi. U vaqtida molekulaning biror statsionar holatidagi to'liq energiyasini quyidagi ko'rinishda ifodalash mumkin:

$$E = E^e + E^T + E^A = \frac{\hbar^2}{m_e a^2} + \sqrt{\frac{me}{M} + E^I} + \frac{m_e}{M} E^I. \quad (10.34)$$

Kuchsiz va kuchli uyg'onishlarda  $E^T$  o'zgaradi, yanada kuchli uyg'onishlarda  $E^e$  o'zgaradi, ya'ni molekulaning elektron konfiguratsiyasi o'zgaradi.

Energetik sathlarning bunday bir-biridan keskin farq qiluvchi guruahlarga ajralishi molekulalarning nurlanish spektrining atomlar nurlanish spektridan keskin farq qilishiga olib keladi. Atomlar spektri alohida-alohida aniq chiziqlardan iborat, ya'ni chiziqli bo'ladi.

Molekulalar spektri esa bir tomonidan aniq chegaraga ega bo‘limgan yo‘l-yo‘l tasvirga ega bo‘ladi. Molekulalar spektrini atom spektridan farq qilishi tushunarli. Ma’lumki, atomlarning optikaviy spektri tashqi qobiqdagi elektronlar harakatining o‘zgarishi bilan bog‘liq. Molekulada esa xuddi shu elektronlar kimyoviy bog‘lanishda ishtirok etadi. Shuning uchun molekuladagi atom tashqi qobiq elektronlari ning harakati tubdan o‘zgargan bo‘lib, bu spektrni butunlay o‘zgartirib yuboradi. Molekula spektrining atom spektridan farq qilishining boshqa sababi molekulani atomga nisbatan qo‘srimcha erkinlik darajasiga ega bo‘lishidir va ushbu qo‘srimcha harakatlar ham nurlanish spektriga hissa qo‘sadi.

Atomlarning molekulaga birlashishida elektronlarning ishtirok qilishining tasdig‘i molekula rentgen spektrining atom rentgen spektriga mos kelishidir. Bu shuni bildiradiki, molekuladagi atomlarning ichki elektron qobiqlarining tuzilishi atomlarning erkin holidagi tuzilishidan farq qilmaydi. Shunday qilib, ikki atomli molekulaning energiyasi elektronning orbita bo‘ylab harakat energiyasi –  $E^e$ , molekulaning tebranma harakat energiyasi –  $E^T$  va aylanma energiyasi –  $E^A$  larning yig‘indisidan iborat bo‘ladi.

## 10.6-§. Molekulyar kuchlar

Molekula va atomlar orasidagi o‘zaro ta’sir kuchlari musbat zaryadlangan yadro va manfiy zaryadlangan elektronlar orasidagi Kulon tortishish va itarishish kuchlari deb qaraladi. Birinchidan, molekulyar kuchlarga kimyoviy yoki valent kuchlari kiradi. Bu kuchlar kichik masofalarda ta’sir qiladigan kuchlar bo‘lib, atom yadrolari spinlarining qarama-qarshi oriyentatsiyasi bilan bog‘liq va ta’sirlashuvchi atomlar elektronlari to‘lqin funksiyalarining bir-birini qoplashi darajasi bilan aniqlanadi. Atom markazigacha bo‘lgan masofaning ortishi bilan elektronlar zichligi eksponensial kamayib boradi. U vaqtida atomlar orasidagi masofa ortishi bilan kimyoviy kuchlar eksponensial ravishda kamayadi. Ikkinchidan, molekulyar kuchlarga qisqa ta’sir etuvchi itarishish kuchlari kiradi. Bu kuchlar o‘zaro ta’sirlashuvchi zarralarning yaqinlashishida elektron qobiqlarining bir-biriga kirishi natijasida hosil bo‘ladi. Bunday kuchlar ta’sirlashuvchi zarralar orasidagi masofaga bog‘liq ravishda eksponensial

kamayadi. Uchinchidan, neytral atomlar va molekulalar orasida o'zaro tortishish kuchlari ta'sir qiladi. Bu kuchlar masofaga bog'liq ravishda eksponensial qonun bilan emas, balki darajali qonun asosida, ya'ni sekin kamayadi. Bunday kuchlar uzoq ta'sir etuvchi kuchlar deyiladi. Bu kuchlar atomlar va molekulalar elektr dipol momentlari o'zaro ta'siri yoki ularning elektron qobiqlari deformasiyasini natijasida hosil bo'ladi. Agar molekulalar qutblangan bo'lsa, ya'ni dipol momentiga ega bo'lsa, bunday o'zaro ta'sir tushunarli bo'ladi. Lekin molekulalar doimiy dipol momentiga ega bo'lmasa ham o'zaro ta'sir mavjud va qutblangan molekulalar o'zaro ta'sirdan katta bo'ladi. Bunday holda o'zaro ta'sir kuchlar Van-der-Vaals yoki dispersion kuchlar deyiladi. Molekulalar dipol momentiga ega bo'lmasa, ular orasida dipol o'zaro ta'sir qanday paydo bo'ladi? Gap shundaki, uyg'otilgan molekula va atomlarda dipol momentlari paydo bo'ladi. Agar atom va molekulalar uyg'otilmagan bo'lsa, klassik nuqtayi nazaridan uyg'otilmagan molekula va atomlar nolinchi energiyaga ega bo'lib, nolinchi tebranishlarni hosil qiladi. Nolinchi tebranishlarning mayjudligi Van-der-Vaals kuchlarining kelib chiqishi bilan bog'liq. Nolinchi tebranishlar issiqlik harakati bilan bog'liq emas, ya'ni temperaturaga bog'liq emas. Shuning uchun Van-der-Vaals kuchlari temperaturaga bog'hiq bo'lmaydi. Shunday ekanligi tajribada tasdiqlangan. Qutblanmagan molekulalar uchun dispersion kuchlar asosiy rol o'ynaydi. Dispersion kuchlar lahzali elektr dipollarining o'zaro ta'sirini xarakterlaydi. Molekulalar orasidagi o'zaro ta'sirning barcha hollarida potensial energiya molekulalar orasidagi masofaning oltinchi darajasiga teskari proporsional bo'ladi, ya'ni:

$$U = -\frac{a}{r^6}. \quad (10.35)$$

Bu formulada  $r$  – molekulalar orsidiagi masofa,  $a$  – molekulaning qutblanuvchanligi.

O'zaro ta'sirning turli holatlari uchun a quyidagicha aniqlanadi:

$$a_1 = \frac{P^4}{24\pi^2 \epsilon_0^2 KT} \quad (\text{oriyentatsiya effekti});$$

$$a_2 = \frac{\alpha P^4}{16\pi^2 \epsilon_0^2} \quad (\text{qutblanish effekti});$$

$$a_3 = \frac{0,6\alpha^{3/2}\sqrt{n \cdot he}}{32\pi^2 \varepsilon_0^2 \sqrt{m}} \text{ (dispersion effekt).}$$

Bu yerda  $P$  – molekulaning dipol momenti,  $m$  – elektronning massasi,  $n$  – atom tashqi elektron qobig‘idagi elektronlar soni. (10.35) formulalardagi ( $-$ ) ishora barcha molekulalar kimyoviy tabiatiga bog‘liq bo‘limgan o‘zaro tortish ishlarini ko‘rsatadi. Lekin to‘yingan molekulalar yoki o‘zaro bog‘lanish hosil qila olmaydigan molekulalar holida Van-der-Vaals kuchlariga itarishish kuchlari ham ko‘shiladi. Shuning uchun bunday molekulalarning o‘zaro ta’sir potensial energiyasini birinchi yaqinlashishda quyidagicha ifodalash mumkin:

$$U = U_0 - \frac{a}{r^6}. \quad (10.36)$$

Bunda  $U_0$  – itarishish energiyasini bildiradi. (10.36)dan ko‘rinadiki, energiyalarni qo‘shish natijasida Van-der-Vaals kuchi va itarishishning musbat energiyasi egri chizig‘i bog‘lanish  $U(r)$  chuqur bo‘limgan minimumga ega bo‘ladi. Bu esa Van-der-Vaals molekulasingning turg‘unligini hosil qiladi. Tajriba va nazariyadan olingan natijalar ko‘rsatadiki, bunday holda muvozanatlari oraliq  $r_0$ , Van-der-Vaals molekulalari uchun oddiy molekulalar muvozanatlari oralig‘idan bir necha marta kattadir. Van-der-Vaals molekulalarining dissosiasiya energiya kattaligi oddiy molekula dissosiasiya energiyasidan  $10^2$ – $10^3$  marta kichikdir.

## 10.7-§. Valentlik

Valentlik (lotinchadan olingan so‘z valentia – kuch) ma’lum biror element atomining boshqa element atomi bilan kimyoviy bog‘lanish hosil qilib birlashish yoki almashish xususiyatidir. Valentlik tushunchasini fanga 1853-yilda E.Franklend tomonidan kiritilgan.

Ilgari har bir element doimiy valentlikka ega va birikma tarkibi doimiy bo‘lishi kerak deb hisoblanar edi. Valentlikning o‘lchov birligi sifatida vodorod (valentligi ikkiga teng) yoki kislород (valentligi ikkiga teng) olinadi. Bunda element atomining valentligi son jihatdan shu element atomi bilan birika oladigan vodorod atomlari soniga teng. Valentlikning bunday aniqlanishi kimyoviy bog‘lanishlar tushunchasi bilan bog‘lanmagan. Lekin valentlikning bunday tushunchasi

rus kimyogari A.M. Butlerovning kimyoviy tuzilish nazariyasini kashif qilishida, D.I. Mendeleyev tomonidan elementlar-ning davriylik qonuni ochilishida, kimyoviy elementlar davriy sistemasining tuzilishida valentlik tushunchasi muhim o'rinn tutdi. D.I Mendeleyev elementlarning davriy tizimdag'i o'rni bilan valentlik o'rtasida bog'lanish borligini isbotladi va o'zgaruvchan valentlik tushunchasini kiritdi. 1897-yilda elektronning ochilishi bilan valentlikning elektron nazariyasiga asos solishga harakat qilindi (ingliz fizigi J.Tomson tomonidan). 1916-yilda nemis fizigi V.Kossel nazariyasiga asosan, elementlar yoki elementlar guruhi o'zaro birikkanda bittasi elektron beradi, ikkinchisi esa bu elektronni qabul qilib oladi. Berilgan elektron soniga qarab musbat valentlik, qabul qilib olingan elektron soniga qarab manfiy valentlik deyiladi. Shunga ko'ra, natriy musbat bir, xlor esa manfiy bir valentlikka ega. Lekin elementlar kovalent bog'lanish hosil qilib birikkanda elektron bermaydi va biriktirmaydi. Amerikalik fizik-kimyogar G.N. Lyuns nazariyasi bo'yicha valentlik element atomlari elektron jufti – kovalent bog'lanish hosil qilish uchun bergen elektronlar soniga teng. V. Kossel va G.N. Lyuns nazariyalari valentlik mohiyatini to'la ochib bermadi. Atomning kvant mexanikasi nazariyasi yuzaga kelgach (1926), valentlikning mohiyati oydinlashdi.

Valentlik tushunchasi kvant mexanikasi nuqtayi nazaridan qaralganda, uning kimyoviy bog'lanishlar nazariyasining qaysi turida aniqlanishi hisobga olinadi, ya'ni valentlik kimyoviy bog'lanishlar turiga bog'liq ravishda aniqlanadi. Bu nazariyaga asosan, valentlik juftlanmagan (yakka) elektronlar soniga teng. Masalan, ishqoriy metallar atomining tashqi elektron qobig'ida bitta elektron bor. Shuning uchun ishqoriy metallar atomlari bir valentlidir. Ba'zi atomlarda juftlanmagan yakka elektronlar reaksiya jarayonida hosil bo'ladi. Masalan, uglerod atomining qobig'ida juftlanmagan ikkita elektron bor. Reaksiya paytida juftlangan ikki elektron yakkalashib, juftlanmagan ikkita elektron beradi. Shunday qilib, juftlanmagan elektronlar soni to'rttaga yetadi. Ba'zan atomlar ta'sirlashib boshqa valent holatiga o'tadi, bitta elektronni boshqa atomga berishi yoki boshqa bir atomning elektronini biriktirib olishi mumkin. Shunday qilib, elementning valentligi uning vodorodli yoki kislorodli birikmasi orqali aniqlanadi.

## **Nazorat savollari**


1. Molekula qanday zarra?
2. Molekulaning hosil bo'lishini, tuzilishi turlarini tushuntiring va misollar keltiring.
3. Molekula hosil bo'lishida ta'sir qiladigan kuchlar qanday kuchlar hisoblanadi?
4. Turli moddalar molekulalari o'chamlari orasida farq bormi? Misollar keltiring.
5. Atomlar orasidagi kimyoviy bog'lanishlar qaysi elektronlarning o'zaro ta'siri bilan tushuntiriladi?
6. Molekula hosil bo'lishida energiya chiqariladimi yoki yutiladimi?
7. Molekula spektrining ko'rindigan va ultrabinafsha sohalaridagi spektral chiziqlar qanday hosil bo'ladi?
8. Ion bog'lanishda molekula qanday hosil bo'ladi? NaCl molekulasi misolida rasmida chizib tushuntiring.
9. Kovalent (gomepolyar) bog'lanishda vodorod molekulasining hosil bo'lishini rasmida chizib tushuntiring.
10. Molekulalar spektrlari qanday ko'rinishga ega bo'ladi?
11. Molekulalarning aylanma, tebranma, tebranma-aylanma spektrlaridagi spektral chiziqlar qanday hosil bo'ladi?
12. Molekulaning biror statsionar holatdagi to'liq energiyasi qanday harakatlardagi energiyalar yig'indisidan iborat?
13. Qisqa ta'sir etuvchi kuchlar qanday kuchlar?
14. Qutblanmagan molekulalar orasida qanday kuchlar ta'sir qiladi?
15. Vodorod molekulasi uchun Gaytler va London nazariyasida qaysi kvant mexanik kattaliklar hisoblangan?
16. Kovalent bog'lanishda yadro va elektronlar orasidagi o'zaro ta'sir energiyasi qanday formula orqali ifodalanadi?
17. Vodorod molekulasi uchun Shredinger tenglamasini yozing va tushuntiring.
18. Vodorod molekulasi uchun to'lqin funksiyasi qanday koordinatalarga bog'liq bo'ladi?
19. Molekulaning statsionar holatdagi to'liq energiyasi qanday harakatlar energiyalari yig'indisidan iborat bo'ladi?
20. Elektronning aylanma orbita bo'ylab harakat energiyasi qayday formula bilan ifodalanadi va bu energiyaga mos keluvchi chastota spektrining qanday sohasi chastotasiga to'g'ri keladi?
21. Molekulaning tebranma harakati energiyasi qanday formula bilan ifodalanadi va bu energiya to'g'ri kelgan chastota spektrining qaysi sohasi chastotasiga to'g'ri keladi?
22. Molekulaning aylanma harakatidagi energiyasining formulasini yozing va bu energiyaga to'g'ri kelgan chastota spektrining qaysi sohasi chastotasiga mos keladi?
23. Molekula va atomlar orasidagi o'zaro ta'sir kuchlari qanday kuchlar?
24. Qanday molekulyar kuchlarni bilasiz?

### 11.1-§. Qattiq jismlar. Qattiq jismlarda atomlarning bog'lanish turlari

Jismlarning qattiq holati molekulalar, atomlar, ionlar orasidagi kuchli o'zaro ta'sir natijasida hosil bo'ladi, bunda molekulalarning issiqlik harakati ahamiyatga ega bo'lmaydi. Erkin energiyaning kichik qiymatlarida molekulalarning bir-biriga nisbatan muvozanatda mustahkam joylashishi yuz beradi. Molekulalarning o'zaro joylashishi fazoning bir sohasidan ikkinchi sohasiga o'tganda takrorlanadi, ya'ni bunda qattiq jismlarning davriy tuzilishi hosil bo'ladi. Bu esa kristall panjarani hosil qiladi, qattiq jismlar kristallar holida bo'ladi.

Molekula, atom, ionlar kristallarini tashkil qiluvchi muvozanat holat nuqtalari *kristall panjara tugunlari* deyiladi. Kristall panjara mayjudligi qattiq jismning asosiy belgisidir.

Atomlar bir-biridan uzoq masofalarda tortishadi, yaqin masofalarda esa itarilishadi.  $R_0$  masofada tortishish va itarilish kuchlari o'zaro kompensatsiyalashadi va atomlar mustahkam muvozanat holatiga o'tadi. Bunday mustahkam muvozanat kristall panjara tugunlaridagi molekulalar atomlari orasida yoki tugunlardagi atomlar o'rtasida kuzatiladi. Potensial energiyaning atomlar orasidagi masofaga bog'liq o'zgarishi 11.1-rasmda keltirilgan.



11.1-rasm

Ushbu rasmdagi potensial energiya molekulalar uchun ham to'g'ri bo'ladi. Kristall panjara tugunlarida molekulalar joylashgan bo'lsa, *molekulyar kristallar* deyiladi. Agar atomlar joylashgan bo'lsa, *atom kristallari* deb yuritiladi. Kristallarda besh xil bog'lanish bo'lishi mumkin: ionli, kovalent, vodorod, metall va molekulyar bog'lanishlar.

### ***11.1.1. Ion bog‘lanish***

Ionli bog‘lanish atomlar orasida bo‘ladi, bunda atomlardan biri osonlikcha elektronini yo‘qotadi va musbat ionga aylanadi. Ikkinci atom esa qo‘sishma elektronni biriktirib olib manfiy ionga aylanadi. Bu ionlar Kulon tortishish kuchi ta’sirida bog‘langan tizimni hosil qiladi. Bunday bog‘lanishga *ionli bog‘lanish* deyiladi. Ionli bog‘lanishli kristallarga NaCl, LiF, KI va boshqalar misol bo‘la oladi. NaCl kristallida natriy atomi elektron qobig‘i inert gaz neonning (Ne) yopiq elektron qobig‘iga bitta elektronning qo‘shilishidan hosil bo‘ladi. Yoki natriyning elektron konfiguratsiyasini (Na)=(Ne)3s ko‘rinishda ko‘rsatish mumkin. 3s holatdagi elektron atomning asosiy qismi bilan kuchsiz bog‘langan bo‘lib, atomdan osonlikcha ajraladi va natriy ioni  $\text{Na}^+$  hosil bo‘ladi. Xlor atomi elektron qobig‘i inert gaz argonning yopiq elektron qobig‘ini hosil qilishi uchun bitta elektroni yetishmaydi. Xlor yetishmagan elektronni biriktirib olib yopiq elektron qobiqni to‘ldirish uchun harakat qiladi, natijada xloring manfiy ioni  $\text{Cl}^-$  hosil bo‘ladi. Bir-biridan  $r$  masofada bo‘lgan ionlarning o‘zaro ta’sir potensial energiyasi  $e^2/(4\pi\varepsilon_0 r^2)$  ko‘rinishda ifodalanadi. Shunday qilib, ion bog‘lanish atomlar orasidagi zaryad almashishi orqali hosil bo‘ladi. Ionli kristallarda bog‘lanish energiyasi katta bo‘ladi. NaCl kristall panjarasi bog‘lanish energiyasi 764 kJ/mol (183 kkal/mol)ni tashkil qiladi. Ionli kristallarning elektr o‘tkazuvchanligi past temperaturelarda kichik va yuqori temperaturalarda katta bo‘ladi.

### ***11.1.2. Kovalent bog‘lanish***

Kovalent bog‘lanish atomlar orasidagi elektronlarning umumiylashganligidan hosil bo‘ladi, ya’ni elektronning butun kristallga tegishli bo‘lib umumiylashganligidan hosil bo‘ladi. Atomlar orasidagi elektronlar bulutining ustma-ust tushishi yadrolar orasidagi masofaning o‘zgarishi bilan tezda o‘zgaradi. Bu esa kovalent bog‘lanish kuchlari katta ekanligini ko‘rsatadi. Shuning uchun kovalent kristallar juda mustahkam bo‘lib, erish temperaturasi yuqori bo‘ladi. Kovalent kristallarga olmos, kreminiy (Si), germaniy (Ge) misol bo‘lishi mumkin. Kovalent bog‘lanishni hosil qiladigan zaryad o‘zaro

ta'sirlashuvchi atomlar orasida teng taqsimlanmaydi. Yoki ikkinchi atom elektronining birinchi atom atrofida bo'lisligiga qaraganda, atomlardan birining elektroni ikkinchi atom atrofida nisbatan uzoq vaqt bo'la oladi. Bunda esa har ikkala atom ham qisman ionlashgan bo'ladi va ular orasida elektrostatik kuchla: paydo bo'ladi. Atomlar orasidagi bog'lanish esa qisman ionli, ya'ni aralash bo'ladi. Shunday qilib, kovalent bog'lanishdan aralash bog'lanishga va ion bog'lanishga uzluksiz ravishda o'tish kuzatiladi. Bu bog'lanishlar bir-biridan zaryadning umumiylashuvi bilan farq qiladi. Kovalent kristallarda gomeopolyar bog'lanish bo'ladi, ya'ni bunday bog'lanish almashuvchi kuchlar orqali amalga oshadi. Kristall panjara tuzilishida tekshirilayotgan atomni o'rabi turgan yaqin atomlar soni elementning valentligiga teng bo'ladi. Panjara atomlarining valent elektronlari umumiylashgan bo'ladi. Kovalent kristallarga yuqori mustahkamlik, past temperaturalarda esa kuchsiz elektr o'tkazuvchanlik xususiyatlari xosdir. Bunday kristallarda kristall panjaralarining bog'lanish energiyasi taqriban 700–1200 kJ/mol bo'ladi.

#### ***11.1.3. Vodorod bog'lanish***

Vodorod atomi bir elektronga ega. Shuning uchun u bitta atom bilan kovalent bog'lanishda bo'lishi mumkin. Agar bu atom vodorod atomi elektronini kuchli umumlashtirsa, manfiy zaryadlangan atomga aylanadi. U vaqtida elektron ko'p vaqt davomida atom yaqinida bo'ladi, proton (vodorod atomi yadrosi) ekranlanmagan bo'ladi (vodorod atomi musbat zaryadlangan) va manfiy zaryadlangan boshqa atomga tortiladi. Bundan vodorod atomi orqali ikki manfiy zaryadlangan atomlar orasida bog'lanish yuzaga keladi. Bunday bog'lanish *vodorod bog'lanish* deyiladi.

#### ***11.1.4. Metall bog'lanish***

Metall atomlarida tashqi qobiq elektronlari umumiylashgan bo'lib, elektron gazni hosil qiladi. Elektronlar bir atom atrofidan ikkinchi atom atrofiga ko'chib yuradilar va birorta atom bilan bar-qaror bog'lanish hosil qilmaydilar. Bunday elektronlar *o'tkazuvchanlik elektronlari* deyiladi va metallarning elektr o'tkazuvchanligini

hosil qiladi. Shunday qilib, metallarda tashqi qobiqdagi valent elektronlar *erkin elektronlar* deyiladi. Metall kristallarning elektr va issiqlik o'tkazuvchanligi yuqori darajadadir. Elektr va issiqlik o'tkazuvchanlik umumiylashgan valent elektron tufayli bo'ladi. Atomlardagi manfiy elektron gazni musbat zaryadlangan ionlar bilan to'ldirish natijasida metall energiyasining pasayishi elektronni atomdan ajratib olish uchun kerakli energiyani kompensatsiyalaydi. Bu vaqtida metall atomlari orasida paydo bo'ladigan bog'lanish *metall bog'lanish* deyiladi.

O'tkazuvchanlik elektronlari konsentratsiyasi metall atomlari konsentratsiyasiga taqriban teng bo'ladi, ya'ni har bir metall atomiga taqriban bitta elektron to'g'ri keladi. Masalan, kumushning (Ag) bir atomiga 0,7 elektron, misning (Cu) bir atomiga 0,8 elektron va oltinning bir atomiga 0,9 elektron to'g'ri keladi. Metallarda elektronlar konsentratsiyasi  $\sim 10^{28} \text{ m}^{-3}$  miqdorda bo'ladi.

#### *11.1.5. Molekulyar bog'lanish*

Agar elektronlar atomlar bilan kuchli bog'lanishda bo'lsa, qattiq jismlarda yuqorida aytilgan bog'lanishlar bo'lishi qiyinroqdir.

Molekulyar kristallar molekulalarning kuchsiz bog'langan shaklidir. Bunday hol, masalan, inert gazlarga to'g'ri keladi. Lekin yetarli sharoitda inert gazlar ham suyuq yoki qattiq holatga o'tkazilishi mumkin. Bunda Van-der-Vaals kuchlari ta'sir qiladi. Bu kuchlar elektronlarning atom va molekulalardagi harakati natijasida paydo bo'ladigan atom va dipol momentlari orasidagi kuchsiz tortishish kuchlaridir. Inert gazlar atomlaridan hosil bo'lgan kristallardagi bog'lanish molekulyar bog'lanish bo'lib, bu bog'lanish Van-der-Vaals kuchlari orqali namoyon bo'ladi.

O'zgaruvchan dipol momenti qo'shni atom va molekulalarda o'zgaruvchan dipol momentini induksiyalaydi. Boshlang'ich va induksiyalangan dipol momentlarining o'zaro ta'siri natijasida Van-der-Vaals tortishish kuchlari paydo bo'ladi. Molekulalar kristallarga deyarli barcha organik kristallar va ko'pgina boshqa birikmalar kiradi. Bunday kristallarning bog'lanish energiyasi kichik. Masalan: Ar,  $\text{CH}_4$  kabi kristallarda bog'lanish energiyasi 8 kJ/mol, ularning erish va qotish temperaturasi past.

## 11.2-§. Qattiq jismlarning issiqlik sig‘imi. Debay nazariysi

Nometall qattiq jismlar issiqlik sig‘imiga kristall panjara tugunlaridagi zarralarning (atom, molekula, ion) issiqlik tebranma harakati energiyasi asosiy hissa qo‘sadi. Metallar issiqlik sig‘imiga esa elektron gaz ham o‘z hissasini qo‘sadi.

Qattiq jismlar issiqlik sig‘imi klassik nazariysi asosida energiyaning erkinlik darajalari bo‘yicha tekis taqsimlanishi haqidagi tessavur yotadi. Bir jinsli qattiq jism bir-biriga bog‘liq bo‘limgan, uchta erkinlik darajasiga ega bo‘lgan, bir xil chastota bilan issiqlik tebranma harakatlarni bajarayotgan zarralar sistemasi deb qaraladi. Har bir erkinlik darajasiga  $E=kT$  energiya to‘g‘ri keladi. Qattiq jism molining ichki energiyasi

$$u = 3N_A E = 3N_A kT = 3RT. \quad (11.1)$$

(11.1) formulada  $k$  – Boltzman doimiyligi bo‘lib, u

$$k = \frac{R}{N_A}; \quad R = k \cdot N_A,$$

$N_A$  – Avogadro soni;  $N_A = 6,023 \cdot 10^{26} \text{ kmol}^{-1}$ ,  $T$  – absolyut temperatura.

Qattiq jism kristall panjarasining molyar issiqlik sig‘imi ichki energiyadan temperatura bo‘yicha olingan xususiy hosilaga teng:

$$C_\mu = \frac{\partial u}{\partial T} = 3R = 25 \frac{\text{Joul}}{\text{mol} \cdot \text{K}} = 5,97 \frac{\text{Kal}}{\text{mol} \cdot \text{K}}, \quad (11.2)$$

(11.2) formula Dyulong va Pt iyonunini ifodalaydi, bu qonunga ko‘ra, barcha kimyoviy oddiy kristall qattiq jismlarning molyar issiqlik sig‘imi taxminan 6 Kal/mol · K ga teng. Bu qonunning faqat nisbatan yuqori temperaturalardagina to‘g‘rili kuzatiladi. Bu qonunga asosan qattiq jismlarning molyar issiqlik sig‘imi kristallarning tem-peraturasiga yoki boshqa xususiyatlariga bog‘liq emas. Lekin tajribalar bunday bo‘lishini rad qiladi. Tajriba natijalari qattiq jismlar issiqlik sig‘imi ularning temperaturasiga, ayniqsa past temperaturalarda juda bog‘liq bo‘lishligini ko‘rsatadi. Qattiq jismlar issiqlik sig‘imining klassik nazariysi bilan tajriba natijalari orasidagi bunday farqning sababi foydalanayotgan energiyaning erkinlik

darajalari bo'yicha bir tekis taqsimlanish qonunining cheklanganligi va bu qonunning past temperaturalarda to'g'ri kelmasligidandir. Past temperaturalarda kristallar issiqlik sig'imi kamayib, 0K ga yaqinlashganda nolga intiladi. Past temperaturalarda kristall panjara tugunlarida tebranayotgan zarraning tebranish harakati o'rtacha energiyasi kvant mexanikasi qonunlari asosida hisoblanadi.

Qattiq jismlar issiqlik sig'imining kvant nazariyasida kristall qattiq jism har biri kvant garmonik ossillyator hisoblangan  $N$  atomlar sistemasidan iborat deb qaraladi. Bu atomlar bir-biriga bog'liq bo'limgan ravishda bir xil  $\omega$  chastota bilan tebranadilar. Atomning har bir erkinlik darajasiga yoki har bir kvant garmonik ossillyatorga to'g'ri keladigan o'rtacha energiya miqdori:

$$E = \frac{\frac{\hbar\omega}{kT}}{e^{\frac{\hbar\omega}{kT}} - 1} = \frac{\hbar\nu}{e^{\frac{\hbar\nu}{kT}} - 1}. \quad (11.3)$$

Qattiq jism molining ichki energiyasi quyidagicha topiladi:

$$U = 3N_A \cdot E = 3N_A \frac{\hbar\nu}{e^{\frac{\hbar\nu}{kT}} - 1}. \quad (11.4)$$


Bundan esa qattiq jismning molyar issiqlik sig'imi quyidagicha aniqlanadi:

$$C_\mu = 3R \left( \frac{\hbar\nu}{kT} \right)^2 \frac{e^{\frac{\hbar\nu}{kT}}}{(e^{\frac{\hbar\nu}{kT}} - 1)^2}. \quad (11.5)$$

(11.5) formulada  $T_\theta = \frac{\hbar\nu}{k}$  kattalikni xarakteristik temperatura deb belgilab olinsa, u vaqtida

$$C_\mu = 3R \left( \frac{T_\theta}{T} \right)^2 \frac{e^{T_\theta/T}}{(e^{T_\theta/T} - 1)^2}. \quad (11.6)$$

(11.6) formula qattiq jismlar issiqlik sig'imining temperaturaga bog'liqligini ifodalaydi. Bu bog'lanish mis (Cu), kumush (Ag), oltingugurt (S), alyuminiy (Al), olmos elementlari uchun 11.2-rasmida tasvirlangan.



11.2-rasm

Energiyaning erkinlik darajalariga bir tekis taqsimlanish qonuniga ko'ra yuqori temperaturalarda, ya'ni  $hn \gg kT$  bo'lganda kristall panjara tugunlarida tebranma harakat qilayotgan garmonik ossillyatorning o'rtacha energiyasi:

$$E = kT \text{ va } C_\mu = 3R,$$

bo'ladi.

Past temperaturalarda, ya'ni  $hn \gg kT$  bo'lganda esa:

$$e^{\frac{hv}{kT}} - 1 \approx e^{\frac{hv}{kT}}, \quad (11.6a)$$

va

$$C_\mu = 3R \left( \frac{T_\theta}{T} \right)^2 e^{-T_\theta/T}. \quad (11.7)$$

Temperatura absolyut nolga yaqinlashganda, ya'ni  $T \rightarrow 0$  da ( $T_\theta/T$ )<sup>2</sup> kattalik ortishiga qaraganda  $T_\theta/T \rightarrow \infty$  va tezroq ortib boradi. Shuning uchun  $T \rightarrow 0$  da molyar issiqlik sig'imi  $C \rightarrow 0$ . Bu natija esa tajriba bilan sifat jihatidan mos keladi. Kristall panjara tugunlaridagi zarralar bir-biriga bog'liq bo'limgan ravishda bir xil chastota bilan issiqlik tebranma harakatida bo'ladilar deb qarash, kristall panjaralarda zarralarning tebranish manzarasini juda sodda-lashtirib ko'rsatishdir. Haqiqatda qattiq jism atomlari (yoki boshqa zarralar) orasida juda kuchli o'zaro ta'sir mavjudki, bunda barcha  $N$  zarralar  $3N$  erkinlik darajasiga ega bo'lgan bog'langan tizimni hosil qiladi. Bunda tebranayotgan zarralarning tebranish chastotalari turlicha bo'ladi. Qattiq jismlarda chastotalar o'zgarish oralig'i kattadir. Shu sababli juda past va yuqori chastotalar bilan bo'ladigan tebranishlar mavjud. Past chastotali tebranishlarga tovush diapazonidagi elastik tebranishlar to'g'ri keladi.

Kristall panjarada zarralar orasidagi bog'lanish kristallarda elastik tovush to'lqinlarining tarqalishiga olib keladi. Qattiq jismlar issiqlik sig'imi nazariyasida kristallning issiqlik tebranishlari energiyasiga past chastotali tebranishlar asosiy hissa qo'shadi. Bunday tebra-

nishlar to‘lqin uzunligi kristall panjaraning davridan katta bo‘lgan elastik to‘lqinlarga tegishlidir. Kristallarda tarqalayotgan elastik to‘lqinlar o‘zlarini tutash muhitda tarqalayotgandek tutadi. Kristallning atom tuzilishi kristallda to‘lqin uzunligi

$$\lambda_{\min} = \frac{\vartheta}{v_{\max}}$$

dan katta bo‘lgan elastik to‘lqinlarning tarqalishiga ta’sir qilmaydi. Bu formulada  $\vartheta$  – elastik to‘lqin tezligi,  $v_{\max}$  – uning chastotasi,  $\lambda_{\min}$  – to‘lqin uzunligi kristall panjara davri kattaligida o‘lchanishi mumkin bo‘lishi kerak:

$$\lambda_{\min} \sim d \sim \left( \frac{v}{N} \right)^{1/3}, \quad (11.7a)$$

bunda  $N$  – hajmi  $V$  bo‘lgan kristalldagi zarralar soni (kristall panjara tugunlari soni). Kristalldagi elastik to‘lqinlar kvant xossalarga ega. Bu esa chastotasi  $n$  bo‘lgan to‘lqinning diskret energiya qiymatiga ega bo‘lishida ko‘rinadi. Elektromagnit nurlanishni energiya kvantlari, ya’ni fotonlar to‘plami sifatida qaralgani kabi, kristall panjaraning tebranish to‘lqinlarini fononlar deb ataladigan tebranish kvantlari to‘plami sifatida tasavvur qilish mumkin. Fononlarning tarqalish tezligi tovush to‘lqinlarining tarqalishiga to‘g‘ri keladi.

Fononlar  $E = hv$  energiyaga va  $P = \frac{hv}{\vartheta}$  kvaziimpulsga ega bo‘lgan kvazizarralardir. Fononning  $P$  – kvaziimpulsi tarqalish yo‘nalishi tovush to‘lqinlari tarqalishi yo‘nalishi bo‘yicha bo‘ladi. Kvaziimpulsning impulsdan farqi shundaki, kristallarda fononlarning to‘qnashishida kvaziimpuls diskret bo‘laklar shaklida kristall panjara uza tilishi mumkin, bu vaqtida u saqlanmaydi. Shunday qilib, tovush maydonining kvantlanishi fononlarga olib keladi. Fononlarning spini nolga teng, shuning uchun ular Boze – Eynshteyn statistikasiga bo‘ysinadi. Fononlar yutilishi va chiqarilishi mumkin, lekin ularning soni doimiy saqlanmaydi. Shuning uchun ham fonon gazi uchun kimyoviy potensial nolga teng bo‘ladi, ya’ni:

$$\mu = \frac{U - TS + PV}{N} = 0.$$

Bunda  $T$  – absolyut temperatura,  $U$  – ichki energiya,  $V$  – tizimning hajmi,  $P$  – bosim,  $S$  – entropiya va  $N$  – zarralar soni.

Kimyoviy potensial izobar-izotermik sharoitlarda tizimdagи zarralar sonini birga oshirishda bajarilgan ishga teng.

Kristallning energiyasi fonon gazining energiyasi sifatida qaraladi. Chastotasi  $v$  va  $v+dv$  oraliqda bo'lgan fononlar soni quyidagicha aniqlanadi:

$$dN = \frac{dg}{e^{\hbar v / kT} - 1}, \quad (11.8)$$

(11.8) formulada  $dg$  – kristallning  $V$  hajmidagi kvant holatlar soni:

$$dg = 3 \frac{4\pi P^2 dPV}{h^3} = 3 \frac{4\pi v^2 dv}{g^3} V. \quad (11.9)$$

Bunda  $P = \frac{\hbar v}{g}$  – fononning kvaziizospulsi,  $g$  – kristallda tovush tezligi,  $g$  esa kristallda o'zaro perpendikulyar qutblangan ikkita ko'ndalang va bo'ylama to'lqinlar tarqalishi mumkinligini hisobga oladigan koeffitsient. (11.9)ni hisobga olgan holda (11.8) ifodani quyidagi ko'rinishda yozish mumkin:

$$dN = \frac{12\pi v^2 dv V}{g^3 (e^{\hbar v / kT} - 1)}. \quad (11.10)$$

Kristallning ichki energiyasi esa:

$$U = \int_0^{v_{\max}} h v dN = \frac{12\pi N h}{g^3} \int_0^{v_{\max}} \frac{v^3 dv}{e^{\hbar v / kT} - 1}. \quad (11.11)$$

(11.11) da  $v_{\max} = g \left( \frac{3N}{4\pi v} \right)^{1/3}$  – fononlar chastotasining yuqori chegarasi bo'lib, kristallning issiqlik tebranishlari energiyasiga hissa qo'shadigan kattalik.  $U$  ning qiymati hisoblanganda

$$T_D = \frac{\hbar v_{\max}}{k} \quad (11.12)$$

kattalik kiritiladi.  $T_D$  – Debayning xarakteristik temperaturasi deyiladi va bunda ikki chegaraviy holat qaraladi.

1. Yuqori temperaturalarda, ya’ni  $T \gg T_D$  ( $kT \gg \hbar\omega$ )da, (11.6)

formulada  $e^{hv/kT} - 1 \approx \frac{hv}{kT}$  deb olish mumkin. U vaqtida

$$U = \frac{12\pi V}{9^3} kT \int_0^{v_{\max}} v^2 dv = \frac{12\pi V kT}{9^3} \frac{v_{\max}^3}{3} = 3NkT,$$

yoki

$$U = 3NkT. \quad (11.13)$$

Kristallning bir moli uchun  $N=N_A$  bo‘lib,  $N_A$  – Avogadro soni. U holda kristallning molyar issiqlik sig‘imi –  $C_\mu$ :

$$C_\mu = \frac{\partial u}{\partial T} = 3N_A K = 3R, \quad (11.14)$$

ya’ni Dyulong va Ptı qonuni hosil bo‘ladi.

2. Past temperaturalarda, ya’ni  $T \ll T_D$  ( $kT \ll \hbar\omega$ )da

$$\int_0^{v_{\max}} \frac{v^3 dv}{\exp\left(\frac{hv}{kT}\right) - 1}$$

integral hisoblanganda, yangi o‘zgaruvchi  $\xi = hn/kT$  kiritiladi va yuqori chegara  $\infty$  ga almashtiriladi, u vaqtida ichki energiya:

$$\begin{aligned} U &= \frac{12\pi V h}{9^3} \int_0^{v_{\max}} \frac{v^3 dv}{\exp\left(\frac{hv}{kT}\right) - 1} = \\ &= \frac{12\pi V h}{9^3} \left(\frac{kT}{h}\right)^4 \int_0^\infty \frac{\xi^3 d\xi}{e^\xi - 1} = \frac{4\pi^5 k^4 V}{5h^3 9^3} T^4. \end{aligned} \quad (11.15)$$

Bunday holda kristallning molyar issiqlik sig‘imi absolyut temperaturaning kubiga proporsional bo‘lib qoladi, ya’ni:

$$C_\mu = \frac{\partial u}{\partial T} = \frac{16\pi^5 k^4 V T^3}{5h^3 9^3} = \text{const} \cdot T^3,$$

yoki


$$C_\mu = \frac{\partial u}{\partial T} = \text{const} \cdot T^3. \quad (11.16)$$

Bu bog'lanish (11.16) – Debayning kubinchi  $T^3$  qonuni deb ataladi. Shunday qilib, kristall panjaraning issiqlik sig'imi absolyut nol tem-peratura yaqinida temperaturaning uchinchi darajasiga proporsional o'zgaradi.  $T=0$  da issiqlik sig'imi ham nolga aylanadi. Yetarlicha past temperaturalarda bu qonun to'g'ri bajariladi. Bunday nazariy hisoblashlar va tajriba natijalarini taqqoslash quyidagi jadvalda ((11.6) formula orqali hisoblangan Debay temperaturalari va tajriba natijalaridan aniqlangan temperaturalar qiymatlari) keltirilgan.

11.1-jadval

Qattiq jismlar	Debay temperaturalari	
	Tajribanatijalari	(11.16) formulagaasosan
Alyuminiy	398	402
Mis	315	332
Kumush	215	214
Qo'rg'oshin	88	73
Olmos	1860	–

11.3-rasmda Pb, KCl, olmos kristallari uchun issiqlik sig'iming  $T/T_D$  kattalikka bog'lanish grafigi keltirilgan. Bunda tutash egri chiziq (11.16) formula orqali hisoblangan, nuqtalar esa tajribadan olingan natijalardir. (11.16) formulada ifodalangan Debay xarakteristik temperaturasi har bir modda uchun tebranishlar energiyasini kvantlash muhim o'rinn tutadigan sohani ko'rsatadi. Debay formulasi bo'yicha qattiq jismlarning issiqlik sig'imi temperaturasining kubiga proporsional, ya'ni,  $C \sim T^3$ . Lekin, Debay formulasi faqat oddiy kristall panjaralari jismlar, ya'ni kimyoiy elementlar va ba'zi sodda birikmalar (masalan, galoid, tuzlar)



11.3-rasm

uchungina issiqlik sig‘imining temperaturasiga qarab o‘zgarishini ko‘rsatadi. Kristall panjarasi ancha murakkab bo‘lgan jismlarga Debay formulasini qo‘llab bo‘lmaydi, chunki bunday jismlarning tebranishlar spektri nihoyatda murakkabdir. Murakkab molekulalardan tuzilgan kristallarda molekula ichidagi atomlar issiqlik harakati bilan bog‘liq bo‘lgan issiqlik sig‘imi paydo bo‘ladi. Birinchi yaqinlashishda panjara ichida molekulalarning tebranishi ularning ichki holatiga ta’sir qilmaydi, deb hisoblash mumkin. U vaqtida kristallning issiqlik sig‘imini quyidagicha ifodalash mumkin:

$$C = C_{panjara} + C_{ichki}.$$

Ayrim hollarda molekulalar ichki tebranma harakati tufayli paydo bo‘ladigan issiqlik sig‘imi —  $C_{ichki}$  yetarlicha ahamiyatli bo‘lishi mumkin. Masalan, benzolda molekulalardagi ichki tebranishlari bilan bog‘liq bo‘lgan issiqlik sig‘imi  $T \approx 150\text{ K}$  da panjara issiqlik sig‘imining 20% ni tashkil qiladi,  $T \approx 270\text{ K}$  da esa 80% gacha yetadi.

### **11.3-§. Qattiq jismlarda atom energetik sathlarining ajralishi. Energetik zonalar**

Atomlar bir-biriga yaqinlashtirilganda (muvozanat holatgacha) ularning energiyalari kamayadi va atom energiya sathlarining ajralishi yuz beradi. Ikki vodorod atomi yaqinlashtirilsa, asosiy holat sathi ikkita sathga ajraladi. Bu ajralish umumiy hodisaning xususiy holidir. Ikkita bir xil tizim yaqinlashtirilib, o‘zaro ta’sir paydo bo‘lganida bu ta’sir paydo bo‘lganicha mayjud bo‘lgan energiyasi bir xil bo‘lgan sathlar ajraladi, lekin tizimdagи sathlarning umumiy soni o‘zaro ta’sir bo‘lganda ham, bo‘limganda ham o‘zgarmaydi.

Atomlar sekin-sekin yaqinlashtirilganda (atomlar orasidagi o‘zaro ta’sir ortganda) tizim energiyasi va uning boshqa tavsiflari uzlusiz o‘zgaradi, ammo sathlar soni faqat diskret tarzda o‘zgarishi kuzatiladi. Sathlar umumiy sonining o‘zgarmasligi tabiiy hol. Tizim sathlari ajralishini klassik tebranuvchi tizimlar misolida qarab chiqamiz.

Ikkita bir xil  $x$  va  $y$  tebranuvchan tizimlarni qarab chiqaylik. Misol sifatida, ikkita mayatnikni yoki tebranish konturini olish mumkin. O‘zaro ta’sir bo‘limganda ularning harakati quyidagi tenglamalar bilan ifodalanadi:

$$\left. \begin{array}{l} \ddot{x} + \omega^2 x = 0, \\ \ddot{y} + \omega^2 y = 0. \end{array} \right\} \quad (11.17)$$

Bu tenglamalarda  $x$  va  $y$  o'zgaruvchilar mayatniklarning muvozanat holatdan yoki elektr konturidagi kuchlanishning o'rta qiymatdan chetlanishini yoki tizimlar harakatining boshqa tavsiflarini ifodalaydi. Har ikki tebranish tizimlarida ham tebranish chastotalari bir xil deb faraz qilib, tizimlarda o'zaro ta'sir paydo bo'lgan holni qarab chiqamiz. Masalan, mayatniklarga yengil prujina bog'laymiz yoki tebranish konturlarini yaqinlashtiramiz. Birinchi tizimga ta'sir etuvchi kuch faqat birinchi tizim koordinatasi  $x$  ga bog'liq bo'lmay, balki ikkinchi tizim koordinatasi  $y$  ga ham bog'liq bo'ladi. Tizimning bir xil bo'lgani uchun  $y$  sistemasining  $x$  sistemasiga bo'lgan ta'siri  $x$  tizimning  $y$  tizimga bo'lgan ta'siridek bo'ladi. Tizimlar orasida o'zaro ta'sir bo'lganda (11.17) tenglama quyidagi ko'rinishga keladi:

$$\left. \begin{array}{l} \ddot{x} + \omega^2 x + \alpha y = 0, \\ \ddot{y} + \omega^2 y + \alpha x = 0. \end{array} \right\} \quad (11.18)$$

(11.18) tenglamalarni yechish uchun  $u$  va  $\vartheta$  koordinatalarga o'tish kerak bo'ladi, ya'ni

$$\left. \begin{array}{l} u = x + y; \quad x = \frac{u + \vartheta}{2}, \\ \vartheta = x - y; \quad y = \frac{u - \vartheta}{2} \end{array} \right\} \quad (11.19)$$

(11.18) va (11.19) tenglamalardan:

$$\left. \begin{array}{l} \ddot{u} + (\omega^2 + \alpha)u = 0 \\ \ddot{\vartheta} + (\omega^2 - \alpha)\vartheta = 0 \end{array} \right\} \quad (11.20)$$

(11.20)da quyidagicha belgilashlar kiritamiz:

$$\left. \begin{array}{l} \omega_1^2 = \omega^2 + \alpha \\ \omega_2^2 = \omega^2 - \alpha \end{array} \right\} \quad (11.21)$$

va  $u$  va  $\vartheta$  larni topamiz:

$$\left. \begin{array}{l} u = A_1 \sin(\omega_1 t + \varphi_1) \\ \vartheta = A_2 \sin(\omega_2 t + \varphi_2) \end{array} \right\}, \quad (11.22)$$

bu yerda  $A_1$  va  $A_2$  lar tebranishlar amplitudalari,  $\varphi_1$  va  $\varphi_2$  tebranishlar fazalari. (11.19) tenglamalar orqali  $x$  va  $y$  o'zgaruvchilarga qaytib, tizimning tebranishi chastotalari bilan biroz farq qiluvchi ikkita  $u$  va  $\vartheta$  garmonik tebranishlar yig'indisidan iboratligi ko'rish mumkin.

$A_1$ ,  $A_2$ ,  $\varphi_1$  va  $\varphi_2$  doimiy kattaliklarning miqdori boshlang'ich shartlarga bog'liq. Boshlang'ich vaqtida faqat  $x$  tizim tebranayotgan holni ko'raylik. Bu holda  $A_1 = A_2 = A$  va  $\varphi_1 = \varphi_2 = \frac{\pi}{2}$  bo'ladi. U vaqtida:

$$\left. \begin{array}{l} x = \frac{A}{2} (\cos \omega_1 t + \cos \omega_2 t) \\ y = \frac{A}{2} (\cos \omega_1 t - \cos \omega_2 t) \end{array} \right\}. \quad (11.23)$$

Vaqt o'tishi bilan  $\omega_1 t$  va  $\omega_2 t$  kattaliklar orasida farq orta boradi.  $\omega_1 t - \omega_2 t = \pi$  bo'lganda  $x$  sistemasida tebranish so'nadi,  $y$  tizimda esa tebranish maksimumga erishadi. So'ng tebranishning barcha energiyasi  $x$  tizimda to'planadi va bu jarayon shunday tarzda davom qiladi. Ko'rilgan holda bir xil kattalikdagi xususiy chastotaga ega bo'lgan ikkita tizim o'zaro ta'sirlashgandan so'ng hosil bo'lgan natijaviy tizim chastotalari ( $\omega_1$  va  $\omega_2$ ) turli bo'lgan ikkita ajralgan  $u$  va  $\vartheta$  umumiylar bilan xarakterlanadi.  $\omega_1$  va  $\omega_2$  chastotalardan biri boshlangich chastotadan biroz katta, ikkinchisi biroz kichik.


Kvant mexanikasida ossillyatorning energiya sathlari kvantlandi, sathlar orasidagi masofa esa  $\hbar\omega$  kattalikka teng bo'lib, chastota  $\omega$  ning o'zgarishi sathlar orasidagi masofaning o'zgarishiga olib keladi.  $u$  va  $\vartheta$  tebranishlarga mos bo'lgan ajralgan energetik sathlar umumiylar bo'ladi va ular alohida atomlarga emas, balki ikkita o'zaro ta'sirlashuvchi atomlar sistemasiga tegishli bo'ladi.

Bunday xulosalarni ko'p sondagi o'zaro ta'sirlashuvchi bir xil atomlardan iborat kristallarga tatbiq qilamiz. Yuqorida joylashgan, umumlashgan atom sathlari energiya bo'yicha ajraladilar. Misol sifatida bir gramm-molekula moddaga ega bo'lgan kristallni ko'raylik.

Bu holda atomdagи har bir sath  $6 \cdot 10^{23}$  sathchalarga ajraladi. Ajralish kattaligi kristalldagi atomlar soniga emas, balki ularni bog'lavchi kuchlariga bog'liq bo'ladi. Shuning uchun bitta energetik sath ajralishidan hosil bo'lgan barcha energetik sathchalar qandaydir  $\Delta E$  energiya sohasi ichida bo'ladi. Bu sohaning kengligi unchalik kuchli bo'lмаган о'заро та'sir paytida sathlar orasidagi masofadan kichik bo'ladi. Bu vaqtда sathchalarning taqsimlanishi uzluksiz bo'ladi. Atomning bitta energetik sathining ajralishidan hosil bo'lgan sathchalar ruxsat etilgan zonani hosil qiladi. Bu zonalar bir-biridan taqiqlangan energetik oraliqlar bilan ajratilgan bo'ladi. Bu oraliqlar *taqiqlangan zonalar* deyiladi. Biror sath ajralishidan hosil bo'lgan zonani ham shu sath belgisi bilan belgilaydilar. 11.4-rasmda litiy kristali atomining 1s va 2s sathlari ajralishidan hosil bo'ladigan energetik zonalar tasvirlangan.

Rasmdan ko'rindiki, 2s sath to'lqin funksiyasining radial cho'zilishi 1s sathi to'lqin funksiyasi radial cho'zilishidan katta bo'lganligi uchun 2s zona 1s zonadan kengroq va 2s zonada o'zaro ta'sir kuchliroq namoyon bo'ladi. 1s va 2s sathlar to'lqin funksiyasining radial cho'zilishi 11.5-rasmda keltirilgan.


11.4-rasmda keltirilgan litiy atomi energetik sathlarinig ajralish tasviri boshqa qattiq jism atomlariga ham to'g'ri keladi. Faqat sathlar soni, kengligi, zonalar taqsimlanishi boshqacha bo'ladi, lekin tasvirning umumiy xarakteri o'zgarmaydi. Qattiq jismlar atomining pastda joylashgan sathlari ajralganda tor zonalarni hosil qiladi, yuqorida joylashgan sathlar ajralganda esa keng zonalar hosil bo'ladi. Agar qattiq jismda bir necha xil atomlar bo'lsa (masalan, NaCl), u



11.4-rasm

vaqtida barcha komponentalar energetik sathlaridan zonalar hosil bo‘ladi. Eng keng zona valent elektron sathiga to‘g‘ri keladi. Shuning uchun ham qattiq jismalar nurlanganda optik diapazonda chiziqli spektr hosil bo‘lmaydi. Qattiq jism yuqori temperaturagacha qizdirilganda uzluksiz spektr hosil bo‘ladi. Rentgen

trubkalarda qattiq jismlar antikatod sifatida ishlatilganda tor ichki zonalar orasidagi o‘tishlarda rentgen spektrlari kuzatiladi. Kristall atomlari orasida bog‘lanish rentgen spektrlariga ta’sir qilmaydi. Atom sathlaridan zonalarning hosil bo‘lishi kristallarning barcha xillarida kuzatiladi. Kristallar turlari orasidagi farq zonalarning boryo‘qligida emas, balki ularning to‘ldirilish xarakteridadir.



11.5-rasm


#### 11.4-§. O‘ta oquvchanlik. Tajriba natijalari

Moddalarning kristallanishi (qotishi) atomlar (molekulalar) orasida o‘zaro tortishish kuchlari ta’sirida hosil bo‘ladi. Kristallanish jarayoniga zarralarning tartibsiz harakati qarshilik ko‘rsatadi. Klassik fizika nuqtai nazardan bu harakat issiqlik harakati bo‘lib, absolyut nol temperaturada butunlay to‘xtaydi. Shu nuqtai nazarga asosan, absolyut nolga yaqinlashganda har qanday modda qattiq holatga o‘tishi kerak. Kvant mexanikasi nuqtai nazaridan atomlar issiqlik harakatidan tashqari absolyut nol temperaturada ham to‘xtamaydigan *nol tebranma* harakatda (energiyasi  $\hbar\omega/2$ ) bo‘ladi. Atom massasi qancha kichik bo‘lsa uning *nol tebranma* harakat chastotasi


$\omega$  shuncha katta bo‘ladi, ya’ni  $\omega \approx \frac{1}{\sqrt{m}}$ . Agar atomlar orasidagi tortishish kuchlari tebranishlarga qarshi turish uchun yetarli bo‘lmasa, u vaqda absolyut nol temperaturada ham modda qattiq holatga o‘tmaydi (agar bosim juda katta bo‘lmasa) suyuq holatida qolaveradi. Bunday hodisani geliyda kuzatish mumkin. Buning ikki sababi bor. Birinchidan, barcha inert gazlar orasida geliy atomlarining

massalari juda kichik. Ikkinchidan, inert gazlar atomlari yopiq tashqi sferik-simmetrik elektron qobiqlariga ega. Geliy atomining yagona  $K$  qobig'i ham shunday,  $K$  qobiq ikki elektrondan iborat yopiq qobiqdir. Shuning uchun geliy atomlari orasidagi tortishish kuchlari nisbatan kuchsiz, chunki suyuq geliyning zichligi kichik ( $2,20\text{K}$  temperaturada va to‘yingan bug‘lar bosimida zichligi  $0,146 \text{ g/sm}^3$ ). Normal bosim va absolyut nol temperaturada geliy suyuq holda bo‘lib, uning kvant xossalari namoyon bo‘ladi. Shuning uchun geliyini *kvant suyuqligi* deyiladi. Ma’lum bo‘lgan barcha moddalar orasida absolyut nol temperaturada suyuq holda bo‘lish xossasi faqat geliyga xosdir. Lekin geliyni qattiq holda ham hosil qilish mumkin. Buning uchun suyuq geliyga bo‘lgan tashqi bosim  $25,3 \text{ atm}$ . katta bo‘lishi kerak. Bunday bosim tortishish kuchlarini oshirish bilan ekvivalentdir.

Geliyning ikkita turg‘un izotopi mavjud:  ${}^4_2\text{He}$  va  ${}^3_2\text{He}$ , havo hajmida  $5 \cdot 10^{-4}\%$  geliy bor. Tabiiy geliy deyarli faqat  ${}^4_2\text{He}$  dan iborat bo‘lib,  ${}^3_2\text{He}$  ning miqdori hisobga olmaslik darajada kichik. Masalan, havodan olingan geliy  ${}^4_2\text{He}$  aralashmasida  ${}^3_2\text{He}$  miqdori umumiy gaz massasining  $10^{-7}$  foizini tashkil qiladi.  ${}^3_2\text{He}$  sun‘iy yo‘l bilan makroskopik miqdorda hosil qilingandan so‘ng, uning xossalari ni o‘rganish mumkin bo‘ldi.  ${}^3_2\text{He}$  tritiyning  $\beta$ -yemirilishi natijasida hosil bo‘ladi.



${}^3_1\text{H}$  – tritiyning o‘zi esa quyidagi yadro reaksiya natijasida hosil bo‘ladi:




${}^3_2\text{He}$  hosil bo‘ladigan boshqa reaksiyalar ham mavjud. Tabiiy geliyini suyultirish 1908-yilda Leyden laboratoriyasida Kamerling – Onnes tomonidan amalga oshirilgan. Shundan so‘ngina absolyut temperatura yaqinida geliyning xossalari ni o‘rganish imkoniyati tug‘ildi.


${}^4_2\text{He}$  ning kritik temperaturasi  $T_k = 5,25\text{K}$ , geliy faqat shu tempe-

raturedan past bo'lgan temperaturadagina suyuq holatda bo'la oladi. Bosim 1 atm. bo'lganda  $^4\text{He}$  4,21 K temperaturada qaynaydi.  $^3\text{He}$  ning kritik temperaturasi 3,35 K. Bosim 1 atm. bo'lganda  $^1\text{He}$  3,195 K temperaturada qaynaydi. Tabiiy geliy 1926-yilda qattiq holda Keye-zom tomonidan olingan. Qattiq geliyni olish uchun nol temperaturada 25,3 atm. bosim talab qilinadi, 60K temperaturada esa 10000 atm. talab qilinadi. Qattiq geliy tiniq va rangsiz modda. Bundan keyin geliy deyilganda, uning og'ir izotopi  $^4\text{He}$  tushuniladi.  $^4\text{He}$  ning holat diagrammasi 11.6-rasmda keltirilgan.

Temperaturasi pasayganda suyuq geliy ikkinchi darajali qaytar fazaviy aylanishlarda qatnashadi, ya'ni bunday aylanishlarda issiqlik yutilmaydi va chiqarilmaydi, suyuqligining solishtirma hajmi esa o'zgarmay qoladi. Bosimning oshishi bilan o'tish temperaturasi  $T_c$  chiziqli qonun bo'yicha maksimal qiymat 2,17 K dan (geliy bug'larining to'yingan bosimida – 37,80 mm Hg) minimal qiymat 1,77 K gacha (30 atm. bosimida) kamayadi. ( $T, P$ ) holat diagrammasida bunday fazaviy o'tishlar bajariladigan nuqtalar  $\lambda$  chiziqlar deb ataladigan to'g'ri chiziqlar ustida joylashgan. Temperaturasi  $T_c$  dan past bo'lgan suyuqlik geliy-II deyiladi (bir xil bosimda). Fazaviy o'tishning namoyon bo'lishi, birinchidan, issiqlik sig'imining  $T_c$  temperaturada sakrab o'zgarishida kuzatiladi.  $T_c$  temperaturaning har ikki tomonida geliyning issiqlik sig'imi



11.6-rasm



11.7-rasm

turli xil proporsionallik koeffitsientli quyidagi logarifmik qonun buyicha

$$C = \text{const} \ln \frac{1}{(T - T_A)}, \quad (11.24)$$


cheksizga intiladi. Issiqlik sig'imi egri chizig'inинг ko'rinishi (11.7-rasm) λ ga o'xshashlidan λ nuqta va λ chiziqlar deyilgan nomlar kelib chiqqan. Ikkinchidan HeI↔HeII o'tishlarda kengayishning temperatura koeffitsienti sakrab o'zgaradi, bu koeffitsient He-II uchun manfiydir.

Geliy-I o'zini oddiy suyuqlik kabi tutadi va yopishqoqlik hamda issiqlik o'tkazuvchanlikning chekli qiymatlariga ega. Geliy-II esa o'ziga xos xossalarga ega bo'lib, bu xossalalar faqat kvant tasavvurlar asosidagina tushuntirilishi mumkin. Geliy-II ning kvant suyuqligi deyilishining ikkinchi sababi ham shunda. Birinchi sababi gelyining absolyut nol temperaturada ham suyuq holda bo'lishidir. Bu xossalalar gelyy-II o'ta oquvchanligining ko'rinishi bo'lib, 1937-yilda P.A. Kapitsa tomonidan aniqlangan. Kapitsaga qadar gelyy-II suyuqligining tor kapillyarlar va tirqishlar orqali oqishini kuzatishlar uning yopishqoqligiga nisbatan o'zaro to'g'ri kelmaydigan natijalarga olib keldi. Kapitsa buning sababini kapillyar va tirqishlarning juda keng bo'lishida deb tushuntirdi. Geliy-II ning yopishqoqligini tekshirishdan olingan natijalar orqali Reynolds soni hisoblanganda juda katta son hosil bo'ladi. Reynolds sonining bunday katta qiymatida gelyy-II ning oqimi turbulent bo'lishi kerak. Kapitsa gelyy-II ning juda tor kapillyar va tirqishlar (diametri  $10^{-5}$  sm dan ham kichik) orqali oqishini kuzatib uning laminar ekanligini aniqlashga muvaffaq bo'ldi. Bunday holda gelyy-II kapillyardan yopishqoqlik kuchiga uchramasdan oqadi. Bu hodisa, ya'ni oqimda yopishqoqlikning yo'qolishi o'ta oquvchanlik deb ataldi. 1938-yilda Keyezom va Mak Vud tomonidan gelyy-II ga tushirilgan diskning aylanuvchi tebranishlarining so'nish usuli bilan gelyy-2 ning yopishqoqligini o'chash ustida tajribalar o'tkazilgan. Tajriba natijalari gelyy-II ning yopishqoqligi chekli qiymatga ega ekanligini va λ nuqta yaqinida gelyy-I ning yopishqoqlidan kam farq qilishini ko'rsatdi.

Geliy-II da kuzatiladigan ayrim hodisalarni qaraylik. Geliy-II ning 1938-yilda L.Tissa tomonidan asoslangan ikki suyuqlikli modeli

1941-yilda L.D. Landau tomonidan takomillashtirildi. Bu modelga asosan geliy-2 ikkita komponentadan iborat: normal ( $n$ ) va o'ta oquvchan ( $s$ ). Bu komponentalarning har biri o'z zichliklari (suyuqlikning to'liq zichligi  $\rho = \rho_n + \rho_s$ ) va gidrodinamik tezliklari  $\vartheta_n$  va  $\vartheta_s$  bilan xarakterlanadi. Suyuqlik oqimining to'liq zichligi impulsi  $j = \rho_n \vartheta_n + \rho_s \vartheta_s$  kattaliklar bilan aniqlanadi.  $T \rightarrow 0$  da normal komponenta zichligi  $\rho_n$  ham nolga intiladi. Geliy to'liq ravishda o'ta oquvchan holatda bo'lganda o'ta oquvchan komponenta zichligi —  $\rho_s$ .  $T > T_c$  da nolga aylanadi. Bu vaqtida geliy-II geliy-I ga aylanadi. Lekin ikki suyuqlikli model faqat geliy-II da bo'ladigan hodisalarini ifodalaydi-gan usul bo'lib, adekvat (tajribaga hamma vaqt ham mos emas) emas. Geliy-II ni normal va o'ta oquvchan atomlardan iborat ajratish mumkin emas, chunki atomlar bir xildir. Tinch holatda bo'lgan geliy-II da normal va o'ta oquvchan komponentalar orasida farq kuzatilmaydi. Aniqrog'i, ikkita komponenta mavjudligi to'g'risida emas, balki normal va o'ta oquvchan harakatlarning bir vaqtida vujudga kelishi haqida so'z yuritish to'g'ri bo'ladi. Bu vaqtida  $\rho_n$  va  $\rho_s$  lar oddiy koeffitsientlar sifatida bo'lib, u yoki bu effektga harakatlarning har birining qo'shgan hissasini bildiradi. Normal harakat suyuqlikning yopishqoqli oqishining barcha xossalariiga ega bo'ladi, bu vaqtida o'ta oquvchan harakat o'ta oquvchanlik hodisasing paydo bo'lishiga olib keladi. Ikki suyuqlikli model ko'rsatadi, geliy-II turidagi o'ta oquvchan harakat nafaqat yopishqoqsiz harakat bo'imasldan, balki issiqlik o'tkazishda ham qatnashmasligini ham ko'rsatadi.


Bayon qilingan bunday nuqtai nazarga ko'ra, geliy-II ning juda tor kapillyarlarda oqishida yopishqoqlikning yo'qolishi tushunarli bo'ladi. Geliy-II ning tor kapillyarlarda oqishida yopishqoqlik yo'qolgan o'ta oquvchan oqim paydo bo'ladi. Kapillyar qancha tor bo'lsa, o'ta oquvchan oqim shunchalik yaxshi hosil bo'ladi. Keng kapillyarda esa oqim turbulent bo'ladi. 1946-yilda E.L. Andronikashvilli tomonidan o'tkazilgan tajriba ikki suyuqlikli modelning to'g'riliгини tasdiqladi. Bu tajribaning sxemasi 11.8-rasmda keltilrilgan.



11.8-rasm

Alyuminiy folgadan yasalgan juda yupqa disklar to'plami (qalinligi 0,0015 sm) bir o'qda bir xil masofada (0,021 sm oralig'ida) ketma-ket joylashtirilgan bo'lib, elastik ipga osilgan va geliy-II da burama tebranma harakat qiladi. Disklarning tebranishiga geliy-II ning normal komponentasi asosiy sabab bo'lib, o'ta oquvchan komponenta bu tebranishlarga ta'sir ko'rsatmaydi.  $T > T_c$  bo'lganda, bu tebranishlarda butun suyuqlik qatnashadi.  $\lambda$  nuqtadan o'tganda tebranishlar davri keskin kamayadi, bu esa geliy-II da o'ta oquvchan komponentaning paydo bo'lganligi bilan tushuntiriladi. Temperaturaning keyingi pasayishlarida ham tebranish davrining uzlusiz kamayishi davom etadi. Tebranish davrini o'lhash bilan turli temperaturalarda  $\rho_n/\rho$  va  $\rho_s/\rho$  normal va o'ta oquvchan komponentalarning nisbiy miqdorlarini aniqlash mumkin bo'ldi. Natijalar 11.9-rasmda grafik ko'rinishida keltirilgan.

Grafikdan ko'rindaniki, absolyut nol temperaturada faqat o'ta oquvchan komponenta bo'ladi. Temperatura ortishi bilan uning miqdori kamaya boradi ( $\rho_n/\rho$  egrini chizig'i pastga tusha boradi).  $\rho_s/\rho$  nolga aylangan temperatura geliy-II ning geliy-I ga o'tish nuqtasi bo'ladi. Shunday qilib, suyuq geliyda fazaviy o'tish suyuqlikning o'ta oquvchan qismining yo'qolishi yoki paydo bo'lishi bilan bog'liqdir. Lekin bunday yo'qolish yoki paydo bo'lish asta-sekin boradi, ya'ni  $\lambda$  nuqtada  $\rho_s/\rho$  chegaraviy qiymatni  $\rho_s/\rho = 1$  oladi. Shuning uchun o'tish ikkinchi darajali fazaviy o'tish bo'ladi. Bayon qilingan nuqtai nazarga ko'ra, geliy-II ning tor kapillyar orqali oqishida yopishqoqlik kuzatilmaydi. Bu esa idishdan suyuqlikning ishqalanishga ega bo'limgan o'ta oquvchan qismining oqishi va



11.9-rasm


suyuqlikning normal qismining idishda ushlanib qolishi, uning yopishqoqligiga xos bo'lgan juda ham kichik tezlik bilan oqishi bilan bog'liqidir. Geliy-II da burama tebranishlar qilayotgan disk suyuqlikning normal qismida ishqalanib tormozlanadi. Shu sababdan yopishqoqlikning oxirgi qiymati hosil bo'ladi. Shunday qilib, kapillyarlardagi oqimni kuzatishlardagi tajribalarda geliy-II ning o'ta oquvchan qismining mavjudligi aniqlandi. Disk tebranishlarini kuzatish tajribalarida esa geliy-II ning normal qismining mavjudligi kuzatildi. Geliy-II da kuzatiladigan ba'zi bir hodisalarini ko'rib chiqaylik. Geliy-II solingen ikki idish bir-biri bilan tor kapillyar orqali ulangan. Bu yerda kapillyar vazifasini maydalangan najdak kukuni bilan to'ldirilgan trubka bajargan. Kukun zarralari orasida har xil qalinlikdagi (~100 nm) kanallar bo'lib, bu kanallarda geliyning o'ta oquvchan qismi oqadi. Dastlab geliy solingen idishlar temperaturasi bir xil bo'lib, geliy sathlari har xil bo'lsa, geliyning o'ta oquvchan qismining bir idishdan ikkinchi idishga oqishi boshlanadi. Bunda geliy oqib chiqayotgan idishda temperatura ko'tariladi va geliy oqib kirayotgan idishda temperatura pasayadi. Bu hodisa *mekanotermik* yoki *mexanokolorik effekt* deyiladi. Bu hodisa geliy-II ning o'ta oquvchan qisminning issiqlik olib o'tmasligi bilan tushuntiriladi. Shuning uchun geliy-II oqib chiqayotgan idishda ichki energiya o'zgarmaydi, undagi suyuqlikning umumiy miqdori esa kamayadi. Massa birligiga katta miqdorda ichki energiya to'g'ri keladi, bu esa temperaturaning ortishiga olib keladi. Aksincha, geliyning o'ta oquvchan qismi oqib kirayotgan ikkinchi idishda geliy-II ning solish-tirma ichki energiyasi kamayadi, shuning uchun bu idishda temperatura pasayadi.

Termomexanik effekt deb ataladigan teskari effekt ham mavjud. Bu hodisani kuzatish uchun quyidagi tajriba o'tkazilgan. Ikki idishga geliy-II solingen bo'lib, idishlar tor kapillyarlar bilan tutashtirilgan. Dastlab har ikki idishda temperatura va suyuqlik sathlari bir xil bo'lgan. Idishlardan biri qizdirilganda, bu idishda o'ta oquvchan komponenta miqdori kamayadi, normal komponenta esa ko'payadi. Temperatura muvozanat buziladi. O'ta oquvchan komponentaning sovuq idishdan issiqroq idishga oqishi orqali mexanik muvozanat tiklanadi. Bunday jarayon mexanikotermik effekt natijasida har ikki idishda temperaturalar farqi ortadi. Bunda normal komponenta

oqimda qatnashmaydi. Idishlardaga temperaturalar tenglashuvi mexanik muvozanat hosil bo'lishiga qaraganda juda sekin boradi. Temperaturalari tenglashmaguncha temperaturasi past idishdagi geliy sathi temperaturasi yuqori bo'lgan idishdagi geliy sathidan past bo'ladi. Shunday qilib, geliy-II temperatura farqi bo'lganda o'ta oquvchan qismining temperatura farqiga teskari tomonga oqishi kuzatiladi. Bu hodisa termomexanik effekt deyiladi. Termomexanik effektga geliy-ning favvoralanishi misol bo'lishi mumkin. Geliyning favvoralanishi 1938-yilda Allen va Jonson tomonidan kuzatilgan (11.10-rasm).

Qumqog'oz kukuni bilan zich to'ldirilgan trubkaning keng uchi geliyli vannaga tushiriladi, ikkinchi tor uchi esa vertikal kapillyarga ulangan. Qumqog'oz kukuni yoritilganda (cho'ntak fonari bilan yoritish mumkin) u qiziydi va o'ta oquvchan oqim geliy solingan vannadan trubkaga shunday tezlik bilan ko'tariladiki, kapillyardan geliy-II 30–40 sm yuqorigacha ko'tarilib fontan bo'lib oqadi.

Yana shunday bir tajribani ko'raylik, suyuq geliya tushirilgan jism sirtida to'yingan bug' bosimida qalnligi 30 nm yoki 100 atom qatlami bo'lgan yupqa pardalar hosil bo'ladi. Bunday pardalar hosil bo'lishi boshqa suyuqliklarda ham kuzatiladi (masalan, kerosinda).




11.10-rasm

Lekin geliy-II yopishqoqlik bo'lma-ganligi uchun o'ta oquvchan qismi tor kanallar bo'ylab parda ichkarisiga oqadi. Bu hodisa 1922-yilda Kamerling-Onnes tomonidan kuzatilgan. Natijada geliy-II solingan vannaga tushirilgan bo'sh probirka suyuqlik bilan to'la boshlaydi (11.11a-rasm). Probirkaning to'lishi probirka va vannadagi suyuqliklar sathi baravarlashguncha davom etadi. Probirka vannadan ko'tarilgach bo'shay boshlaydi (11.11b-rasm). Toki probirka vannadagi suyuqlik sirtidan butunlay ko'tarilguncha davom etadi. Probirkaning tashqi sirtidan vannaga tomadigan tomchilar hosil bo'ladi (11.11d-rasm).

Bu tajribalarda geliy-II sifon sifatida ishlaydi. Geliy-II ning o'ta oquvchan qismini harakatga keltiruvchi kuchni asosan pardagi oxiridagi gravitatsion potensialr farqi vujudga keltiradi. Geliy-II ning o'ta oquvchan qismining tezligi 20 sm/s ni tashkil qiladi. Geliy-II ning normal qismi o'zining yopishqoqligi tufayli pardada harakatsiz qoladi.

V. Keyezom va uning qizi A. Keyezom 1935-yilda geliy-I ning geliy-II ga o'tishi issiqlik o'tkazuvchanlikning keskin ortib ketishi (taqriban 106 marta) bilan sodir bo'lishini kuzatganlar. Geliy-II ning issiqlik o'tkazuvchanligi issiqliknin eng yaxshi o'tkazuvchi metallarnikidan ham yuz martadan ko'proq ortiq. Bundan tashqari, geliy-II da issiqlik oqimi temperaturalar farqiga proporsional emas, shuning uchun geliy-II da issiqlik o'tkazuvchanlik koeffitsienti to'g'risida mulohaza yuritish mumkin emas.

P.L. Kapisa geliy-II ning issiqlik berishidagi anomaliya sababi uning o'ta oquvchanligi natijasi ekanligini ko'rsatdi. Geliy-II dagi issiqlik berish konvektiv xarakterga egadir. Geliy-II da o'ta oquvchanlik va normal oqimlarining mavjudligini 1941-yilda P.L. Kapitsa tajribada kuzatdi. Tissa ikki suyuqlikli model asosida geliy-II da ikkinchi tovushning mavjudligi g'oyasini taklif qildi. Uning bu g'oyasi Landau tomonidan ishlab chiqildi va 1946-yilda V.P. Peshkov tomonidan tajribada kuzatildi. Oddiy suyuqlikda tebranishlarning tarqalishi tovushni hosil qiladi. Bunday to'lqinlar geliy-II da ham tarqalishi mumkin, bunda hosil bo'ladigan tovushlar birinchi tovushlar bo'ldi. Geliy-II da  $T=0$  bo'lganda, birinchi tovushning tarqalish tezligi 239 m/s ni tashkil qiladi, bu tezlik temperatura




11.11-rasm

ortishi bilan kamayadi. Birinchi tovush to‘lqinida o‘ta oquvchan va normal qismlar har bir vaqt oralig‘ida bir tomonga siljiydi, ya’ni bir xil fazada harakatlanadi. Lekin, agar geliy-II da temperaturalar farqi hosil qilinsa, temperaturalar konveksiya yo‘li bilan tenglasha boshlaydi. Bunda o‘ta oquvchan va normal qismlar qarama-qarshi tomonga harakat qilgani uchun, geliy-II ning to‘liq zichligi o‘zgar may qoladi va impulsning to‘liq oqimi  $j = \rho \cdot \rho' \cdot g$ , nolga teng bo‘ladi. Geliy-II ning o‘ta oquvchan va normal qismlari qarama-qarshi fazalarda tebranadi. Normal qism issiqlik olib o‘tadi, o‘ta oquvchan qism issiqlik olib o‘tmaydi. Ko‘rilayotgan holda temperatura to‘lqini hosil bo‘ladi, bunda zichlik o‘zgarmaydi, balki temperatura o‘zgaradi. Temperaturaning bunday o‘zgarishi ikkinchi tovush deb atalgan. Ikkinchi tovushning tezligi temperaturaga kuchli bog‘liq.  $T=0$  bo‘lganda ikkinchi tovush tezligi  $139 \text{ m/s}$ ,  $T=T_c$  bo‘lganda, bu tezlik nolga aylanadi. Landau nazariyasiga asosan,  $T=0$  da ikkinchi tovush tezligi birinchi tovush tezligidan  $\sqrt{3}$  marta kichik bo‘ladi (tajriba natijalariga asosan).

### 11.5-§. O‘ta o‘tkazuvchanlik

*O‘ta o‘tkazuvchanlik* deb, moddaning elektr o‘tkazish qarshiligi nol bo‘lgan holatga o‘tishi hodisasiga aytildi. Bunday hodisa 1911-yilda niderlandiyalik fizik X.Kamerling – Onnes tomonidan kashf etildi. Kamerling – Onnes 4,2 K temperaturada simobning



11.12-rasm


qarshiligi keskin pasayishini kuzatdi, lekin u 3 K temperaturada ham simob qarshiligi mavjudligini aniqlay olmagan edi. Modda qarshiligi ( $R$ ) va temperaturası ( $T$ ) orasidagi bunday bog‘-lanish 11.12-rasmda tasvirlangan. Hozirgi vaqtida o‘ta o‘tkazuvchanlik holatda o‘ta o‘tkazuvchilar solishtirma qarshiligi  $10^{-21} \text{ Om} \times \text{m}$  dan kichik, ya’ni uy temperaturasida misning qarshiligidan  $10^{17}$  marta kichikligi aniqlangan. 11.12-rasmdan ko‘rinadiki, normal holatdan o‘ta o‘tkazuvchanlik holatga

o'tishda ma'lum bir temperaturada juda keskin o'tiladi, bunday temperatura *kritik temperatura* ( $T_c$ ) deyiladi. Termodinamika nuqtai nazaridan bunday o'tish ikkinchi turdagı fazaviy o'tishdir, chunki bu o'tish elektron holatlarining qayta tuzilishi bilan bog'liq. O'ta o'tkazuvchanlik kashf qilingandan so'ng, o'tkazuvchanlikni faqat moddani qizitish bilan emas, balki magnit maydoniga joylashtirish bilan ham buzish mumkinligi aniqlandi. Normal holatdan o'ta o'tkazuvchanlik holatiga o'tish yuz beradigan magnit maydon *kritik maydon* deb ataldi. Kritik maydonning temperaturaga bog'liqligi quyidagi empirik formula orqali ifodalanadi:


$$H_c(T) = H_c(0) \left[ 1 - \left( \frac{T}{T_c} \right)^2 \right]. \quad (11.25)$$

$T=0$  K bo'lganda, kritik maydon maksimal bo'ladi va kritik temperaturaga yaqinlashgan sari kamayib boradi. Ba'zi bir o'ta o'tkazuvchan metallar uchun kritik magnit maydonning temperaturaga bog'liqligi 11.13-rasmda keltirilgan.


O'ta o'tkazuvchanlikni tadqiq qilishda 1933-yil ahamiyatli davr hisoblanadi. Bu davrda nemis fizigi V.Meyssner va R.Oksenfeld birinchi marta kritik temperaturadan past temperaturada magnit maydoni to'liq ravishda o'ta o'tkazuvchilardan siqb chiqarilishini aniqlashdi. Bunday hodisa *Meyssner effekti* deyiladi. 11.14-rasmda bu effekt o'ta o'tkazuvchi shar misolida tasvirlangan: o'ta o'tkazuvchanlik temperaturasidan past temperaturada o'ta o'tkazuvchanlikka o'tishda magnit maydoni kuch chiziqlari to'liq ravishda shardan siqb chiqara oladi. O'ta o'tkazuvchanlik holati moddaning fundamental xossasi hisoblanadi, bunday holat 11.5-rasmda ko'rsatilgan. Rasmda magnit tabletkasi o'ta o'tkazuvchanlik xossasiga ega bo'lgan idish ustida suzishi tasvirlangan. Tabletkaning magnit



11.13-rasm



11.14-rasm



11.15-rasm

maydoni o'ta o'tkazuvchan idishning yupqa qatlamida elektr tokini hosil qiladi. O'z navbatida bu tok magnit tabletkasi maydoniga qarama-qarshi bo'lgan magnit maydonini va idish materiali ichida kompensatsiya bo'ladigan magnit maydonini yuzaga keltiradi. Shunday qilib, magnit maydoni to'liq ravishda o'ta o'tkazuvchidan siqb

chiqariladi, magnit tabletkasi esa xususiy magnit maydoni kuch chiziqlari tepasida «muallaq» turadi. Namuna ichidagi magnit maydoni induksiyasi  $B$ , tashqi maydon kuchlanganligi  $H$  va magnitlanish maydoni kuchlanganligi  $I$  larning yig'indisiga teng bo'lganligi sababli, o'ta o'tkazuvchilarida  $I = -H$  va  $B = 0$  bo'lganligi sababli, ular ideal diamagnitlar hisoblanadi.

O'ta o'tkazuvchanlik nazariyasida 1950-yilda nazariyotchi fiziklar V.A. Ginzburg va L.D. Landau ahamiyatga molik ishlar qildilar. Bu ishlar II turdag'i fazaviy o'tishlardagi hodisalarining kvant tabiatini hisobga olgan holda rivojlanrilgan fenomenologik nazariya edi. 1957-yilda A.A. Abrikosov Ginzburg – Landau nazariyasi asosida II turdag'i o'ta o'tkazuvchilar nazariyasini ishlab chiqdi. Bu bilan 1937-yilda L.V. Shubnikov tomonidan o'ta o'tkazuvchi qotishmalarda kuzatilgan magnit maydonining qisman singishi va bu holda qarshilik nol bo'lishi hodisasi tushuntirildi. O'ta o'tkazuvchanlik hodisasingining mexanizmi 1957-yilda amerikalik olimlar Dj.Bardin, L.Kuper va Dj.Shriffer (BKSH nazariyasi) va rus olimi N.N. Bogolyubovlarning nazariy ishlaridan so'ng tushunarli bo'ldi. BKSh nazariyasida yangi prinsipial taklif berildi: o'ta o'tkazuvchilarida o'tkazuvchanlik elektron-fonon o'zaro ta'siri bilan juftlashgan elektronlar, ya'ni kuper juftliklari harakati tufayli hosil bo'ladi. Nazariyaning rivojlanishi o'ta o'tkazuvchanlik fizikasidagi asosiy tajriba natijalarini tushuntirdi va yangi effektlarning mavjudligini ko'rsatdi.

1961-yilda o'ta o'tkazuvchanlikda yana bir muhim yangilik aniqlandi: o'ta o'tkazuvchi silindrлarda magnit oqimining kvantlanishi hodisasi kuzatildi. 1962-yilda ingliz fizigi B. Josefson ikki o'ta

o'tkazuvchi orasiga qo'yilgan izolyator modda – oksidlar orqali tunnel o'tishi sodir bo'lishini nazariy bashorat qildi. Bu hodisa «kuchsiz o'ta o'tkazuvchanlik» deb nom oldi. Agar ikkita o'ta o'tkazuvchini ajratib turgan yupqa ( $10\text{\AA}$  tartibda) izolyator qatlami orqali o'tadigan tok  $i$  ning kritik qiymati ic dan katta bo'limganda, kontaktda kuchlanish tushishi bo'lmaydi (bu hodisa Djozefsonning statsionar effektidir).  $i > i_c$  bo'lgan holda kontaktda kuchlanishning tushishi sodir bo'ladi, bu vaqtida kontakt elektromagnit to'lqinlar nurlaydi (bu hodisa Djozefsonning nostatsionar effektidir). Bunday aytilgan bashoratlardan bir yil o'tgandan so'ng tajribada birinchi effekt, keyinchalik 1965-yilda ikkinchi effekt ochildi.

1986-yilda, ya'ni o'ta o'tkazuvchanlik ochilgandan 75 yil keyin ko'p yangiliklar qilindi. O'ta o'tkazuvchanlik holatda bo'la oladigan 40 turdag'i metallar ma'lum bo'ldi. Bu metallarning kritik temperaturalari  $0,012 \text{ K}$  dan (volfram uchun),  $11,3 \text{ K}$  (texnitsiy uchun) gacha bo'lgan oraliqda yotadi. Toza metallardan tashqari, bir necha yuzlab o'ta o'tkazuvchan birikmalar va qotishmalar ma'lum. Ko'pincha birikmalarda komponentalardan birortasi ham o'ta o'tkazuvchan bo'lmaydi, masalan,  $\text{CoSi}_2$ ,  $\text{CuS}$  birikmalarda. Shu vaqtgacha maksimal kritik temperaturaga ega bo'lgan birikmalarga  $\text{Nb}_3\text{Ge}$ ,  $\text{Nb}_3\text{Sn}$ ,  $\text{V}_3\text{Si}$  lar kiradi. Bu birikmalar mos holda  $23,2$ ,  $18$  va  $17 \text{ K}$  temperaturalarda o'ta o'tkazuvchanlik holatga o'tadi ( $\text{Nb}_3\text{Ge}$  da o'tish temperaturasi pylonkada hosil qilingan, og'ir namunada kritik temperatura  $15 \text{ K}$  atrofida). Ba'zi bir elementlar va birikmalarning o'ta o'tkazuvchanlik xususiyatlari  $11.2$  va  $11.3$ -jadvallarda keltirilgan.

#### 11.2-jadval

##### Ko'proq tarqalgan ba'zi bir texnik materiallarning kritik temperaturasi va maksimal kritik magnit maydoni

Modda	$T_c, \text{ K}$	$H_{c2}, \text{ Tl}; T=4,2 \text{ K}$ bo'lqanda
$\text{Nb}_3\text{Sn}$	18,0	22
$\text{NbZr}$	10	8,8
$\text{NbTi}$	10	10
$\text{Nb}_3\text{Ge}$	15	22

**Ba'zi bir elementlarning kritik temperaturasi va  
kritik magnit maydoni**

Element	$T_c$ , K	$H_c$ , $10^{-4}$ Tl	Element	$T_c$ , K	$H_c$ , $10^{-4}$ Tl
Al	1,19	105	Pb	7,2	803
Be	0,026		Sn	3,72	308
Cd	0,55	29,6	Ta	4,46	831
Ga	1,09	58,9	Ti	0,42	56
Hg	4,15	390	Tl	2,39	179
In	3,4	289	V	5,46	1167
La	4,88	808	W	0,015	1,07
Mo	0,92	98	Zn	0,85	52,5
Nb	9,3	1980	Zr	0,55	47,7

O'ta o'tkazuvchanlik sohasidagi tadqiqotlar rivojlanishi tahlil qilinganda, quyidagi tendensiya yaqqol ko'rindi: dastlab oddiy metallarning (Hg, Pb, Hg), keyinchalik ikki karrali ( $Nb_3Sn$ ,  $Nb_3Ge$ ) va uch karrali ( $Nb_3(Al, Ge)$ ) birikmalarning o'ta o'tkazuvchanligi o'rganilgan. O'ta o'tkazuvchanlikni bunday ketma-ketlikda o'rganish oddiy metallar o'rganilishining mantiqiy davomi deyish mumkin.  $Nb_3Ge$  birikmasi uchun kritik temperatura  $T_c=23,2$  K. O'ta o'tkazuvchanlikning mavjud bo'lishida temperatura intervali faqat suyuq vodorodning qaynash temperaturasiga (20,3 K) va suyuq neonning qaynash temperurasiga (27,1 K) yaqinlashadi. Haqiqatda esa materiallarni o'ta o'tkazuvchan holatga o'tkazish uchun juda qimmat turadigan va ishlatishda texnik qiyingchiliklar tug'diradigan xladoagent – suyuq geliydan foydalilanadi. Kritik temperaturaning ( $T_c$ ) chegaraviy qiymati suyuq azotning qaynash temperurasasi (77 K) hisoblanadi. Suyuq azot arzon va qulay xladoagent bo'lib, sanoatda katta miqdorda ishlab chiqariladi.

1986-yilda I.G. Bednors va K.A. Myullerlar tomonidan yuqori temperaturali o'ta o'tkazuvchilar ochildi. Ularning kritik temperaturasi suyuq azotning qaynash temperurasidan yuqori. Bunday birikmalarning əsosi mis oksidlari deb aytildi. Metall oksidli o'tkazuvchilar tadqiq qilinganda va shu yo'nalishda yangi o'ta o'tkazuvchi materiallar ochilishida Bednors va Myullerlar kashfiyotidan so'ng

butun dunyo ilmiy jamoatchiligi qo'shildi. 1987-yilda  $\text{YBa}_2\text{Cu}_3\text{O}_7$  keramikasida o'ta o'tkazuvchanlikka o'tish temperaturasi 92 K ga yetdi. Keyinchalik o'ta o'tkazuvchanlikka o'tish temperaturasi talliy birikmalarida 125 K gacha ko'tarildi. Oxirgi o'n yilda yuqori temperaturali o'ta o'tkazgichlar ustida olib borilgan izlanishlar natijasida simob birikmalarida eng yuqori kritik temperatura ~145 K ga erishildi.

### 11.6-§. Yuqori temperaturali o'ta o'tkazgichlar

Hozirgi vaqtدا yuqori temperaturali o'ta o'tkazgichlarga mis oksidlariga asoslangan va azot temperaturasi sohasida o'ta o'tkazuvchanlikka o'tish temperurasiga ega bo'lgan birikmalar kiradi. Hozir 20 dan ortiq yuqori temperaturali o'ta o'tkazgichlar aniq, ular turli metallar kupratlari bo'lib, aytilishda asosiy metall nomi bilan ittriyli yuqori temperaturali o'ta o'tkazgichlar deyiladi. Masalan,  $\text{YBa}_2\text{Cu}_3\text{O}_{7-x}$ ,  $T \approx 90$  K – ittriyeli yuqori temperaturali o'ta o'tkazgich,  $\text{Bi}_2\text{Sr}_2\text{CaCu}_2\text{O}_8$ ,  $T \approx 95$  K – vismutli,  $\text{Tl}_2\text{Ba}_2\text{CaCu}_2\text{O}_8$ ,  $T \approx 110$  K – talliyli,  $\text{HgBa}_2\text{CaCu}_2\text{O}_6$ ,  $T \approx 125$  K – simobli o'ta o'tkazgichlar deyiladi.

Yuqori temperaturali o'ta o'tkazgichlar ikkinchi turdag'i tipik o'ta o'tkazuvchilar vakili bo'lib, ular uchun london uzunligining kogerent uzunligiga nisbati katta qiymatga (bir necha yuz tartibda) ega. Shuning uchun ikkinchi kritik magnit maydoni  $H_{c2}$  juda katta qiymatga ega bo'ladi, jumladan Bi-212 uchun taqriban 400 Tl,  $H_c$ , uchun esa bir necha yuz ersted ( $1 \text{ e} = 10^{-4} \text{ Tl}$ ). 11.4-jadvalda kupratli oilalar ayrim tipik vakillarining parametrлари keltirilgan.


Yuqori temperaturali o'ta o'tkazgich monokristallarida quyi kritik magnit maydonidan katta bo'lgan magnit maydonlarida hamma vaqt ikkinchi turdag'i o'ta o'tkazgichlarga xos uyurmali strukturalarning mavjudligi kuzatiladi.

Oksidli o'ta o'tkazgichlar tarkibiga odatda 4–5 xil atomlar kiradi, elementar kristallografik yacheykaga esa 20 ga yaqin turli atomlar kiradi. Amalda barcha yuqori temperaturali o'ta o'tkazuvchilar Cu va O atomlardan iborat tekislikli perovskit tipidagi qatlamlı strukturaga ega. 11.16-rasmida keng tarqalgan yuqori temperaturali

**Yuqori temperaturali o‘ta o‘tkazuvchi materiallarning  
parametrlari**

Birikmalar	T <sub>c</sub> , K	CuO-qatlam soni	λ <sub>a,b</sub> , nm	λ <sub>c</sub> , nm	ξ <sub>a,b</sub> , nm	ξ <sub>c</sub> , nm
La <sub>1,85</sub> Sr <sub>0,15</sub> CuO <sub>4</sub>	40	1	80	430	3,7	0,7
YBa <sub>2</sub> Cu <sub>3</sub> O <sub>7</sub>	95	2	27	180	3,1	0,4
Bi <sub>2</sub> Sr <sub>2</sub> CaCu <sub>2</sub> O <sub>8</sub>	95	2	25	500	3,8–1,8	0,2
Bi <sub>2</sub> Sr <sub>2</sub> Ca <sub>2</sub> Cu <sub>3</sub> O <sub>10</sub>	115	3	<25	>500	3	<0,2

tipik o‘ta o‘tkazuvchi – YBa<sub>2</sub>Cu<sub>2</sub>O<sub>7-x</sub> ittriyli birikmaning kristallografik struktu-rasi tasvirlangan. Strelka bilan o‘tkazuvchi tekisliklar Cu—O holati ko‘rsatilgan.



11.16-rasm


O'ta o'tkazuvchanlikda kislороднинг mavjudligi muhim o'rин tutadi. Kislород atomlari ikkitा turli pozitsiyani egallashi mumkin: CuO<sub>2</sub> tekisliklarida (hu pozitsiyaлar hozir O<sub>3</sub> ko'rinishda belgilanadi) va CuO zanjirida (O<sub>1</sub> ko'rinishda belgilanadi), buni 11.16-rasmda ko'rish mumkin. Zanjirda kislород atomlarining kimyoviy bog'lanishi kuchli emas, termik ishlovda ular kristalldan chiqishi mumkin, zanjirda esa vakansiya (teshiklar) hosil bo'ladi, bu esa strukturaviy o'zgarishlarga olib keladi.

Masalan, ittiрили kupratda ( $x=7$  – kislород atomlarining soni) mis zanjirining kislород bilan to'liq to'lishiga ortorombik struktura mos keladi, kislород atomlari yetarli bo'lмаган holda tetrogonal struktura mos keladi (O<sub>1</sub> panjara  $x=6$ ). 11.17-rasmda YBa<sub>2</sub>Cu<sub>3</sub>O<sub>7-x</sub> – ittiрили kuprat kritik temperaturasining undagi kislород miqdori  $x$  ga bog'liqligi ko'rsatilgan.

Ko'п sondagi tajribalar natijalarini kislородli tekisliklar kris-tallografik panjaralarda asosiy obyekt ekanligini tasdiqlaydi. Kislородli tekisliklar oksidli birikmalarning o'tkazuvchanligini va ularda yuqori temperaturalarda o'ta o'tkazuvchanlikning hosil bo'lishini ta'minlaydi.

### *Nazorat savollari*

1. Qanday jismlarga qattiq jismlar deyiladi va ular necha xil bo'ladi?
2. Kristallar qanday turlarga bo'linadi?
3. Qanday kristallar ionli kristallar deyiladi va ionlar orasida qanday bog'lanish bor? Misollar keltiring.
4. Atomli kristallar qanday tuziladi va atomlar orasida qanday bog'lanish mavjud bo'ladi?
5. Kristall panjara davrini qanday tushunasiz?



11.17-rasm

6. Kristallarda bog'lanish turlari necha xil bo'лади?
7. Vodorod atomi orqали qanday zaryadlangan atomlar orasida bog'lanish vujudga keladi va bog'lanish qanday bog'lanish deyiladi?
8. Metall bog'lanishdagi elektron gazini qanday tushunasiz?
9. Metallarning o'tkazuvchanligini qanday elektronlar hosil qiladi?
10. Molekulyar bog'lanishni tushuntiring.
11. Dyulong va Pt1 qonunining mohiyati nimadan iborat va bu qonun qaysi temperaturalarda o'rinni?
12. Kvant nazariyasida atomning har bir erkinlik darajasiga to'g'ri keladigan o'rtacha energiya qanday formula bilan ifodalanadi?
13. Qattiq jismlar issiqlik sig'imi temperaturaga bog'liqmi? Past temperaturalarda issiqlik sig'imi qanday bo'лади?
14. Qattiq jismlar issiqlik sig'imining temperaturaga qarab o'zgarishi qaysi formula bilan ifodalanadi va bu formula qaysi olimning nomi bilan ataladi?
15. Past temperaturalarda, ya'ni  $hv \gg kT$  bo'lgan holda molyar issiqlik sig'imi c<sub>n</sub> qanday formulada aniqlanadi?
16. Xarakteristik temperatura qanday temperatura va u qaysi formula bilan aniqlanadi?
17. Fonon nima? Fonon energiya va impulsiga egami?
18. Qattiq jismlar atomlarida qanday energetik zonalar mavjud bo'лади?
19. Qattiq jismlar spektri qanday hosil bo'лади va u qanday ko'rinishda bo'лади?
20. Qanday holda modda absolyut nolda qattiq holatga o'tmaydi?
21. Geliy absolyut nol temperaturada qanday holatda bo'лади va uni qattiq holda ham hosil qilish mumkinmi?
22. Moddaning qanday holatga o'tishida o'ta o'tkazuvchanlik sodir bo'лади?
23. Kritik temperatura qanday temperatura?
24. Kritik magnit maydon deb qanday maydonni tushunasiz?
25. Kritik temperaturalarga ega bo'lgan birikmalarga qaysi birikmalar kiradi?
26. Yuqori temperaturali o'ta o'tkazuvchilar qachon va kimlar tomonidan ochildi?
27. Yuqori temperaturali o'ta o'tkazgichlarga qanday birikmalar kiradi?
28. Eng yuqori kritik temperatura qanchaga teng?

## I-ILOVA

**Mikrodunyoda fizik kattaliklar o'chamlari.** Mikrodunyo hodisalarini tekshirishlar ko'rsatadiki, atomlar va boshqa elementar zarralar bo'yinadigan qonunlar mikrodunyo qonunlaridan farq qiladi. Bu esa ma'lum darajada tezlik, energiya, uzunlik va boshqa fizik kattaliklar o'chamliklarning boshqa mashtabga o'tishi bilan bog'liqidir. Lekin buni makrodunyo va mikrodunyo qat'iy chegara bilan ajratilgan, mikrodunyoda boshqa qonunlar, makrodunyoda yana boshqa qonunlar ta'sir qiladi deb tushunmaslik kerak. Mikrodunyoda ta'sir qiladigan barcha qonunlar makrodunyoda ham ta'sir qiladi, lekin tekshiriladigan namunalar mashtabi boshqa bo'lgani uchun bu qonunlarning shakli, foydalanishlari o'zgaradi va mikrodunyo qonunlariga o'tadi. Mikrodunyoda fizik kattaliklarning o'chamliklari mashtabini qarab chiqaylik.

**Uzunlik.** Atom o'chami  $10^{-8}$  sm ( $1\text{ A} = 10^{-8}\text{ sm} = 10^{-10}\text{ m}$ ) yoki  $10^{-10}\text{ m}$  tartibidadir. Bu kattalik atomning tashqi elektron orbitasi radiusini ifodalaydi. Yuz million atomni bir qatorga joylashtirsa  $1\text{ sm} = 10^{-2}\text{ m}$  uzunlikni egallaydi. Yadroning o'chami ( $10^{-12} \div 10^{-13}$ )sm yoki ( $10^{-14} \div 10^{-15}$ )m tartibidadir.  $10^{-13}\text{ sm} = 10^{-15}\text{ m}$  uzunlik bir Fermi deb qabul qilingan. Ya'ni,

$$1\text{ Fermi} = 10^{-15}\text{ m}$$

yoki

$$1\text{ Fermi} = 10^{-13}\text{ sm}.$$

Hozirgi kungacha o'tkazilgan tajribalarda  $0,1\text{ Fermi}$  yoki  $10^{-14}\text{ sm} = 10^{-16}\text{ m}$  gacha bo'lgan uzunlikni o'chashga muvaffaq bo'lingan. Demak, mikrodunyoda uzunlik Fermi birliklarida o'chanadi.

**Energiya.** Atom va yadro tadqiqotlarida energiyaning o'chov birligi sifatida elektronvolt (eV), kiloelektronvolt (keV), megaelektronvolt (MeV) va gigaelektronvolt (GeV) birliklari ishlataladi.

Bir elektronvolt elektron elektr maydonida potensiallari farqi bir volt bo'lgan ikki nuqta orasida harakatlanganida olgan energiyasidir. Bir elektronvolt energiya va ish birliklari orasidagi bog'lanishlarni ko'raylik. Elektr maydonda zaryadni bir nuqtadan ikkinchi nuqtaga ko'chirishda maydon kuchlarining bajargan ishi quyidagicha aniqlanadi:

$$A=qU, \quad (1)$$

$q$  — elektron zaryadi. O'chov birligi SI — sistemasida Kulon. Zaryad kattaligi  $q=1,6 \cdot 10^{-19}\text{ Kl}$ .

$$1\text{ Kl}=3 \cdot 10^9 \text{ SGSE zaryad birligi.}$$

$$U \text{ vaqtida: } q=1,6 \cdot 10^{-19} \cdot 3 \cdot 10^9 = 4,8 \cdot 10^{-10} \text{ CGSE zaryad birligi.}$$

$U$  – potensiallar farqi, o‘lchov birligi  $SI$  sistemasida volt.

$$1 \text{ V} = \frac{1}{3 \cdot 10^2} \text{ SGSE} = \frac{1}{300} \text{ SGSE}$$
 potensial birligi.

(1) formula asosida SGSE birliklar sistemasida:

$$1 \text{ eV} = 4,8 \cdot 10^{-10} \text{ CGSE} \cdot \frac{1}{300} \text{ SGSE} = 1,6 \cdot 10^{-12} \text{ erg.}$$

Demak, mikrodunyoda energiya birliklari quyidagicha:

$$1 \text{ eV} = 1,6 \cdot 10^{-12} \text{ erg} = 1,6 \cdot 10^{-19} \text{ Joule};$$

$$1 \text{ keV} = 10^3 \text{ eV} = 10^3 \cdot 1,6 \cdot 10^{-12} \text{ erg} = 1,6 \cdot 10^{-9} \text{ erg} = 1,6 \cdot 10^{-16} \text{ Joule};$$

$$1 \text{ MeV} = 10^6 \text{ eV} = 10^6 \cdot 1,6 \cdot 10^{-12} \text{ erg} = 1,6 \cdot 10^{-6} \text{ erg} = 1,6 \cdot 10^{-13} \text{ Joule};$$

$$1 \text{ GeV} = 10^9 \text{ eV} = 10^9 \cdot 1,6 \cdot 10^{-12} \text{ erg} = 1,6 \cdot 10^{-3} \text{ erg} = 1,6 \cdot 10^{-10} \text{ Joule}.$$

Bu birliklar asosida massa atom birligining energiya ekvivalenti-ni aniqlash mumkin:

$$1 \text{ m.a.b} = 931,5 \text{ MeV};$$

$$1 \text{ elektron massasi} = 0,511 \text{ MeV}.$$

**Tezlik.** Har qanday harakatlar tezligining mutlaq chegarasi yorug‘likning vakuumdagi tezligi hisoblanadi, ya’ni:

$$c = 3 \cdot 10^{10} \text{ sm/s} = 3 \cdot 10^8 \text{ m/s.}$$

Yorug‘lik tezligi bilan elektromagnit to‘lqinlar va massaga ega bo‘limgan neytrino harakatlanadi. Massaga ega bo‘lgan boshqa elementar zarralar yorug‘lik tezligiga yaqin tezlikka ega bo‘lishi mumkin, lekin yorug‘lik tezligidan kichik. Masalan, protonning kinetik energiyasi  $10^9$  eV bo‘lganda, uning tezligi yorug‘lik tezligining 85% iga teng bo‘ladi. Mikrodunyoda zarralar tezligi yorug‘lik tezligi bilan taqqoslanishi va unga yaqin bo‘lishi mumkin, bunday hol makrodunyoda kuzatilmaydi. Yorug‘lik tezligi mikrodunyoda tezliklar mashtabini belgilaydigan kattalik sifatida qabul qilinadi. Demak, mikrodunyoda tezlik yorug‘lik tezligi ulushlari bilan o‘lchanadi.

**Vaqt.** Uzunlik Fermilarda, tezlik yorug‘lik tezligi ulushlarida o‘lchanadigan mikrodunyoda hodisalar yuz beradigan vaqt mashtabi ham biz odatlangan vaqt dan farq qilish kerak. Agar 10 Fermi uzunlikni yorug‘lik tezligiga bo‘lsak, ya’ni, zarra yorug‘lik tezligi bilan harakatlanib yadroni diaametri bo‘yicha kesib o‘tishi uchun ketgan vaqt hisoblansa, quyidagi kattalik hosil bo‘ladi:

$$\frac{10 \cdot 10^{-13}}{3 \cdot 10^{10}} \approx 3 \cdot 10^{-23} \text{ s},$$

$10^{-23}$  sekund yadro vaqt deb ham yuritiladi, bu bilan elementar zarralar mikrodunyosida vaqt mashtabi aniqlanadi.

**Massa.** Massa zarralarning inertligini va gravitatsion xossalarni ifodalaydi. Massa orqali zarraning zahira energiyasi aniqlanadi. Nisbiylik nazariyasiga asosan  $\theta$  tezlik bilan harakatlanayotgan jismning to‘liq energiyasi:

$$E = mc^2 = \frac{m_0 c^2}{\sqrt{1 - \frac{v^2}{c^2}}}. \quad (2)$$

$v < c$  bo'lganda  $v/c$  daraja bo'yicha yoyib to'liq energiya uchun quyidagi ifoda hosil qilinadi:

$$E \approx \frac{m_0 v^2}{2} + m_0 c^2 \quad (3)$$

(3) ko'rindiki, jismning to'liq energiyasi uning kinetik energiyasi va tinchlikdagi energiyasidan iborat tinchlikdagi massasi  $m_0$  bo'lgan jism zahira  $E_0$  hususiy energiyaga ega bo'ladi, bu energiya munosabat bilan ifodalanaadi. Elementar zarralarning massa birligi sifatida elektronning tinchlikdagi massasi ( $m_e$ ):

$$m_e = 9 \cdot 10^{-28} \text{ g} = 9 \cdot 10^{-31} \text{ kg}$$

qabul qilingan. Agar bu massa energetik birliklarda ifodalansa, elektron massasining energiyaga ekvivalentligi hosil bo'ladi:

$$1 \text{ elektron massa} = m_e c^2 = \frac{9 \cdot 10^{-28} \cdot 9 \cdot 10^{20}}{1,6 \cdot 10^{-6}} = 0,511 \text{ MeV.}$$

Atom va yadro fizikasida atom va yadro massalari massanining atom birliklarida o'lchanadi. 1962-yilgacha massanining bir atom birligi qilib, kislorod ( ${}^{16}_8\text{O}$ ) neytral atomi massasining  $1/16$  qismi qabul qilingan edi. 1962-yildan boshlab atom massasining yangi uglerod ( ${}^{12}_6\text{C}$ ) shkalasi qabul qilindi. Bunda massanining bir atom birligi qilib uglerod ( ${}^{12}_6\text{C}$ ) atomi massasining  $1/12$  qismi qabul qilindi. Massanening atom birligi qisqacha m.a.b ko'rinishida yoziladi. Bu birlik atom massasining xalqaro birligidir.

$$1 \text{ m.a.b} = 1/{}^{12}\text{C massasi.}$$

Uglerod shkalasida vodorod atomining massasi 1,0078252, neytron massasi 1,0086654, elektron massasi 0,0005486 massa birligiga teng. Massanening atom birligini grammlarda ifodalash mumkin:

$$1 \text{ m.a.b.} = \frac{1}{16} \cdot \frac{16}{N_A} = \frac{1}{6,023 \cdot 10^{23}} = 1,66 \cdot 10^{-24} \text{ g,}$$

ya'ni,  $1 \text{ m.a.b} = 1,66 \cdot 10^{-24} \text{ g} = 1,66 \cdot 10^{-27} \text{ kg.}$

Massanening bir atom birligining energiyaviy ekvivalenti ( $m = 1,66 \cdot 10^{-24} \text{ g}$  va  $c = 3 \cdot 10^{10} \text{ sm/s}$ ),  $E = mc^2 = 1,492 \cdot 10^{-3} \text{ erg.}$

**Harakat miqdor momenti.** Harakat miqdor momentining kvant birligi qilib  $\hbar$  qabul qilingan.

Demak,  $\hbar = 1,054 \cdot 10^{-34}$  erg·s yoki  $\hbar = 1,054 \cdot 10^{-34}$  J·s.

Atomdagi elektron bir  $\hbar$  yoki bir necha  $\hbar = (n \cdot \hbar)$  harakat miqdor momentiga ega bo'lishi mumkin. Harakat miqdor momenti bir qiymatdan ikkinchi qiymatga o'tgandagi o'zgarishi juda kichik bo'ladi, bunday kichik o'zgarishni makrodunyo hodisalarida sezib ham kuzatib ham bo'lmaydi. Zarralarning harakat miqdor momentini oshirish uchun ularning tezligini oshirish kerak. Orbitadagi elektronning harakat miqdor momentini  $\hbar$  ga oshirish uchun uning tezligini ikki marta oshirish kerak bo'ladi.

---

## 2-ILOVA, AMALIY MASHG'ULOTLAR MAVZULARI VA MASALAR

### 1. Issiqlik nurlanishi

1.1. Quyosh qora jismdek nur sochadi deb qabul qilib, uning energetik yorituvchanligi  $M_e$  va sirtidagi temperatura  $T$  hisoblansin. Quyoshning gardishi Yerdan  $\theta=32^\circ$  burchak ostida ko'rinishi. Quyosh doimisi  $C=1,4 \text{ kJ/(m}^2\text{-s)}$ .

(Javob:  $64,7 \text{ MVt/m}^4$ ;  $5,8 \text{ kK}$ )

1.2. Eritish pechning ko'rish tuynugidan sochilayotgan energiya oqimi  $\Phi_e=34 \text{ Vt}$ . Agar tuynukning yuzasi  $S=6 \text{ sm}^2$  bo'lsa, pechning temperaturasi  $T$  aniqlansin.

(Javob:  $1 \text{ kK}$ )

1.3. Qora jismning energetik yorituvchanligi  $M=10 \text{ kVt/m}^2$  bo'ladigan temperatura  $T$  aniqlansin.

(Javob:  $648 \text{ K}$ )

1.4.  $T=0^\circ\text{C}$  temperaturada qora jism energetik yorituvchanligi spektral zichligining maksimumi  $(M_{\lambda,T})_{max}$  qanday to'lqin uzunligiga mos keladi?

(Javob:  $10,6 \text{ mkm}$ )

1.5.  $T=400 \text{ K}$  temperaturada  $t=5 \text{ min}$  vaqt davomida qorakuyaning  $S=2 \text{ sm}_2$  yuzali sirtidan  $W=83 \text{ J}$  energiya sochiladi. Qorakuyaning issiqlik nurlanish koefitsienti  $\varepsilon$  aniqlansin.

(Javob:  $0,9537$ )

1.6. Quyoshning yuqori qatlamlarining temperaturasi  $5,8 \text{ kK}$  ga teng. Quyoshni qora jism sifatida qabul qilib, Quyosh energetik yorqinligi spektral zichligining maksimumi  $(M_{\lambda,T})_{max}$  ga mos keluvchi to'lqin uzunligi  $\lambda_m$  aniqlansin.

(Javob:  $54 \text{ nm}$ )

1.7.  $T=600\text{ K}$  temperaturada ko'mirning issiqlik nurlanish koeffitsientini  $\omega=0,8$  deb qabul qilib: 1) ko'mirning energetik yorituvchanligi  $M_e$ ; 2)  $t=10\text{ min}$  vaqt davomida ko'mirning  $S=5\text{ sm}^2$  yuzali sirtida sochiladigan  $W$  energiya aniqlansin.

(Javob:  $R_e = \alpha_T G T^4 = 5,88 \text{ kVt/m}^2$ ;  $W = R_e S T = 1,76 \text{ kJ}$ )

1.8. Qora jism energetik yorituvchanligi spektral zichligining maksimumi  $(M_{\lambda,T})_{max}=4,16 \cdot 10^{11} (\text{Vt/m}^2)/\text{m}$ . U qanday  $\lambda_m$  to'lqin uzunligiga to'g'ri keladi?

(Javob:  $1,45 \text{ mkm}$ )

1.9. Qora jismning energetik yorituvchanligi  $M_e$  ikki marta o'sishi uchun uning termodinamik temperaturasini necha marta orttirish kerak?

(Javob:  $1,19$  marta)

1.10. Artur yorqin yulduzi energetik yorituvchanligi spektral zichligining maksimumi  $(M_{\lambda,T})_{max} = 580 \text{ nm}$  to'lqin uzunligiga to'g'ri keladi. Yulduz qora jismdek nur sochadi deb qabul qilib, uning sirtining temperaturasasi  $T$  aniqlansin.

(Javob:  $4,98 \text{ kK}$ )

1.11. Energetik yorituvchanligi spektral zichligining maksimumi  $(M_{\lambda,T})_{max}$  ko'rish spektrining  $\omega$  qizil chegarasiga ( $\lambda_1=750 \text{ nm}$ ); b) binafsha chegarasiga ( $\lambda_2=380 \text{ nm}$ ) to'g'ri kelganda, qora jismning temperaturasasi  $T$  qanday bo'ladi?

(Javob:  $3,8 \text{ kK}; 7,6 \text{ kK}$ )

1.12. Agar pechning temperurasasi  $T=1,2 \text{ kK}$  bo'lsa, yuzasi  $S=8 \text{ sm}^2$  bo'lgan eritish pechining tuynugidan  $t=1 \text{ min}$  vaqtida sochiladigan  $W$  energiya aniqlansin.

(Javob:  $3,65 \text{ kJ}$ )

1.13. Qora jismning termodinamik temperurasasi  $T$  ikki marta ortganida energetik yorituvchanlik spektral zichligining maksimumiga to'g'ri keluvchi  $\lambda_m$  to'lqin uzunligi  $\Delta\lambda=400 \text{ nm}$  ga kamaydi. Boshlang'ich va oxirgi temperatura  $T_1$  va  $T_2$  lar aniqlansin.

(Javob:  $3,62 \text{ kK}; 7,24 \text{ kK}$ )

1.14. Quyosh 1 minutda qancha miqdor energiya chiqaradi? Quyosh nurlanishi absolyut qora jism nurlanishiga yaqin deb hisoblansin. Quyosh sirtining temperurasini  $5800^\circ\text{K}$  deb qabul qilinsin.

(Javob:  $W=6,5 \cdot 10^{21} \text{ kVt}\cdot\text{min}$ )

1.15. Pechdagi  $6,1 \text{ sm}^2$  o'lchamli teshikdan 1 sekundda  $8,28$  kal issiqlik nurlanadigan bo'lsa, pechning temperurasasi qancha? Nurlanish absolyut qora jism nurlanishiga yaqin deb hisoblansin.

(Javob:  $1000 \text{ K}$ )

1.16. Absolyut qora jismning nurlanishini quvvati 34 kVt. Jism sirti  $0,6 \text{ m}^2$  bo'lsa, uning temperaturasini aniqlang.

(Javob: 1000 K)

1.17. Agar absolyut qora jism energetik yorituvchanligining maksimal spektral zichligi  $4840 \text{ \AA}$  to'lqin uzunligi to'g'ri keladigan bo'lsa, absolyut qora jism 1 sekundda  $1 \text{ sm}^2$  sirtidan qancha energiya chiqaradi?

(Javob:  $W=7,35 \cdot 10^3 \text{ J}$ )

## 2. Elektromagnit nurlanishning korpuskulyar xususiyatlari

2.1. Rux plastinkaga to'lqin uzunligi  $\lambda=220 \text{ nm}$  bo'lgan monoxromatik yorug'lik tushadi. Fotoelektronlarning maksimal tezligi aniqlansin.

(Javob:  $760 \text{ km/s}$ )

2.2. Fotoelektronlarning maksimal tezligi  $10 \text{ Mm/s}$  ga teng bo'lganda, muayyan metallning sirtiga tushayotgan ultrabinafsha nurlanishning to'lqin uzunligi  $\lambda$  aniqlansin. Elektronlarning metalldan chiqish ishi hisobga olinmasin.

(Javob:  $4,36 \text{ nm}$ )

2.3. Litiy sirtiga monoxromatik yorug'lik tushadi ( $\lambda=310 \text{ nm}$ ). Elektronlar emissiyasini to'xtatish uchun  $1,7 \text{ V}$  dan kam bo'lgagan tutuvchi potensiallar farqini qo'yish kerak. Chiqish ishi  $A$  aniqlansin.

(Javob:  $2,3 \text{ eV}$ )

2.4. Agar fotoeffektning qizil chegarasi  $\lambda_0=307 \text{ nm}$  va fotoelektronning maksimal kinetik energiyasi  $T_{max}=1 \text{ eV}$  bo'lsa, foton energiyasining qanday hissasi fotoelektronni urib chiqarishga sarflangan?

(Javob:  $0,8$ )

2.5. Agar natriy uchun fotoeffektning qizil chegarasi  $\lambda_0=500 \text{ nm}$  bo'lsa, elektronlarning natriydan chiqish ishi  $A$  aniqlansin.

(Javob:  $2,49 \text{ eV}$ )

2.6.  $\varepsilon=1,53 \text{ MeV}$  energiyali g-fotonlar bilan nurlantirilganda, metalldan uchib chiqqan fotoelektronlarning maksimal tezligi  $\vartheta_{max}$  aniqlansin.

(Javob:  $291 \text{ Mm/s}$ )

2.7.  $\gamma$ -fotonlar bilan nurlantirilgan metalldan uchib chiqayotgan fotoelektronlarning maksimal tezligi  $\vartheta_{max}=291 \text{ Mm/s}$ .  $\gamma$ -fotonlarning energiyasi  $\varepsilon$  aniqlansin.

(Javob:  $1,59 \text{ MeV}$ )

2.8. To'lqin uzunligi  $\lambda=55,8 \text{ pm}$  bo'lgan rentgen nurlari grafit plitkasidan sochiladi (Kompton hodisasi). Tushayotgan yorug'lik dastasining yo'nalishiga nisbatan  $\theta=60^\circ$  burchak ostida sochilgan yorug'likning to'lqin uzunligi  $\lambda'$  aniqlansin.

(Javob: 57 pm)

2.9. 1) erkin elektronlarda; 2) erkin protonlarda Kompton sochilishida to'lqin uzunligining maksimal o'zgarishi aniqlansin.

(Javob: 1) 4,84 pm; 2) 2,64 fm)

2.10.  $\varepsilon=0,4 \text{ MeV}$  energiyali foton erkin elektronda  $\theta=90^\circ$  burchak ostida sochiladi. Sochilgan fotonning energiyasi  $\varepsilon'$  va sochuvchi elektronning kinetik energiyasi  $T$  aniqlansin.

(Javob: 0,224 MeV; 0,176 MeV)

2.11. Foton ( $\lambda=1 \text{ pm}$ ) erkin elektronda  $\theta=90^\circ$  burchak ostida sochildi. Foton o'z energiyasining qancha hissasini elektronga bergen?

(Javob: 70%)

2.12. Fotonning to'lqin uzunligi  $\lambda$  elektronning Kompton to'lqin uzunligi  $\lambda_0$  ga teng. Fotonning energiyasi  $\varepsilon$  va impulsi  $P$  aniqlansin.

(Javob: 0,511 MeV;  $27 \cdot 10^{-22} \text{ kg m/s}$ )

2.13. Grafit rentgen nurlarini  $60^\circ$  burchak bilan sochsa (to'lqin uzunligi  $2,54 \cdot 10^{-9} \text{ sm}$ ), kompton sochilishda rentgen nurlarining to'lqin uzunligi qanday bo'lgan?

(Javob:  $\lambda_0=0,242 \text{ \AA}$ )

2.14. Rentgen trubkasiga 1) 30 kV, 2) 40 kV va 3) 50 kV potensiallar ayirmasi berilgan. Uzluksiz rentgen spektrining qisqa to'lqin chegarasi topilsin.

(Javob: 1) 0,413 Å; 2) 0,310 Å; 3) 0,248 Å)

2.15. Rentgen trubkasiga berilgan kuchlanishning 23 kV ga kamayishi izlanayotgan to'lqin uzunligini 2 marta orttirishi ma'lum bo'lsa, uzluksiz rentgen spektrining qisqa to'lqin chegarasi topilsin.

(Javob: 0,27 Å)

2.16. Rentgen trubkasi elektrodlariga 60 kV potensiallar ayirmasi berilgan. Bu trubkadan olingan rentgen nurlarining eng kichik to'lqin uzunligi 0,194 Å ga teng. Bu ma'lumotlardan Plank doimiysi topilsin.

(Javob:  $h=6,6 \cdot 10^{-34} \text{ J s}$ )

2.17. Fotonga muvofiq keladigan to'lqin uzunlik 0,016 Å bo'lsa, uning energiyasi, massasi va harakat miqdorini toping.

(Javob:  $\varepsilon=1,15 \cdot 10^{-13} \text{ J}$ ;  $m=1,38 \cdot 10^{-30} \text{ kg}$ ;  $p_b=4,1 \cdot 10^{-22} \text{ kg m/s}$ )

2.18. Foton massasi tinch turgan elektron massasiga teng bo'lishi uchun uning energiyasi qancha bo'lishi kerak?

(Javob: 0,51 MeV)

2.19. Litiy, natriy, kaliy va seziy uchun fotoeffektning qizil chegarasini toping.  
(Javob:  $5,17 \cdot 10^{-7}$  m;  $5,4 \cdot 10^{-7}$  m;  $6,2 \cdot 10^{-7}$  m;  $6,6 \cdot 10^{-7}$  m)

2.20. Muayyan metall uchun fotoeffektning qizil chegarasi  $2750\text{\AA}$ . Fotoeffektni vujudga keltiruvchi foton energiyasining minimal qiymati nimaga teng?

(Javob:  $\varepsilon=4,5$  eV)

2.21. To'lqin uzunligi  $\lambda=0,2$  Å bo'lgan rentgen nurlari  $90^\circ$  burchak bilan Kompton hodisasi bo'yicha sochiladi. 1) Rentgen nurlari sochilganda to'lqin uzunligining o'zgarishini, 2) tepki elektron energiyasini, 3) tepki elektron harakat miqdorini toping.

(Javob: 1)  $\Delta\lambda=0,024$  Å; 2)  $W_e = \frac{hc\Delta\lambda}{\lambda_0\lambda} = 6,6 \cdot 10^3$  eV;

3)  $p_e=4,4 \cdot 10^{-23}$  kg·m/s)

### 3. Zarralar va to'lqinlar

3.1. Kinetik energiyasi: 1) 10 keV, 2) 1 MeV bo'lgan elektron uchun de-Broyl to'lqin uzunligini toping.

(Javob: 1)  $\lambda=0,122$  Å; 2)  $\lambda=0,0087$  Å)

3.2.  $20^\circ\text{C}$  temperaturada ko'proq ehtimol tezlikda harakat qilayotgan vodorod atomi uchun de-Broyl to'lqin uzunligini toping.

(Javob:  $\lambda=1,8$  Å)

3.3. 1) 1 V va 2) 100 V potensiallar ayirmasida o'tgan elektronlar uchun de-Broyl to'lqin uzunligi topilsin.

(Javob: 1)  $\lambda=12,3$  Å; 2)  $\lambda=1,23$  Å)

3.4.  $\alpha$ -zarracha kuchlanganligi 250 V bo'lgan bir jinsli magnit maydonida  $0,83$  sm radiusli aylana bo'yicha harakat qiladi. Shu  $\alpha$ -zarracha uchun de-Broyl to'lqin uzunligini toping.

(Javob:  $\lambda=0,1$  Å)

3.5. Agar elektronning tezligi  $\vartheta=1$  Mm/s bo'lsa, elektronning to'lqin xususiyatini xarakterlovchi de-Broyl to'lqin uzunligi  $\lambda$  aniqlansin. Shunday hisob-kitob proton uchun ham bajarilsin.

(Javob: 727 pm; 0,396 pm)

3.6. Elektron  $v=200$  Mm/s tezlik bilan harakatlanadi. Elektron massasining uning tezligiga bog'liq ravishda o'zgarishi hisobga olingan holda de-Broyl to'lqin uzunligi  $\lambda$  aniqlansin.

(Javob: 2,7 pm)

3.7. Elektron uchun de-Broyl to'lqin uzunligi  $\lambda=0,1$  nm bo'lishi uchun u qanday tezlaniruvchi potensiallar farqi  $U$  ni o'tishi kerak?

(Javob: 150 V)

3.8. 1) 1 kV; 2) 1 MV – tezlaniruvchi potensiallar farqidan o'tgan protonning de-Broyl to'lqin uzunligi  $\lambda$  aniqlansin.

(Javob: 907 fm; 28,6 fm)

3.9. Agar elektronning de-Broyl to'lqin uzunligi  $\lambda$  uning Kompton to'lqin uzunligi  $\lambda_0$  ga teng bo'sa, elektron qanday tezlik bilan harakatlanmoqda?

(Javob: 212 Mm/s)

3.10. Vodorod atomining ikkinchi orbitasida turgan elektronning de-Broyl to'lqin uzunligi  $\lambda$  aniqlansin.

(Javob: 0,67 nm)

3.11. Asbob elektromagnit impulsning tarqalish tezligini qayd qildi. Asbob qanday tezlikni qayd qilgan – fazaviy tezliknimi yoki guruhiynimi? Izohlab bering.

(Javob: Asbob guruhiy tezlikni qayd etdi)

3.12. Guruhiy tezlikning umumiy ifodasini bilgan holda norelyativistik va relyativistik hollar uchun de-Broyl to'lqinining guruhiy tezligi u topilsin.

(Javob: Har ikkala holda ham guruhiy tezlik, zarraning  $v$  tezligiga teng)

3.13. Harakatlanayotgan zarra koordinatasining noaniqligini de-Broyl to'lqin uzunligiga teng deb faraz qilib, shu zarra impulsining nisbiy noanikligi  $\Delta p/p$  aniqlansin.

(Javob: 16%)

3.14.  $\Delta x \cdot \Delta p_e \geq \hbar$  noaniqliklar munosabatidan foydalanib, vodorod atomidagi elektronning eng pastki energetik sathi baholansin. Atomning chiziqli o'lchamlari  $/ \approx 0,1$  nm deb qabul qilinsin.

(Javob:  $E_{min} = 2\hbar^2/(mp) = 15$  eV)

#### 4. Kvant mexanikasining asoslari

4.1. Tomson modeli asosida vodorod atomining radiusini va uning nurlanishining to'lqin uzunligini hisoblang. Vodorod atomini ionlashtirish energiyasi  $E=13,6$  eV.

(Javob:  $r=1,6 \cdot 10^{-8}$  sm;  $\lambda=0,24$  mkm)

4.2. Tezligi  $\vartheta=6 \cdot 10^6$  m/s bo'lgan protonlar dastasi kumush folgaga normal tushmoqda. Folganing qalinligi  $d=1,0$  mkm. Protonlarning orqa yarim sferada sochilish ehtimoliyati topilsin.

(Javob:  $W=0,006$ )

4.3. Geliy ionining ( $\text{He}^+$ ) ikkinchi Bor orbitasida elektronning aylani-shining doiraviy chastotasi hisoblansin.

(Javob:  $\omega = (m_e^4 / \hbar^3) Z^2 / n^3 = 2,07 \cdot 10^{10}$  rad/s. )

4.4. Uran atomi yadrosidan kinetik energiyasi  $T=1,5$  MeV bo'lgan  $\alpha$ -zarraning  $\theta_1=60^\circ$ dan  $\theta_2=180^\circ$  gacha bo'lgan burchaklar oralig'i-da sochilishiga tegishli bo'lgan effektiv kesimlar topilsin.

(Javob:  $\Delta\sigma = \pi \left( \frac{q_1 \cdot q_2}{27} \right)^2 \left( \csc^2 \frac{\theta_1}{2} - \csc^2 \frac{\theta_2}{2} \right) = 7,3 \cdot 10^{-22} \text{ sm}^2$  . )

4.5. Elektronning vodorod atomidagi uchinchi energetik sathdan birinchisiga o'tishida chiqariladigan foton energiyasi  $\varepsilon$  hisoblansin.

(Javob: 12,1 eV)

4.6. Vodorod spektri birinchi infraqizil seriyasining (Pashen seriyasi) eng katta  $\lambda_{max}$  va eng kichik  $\lambda_{min}$  to'lqin uzunliklari topilsin.

(Javob: 1,87 mkm; 820 nm)

4.7. Vodorod atomidagi ikkinchi va uchinchi orbitalarning radiuslari  $r_2$  va  $r_3$  hisoblansin.

(Javob:  $r_m = 4\pi\epsilon_0 h^2 n^2 / (me^2)$ ;  $r^2 = 122$  pm;  $r^3 = 477$  pm)

4.8. Elektronning vodorod atomining ikkinchi orbitasida aylanish chastotasi aniqlansin.

(Javob:  $f = \frac{9}{2\pi r} = \frac{me^4}{32\pi^3 \epsilon_0^2 h^3 n^3} = 8,19 \cdot 10^{14} \text{ s}^{-1}$  )

4.9. Balmer seriyasidagi uchinchi spektral chiziqla mos keluvchi to'lqin uzunligi  $\lambda$  aniqlansin.

(Javob: 434 nm)

4.10.  $\varepsilon=16,5$  eV energiyali foton g'alayonlanmagan vodorod atomidan elektronni urib chiqardi. Atom yadrosidan uzoqda elektron qanday  $\vartheta$  tezlikka ega bo'ladi?

(Javob: 1 Mm/s)

4.11. Geliy ioni  $\text{He}^+$  ning ikkinchi energetik sathdan birinchisiga o'tishida chiqaradigan to'lqin uzunligi hisoblansin. Shunday hisob-kitob litiy ioni  $\text{Li}^{++}$  uchun ham bajarilsin.

(Javob: 30,1 nm; 13,5 nm)

4.12. Asosiy holatdagи vodorod atomi to'lqin uzunligи  $\lambda=121,5$  nm bo'lgan yorug'lik kvantini yutdi. G'alayonlangan vodorod atomidagi elektron orbitasining radiusi  $r$  aniqlansin.

(Javob: 212 pm)

4.13. Vodorod atomining  $n$ -orbitasida turgan elektronning kinetik energiyasini hisoblab chiqaring. Masalani  $n=1,2,3$  va  $\infty$  uchun hal qiling.

(Javob:  $W=2,18 \cdot 10^{-18}$  J=13,6 eV;  $W_2=5,44 \cdot 10^{-19}$  J=3,40 eV;  
 $W_3=2,42 \cdot 10^{-19}$  J=1,51 eV;  $W_\infty=0$ )

4.14. 1) Birinchi bor orbitasidagi vodorod atomi elektronining aylanish davrini; 2) uning burchak tezligini toping.

(Javob: 1)  $T=1,43 \cdot 10^{-16}$  s; 2)  $\omega=4,4 \cdot 10^{16}$  rad/s)

4.15. 1) Vodorod spektrining ultrabinafsha seriyasidagi eng katta to'lqin uzunligini toping; 2) elektron urilishidan vodorod atomlari g'alayonlanishida chiziq paydo bo'lishi uchun elektronlar qanday eng kichik tezlikka ega bo'lishi kerak?

(Javob: 1)  $\lambda=1,21 \cdot 10^{-7}$  m; 2)  $\vartheta=1,90 \cdot 10^6$  m/s)

4.17. To'lqin uzunligи  $\lambda=4860$  Å bo'lgan foton atomni nurlantirganida vodorod atomida elektronning kinetik energiyasi qanchaga o'zgargan?

(Javob: 2,56 eV)

4.18 Vodorod atomida birinchi bor orbitasida harakatlanadigan elektron uchun de-Broyl to'lqin uzunligini toping.

(Javob:  $\lambda=3,3\text{\AA}$ )

4.19 1) Bir karra ionlashgan geliy uchun birinchi bor elektron orbitasi radiusini; 2) undagi elektron tezligini toping.

(Javob: 1)  $r=2,66 \cdot 10^{-11}$  m; 2)  $\vartheta=4,37 \cdot 10^6$  m/s)

4.20. Elektronning vodorod atomining ikkinchi orbitasidagi tezligi  $\vartheta$  aniqlansin.

(Javob:  $\vartheta = \frac{e^2}{4\pi\epsilon_0 hn} = 1,09 \text{ Mm/s}$ )

## 5. Kvant mexanikasining asoslari

5.1. Shryodinger tenglamasining vaqtga bog'liq qismi  $i\hbar = \frac{\partial\psi}{\partial t} = E\psi$  ko'rinishga ega. Tenglamaning yechimi topilsin.

(Javob:  $\psi = C \exp(-iEt/\hbar)$ )

5.2.  $\psi$  funksiya chekliligi talabi nimaga asoslangan?

(Javob:  $\psi$ -funksiya chekli bo‘lgandagina  $|\psi|^2$  ni ehtimollikning zichligi sifatida fizik tahlil qilish mumkin)

(Javob:

5.3.  $|\psi(x)|^2$  birdan katta bo‘lishi mumkinmi?

(Javob: Bo‘la oladi. Zarrani  $x$  dan  $x+dx$  gacha oraliqda topish ehtimolligini ko‘rsatuvchi  $|\psi(x)|^2 dx$  ifodagina birdan kichik bo‘lishi kerak. Lekin  $|\psi(x)|^2 dx$  ifoda  $|\psi(x)|^2 > 1$  shart bajarilganda ham birdan kichik bo‘lishi mumkin)

5.4. Kengligi 1 bo‘lgan potensial o‘radagi elektronning holatini ifodalovchi to‘lqin funksiyasi ma’lum:  $\psi(x) = c_1 \sin kx + c_2 \cos kx$  chega-raviy  $\psi(0)=0$  va  $\psi(l)=0$  shartlardan foydalanim,  $c_2$  koefitsient va to‘lqin vektori  $k$  ning notrivial yechimlar mavjud bo‘ladigan qiymatlari aniqlansin.

(Javob:  $c_2=0$ ;  $k=\pi n/l$ )

5.5. Kengligi 1 bo‘lgan potensial o‘radagi elektronga  $k = \frac{\pi n}{l}$  ( $n=1,2,3,\dots$ )

to‘lqin soni to‘g‘ri keladi. Elektron energiyasi  $E$  ning to‘lqin soni  $k$  ga bog‘lanishidan foydalanim, energiyaning xususiy qiymatlari  $E_n$  uchun ifoda topilsin.

(Javob:  $E = \frac{\pi^2 \hbar^2 n^2}{2ml^2}$  )

5.6. Elektron kengligi  $l=0,5$  nm bo‘lgan potensial o‘rada turibdi. Elektron energetika sathlarining eng kichik farqi  $\Delta E$  aniqlansin. Javob elektron-voltlarda ifodalansin.

(Javob: 4,48 eV)

5.7. Potensial o‘radagi zarra holatini ifodalovchi xususiy funksiya ko‘rinishiga ega. Normalashtirish shartidan foydalanim o‘zgarmas  $c$  aniqlansin.

(Javob:  $c_n = \sqrt{2/l}$  )

5.8. Zarra potensial o‘rada asosiy holatda turibdi. Zarrani: 1) o‘raning o‘rtadagi uchdan bir qismida; 2) o‘raning chekkadagi uchdan bir qismida bir o‘lchamli bo‘lish ehtimolligi qanday?

(Javob: 1) 0,609; 2) 0,195)

5.9. Kengligi  $l$  bo‘lgan bir o‘lchamli potensial o‘rada elektron bor. Elektronning o‘ra devorlaridan teng uzoqlikda  $1/4$  intervalda, birinchi energetik sathda bo‘lish ehtimolligi  $W$  hisoblansin.

(Javob: 0,475)

5.10. Zarra kengligi  $l$  bo'lgan potensial o'rada eng pastki g'alayonlangan holatda turibdi. Zarraning o'ra devorlaridan teng uzoqlikda  $1/4$  intervalda bo'lish ehtimolligi  $W$  hisoblansin.

(Javob: 0,092)

5.11. Elektronning kengligi  $l$  bo'lgan bir o'lchamli potensial o'ra devorlaridan teng uzoqlikdagi  $1/4$  oraliqda, birinchi va ikkinchi energetik sathlarda bo'lish ehtimolliklarining nisbati  $W_1/W_2$  hisoblansin.

(Javob: 5,22)

5.12. Yadrodagi nuklonlarni chiziqli o'lchamlari  $l=10\text{ fm}$  bo'lgan kub shaklidagi uch o'lchamli potensial o'rada turibdi deb hisoblab, yadrodagi nuklonning eng pastki energetik sathi baholansin.

(Javob: 6,2 MeV)

5.13. Elektron tomonlari  $l$  bo'lgan ikki o'lchamli cheksiz chuqur kvadratsimon potensial o'rada, asosiy holatda turibdi. Elektronning quyi devorlaridan teng uzoqlikdagi kvadrat bilan cheklangan va yuzasi quyi yuzasining  $1/4$  qismini tashkil qiladigan sohada bo'lish ehtimolligi aniqlansin.

(Javob: 0,67)

5.14. Elektronning tomonlari  $l_1, l_2, l_3$  bo'lgan uch o'lchamli cheksiz chuqur potensial o'radagi holatini tasvirlovchi xususiy  $\psi$  funksiya

$$\psi_{n_1n_2n_3} = C \sin \frac{\pi n_1}{l_1} x \sin \frac{\pi n_2}{l_2} y \sin \frac{\pi n_3}{l_3} z \quad \text{dagi } C \text{ koefitsient normalashtirish shartidan aniqlansin.}$$

(Javob:  $C = \frac{2\sqrt{2}}{\sqrt{l_1 l_2 l_3}}$ )

5.15.  $E=100$  eV energiyali elektron balandligi  $U=64$  eV bo'lgan potensial to'siqqa tegadi. Elektronning to'siqdan qaytish ehtimolligi  $W$  hisoblansin.

(Javob: 0,0625)

5.16. Protonning potensial to'siqdan qaytish koefitsienti  $\rho=2,5 \cdot 10^{-5}$ . To'siqning balandligi  $U$  to'siqqa tushayotgan protonlar kinetik energiyasi  $T$  ning necha foizini tashkil qiladi?

(Javob: 2%)

5.17. Elektron kengligi  $d=0,5$  nm bo'lgan to'g'ri burchakli potensial to'siq orqali o'tadi. To'siqning balandligi  $U$  elektronning energiyasi  $E$  dan  $1\%$  ga katta. Agar elektronning energiyasi: 1)  $E=10$  eV; 2)  $E=100$  eV bo'lsa, shaffoflik koefitsienti  $D$  hisoblansin.

(Javob: 0,2;  $6,5 \cdot 10^{-3}$ )

## 6. Bir elektronli atomlar

6.1. Vodorod atomi asosiy holatda. Elektronning atomdagи holatini tavsiflovchi xususiy to'lqin funksiya  $\psi(r) = c \cdot e^{-r/a}$  ko'rinishga ega (bunda  $c$  – ma'lum doimiy). Normalashtirish shartidan  $c$  doimiy topilsin.

(Javob:  $c = 1/\sqrt{\pi a^3}$ )

6.2. Elektronning vodorod atomidagi asosiy holatini tasvirlovchi xususiy funksiya  $\psi(r) = ce^{-r/a}$  ko'rinishga ega, bu yerda  $a = 4\pi\epsilon_0\hbar^2/(e^2m)$  (Bor radiusi). Elektronning bo'lish ehtimoli eng katta bo'lgan  $r$  masofa aniqlansin.

(Javob:  $r = \pi\epsilon_0\hbar^2/(e^2m)$ )

6.3. Vodorod atomida asosiy holatdagi elektron  $\psi(r) = ce^{-r/a}$  to'l-qin funksiyasi bilan tavsiflanadi. Elektronning  $r=0,5a$  va  $r=1,5a$  radiusli  $\Delta r=0,01a$  qalinlikdagi sferik qatlama bo'lish ehtimolliklarining nisbati  $\omega_1/\omega_2$  aniqlansin.

(Javob: 0,825)

6.4. Vodorod atomi asosiy holatda. 1) Elektronning radiusi Bor radiusi  $a$  ga teng sfera bilan chegaralangan soha ichida bo'lishining ehtimolligi  $\omega_1$ ; 2) elektronning shu sohadan tashqarida bo'lishining ehtimolligi  $\omega_2$ ; 3) ehtimolliklarning nisbati  $\omega_1/\omega_2$  hisoblansin. To'lqin funksiyasi ma'lum deb

hisoblansin:  $\psi_{100}(r) = \frac{1}{\sqrt{\pi a^3}} e^{-r/a}$ .

(Javob: 0,324; 0,676; 2,09)

6.5. Atomda: 1)  $s$ -holatda; 2)  $p$ -holatda turgan elektron orbital harakatining impuls momenti  $L$  hisoblansin.

(Javob: 1) 0; 2)  $1,50 \cdot 10^{-34} \text{ J}\cdot\text{s}$ )

6.6. Atomdagи elektron orbital harakatining impuls momenti  $L_e$  ning, tashqi magnit maydon yo'nalishidagi proyeksiyasining ehtimoliy qiymatlari aniqlansin. Elektron  $d$ -holatda.

(Javob: 0;  $1,55 \cdot 10^{-34} \text{ J}\cdot\text{s}$ ;  $2,11 \cdot 10^{-34} \text{ J}\cdot\text{s}$ )

6.7. Dastlabki paytda asosiy holatda bo'lgan vodorod atomi  $\epsilon=10,2$  eV energiyali yorug'lik kvantini yutdi. Elektronning orbital harakat impuls momenti  $\Delta L_e$  ning o'zgarishi aniqlansin. Elektron g'alayonlangan atomda  $p$ -holatda.

(Javob:  $1,49 \cdot 10^{-34} \text{ J}\cdot\text{s}$ )

6.8. Elektron atomda  $f$ -holatda. Elektron impulsining orbital momenti  $L_e$  va impuls momentining tashqi magnit maydon yo'nalishidagi proyeksiyasi  $Z_{e\max}$  ning maksimal qiymati topilsin.

(Javob:  $\hbar\sqrt{12} = 3,46\hbar$ ;  $3\hbar$ )

6.9. Vodorod atomidagi elektron orbital harakatining impuls momenti  $L_e = 1,83 \cdot 10^{-34} \text{ J}\cdot\text{s}$ . Elektronning orbital harakati natijasida vujudga kelgan me magnit momenti aniqlansin.

(Javob:  $1,61 \cdot 10^{-23} \text{ J/Tl}$ )

6.10. Vodorod atomida  $2p$ -holatda bo'lgan elektronning to'liq energiyasi  $E$ , orbital harakatining impuls momenti  $L$  va magnit momenti  $\mu$  hisoblansin.

(Javob:  $-3,4 \text{ eV}$ ;  $1,50 \cdot 10^{-34} \text{ J}\cdot\text{s}$ ;  $1,31 \cdot 10^{-23} \text{ J/Tl}$ )

6.11. Elektron impulsining spin momenti  $L$  va shu momentning tashqi magnit maydon yo'nalishidagi proyeksiyasi  $L_z$  hisoblansin.


(Javob:  $0,912 \cdot 10^{-34} \text{ J}\cdot\text{s}$ ;  $0,528 \cdot 10^{-34} \text{ J}\cdot\text{s}$ )

6.12.  $9=0,6 \text{ km/s}$  tezlikka ega bo'lgan kumush atomlari tor tirqishdan o'tkazildi va bir jinsli bo'lmasidan magnit maydon induksiyasi chiziqlariga tik yo'naltirildi (Shtern-Gerlax tajribasi).  $l=6 \text{ sm}$  ga cho'zilgan bu maydonda dasta ikkiga ajraldi. Maydondan chiqishda ajralgan dastaning tashkil etuvchilar orasidagi masofa  $b=3 \text{ mm}$  bo'lsa, magnit maydonning bir jinslimaslik darajasi  $\partial B / \partial z$  aniqlansin. Kumush atomlari asosiy holatda.

(Javob:  $5,8 \text{ kTl/m}$ )

6.13. Shtern va Gerlax tajribasida seziy atomlarining (asosiy holatdagi) ingichka dastasi ko'ndalang bir jinslimas magnit maydon orqali o'tib  $E$  ekranga tushadi (1-rasm). Ekranda ajralgan dastani tashkil etuvchilar orasidagi  $b$  masofa  $6 \text{ mm}$  ga teng bo'lishi uchun magnit maydonning bir jinslimaslik darajasi  $\partial V / \partial z$  qanday bulmog'i kerak?  $l_1=l_2=10 \text{ sm}$  deb qabul qilinsin. Seziy atomlarining tezligi  $0,3 \text{ km/s}$  ga teng.

(Javob:  $432 \text{ Tl/m}$ )



6.14. Kumush atomlarining ingichka dastasi  $l_1=4 \text{ sm}$  ga cho'zilgan bir jinslimas ( $\partial B / \partial z = 1 \text{ kTl/m}$ ) magnit maydondan o'tishda ikki dastaga ajraldi. Kuzatish ekrani magnit maydonining chegarasidan  $l_2=10 \text{ sm}$  masofaga uzoqlashtirilgan (1-rasm). Agar ekranda ajralgan dastaning tashkil etuvchilar orasidagi  $b$  masofa  $2 \text{ mm}$  ga teng va kumush atomlari  $9=0,5 \text{ km/s}$  tezlikka ega bo'lsa, atom magnit momentining magnit induksiya vektorining yo'nalishidagi proyeksiyasi  $\mu_L$  (Bor magnitonlarida) aniqlansin.

(Javob:  $-\mu_B$ ,  $+\mu_B$ )

## 7. Ko‘p elektronli atomlar

7.1. Ushbu 1) H; 2) He; 3) Be; 4) Li; 5) B atomlar uchun asosiy termlar yozilsin.

(Javob: 1)  $^2S_{1/2}$ ; 2)  $^1S_0$ ; 3)  $^2S_{1/2}$ ; 4)  $^1S_0$ ; 5)  $^2P_{1/2}$ )

7.2. Atomlarning ushbu: 1)  $^2S$ ; 2)  $^2P$ ; 3)  $^4P$ ; 4)  $^5D$  holatlari uchun mumkin bo‘lgan termlar hisoblansin.

(Javob: 1)  $^2S_{1/2}$ ; 2)  $^2P_{1/2}$ ;  $^2P_{3/2}$ ; 3)  $^4P_{1/2}$ ;  $^4P_{3/2}$ ;  $^4P_{5/2}$ ; 4)  $^5D_0$ ;  $^5D_1$ ;  $^5D_2$ ;  $^5D_3$ ;  $^5D_4$ )

7.3. Ushbu atomlar: 1) Li; 2) Be; 3) B; 4) C; 5) N termlarining mumkin bo‘lgan multipletligi ( $2s+l$ ) aniqlansin.

(Javob: 1) 2; 2) 1 va 3; 3) 2 va 4; 4) 1,3 va 6; 5) 2,4 va 6)

7.4.  $p$ - va  $d$ -elektronlarning Rassel-Saunders bog‘lanish turiga binoan kombinasiyasi uchun mumkin bo‘lgan barcha termlar yozilsin. Ularning spektral belgisi berilsin.

(Javob: Singlet termlar –  $^1P_1$ ,  $^1D_2$ ,  $^1F_3$ ; triplet termlar –  $^3P_{0,1,2}$ ,  $^3D_{1,2,3}$ ,  $^3F_{2,3,4}$ )

7.5.  $s$  va  $p$  holatlarda bitta valentli elektroni bo‘lgan atomlar uchun Lande ko‘paytiruvchisi  $g$  hisoblansin.

(Javob:  $s$  holatda 2;  $p$  holatda 2/3 va 4/3)

7.6. Pauli prinsipidan foydalanib, atomdagи elektronlarning qanday  $N_{\max}$  maksimal soni ushbu: 1)  $n, l, m, m$ ; 2)  $n, l, m$ ; 3)  $n, l$ ; 4)  $n$  kvant sonlarining bir xil qiymatlariga ega bo‘lishi mumkin ekanligi ko‘rsatilsin.

(Javob: 1) 1; 2) 2; 3)  $2(2l+1)$ ; 4)  $2n^2$ )

7.7. To‘ldirilgan elektron qatlami  $n=3$  kvant soni bilan xarakterla-nadi. Shu qatlama ushbu: 1)  $m=+1/r$ ; 2)  $m=-2$ ; 3)  $m=-1/2$  va  $m=0$ ; 4)  $m=l/2$  va  $l=2$  kvant sonlariga ega bo‘lgan elektronlarning soni  $N$  ko‘rsatilsin.

(Javob: 1) 9; 2) 4; 3) 2; 4) 5)

7.8. 1) Bor; 2) uglerod; 3) natriy atomlari elektron tuzilishining formulasi yozilsin.

(Javob: 1)  $1s^22s^2p^1$ ; 2)  $1s^22p^2$ ; 3)  $1s^22s^2p^63s^1$ )

7.9. Atomning  $K$ -,  $L$ - va  $M$ -elektron qatlamlarida turishi mumkin bo‘lgan  $s$ -,  $n$ - va  $d$ -elektronlarning maksimal soni nechaga teng?

(Javob: Ikkita  $s$  elektron; ikkita  $s$  elektron va oltita  $p$  elektron; ikkita  $s$  elektron, oltita  $p$  elektron va o‘nta  $d$  elektron)

7.10. Asosiy holatda: 1)  $K$ - va  $L$ -qatlamlar,  $3s$ -qobiq va  $3p$ -qobiqning yarmi; 2)  $K$ ,  $L$ - va  $M$ -qatlamlar hamda  $4s$ -,  $4p$ - va  $4d$ -qobiqlari to'ldirilgan atomlardagi elektronlarning soni  $N$  topilsin. Bular qaysi atomlar?

(Javob: 1) 15 (fosfor atomi); 2) 46 (palladiy atomi))

7.11.  $p$  va  $d$  elektronlardan iborat ikki elektronli sistemaning spektral termlari belgilarni yozing.

(Javob:  ${}^1P_1$ ;  ${}^1D_2$ ;  ${}^1F_3$ ;  ${}^3P_{0,1,2}$ ;  ${}^3D_{1,2,3}$  va  ${}^3F_{2,3,4}$ )

7.12. Qaysi element atomida  $K$ ,  $L$  va  $M$  qobiqlar  $4s$ -holat to'ldirilgan,  $4p$ -holat esa yarim to'ldirilgan?

(Javob: As)

7.13. Atomning mumkin bo'lgan maksimal to'liq mehanik momentini va unga tegishli bo'lgan spektral termning belgisi topilsin: a) natriy, valent elektronining bosh kvant soni  $n=4$ ; b) elektron konfiguratsiyasi  $1s^2 2p3d$  bo'lganda.

(Javob: a)  ${}^2F_{7/2}$ ,  $P_{\max} = \frac{\sqrt{63}}{2} \hbar$ ; b)  ${}^3F_4$ ,  $P_{\max} = 2\sqrt{5}\hbar$ )

## 8. Rentgen nurlari

8.1. Chastotalari  $6 \cdot 10^{19}$  Hz va  $7,5 \cdot 10^{19}$  Hz bo'lgan rentgen nurlarining to'lqin uzunliklari topilsin.

(Javob:  $l1=50\text{\AA}$ ;  $l2=0,04\text{\AA}$ )

8.2. Tormozlangan rentgen nurlanishining spektri qanday bo'ladi?

(Javob: Tormozlangan rentgen nurlanishi elektronlar oqimining rentgen trubka anodida tormozlanishi natijasida hosil bo'ladi. Anodga kelayotgan elektronlar turli energiyaga ega. Ularning tormozlanishida to'lqin uzunligi turlicha bo'lgan rentgen nurlari hosil bo'ladi, shunga ko'ra spektr tutash (yaxlit) bo'ladi)

8.3. Agar tutash rentgen nurlanishi spektrining minimal to'lqin uzunligi  $\lambda_{\min}=1$  nm bo'lsa, rentgen trubkasining antikatodiga tusha-yotgan elektronlarning tezligi aniqlansin.

(Javob: 21 Mm/s)

8.4. Tormozlangan rentgen nurlanishi spektridagi qisqa to'lqinli chegara  $\lambda_{\min}=15,5$  pm bo'lsa, rentgen trubkasi qanday kuchlanish ostida ishlayotganligi aniqlansin.

(Javob: 79,8 kV)

8.5. Agar Rentgen trubkasi  $U=30$  kV kuchlanish ostida ishlayotgan bo'lsa, tutash rentgen nurlanishi spektrining qisqa to'lqinli chegarasi  $\lambda_{\min}$  aniqlansin.

(Javob: 41 pm)

8.6. Skandiy xarakteristik rentgen spektrining  $K$ -seriyasidagi eng katta to'lqin uzunligi  $\lambda_{\max}$  hisoblansin.

(Javob: 304 pm)

8.7. Muayyan elementning chiziqli rentgen spektrini tekshirish natijasida  $K$ -chiziqlarning to'lqin uzunligi  $\lambda=76$  pm ekanligi topildi. Bu qaysi element?

(Javob: niobiy ( $Z=41$ ))

8.8. Rentgen nurlanishining spektrida vanadiy  $K$ -seriyasining barcha chiziqlari paydo bo'lishi uchun antikatodi vanadiy ( $Z=23$ ) bilan qoplangan rentgen trubkasiga qanday eng kichik Umin potensiallar farqini qo'yish kerak? Vanadiy  $K$ -seriyasining chegarasi  $\lambda=226$  pm.

(Javob: 5,5 kV)

8.9. Marganes ( $Z=25$ ) xarakteristik spektrining chizig'iga mos keluvchi foton energiyasi  $\varepsilon$  aniqlansin.

(Javob: 5,9 kV)

8.10. Volfram atomida elektron  $M$ -qatlamdan  $L$ -qatlamga o'tdi. Ekranlash doimiyasp s ni 5,5 ga teng deb qabul qilib, chiqarilgan fotonning to'lqin uzunligi  $\lambda$  aniqlansin.

(Javob: 0,14 nm)

8.11. Rentgen trubkasi  $U=1$  mV kuchlanish ostida ishlaydi. Rentgen nurlanishining eng kichik to'lqin uzunligi lmin aniqlansin.

(Javob: 1,24 pm)

8.12. Platina xarakteristik rentgen nurlanishi spektridagi  $K_\alpha$  chiziqqa tegishli fotonning to'lqin uzunligi  $\lambda$  va energiyasi  $\varepsilon$  hisoblansin.

(Javob: 20,5 pm; 60,5 kV)

8.13. Rentgen trubkasidagi qanday  $U_{\min}$  eng kichik kuchlanishda mis  $K_\alpha$  seriyasining chiziqlari paydo bo'la boshlaydi?

(Javob: 8,00 kV)

8.14. Mozli qonuni yordamida hisoblang: 1) alyuminiy va kobalt uchun  $K_\alpha$ -chizig'ining to'lqin uzunligini; 2) vanadiy  $K$  va  $L$  qobiqlari elektronlarining bog'lanish energiyalari orasidagi farq topilsin.

(Javob: a) Al uchun 8,43 Å; Co uchun 1,80 Å; b) taqriban 5 keV)


8.15. Rentgen trubkasida kuchlanishni  $U_1=10$  kV dan  $U_2=20$  kV gacha ko'targanda  $K$  chiziqlarining to'lqin uzunliklari oralig'i va qisqa to'lqin chegarasi  $n=3,0$  oshdi. Rentgen trubkasi antikatodi elementining tartib raqami topilsin.

$$(Javob: Z = 1 + \sqrt{\frac{2(n-1)}{3\pi\hbar c R \left( \frac{n}{eU_1} - \frac{1}{eU_2} \right)}} = 29)$$

## 9. Atom tashqi kuchlar maydonida


9.1. Atomning holati ikkita spektral term bilan xarakterlanadi. 1)  $^1S$  va  $^1P$ ; 2)  $^1D$  va  $^1F$  holatlar uchun  $S$ ,  $L$  kvant sonlari va  $J$  kvant sonining mumkin bo'lgan qiymatlari ko'rsatilsin. Bu holatlar uchun energetik sathlarning joylashuviga magnit maydoni bo'limgan hol uchun tasvirlansin.

(Javob: 1)  $^1S$  term uchun  $S=0$ ,  $L=0$ ,  $J=0$ ,  $^1P$  term uchun  $S=0$ ,  $L=1$ ,  $J=1$ ; 2)  $^1D$  term uchun  $S=0$ ,  $L=2$ ,  $J=2$ ,  $^1F$  term uchun  $S=0$ ,  $L=3$ ,  $J=3$ . Energetik sathlarning joylashuvi 2-rasmida ko'rsatilgan)



9.2. Atomning holati ikkita spektral term bilan xarakterlanadi. 1)  $^2S$  va  $^2P$ ; 2)  $^3P$  va  $^2D$ ; 3)  $^3S$  va  $^3D$  holatlar uchun kvant soni  $J$  ning mumkin bo'lgan qiymatlari ko'rsatilsin. Magnit maydon bo'limganda bu holatlar uchun spin-orbital ta'sirni (tabiiy multiplet ajralish) hisobga olib energetik sathlarning joylashuvi tasvirlansin.

(Javob:  $^1S$  term uchun  $J=1/2$ ;  $2P$  term uchun  $J=1/2, 3/2$ ; 2)  $^3P$  term uchun  $J=0, 1, 2$ ;  $^2D$  term uchun  $J=3/2, 5/2$ ; 3)  $^3S$  term uchun  $J=1$ ;  $^3D$  term uchun  $J=1, 2, 3$ . Energetik sathlarning joylashuvi 3-rasmida tasvirlangan.




9.3. Holatlari: 1)  $^2S$ ; 2)  $^2P_{3/2}$ ; 3)  $^2D_{5/2}$ ; 4)  $^1F_3$  spektral termlar bilan aniqlanadigan magnit maydonagi atomning energetik sathlarining ajralishi tasvirlansin va  $m_J$  kvant sonining mumkin bo'lgan qiymatlari aniqlansin.

(Javob: 1)  $-1/2, 1/2$ ; 2)  $-3/2, -1/2, 1/2, 3/2$ ;

3)  $-5/2, -3/2, -1/2, 1/2, 3/2, 5/2$ ;

4)  $-3, -2, -1, 0, 1, 2, 3$ . Energetik sathlarning magnit ajralishi 4-rasmda tasvirlangan)



4-rasm

9.4. Zeemannning murakkab effektida atom  $^2P_{1/2}$  term bilan aniqla-nuvchi holatdan  $^2S_{1/2}$  holatga o'tishida spektral chiziqlarning siljishi  $\Delta\omega$  hisoblansin.

Siljish birligi sifatida normal (Lorens) siljish  $\Delta\omega = \left( \frac{\mu_B}{\hbar} \right) B$  qabul qilinsin.

(Javob:  $-4/3\Delta\omega_0, -2/3\Delta\omega_0, 2/3\Delta\omega_0, 4/3\Delta\omega_0$ )

9.5.  $\lambda=0,612$  mkm bo'lgan spektral chiziq  $H$  magnit maydonida Zeemannning normal effektini aniqlaydi. Bu chiziqning chetki komponentalari oralig'i  $\Delta\lambda$  topilsin.  $H=10$  kE.

(Javob:  $\Delta\lambda = \lambda^2 eH / 2\pi mc^2 = 0,35$  Å)

9.6. Atom kuchlanganligi  $H=2,5$  kE bo'lgan magnit maydonida ajralishning to'liq kattaligi hisoblansin (kE larda): a)  $^1D$  term uchun; b)  $^3F_4$  term uchun.

(Javob: a)  $5,8 \cdot 10^{-5}$  eV; b)  $\Delta E = 2gJ\mu_B H = 14,5 \cdot 10^{-5}$  eV, bunda  $g$  – Lande faktori,  $J$  – ichki kvant soni)

## 10. Molekulalar

10.1. Vodorod molekulasi tebranishining xususiy doiraviy chastotasi  $\omega=8,08 \cdot 10^{14}$  s<sup>-1</sup>. Molekula klassik tebranishlarining amplitudasi  $A$  topilsin.

(Javob:  $A = \sqrt{\frac{h}{\mu\omega}} = 12,5$  pm)

10.2. CO molekulasi tebranishining xususiy doiraviy chastotasi  $\omega$  ni bilgan holda ( $\omega=4,08 \cdot 10^{14} \text{ s}^{-1}$ ), kvazi elastik kuchlar koefitsiyenti  $\beta$  topilsin.

(Javob:  $\beta=\mu\omega^2=1,89 \text{ kN/m}$ )

10.3. Agar angarmoniklik koefitsienti  $\gamma=0,0208$  bo'lsa, HBr molekulasi ega bo'lgan tebranma energetik sathlarning soni aniqlansin.

(Javob: 24)

10.4. H<sub>2</sub> molekulasi uchun ikkita qo'shni energetik sathlarning maksimal va minimal (noldan farqli) oraliqlari necha marta farq qiladi ( $\gamma=0,0277$ )?

(Javob: 16,2)

10.5. Xususiy doiraviy chastotasi  $\omega=2,98 \cdot 10^{14} \text{ s}^{-1}$  va angarmoniklik koefitsienti  $\gamma=9,46 \cdot 10^{-3}$  ma'lum bo'lgan O<sub>2</sub> molekulasining maksimal tebranish energiyasi  $E_{\max}$  aniqlansin.

(Javob:  $E_{\max} = \hbar \omega / (4\gamma) = 5,18 \text{ eV}$ )

10.6. Agar CO molekulasining xususiy chastotasi  $\omega=4,08 \cdot 10^{14} \text{ s}^{-1}$  va angarmoniklik koefitsienti  $\gamma=5,83 \cdot 10^{-3}$  bo'lsa, uning dissotsilanish energiyasi  $D$  (elektronvoltlarda) aniqlansin. Potensial egri chiziqda tebranma energetik sathlarning joylashuvi tasvirlansin va unda dissotsilanish energiyasi qayd etilsin.

(Javob:  $E_d = \frac{\hbar\omega(1 - 2\gamma)}{4\gamma} = 11,4 \text{ eV}$ )

10.7. Agar N<sub>2</sub> molekulasining dissotsilanish energiyasi  $D=9,80 \text{ eV}$  va xususiy doiraviy chastotasi  $\omega=4,45 \cdot 10^{14} \text{ s}^{-1}$  bo'lsa, uning angarmoniklik koefitsienti  $\gamma$  topilsin. Potensial egri chiziqda molekula energetik sathlarining joylashuvi tasvirlansin va unda dissotsilanish energiyasi qayd etilsin.

(Javob:  $\gamma = \frac{\hbar\omega}{4E_d + 2\hbar\omega} = 7,36 \cdot 10^{-3}$ )

10.8. Ikki atomli molekulaning eng past g'alayonlangan holatga mos keluvchi impuls momenti  $L$  topilsin.

(Javob:  $1,49 \cdot 10^{-34} \text{ J}\cdot\text{s}$ )

10.9. Ikki atomli molekulaning birinchi aylanma sathdan ikkinchisiga o'tishida uning impuls momentining o'zgarishi  $\Delta L$  aniqlansin.

(Javob:  $1,10 \cdot 10^{-34} \text{ J}\cdot\text{s}$ )

10.10. Birinchi g'alayonlangan aylanma sathda turgan Sa molekulaning aylanma harakati burchak tezligi  $\omega$  aniqlansin. Yadrolararo masofa  $d=189 \text{ pm}$ .

(Javob:  $1,57 \cdot 10^{-11} \text{ J}\cdot\text{s}$ )

10.11. Agar yadrolararo masofasi  $d=113$  pm bo'lsa, CO molekulasi uchun aylanish doimiysi  $B$  hisoblansin. Javob millielektron-voltlarda ifodalansin.  
(Javob: 0,238 MeV)

10.12. Aylanma harakat energiyasi  $E=2,16$  MeV bo'lgan kislород molekulasining impuls momenti  $L$  topilsin.  
(Javob:  $3,66 \cdot 10^{-34}$  J·s)

10.13. Agar CO molekulasi chiqaradigan sof aylanma spektrning qo'shni chiziqlari orasidagi  $\Delta E$  intervallar  $0,48$  meV ga teng bo'lsa. CO molekulasining inersiya momenti  $J$  va yadrolararo masofasi  $d$  topilsin.

(Javob:  $14,6 \cdot 10^{-46}$  kg·m<sup>2</sup>; 113 pm)

10.14. HCl molekulasi uchun energiyalarining farqi  $\Delta E_{+1,+2}=7,86$  meV bo'lgan ikkita qo'shni sathlarning aylanma kvant soni z aniqlansin.

(Javob: 22 va 3)

10.15. Sof aylanma spektrga taalluqli  $n=1250$  mkm to'lqin uzunligiga ega bo'lgan spektral chiziq chiqarishida azot molekulasining impulsi qanchaga o'zgarishi aniqlansin.

(Javob:  $-1,035 \hbar$  ( $J=2 \rightarrow J=1$ ))

10.16. N<sub>2</sub> molekulasi uchun ushbular topilsin: 1) agar yadrolararo masofa  $d=110$  pm bo'lsa, inersiya momenti  $J$ ; 2) aylanish doimiysi  $B$ ; 3) molekulaning uchinchi aylanma energetik sathdan ikkinchisiga o'tishida energiyaning o'zgarishi  $|\Delta E|$ . Nisbiy atom massasi  $A_N=14$ .

(Javob: 1)  $1,40 \cdot 10^{-46}$  kg·m<sup>2</sup>; 2) 0,259 MeV; 3)  $6 V=1,55$  neV)

10.17. Agar CH molekulasining sof aylanma nurlanish spektrining qo'shni chiziqlari orasidagi intervallar  $\Delta\nu=29$  sm<sup>-1</sup> bo'lsa, bu molekulaning yadrolari orasidagi  $d$  masofa topilsin.

(Javob: 112 pm)

10.18. HCl molekulasining sof aylanma spektri ikkita qo'shni spektral chiziqlarining to'lqin uzunliklari  $\nu_1$  va  $\nu_2$  mos ravishda 117 mkm va 156 mkm larga teng. HCl molekulasi uchun aylanish doimiysi (sm<sup>-1</sup>) hisoblansin.

(Javob:  $B = \frac{1}{2} \left( \frac{1}{\lambda_1} - \frac{1}{\lambda_2} \right) = 10,7 \text{ sm}^{-1}$ )

10.19. Aylanma kvant soni z bo'lgan ikki atomli molekula energetik sathlarining qo'shilish (aylanish) karraliligi aniqlansin.

(Javob:  $2J+1$ )

## 11. Qattiq jismlar

11.1. Agar eng yaqin qo'shni atomlari orasidagi  $d$  masofa  $0,304 \text{ nm}$  ga teng bo'lsa, kristallning nisbiy atom massasi aniqlansin. Panjara hajmi markazlashtirilgan kubsimon singoniyali. Kristallning zichligi  $\rho = 534 \text{ kg/m}^3$ .

(Javob: 6,95 (litiy))

11.2. Quyidagi kristallarning panjara doimiysi  $a$  va eng yaqin qo'shni atomlari orasidagi  $d$  masofa topilsin: 1) alyuminiy (qirrasida markazlashtirilgan kubsimon singoniyali panjara); 2) volfram (hajmi markazlashtirilgan kubsimon singoniyali panjara).

(Javob: 1)  $0,404 \text{ nm}$ ; 2)  $0,286 \text{ nm}$ ; 2)  $0,316 \text{ nm}$ ; 0,274 nm)

11.3. Zich joylashgan geksogonal tuzilishga ega bo'lgan magniy kristalli panjarasining doimiylari  $a$  va  $c$  lar aniqlansin. Magniy kristallining zichligi  $\rho = 1,74 \cdot 10^3 \text{ kg/m}^3$ .


(Javob: 0,320 nm; 0,521 nm)

11.4. Zich joylashgan geksogonal tuzilishga ega bo'lgan berilli kristalli panjarasining doimiysi  $a$  hisoblansin. Panjara parametri  $a=0,359 \text{ nm}$ . Berilli kristallining zichligi  $\rho = 1,82 \cdot 10^3 \text{ kg/m}^3$ .

(Javob: 0,23 nm)

11.5. Zich joylashgan geksogonal tuzilishga ega bo'lgan geliy kristallining ( $T=2 \text{ K}$  temperaturada) zichligi  $\rho$  topilsin. Shu temperaturada aniqlangan panjara doimiysi  $a=0,397 \text{ nm}$ .

(Javob:  $207 \text{ kg/m}^3$ )



11.6. 5-a,b,d-rasmlarda tasvirlangan  $AB$ ,  $CD$ ,  $K$  to'g'ri chiziqlar yo'nalishlarining ko'rsatkichlari topilsin.

(Javob: [110]; [111]; [101])

11.7. Agar  $T=20 \text{ K}$  da kumushning molyar issiqlik sig'imi  $C=1,7 \text{ J/mol}\cdot\text{K}$  ekanligi ma'lum bo'lsa, Debayning maksimal chastotasi  $\omega_{\max}$  hisoblansin.

(Javob:  $5,2 \cdot 10^3$ )

11.8. Debay nazariyasi bo'yicha oltin kristallidagi xususiy tebranishlarning maksimal chastotasi  $\omega_{\max}$  aniqlansin. Xarakteristik temperatura  $\theta_D=180$  K.  
(Javob:  $2,36 \cdot 10^{-13} \text{ m}^{-1}$ )

11.9. Eynshteyn nazariyasiga binoan rux kristallining nolinchi molyar energiyasi  $U_{m_0}$  hisoblansin. Rux uchun xarakteristik temperatura  $\theta_E=180$  K.  
(Javob: 2,87 MJ/mol)

11.10.  $t_1=0^\circ\text{S}$  dan  $t_2=200^\circ\text{C}$  gacha isitishda nikel kristallining ichki energiyasining o'zgarishi  $\Delta U$  aniqlansin. Kristallning massasi  $m=20$  g. Issiqlik sig'imi  $C$  hisoblansin.

(Javob: 1,70 kJ)

11.11.  $N=10^{25}$  ta klassik uch o'lchovli erkli garmonik ossillyatorlardan tashkil topgan tizimning energiyasi  $U$  va issiqlik sig'imi  $C$  aniqlansin. Temperatura  $T=300$  K.

(Javob: 124 kJ; 414 J/K)

11.12. Agar kumush uchun xarakteristik temperatura  $\theta_E=165$  K bo'lsa, Eynshteynnning issiqlik sig'imi nazariyasiga muvofiq kumush atomlarining tebranish chastotasi n topilsin.

(Javob: 3,44 THz)

11.13. Eynshteynnning issiqlik sig'imi haqidagi kvant nazariyasidan foydalanib, kristallni  $T=\theta_E/2$  temperaturadан  $\Delta T=2$  K gacha qizdirishda uning molyar ichki energiyasining o'zgarishi  $\Delta U_m$  hisoblansin.

(Javob: 36 kJ/mol)

11.14. Issiqlik sig'imining klassik nazariyasiga binoan alyuminiy va mis kristallarining solishtirma issiqlik sig'imi  $C$  hisoblansin.

(Javob:  $925 \text{ J}/(\text{kg}\cdot\text{K})$ ;  $39 \text{ J}/(\text{kg}\cdot\text{K})$ )

11.15. Klassik nazariyadan foydalanib  $\text{NaCl}$  va  $\text{CaCl}_2$  kristallarining solishtirma issiqlik sig'imi  $C$  hisoblansin.

(Javob:  $825 \text{ J}/(\text{kg}\cdot\text{K})$ ;  $675 \text{ J}/(\text{kg}\cdot\text{K})$ )

11.16. Issiqlik sig'imining klassik nazariyasiga binoan  $V=1 \text{ m}^3$  hajmli alyuminiy bromid  $\text{AlBr}_3$  kristallining issiqlik sig'imi  $C$  hisoblansin. Alyuminiy bromid kristallining zichligi  $\rho=3,01 \cdot 10^3 \text{ kg/m}^3$ .

(Javob: 1,12 MJ/K)

11.17. Debay nazariyasi bo'yicha mis kristallining molyar nolinchi energiyasi  $U_{m_0}$  hisoblansin. Misning xarakteristik temperaturasi  $\theta_D=320$  K.

(Javob: 2,99 MJ)

**TEST SAVOLLARI**

**1.** Issiqlik nurlanishi qaysi vaqtida vujudga keladi?

- a) havo tarkibidagi elementlar miqdorining o'zgarishida;
- b) elektronlarning vakuumdagi harakatida;
- c) rentgen nurlari elektronda sochilishida;
- d) modda atom va molekulalarining issiqlik harakati tufayli.

**2.** Absolyut qora jismning amaldagi modeli qanday?

- a) juda kichik tirqishga ega va ichki sirti qoraga bo'yagan deyarli berk bo'lgan kovak idishdan iborat qurilma;
- b) ichkari qismi qora kuya bilan to'ldirilgan kub shaklidagi idish;
- c) tashqi sirti qora rangdagi butunlay berk bo'lgan silindrsimon idishdan iborat;
- e) tushgan nurlarni to'liq qaytaradigan shisha idish.

**3.** Absolyut qora jism nurlanishi spektridagi egri chiziqlar qaysi kattaliklar orasidagi bog'lanish ifodalaydi?

- a) issiqlik nurlanishi energiyasining uzluksizligini ifodalaydi;
- b) issiqlik nurlanishi impulsining chastotalar bo'yicha taqsimlanishini ifodalaydi;
- d) absolyut qora jism nur chiqarish qobiliyatining to'lqin uzunlikka bog'liqligini ifodalaydi;
- e) issiqlik nurlanishini spektrining infraqizil sohasini ifodalaydi.

**4.** Kirxgof qonuni qaysi formulada to'g'ri ifodalangan?

$$\text{a) } \frac{E_{\lambda T}}{A_{\lambda T}} = \varepsilon_{\lambda T}; \quad \text{b) } E_{\lambda} A_{\lambda} = \varepsilon;$$

$$\text{d) } \varepsilon_{\lambda T} E_{\lambda T} = \frac{1}{\lambda_{\lambda T}}; \quad \text{e) } \frac{E}{A} = eU.$$

**5.** Jismlarning nurlanishi to'g'risidagi Plank gipotezasi qanday?

- a) jismlarning nurlanishi uzluksiz emas, balki alohida ulushlar (kvantlar) sifatida chiqariladi;
- b) jismlarning nurlanishi uzluksiz ravishda davom etib turadi;
- d) jismlarning nurlanishi temperaturaga bog'liq ravishda ortib boradi;
- e) jismlarning nurlanishi doimiy jarayondir.

**6.** Issiqlik nurlanishi to'g'risida Plank formulasi qaysi kattalikni tushuntiradi?

- a) issiqlik nurlanishi to'liq spektrida energiya taqsimlanishining zichligini tushuntiradi;

- b) absolyut qora jismning issiqlik yutishini tushuntiradi;
  - d) jismarning issiqlik chiqarishini tushuntiradi;
  - e) absolyut qora jismning nurlarni qaytarishini tushuntiradi.

7. Stefan – Bolsman qonuni qaysi kattaliklar orasidagi bog‘lanishni ifodalaydi va uning formulasi qanday ko‘rinishda?

- a) jismning nur yutish qobiliyatining jism massasiga bog'liqligini ifodalaydi;  
 b) absolyut qora jismning to'la nur chiqarish qobiliyati bilan temperatura orasidagi bog'lanishni ifodalaydi:  $E_T = \sigma T^4$ ;  
 c) jismning impuls va energiyasi orasidagi munosabatni ifodalaydi;  
 d) mikrozarralarning to'lqin va zarra xususiyatlari orasidagi bog'lanishni ifodalaydi.

8. Vin qonuni qaysi formulada to‘g‘ri ifodalangan?

- a)  $c = \lambda v$ ; b)  $\frac{h}{\lambda} = \sigma$ ;  
 d)  $h\nu = E$ ; e)  $\lambda T = b$ .

9. Reley-Jins formulasi qaysi formulada to‘g‘ri ifodalangan?

- a)  $\rho_v = \frac{8\pi v^2}{c^3} kT$ ;      b)  $\rho_v = mV$ ;

d)  $\rho_v = nkT$ ;      e)  $\rho_v = \frac{3}{2} m\omega^2$ .

**10.** Vin formulasi issiqlik nurlanishi spektrining qaysi sohasini to‘g‘ri tushuntira oladi?

- a) spektrning infraqizil sohasini;
  - b)** spektrning yuqori chastotali sohasini;
  - d) spektrning ko'zga ko'rinaradigan sohasini;
  - e) spektri to'liq ravishda tushuntira oladi.

**11.** Plank formulasi qaysi ifodada to‘g‘ri yozilgan?

- d)  $\rho_v = \frac{me^4}{b^2 n^2};$  e)  $\rho_v = \frac{h}{P}.$

**12.** Ridberg doimiysining nazariya va tajribadan olingan qiymatlari mos kelishi uchun elektron massasi o'tnida qanday massa olingan?

- a) elektron massasi o'rnidagi protonning keltirilgan massasi olingan;  
 b) elektron massasi o'rnidagi neytron massasi olingan;  
 d) elektron massasi o'rnidagi elektron va yadronning keltirilgan massasi olingan;  
 e) elektron massasi o'rnidagi proton va yadronning keltirilgan massasi olingan.

**13.** Balmerning umumlashgan formulasida  $m$  va  $n$  lar qaysi kattaliklarni bildiradi?

- a)  $m$  va  $n$  lar kvant sonlarni bildiradi;  
 b)  $m$  va  $n$  lar protonlar sonini bildiradi;  
 d)  $m$  va  $n$  lar elektronlar sonini bildiradi;  
 e)  $m$  va  $n$  lar elektron orbitalarining tartibini bildiradi.

**14.** De-Broyl to'lqinlarining guruhiy tezligi qanday tezlik?

- a) guruhiy tezlik bu umumiyligini tezlidir;  
 b) guruhiy tezlik zarrachaning o'z tezligidir;  
 d) guruhiy tezlik bu fazoviy tezlidir;  
 e) guruhiy tezlik bu mikrozarracha tezligidir.

**15.** Balmer seriyasidagi spektral chiziqlar spektrning qaysi sohasida joylashgan?

- a) spektrning qisqa to'lqinli sohasida;  
 b) spektrning uzun to'lqinli sohasida;  
 d) spektrning ultrabinafsha sohasida;  
 e) spektrning ko'zga ko'rindigan sohasida.

**16.** Pashen, Breket, Pfund seriyalari spektrning qaysi sohasida yotadi?

- a) spektrning infraqizil sohasida;  
 b) spektrning yuqori chastotali sohasida;  
 d) spektrning past chastotali sohasida;  
 e) spektrning ultrabinafsha sohasida.

**17.** Issiqlik nurlanishi spektrining yuqori chastotali sohasida energiya taqsimlanishi zichligi qaysi formulada to'g'ri ifodalangan?

$$a) P = \frac{m\theta}{r} kT;$$

$$b) \rho_v = \frac{8\pi h\nu^3}{c^3} e^{-h\nu/kT};$$

$$d) P = \frac{4\pi^3 h}{c^2} kT^2 dv;$$

$$e) P = \frac{2\pi^2 m e^4}{h^2} e^{-h\nu/kT_{dv}}.$$

**18.** Fotoeffekt qanday hodisa?

- a) yorug'lik ta'sirida moddalardan elektronning uzilib chiqishi;  
 b) Jismlarning issiqdan kengayishi;  
 d) yorug'likning turli sirtlardan qaytish hodisasi;  
 e) yorug'likning bir muhitdan ikkinchi muhitga o'tganida sinish hodisasi.

**19.** Fotoeffektning qizil chegarasini qanday tushunasiz va uning formulasi qanday?

a) spektrdagи chiziqlarning eng chetki chizig'i  $E = me^2$ ;

b) fotoeffekt hosil bo'lishi uchun chegaraviy energiyaga to'g'ri keladigan

$$\text{to'lqin uzunligi, } \lambda_r = \frac{hc}{A};$$

d) modda yutadigan energiyaning maksimal qiymati  $\lambda = \frac{1}{T}$ ;

e) eng oxirgi orbitadan elektronning uzilib chiqishi  $E = hv$ .

**20.** Fotoeffekt hodisasi metallarda qaysi elektronlarda yuz beradi?

a) erkin elektronlarda;

b) manfiy elektronlarda;

**d)** bog'langan elektronlarda;

e) valent elektronlarda.

**21.** Qaysi formulada fotoeffekt uchun Eynshteyn formulasi to'g'ri ifodalangan?

a)  $h\nu = \frac{2\pi c}{\lambda}$ ;

b)  $E = h\nu + \frac{1}{2}P$ ;

d)  $E = A + m\theta$ ;

**e)**  $h\nu = A + \frac{m\theta^2}{2}$ .

**22.** Kompton effektida qaysi kattalik o'zgarishi yuz beradi, uning formulasi qanday ko'rinishda?

a) to'lqin uzunligi,  $\Delta\lambda = \lambda - \lambda_0 = 2k \sin^2 \frac{\theta}{2}$ ;

b) elektron massasi  $Me$ ;

d) elektron zaryadi  $Ze$ ;

e) elektron spinii  $s$ .

**23.** Kompton to'lqin uzunligi (Kompton doimiysi) qanday ifodalanadi?

a)  $\lambda = nh$ ;

b)  $\lambda = 2\pi r \cdot h$ ;

d)  $\lambda = \frac{c}{v}h$ ;

**e)**  $\lambda_K = \frac{h}{m_0 c}$ .

**24.** De-Broyl gipotezasi qanday tajribalarda tasdiqlangan?

a) elektronlarning difraksiya va interferensiya hodisalarini hosil qilishda;

b) elektronlarning moddada yutilishi hodisasida;

d) De-Broyl to'lqinlarining yoyilishi hodisasida;

e) De-Broyl to'lqinlarining tebranishida.

**25.** Elektron uchun de-Broyl to'lqin uzunligi qaysi formula orqali hisoblanadi?

a)  $\lambda_e = \frac{1,2254}{\sqrt{U}}$ ;

b)  $\lambda = \frac{h}{mv}$ ;

d)  $\lambda = A + \frac{mv}{r}$ ;

e)  $\lambda = A + \frac{mv^2}{2}$ .

**26.** Geliy atomi uchun de-Broyl to'lqin uzunligi qaysi formulada aniqlanadi?

a)  $\lambda_{He} = \frac{h}{1 - e^{hv/kT}}$ ;

b)  $\lambda_{He} = \frac{1}{\sqrt{U}}$ ;

d)  $\lambda_{He} = \frac{2\pi Ze^2}{r}$ ;

e)  $\lambda_{He} = \frac{1,26}{\sqrt{T}}$  nm.

**27.** Tormozlanish rentgen nurlanishi spektrining qisqa to'lqinli chegarasi qaysi formula orqali ifodalanadi?

a)  $\lambda_{nm} = \frac{hc}{eU}$ ;

b)  $\lambda_{nm} = \frac{h}{\sqrt{E+U}}$ ;

d)  $\lambda_{nm} = \frac{h}{mv^2}$ ;

e)  $\lambda_{nm} = \frac{h}{2\pi^2 Ze^4}$ .

**28.** Rentgen nurlari necha xil bo'ladi va qanday ataladi?

a) rentgen nurlari faqat ultrabinafsha nurlardan iborat bo'ladi;

b) rentgen nurlari uch xil bo'ladi, infraqizil, ultrabinafsha va oq rentgen nurlari;

d) rentgen nurlari bir xil bo'ladi, ko'zga ko'rinishdigan nurlar;

c) rentgen nurlari ikki xil bo'ladi, tormozlanish va xarakteristik rentgen nurlari.

**29.** De-Broyl to'lqin uzunligi qanday ifodalanadi?

a)  $\lambda = c \cdot v$ ;

b)  $\lambda = \frac{h}{P}$ ;

d)  $\lambda = \frac{K}{P}$ ;

e)  $\lambda = 2\pi r$ .

**30.** De-Broyl to'lqinlari qanday tezliklar bilan tarqaladi?

a) o'rtacha va katta tezliklar bilan;

b) kosmik tezliklar bilan;

d) fazaviy va guruhiy tezliklar bilan;

c) to'lqin tezliklari bilan.

**31.** Mikrozarralar trayektoriyaga ega bo'ladimi?

- a) mikrozarralar trayektoriyaga ega bo'ladi;
- b) mikrozarralar trayektoriyaga ega bo'lmaydi;
- c) mikrozarralar aylana ko'rinishdagi trayektoriyaga ega bo'ladi;
- d) mikrozarralar to'g'ri chiziqli trayektoriyaga ega bo'ladi.

**32.**  $\psi = Ae^{-i(\omega t - kZ)}$  funksiya Shredinger tenglamasining yechimi bo'lishi

uchun u qanday shartlarni qanoatlantirishi kerak?

- a)  $\psi$ -funksiya ko'ndalang to'lqin funksiyasi bo'lishi kerak;
- b)  $\psi$ -funksiya bo'ylama to'lqin funksiyasi bo'lishi kerak;
- c)  $\psi$ -funksiya bir qiymatli, chekli va uzluksiz bo'lishi kerak;
- d)  $\psi$ -funksiya uzlukli bo'lishi kerak.

**33.** De-Broyl yassi to'lqin funksiyasi qanday ifodalanadi?

- a)  $\psi = \psi_0 e^{-xt}$ ;
- b)  $\psi = A \cdot e^{-kx}$ ;
- c)  $\psi = \psi_0 \cos \omega t$ ;
- d)  $\psi = A \cdot e^{-L(\omega t - kr)}$ .

**34.** Nozik struktura doimiyligining son qiymati qanchaga teng?

$$a) C = \left( \frac{mZ}{hc} \right)^2 = \left( \frac{1}{100} \right)^2; \quad b) b^2 = \left( \frac{m\theta^2}{e^2} \right)^2 = \left( \frac{1}{150} \right)^2;$$

$$d) a^2 = \left( \frac{e^2}{hc} \right)^2 = \left( \frac{1}{137} \right)^2; \quad e) a^2 = \left( \frac{Ze^4}{n^2} \right)^2 = \left( \frac{1}{80} \right)^2.$$

**35.** O'ta nozik struktura deganda nimani tushunasiz?

- a) atomlarning o'zaro ta'sirlashuvida elektronlar ajralishini;
- b) atomlar elektr maydonlarining o'zaro ta'sirlashuvida energetik sathlar ajralishi;
- c) elektron bilan neytronning o'zaro ta'sirlashuvi natijasida energetik sathlar ajralishini;
- e) elektronlar magnit momenti bilan yadroning kuchsiz magnit maydon momenti orasidagi o'zaro ta'sir natijasida energetik sathlar ajralishini.

**36.** Pauli prinsipi nimani ma'n qiladi?

- a) atomlarning asosiy holatlarda bo'lishini;
- b) atomlarning uyg'ongan holatlarda bo'lishini;
- d) bitta kvant holatda (energetik sathda) kvant sonlari har xil bo'lgan uchta elektron bo'lishini;

**e)** bir kvant holatda (energetik sathda) to'rtta kvant sonlari bir xil qiymatga ega bo'lgan ikkita elektron bo'lishini.

**37.** Simmetrik to'ljin funksiyasi bilan qaysi zarralar ifodalanadi?

a) spini  $\frac{1}{2}$  ga teng bo'lgan zarralar – elektronlar, protonlar, neytronlar;

b) spini  $\frac{3}{2}$  ga teng bo'lgan zarralar – adronlar;

**d)** spini butun songa teng bo'lgan zarralar – yorug'lik kvantlari,  $\pi$ - va K-mezonlar, geliy atomi yadrosi,  $\alpha$ -zarralar;

e) spini  $\frac{5}{2}$  ga teng bo'lgan zarra – giperonlar.

**38.** Shredinger tenglamasi zarraning qaysi xususiyatini hisobga oladi?

a) Shredinger tenglamasi mikrozarrachaning tezligini ifodalaydi;

b) Shredinger tenglamasi mikrozarrachaning harakat trayekto-riyasini ifodalaydi;

**d)** Shredinger tenglamasi mikrozarrachaning to'ljin xususiyatini hisobga oladi;

e) Shredinger tenglamasi zarracha tezlanishini ifodalaydi.

**39.** Kompton effekti qaysi zarralar orasidagi to'qnashuvda hosil bo'ladi?

a) elektronning yadro bilan to'qnashuvida;

b) elektronning elektron bilan to'qnashuvida;

**d)** fotonning erkin elektron bilan to'qnashuvida;

e) yadronning yadro bilan to'qnashuvida.

**40.** Atom nurlaydigan yoki yutadigan energiya qaysi formulada to'g'ri yozilgan?

a)  $E = h\nu$ ;

b)  $E = m\vartheta r$ ;

d)  $E = \frac{k}{p}$ ;

e)  $E = \frac{m\vartheta^2}{2}$ .

**41.** Yadroning zaryadi va o'lchami qanday?

a) manfiy,  $10^{-5}$  sm;

**b)** musbat,  $10^{-13}$  sm;

d) musbat,  $10^{-3}$  sm;

e) neytral,  $10^{-6}$  sm.

**42.** Atomda elektron holatini nechta kvant sonlari xarakterlaydi?

a)  $p, l$  – ikkita kvant sonlari xarakterlaydi;

- b)  $p, l, s$  – uchta kvant sonlari xarakterlaydi;  
 d)  $n, l, m_p, m_s$  – to‘rtta kvant sonlari xarakterlaydi;  
 e)  $n$  – bitta kvant sonlari xarakterlaydi.

**43.** Simob atomining «Rezonans potensiali» qanchaga teng?

- a) 8,8 eV ga;  
 b) 6,8 eV ga;  
 d) 4,9 eV ga;  
 e) 9,5 eV ga.

**44.** Frank va Gers tajribasi nimani ifodalaydi?

- a) atomda diskret energetik sathlarning mavjudligini isbotlaydi;  
 b) atomda elektronlarning borligini isbotlaydi;  
 d) yadroda proton va neytronning mavjudligini isbotlaydi;  
 e) elektron va yadro orasida o‘zaro ta’sirning mavjudligini isbotlaydi.

**45.** Atom tuzilishining Tomson modeli bo‘yicha atom radiusini aniqlash qaysi formulada to‘g‘ri yozilgan?

a)  $R = \left( \frac{e^2}{m\omega^2} \right)^{1/3};$       b)  $R = \frac{\hbar}{m\vartheta};$   
 d)  $R = \frac{m\vartheta^2}{r^2};$       e)  $R = \frac{e}{2\pi r}.$

**46.** Zarraning erkin harakati uchun Shredinger tenglamasi qaysi tenglamada to‘g‘ri yozilgan?

a)  $E = \frac{p^2}{2m};$       b)  $-\frac{\hbar^2}{2m} \frac{\partial^2 \psi}{\partial x^2} = E\psi;$   
 d)  $E = \frac{p^2}{2m} + \frac{m\vartheta^2}{2};$       e)  $\frac{\partial^2 \psi}{\partial x^2} + \frac{\partial^2 \psi}{\partial z^2} = 0.$

**47.** Chiziqli garmonik ossillyator energiyasi qaysi formulada tg‘ri ifodalangan?

a)  $E_n = \frac{8\pi m Ze^2}{\hbar^2 n^2};$       b)  $E_n = kx + m\vartheta^2;$   
 d)  $E_n = \sqrt{\frac{2mh}{k}};$       e)  $E_n = (n + \frac{1}{2})\hbar\nu.$

**48.** Rezerford tajribalarida sochilgan alfa-zarralar soni metall folga elementi zaryadiga qanday bog'liq?

- a) folga elementi zaryadi ortishi bilan sochilgan alfa-zarralar soni ortadi;
- b) element zaryadi kamayishi bilan sochilgan alfa-zarralar soni ortib boradi;
- c) sochilgan alfa-zarralar soni element zaryadiga bog'liq emas;
- e) sochilgan alfa-zarralar soni faqat zarralar tezligiga bog'liq.

**49.** Qanday energiyalar xususiy energiyalar deyiladi?

- a) Shredinger tenglamasi yechimiga ega bo'lgan diskret  $E_1, E_2, E_3, \dots$  energiya qiyamlari xususiy energiyalar deyiladi;
- b) vaqt o'tishi bilan o'zgarmaydigan energiyalar xususiy energiyalar deyiladi;
- d) zarraning potensial va kinetik energiyalari xususiy energiyalar deyiladi;
- e) zarralarning issiqlik harakatidagi energiyasi xususiy energiyalar deyiladi.

**50.** To'lqin funksiyasining normalash sharti qanday ma'noga ega?

- a) zarraning mavjudligini va harakati tezligini bildiradi;
- b) zarraning fazoning biror nuqtasida bo'lmasligining ehtimolligini bildiradi;
- d) zarraning fazoning biror nuqtasida bo'lishi ishonchli hodisa bo'lib, uning ehtimolligi birga teng bo'lishini ko'rsatadi;
- e) zarraning hajm birligidan chiqib ketishi ishonchli hodisa ekanligini bildiradi.

**51.** Noaniqlik munosabatlari qanday ma'noga ega?

- a) klassik fizikada makrozarralar uchun bo'lgan qonunlarni mikrozarralarga tatbiq qilish chegarasini ifodalaydi;
- b) mikrozarralar qonunlarini ifodalaydi;
- d) mikrozarralarga klassik fizika qonunlarini tatbiq qilish mumkinligini ifodalaydi;
- e) kvant mexanikasida zarraning impulsini o'lhash mumkinligini ifodalaydi.

**52.** Tunnel effektini qanday tushunasiz?

- a) mikrozarralarning potensial o'radan chiqsa olmasligini bildiradi;
- b) mikrozarralarning potensial to'siqdan sizib o'tishiga tunnel effekti deyiladi;
- d) mikrozarralarning potensial to'siq devoriga urilishiga tunnel effekti deyiladi;
- e) mikrozarralarning potensial o'ra devoriga urilib undan qaytishiga tunnel effekti deyiladi.

**53.** Elektronning xususiy mexanik momenti qaysi formulada to'g'ri yozilgan?

- a)  $L_S = \mu g H m$ ;
- b)  $L_S = \hbar \sqrt{s(s+1)}$ ;
- d)  $L_S = j + l + 1$ ;
- e)  $L_S = \frac{\hbar}{m g r}$ .

**54.** Elektronning orbital impuls momenti qaysi formulada to‘g‘ri ifodalangan?

a)  $L_\ell = \hbar\sqrt{\ell(\ell+1)}$ ;

b)  $L_\ell = \hbar 2\pi r$ ;

d)  $L_\ell = is$ ;

e)  $L_\ell = \frac{\hbar}{2\pi\varepsilon_0\ell^2}$ .

**55.** Atomning magnit momenti qaysi formulada to‘g‘ri yozilgan?

a)  $\mu_I = \frac{e}{2m} L = \frac{e\hbar}{2m} \sqrt{\ell(\ell+1)}$ ;

b)  $\mu_I = \sum_{i=1}^n j_i$ ;

d)  $\mu_I = g\mu_B \sqrt{I(J+1)}$ ;

e)  $\mu_I = \frac{\hbar}{mg}$ .

**56.** Bosh kvant son  $n$  ning berilgan qiymati bilan aniqlanadigan elektron qobig‘idagi elektronlarning maksimal soni qaysi formulada to‘g‘ri ifodalangan?

a)  $\sum_{\ell=0}^{\ell=n-1} 2(2\ell+1) = 2n^2$ ;

b)  $Z = 2n^2 + 1$ ;

d)  $N = n + \ell + k + 1$ ;

e)  $N = 2\ell + 2p + 2s$ .

**57.** Elektron holatlarda berilgan  $n$  va  $\ell$  kvant sonlari bilan aniqla-nadigan elektronlarning maksimal sonini aniqlashg formulasi qaysi ifodada to‘g‘ri yozilgan?

a)  $2(2\ell+1)$ ;

b)  $2(n+2)$ ;

d)  $2(h\nu + 1)$ ;

e)  $\sum_{n=1}^{\infty} \left( h\nu + \frac{mg^2}{2} \right)$ .

**58.** Molekula qanday zarra va u qanday hosil bo‘ladi?

a) Molekula berilgan moddaning eng kichik zarrasi bo‘lib, shu moddaning asosiy kimyoviy xossalariga ega bo‘ladi. Ma’lum sharoitlarda atomlar birlashib molekulani hosil qiladi;

b) Molekula moddaning ichki energiyasini aniqlaydigan zarra bo‘lib, atom yadrosidagi proton va neytronlarning birlashishidan hosil bo‘ladi.

d) Molekula moddani qizdirishda hosil bo‘ladigan zarra bo‘lib, moddaning issiqlik xossalarini ifodalaydi;

e) Molekula moddaning eng kichik zarrasi hisoblanadi va moddaning sovushida hosil bo‘ladi.

**59.** Ionli molekula qaysi javobda to‘g‘ri ko‘rsatilgan?

- a) NaCl; b) H<sub>2</sub>, Cl<sub>2</sub>;  
 d) O<sub>2</sub>; e) N<sub>2</sub>.

**60.** Quyidagi javoblarning qaysi birida kovalent bog'lanishda hosil bo'lgan molekulalari ko'rsatilgan?

- a) NaCl, HCl;  
d) H<sub>2</sub>SO<sub>4</sub>; b) H<sub>2</sub>, O<sub>2</sub>, N<sub>2</sub>, Cl<sub>2</sub>;  
e) CuSO<sub>4</sub>.

**61.** Molekula to'liq energiyasining formulasi qaysi javobda to'g'ri ifodalangan?

- a)  $E = eE$ ; b)  $E = mgh + \frac{mv^2}{2}$ ;  
 d)  $E = E_{elek} + E_{tebr} + E_{ayl}$ ; e)  $E = \frac{p^2}{2m}$ .

#### **62. Kimyoviy bog'lanishlar necha xil?**

- a) ikki xil: ion bog'lanish, kovalent bog'lanish;  
 b) besh xil: ion, induksion, kovalent, geteropolyar, gomopolyar bog'-lanishlar;  
 d) uch xil: chiziqli bog'lanish, burchakli bog'lanish, valent bog'lanish;  
 e) bir xil: kimyoviy bog'lanish.

63. Molekulaning energetik sathlarini necha turga ajratish mumkin?

- a) besh turga ajratish mumkin: ilgarilanma, aylanma, egri chiziqli, to'g'ri chiziqli va tebranma;
  - b) uch turga ajratish mumkin: elektronlar energetik sathlariga, tebranish va aylanish energetik sathlariga;
  - c) ikki turga ajratish mumkin: ilgarilanma va aylanma;
  - d) bir xil energetik sath bo'ladi: elektronlarning aylanma harakati energetik sathi.

**64.** Ikki atomli molekulaning energiyasi qanday energiyalar yig'indisidan iborat?

- a) atomning, yadroning, elektronning aylanma harakatidagi ener-giyalarini yig'indisidan iborat:  $E=E^A+E^{\bar{A}}+E^{\nu}$ ;

b) elektronning, yadrodag'i proton va neytronning energiyalari-ning yig'indisidan iborat:  $E=E^e+E^{\bar{p}}+E^{\bar{n}}$ ;

**d)** molekula elektron qobig'ining energiyasi  $E^e$ , molekula tarkibi-dagi atomlar va yadrolarning tebranma harakati energiyasi  $E^T$  va molekulaning aylanma harakati energiyasi  $E^A$  – larning yig'indisidan iborat:  $E=E^e+E^T+E^A$ ;

e) ikki elektronning orbitadagi aylanma harakati energiyalarining yig'indisidan iborat:  $E=E^e+E^{\bar{e}}$ .

**65.** Molekulalar orasida qanday o'zaro ta'sir kuchlari mavjud?

- a) dispersion, oriyentasion va induksion o'zaro ta'sir kuchlari mavjud;
- b) molekula atomlari elektronlari orasida tortishish o'zaro ta'sir kuchlari mavjud;
- c) molekula atomlari yadrolari orasida tortishish o'zaro ta'sir kuchlari mavjud;
- d) molekula atomlari yadrosidagi neytronlar orasida o'zaro itarishish kuchlari mavjud.

**66.** Qattiq jismlar necha xil holatda bo'ladi va qaysi holatlarda?

- a) uch xil: gaz, suyuq, bug';
- b) ikki xil holatda: kristall va amorf;
- c) bir xil holatda: qattiq holatda;
- d) besh xil holatda: qattiq, suyuq, gaz, amorf, yopishqoq.

**67.** Amorf jismlar qaysi javobda to'g'ri ta'riflangan?

- a) amorf jismlar "o'ta sovutilgan" suyuqlik bo'lib, ular aniq kristall xossalari ega bo'la olmaydi;
- b) amorf jismlar qizdirilgan suyuqlik bo'lib, uning xossalari suyuqlik xossalari kabi bo'ladi;
- c) amorf jismlar kristallarning bir turi hisoblanadi;
- d) amorf jismlar qattiq jismlarning anizotropik xossasiga ega bo'lgan turi hisoblanadi.

**68.** Kristall qattiq jismlarga qaysi javobda to'g'ri ta'nif berilgan?

- a) kristallar issiqlikni uzlusiz ravishda o'tkazadigan qattiq jismlardir;
- b) kristallar aniq erish, qotish temperaturasiga ega bo'lмаган qattiq jismlardir;
- c) kristallar tashqi ko'rinishidan to'g'ri geometrik shaklga ega bo'ladi. Kristallni tashkil qilgan zarralar joylashishi davriy ravishda takrorlanadi;
- d) kristallar elektr tokini o'tkazmaydigan qattiq jismlardir.

**69.** Kristallar necha xilda bo'ladi va qanday kristallar deyiladi?

- a) kristallar besh xilda bo'ladi: qattiq, suyuq, gaz, qizdirilgan va sovutilgan kristallar;
- b) kristallar bir xil bo'ladi: qattiq kristallar;
- c) kristallar ikki xil bo'ladi: qattiq va yumshoq kristallar;
- d) kristallar to'rt xil bo'ladi: ionli kristallar, valentli kristallar, molekulyar kristallar va metall kristallar.

**70.** Dyulong va PTi qonuni qaysi formulada to'g'ri ifodalangan va u qanday temperaturalarda to'g'ri bo'ladi?

a)  $C_\mu = \frac{\partial U}{\partial T} = R \cdot e^{\hbar v / kT}$ , bu qonun past temperaturalarda to'g'ri bo'ladi;

b)  $C_\mu = 3R = 6 \frac{\text{Kal}}{\text{mol} \cdot \text{K}}$ , bu qonun faqat nisbatan yuqori temperaturalarda to'g'ri bo'ladi;

d)  $C_\mu = \frac{\partial Q}{\partial T} = 15 \frac{\text{J}}{\text{mol} \cdot \text{K}}$ , bu qonun barcha temperaturalarda ham to'g'ri bo'ladi;

e)  $C_\mu = \frac{h}{1 + e^{\hbar\nu/kT}} = 3 \frac{\text{J}}{\text{mol} \cdot \text{gr}}$ , bu qonun absolyut nol temperature-larda to'g'ri bo'ladi.

**71.** Qattiq jismlar issiqlik sig'imining kvant nazariyasida atom-ning har bir erkinlik darajasiga to'g'ri keladigan o'rta energiya qaysi formulada to'g'ri ifodalangan?

a)  $E = \frac{\hbar\nu}{e^{\hbar\nu/kT} - 1};$

b)  $E = \hbar\nu;$

d)  $E = \frac{m\vartheta^2}{2}$

e)  $E = \frac{m\vartheta^2}{2} + mgh.$

**72.** Qattiq jismlar issiqlik sig'imining klassik nazariyasida uchta erkinlik darajasiga ega bo'lgan va issiqlik tebranma harakatda bo'lgan zarraning har bir erkinlik darajasiga to'g'ri keladigan energiya qaysi javobda to'g'ri keltirilgan?

a)  $E = eU;$

b)  $E = \hbar\nu;$

d)  $E = m\vartheta^2 + P;$

e)  $E = kT.$

**73.** Qattiq jismlarning issiqlik sig'imi ularning temperaturasiga bog'liqmi?

a) qattiq jismlarning issiqlik sig'imi faqat ularning uy temperaturasiga bog'liq;

b) qattiq jismlarning issiqlik sig'imi kvant nazariyasida ularning temperurasiga, ayniqsa past tempeaturalarda juda bog'liq;

d) qattiq jismlarning issiqlik sig'imi absolyut nol temperaturaga bog'liq;

e) qattiq jismlarning issiqlik sig'imi juda yuqori temperaturalardagina temperaturaga bog'liq bo'ladi.

**74.** Debayning xarakteristik temperurasining formulasi qaysi javobda to'g'ri berilgan?

a)  $T_D = \frac{\hbar\nu_{\max}}{K}$

b)  $T_D = t + 273;$

$$d) \ T_D = \frac{me^4}{h^2 n^2};$$

$$e) \ T_D = \frac{h\nu}{\lambda}.$$

75. Debayning  $T^3$  qonuni qaysi javobda to‘g‘ri ta’riflangan?

- a) qattiq jismlarning issiqlik sig‘imi temperaturaning kvadratiga to‘g‘ri proporsional;
- b) qattiq jismlarning issiqlik sig‘imi temperaturaga bog‘liq emas;
- d) qattiq jismlarning issiqlik sig‘imi absolyut nol temperatura yaqinida temperaturaning uchinchi darajasiga proporsional o‘zgaradi;
- e) qattiq jismlarning issiqlik sig‘imi temperaturaning beshinchchi darajasiga proporsional bo‘ladi.
- 
- 

### TEST JAVOBLARI

1) e	16) a	31) b	46) b	61) d
2) a	17) b	32) d	47) e	62) a
3) d	18) a	33) e	48) a	63) b
4) a	19) b	34) d	49) a	64) d
5) a	20) d	35) e	50) d	65) a
6) a	21) e	36) e	51) a	66) b
7) b	22) a	37) d	52) b	67) a
8) e	23) e	38) d	53) b	68) d
9) a	24) a	39) d	54) a	69) e
10) b	25) a	40) a	55) a	70) b
11) a	26) e	41) b	56) a	71) a
12) d	27) a	42) d	57) a	72) e
13) e	28) e	43) d	58) a	73) b
14) b	29) b	44) a	59) a	74) a
15) a	30) d	45) a	60) b	75) d

## ADABIYOTLAR

1. *Ahmadjonov O.* Fizika kursi. Optika, atom va yadro fizikasi. III tom. – Toshkent: O‘qituvchi, 1989. – 272 b.
2. *Акоста В., Кован К., Грэм Б.* Основы современной физики. // Перевод с английского В.В.Толмачева, В.Ф.Трифонова. Под редакцией А.Н.Матвеева. – Москва: Просвещение, 1981. – 495 с.
3. *Ахмезер А.И.* Атомная физика. Справочное пособие. – Киев: Наукова думка, 1988. – 264 с.
4. *Bekjonov R.B., Ahmadxo‘jayev B.* Atom fizikasi. – Toshkent: O‘qituvchi, 1979.
5. *Белый М.У., Охрименко Б.А.* Атомная физика. – Киев: Вища школа, 1984. – 271 с.
6. *Белонучкин В.Е., Заикин Д.А., Ципенюк Б.М.* Основы физики, т.2. – Москва: Физматлит, 2007. – 608 с.
7. *Борн М.* Атомная физика. – Москва: Мир, 1965.
8. *Гольдин Л.Л., Новикова Г.И.* Введение в атомную физику. – Москва: Наука, 1969. – 304 с.
9. *Горяга Г.И.* Конспект лекций по атомной физике. – Москва: Изд-во МГУ, 1974. – 433 с.
10. *Грабовский Р.И.* Курс физики. – Москва: Высшая школа, 1963. – 527 с.
11. *Иродов И.Б.* Задачи по общей физики. – Москва: МГУ, 2001.
12. *Korolev F.A.* Fizika kursi. Optika, atom va yadro fizikasi. – Toshkent: O‘qituvchi, 1978. – 616 b.
13. *Ливенцев Н.М.* Курс физики. Атомная и ядерная физика. – Москва: Высшая школа, 1978.
14. *Матвеев А.Н.* Атомная физика. – Москва: Высшая школа, 1989. – 439 с.
15. *Нерсесов Э.А.* Основные законы атомной и ядерной физики. – Москва: Высшая школа, 1988. – 288 с.
16. *Рунов Н.Н.* Строение атомов и молекул. – Москва: Просвещение, 1987.
17. *Savelev I.V.* Umumiy fizika kursi. III tom. – Toshkent: O‘qituvchi, 1976. – 449 b.
18. *Сивухин Д.В.* Общей курс физики. Атомная и ядерная физика. Ч.1. – Москва: Наука, 1986. – 415 с.
19. *Chertov A., Vorobiov A.* Fizikadan masalalar to‘plami. – Toshkent: O‘zbekiston, 1997. – 604 b.
20. *Shpol’skiy E.V.* Atom fizikasi. I tom. – Toshkent: O‘qituvchi, 1970. – 584 b.

## MUNDARIJA

So‘z boshi.....	3
Kirish.....	4

### I BOB. ISSIQLIKNING URLANISHI

1.1-\$. Issiqlik urlanishi. Muvozanatli urlanish.....	12
1.2-\$. Absolyut qora jism modeli.....	14
1.3-\$. Kirxog qonuni.....	16
1.4-\$. Issiqlik urlanishining qonunlari.....	18
1.5-\$. Plank formulasi.....	24
1.6-\$. Kvant o‘tishlar.....	26
Nazorat savollari.....	27

### II BOB. ELEKTROMAGNIT URLANISHNING KORPUSKULYAR XUSUSIYATLARI

2.1-\$. Tutash rentgen spektrining qisqa to‘lqinli chegarasi.....	28
2.2-\$. Fotoeffekt.....	30
2.3-\$. Fotoeffekt nazariyasi.....	39
2.4-\$. Fotonlar.....	42
2.5-\$. Kompton effekti.....	45
2.6-\$. Oje elektronlari.....	48
Nazorat savollari.....	49

### III BOB. ZARRALAR VA TO‘LQINLAR

3.1-\$. Mikro va makrozarralarning to‘lqin xususiyatlari.....	50
3.2-\$. De-Broyl gipotezasi.....	51
3.3-\$. De-Broyl to‘lqinlarining xususiyatlari.....	53
3.4-\$. De-Broyl gipotezasining tajribada tasdiqlanishi.....	63
3.4.1. Devisson va Jermer tajribalari.....	64
3.4.2. Tomson va Tartakovskiy tajribalari.....	69
3.5-\$. De-Broyl to‘lqinlarining statistik talqini.....	70
3.6-\$. Noaniqlik munosabatlari.....	72
Nazorat savollari.....	78

## **IV BOB. ATOM TUZILISHINING MODELLARI. VODOROD ATOMINING BOR NAZARIYASI**

4.1-§. Atom tuzilishining modellari.....	79
4.2-§. Atom tuzilishining Tomson modeli.....	80
4.3-§. Rezerford tajribalari.....	81
4.4-§. Alfa-zarralarning sochilish nazariyasi. Rezerford formulasi.....	85
4.5-§. Atom tuzilishining planetar modeli.....	90
4.6-§. Atom planetar modelining klassik fizika tasavvurlariga mos kelmasligi.....	92
4.7-§. Yadro zaryadini aniqlash.....	94
4.8-§. Bor postulatlari. Atom tuzilishining Bor nazariyasi.....	97
4.9-§. Doiraviy orbitalarni kvantlash.....	99
4.10-§. Elliptik orbitalarni kvantlash.....	104
4.11-§. Frank va Gers tajribalari.....	107
4.12-§. Vodorod atomi spektridagi qonuniyatlar.....	110
4.13-§. Spektral termlar. Kombinatsion prinsip.....	115
4.14-§. Vodorod atomining energetik sathlari diagrammasi.....	117
4.15-§. Pikering seriyasi va vodorodsimon ionlar spektrlari.....	120
4.16-§. Vodorod atomining ionlashtirish energiyasi.....	122
4.17-§. Yadro harakatini hisobga olish.....	124
4.18-§. Spektral chiziqlarning izotopik siljishi.....	129
4.19-§. Bor nazariyasining asosiy kamchiliklari.....	132
Nazorat savollari.....	133

## **V BOB. KVANT MEXANIKASINING ASOSLARI**

5.1-§. To'lqin funksiyasi.....	135
5.2-§. Shredinger tenglamasi.....	137
5.3-§. Operatorlar haqida qisqacha ma'lumot.....	146
5.4-§. Zarraning erkin harakati.....	154
5.5-§. Bir o'lchamli potensial o'radasiga zarra.....	158
5.6-§. Zarralarning potensial to'siqdan o'tishi. Tunnel effekti.....	165
5.7-§. Chiziqli garmonik ossillyator.....	170
Nazorat savollari.....	176

## **VI BOB. BIR ELEKTRONLI ATOMLAR**

6.1-§. Vodorod atomi.....	177
6.2-§. Vodorodsimon atomlar.....	184
6.3-§. Kvant sonlar.....	188
6.4-§. Elektronning orbital mehanik momenti.....	198
6.5-§. Elektronning orbital magnit momenti.....	204

6.6-§. Elektronning xususiy momenti. Spin.....	206
6.7-§. Shtern va Gerfax tajribalari.....	209
6.8-§. Elektronning to'liq mexanik va magnit momentlari .....	211
6.9-§. Atomning vektor modeli.....	217
6.10-§. Vodorod va vodorodsimon atomlar spektrining nozik strukturasi.....	219
6.11-§. Spektrlarning multipletligi.....	226
Nazorat savollari.....	228

## **VII BOB. KO'P ELEKTRONLI ATOMLAR**

7.1-§. Ko'p elektronli atomlar sistemasi.....	230
7.2-§. Ko'p elektronli atomlarda elektron sathlarining tuzilishi.....	231
7.3-§. Geliy atomi.....	233
7.4-§. Ishqoriy metallar atomlari.....	243
7.5-§. Pauli prinsipi.....	254
7.6-§. Elementlarning davriy sistemasi. Atom elektron qobiq va holatlarining elektronlar bilan to'ldirilish tartibi.....	255
7.7-§. Atomning nurlanishi va yutishidagi tanlash qoidalari.....	262
7.8-§. Atomda elektronlarning bog'lanish turlari.....	267
Nazorat savollari.....	270

## **VIII BOB. RENTGEN NURLARI**

8.1-§. Rentgen nurlarining hosil qilinishi.....	271
8.2-§. Rentgen nurlarining spektrlari.....	272
8.3-§. Mozli qonuni.....	277
8.4-§. Rentgen nurlarining difraksiyasi.....	279
8.5-§. Rentgen nurlarining moddada yutilishi.....	284
8.6-§. Rentgen nurlarining moddada sochilishi.....	288
8.7-§. Rentgen nurlarining to'lqin uzunligini aniqlash.....	290
8.8-§. Elektronning solishtirma zaryadini aniqlash.....	291
8.9-§. Rentgen nurlarining xossalari va ulardan foydalanish.....	292
Nazorat savollari.....	293

## **IX BOB. ATOM TASHQI KUCHLAR MAYDONIDA**

9.1-§. Zeemannig oddiy va murakkab effektlari.....	294
9.2-§. Pashen va Bak effekti.....	301
9.3-§. Elektron paramagnit rezonans.....	304
9.4-§. Shtark effekti.....	307

Nazorat savollari.....	314
------------------------	-----

## X BOB. MOLEKULALAR

10.1-§. Molekulalar va ularning hosil bo‘lishi. Kimyoviy bog‘lanish turlari.....	315
10.2-§. Ion bog‘lanish.....	317
10.3-§. Kovalent bog‘lanish. Vodorod molekulasining kvant nazariyasi....	320
10.4-§. Molekulalar spektrlari.....	327
10.5-§. Molekulalar energiyasi.....	332
10.6-§. Molekulyar kuchlar.....	335
10.7-§. Valentlik.....	337
Nazorat savollari.....	339

## XI BOB. QATTIQ JISMLAR

11.1-§. Qattiq jismlar. Qattiq jismlarda atomlarning bog‘lanish turlari.....	340
11.1.1. Ion bog‘lanish.....	341
11.1.2. Kovalent bog‘lanish.....	341
11.1.3. Vodorod bog‘lanish.....	342
11.1.4. Metall bog‘lanish.....	342
11.1.5. Molekulyar bog‘lanish.....	343
11.2-§. Qattiq jismlarning issiqqlik sig‘imi. Debay nazariyasi.....	344
11.3-§. Qattiq jismlarda atom energetik sathlarining ajralishi.	
Energetik zonalar.....	351
11.4-§. O‘ta oquvchanlik. Tajriba natijalari.....	355
11.5-§. O‘ta o‘tkazuvchanlik.....	364
11.6-§. Yuqori temperaturali o‘ta o‘tkazgichlar.....	369
Nazorat savollari.....	371
 Ilvalar.....	373
Amaliy mashg‘ulotlar mavzulari va masalalar.....	376
Testlar.....	397
Adabiyot.....	411

**Guljaxon AXMEDOVA  
Orifjon Baxromovich MAMATQULOV  
Isobek XOLBAYEV**

## **ATOM FIZIKASI**

*Oliy o‘quv yurtlarining 5140200 – fizik –  
bakalavr ta’lim yo‘nalishi uchun o‘quv qo‘llanma*

«ISTIQLOL» – Toshkent – 2013

*Muharrir Mirali Po‘latov  
Badiiy muharrir Husniddin Yoqubov  
Texnik muharrir Yelena Tolochko  
Musahhih Nargiza Atabayeva  
Sahifalovchi Sunnat Po‘latov*

Litsenziya raqami AI № 217. 03.08.2012-y. Bosishga ruxsat etildi 12.12.2013-y.  
Bichimi  $60 \times 84^1/_{16}$ . Shartli bosma tabog‘i 26,0. Adadi 315 nusxa. Ofset qog‘izi.  
Buyurtma № 63.

«ISTIQLOL NASHRIYOTI» MChJ, Toshkent sh., 100129, Navoiy ko‘chasi,  
30-uy. Tel: 244-94-36, faks: 244-51-98. El. pochta: istiqlol-nashr@mail.ru.

«ISTIQLOL NASHRIYOTI» MChJ matbaa bo‘limida chop etildi. Toshkent sh.,  
100129, Navoiy ko‘chasi, 30-uy.

## MUHIM TUZATISHLAR

Bet	Satr	Bosilgan	O'qilishi kerak
Yugoridan	Pastdan		
8	7	$\hbar\omega$	$\hbar\omega$
21	14	ni topish uchun	$\bar{E}$ ni topish uchun
34	20	$e$ – uning tezligi	$e$ – uning zaryadi
46	2	$Ee = m_0c^2$	$E_e = m_0c^2$
51	9	1 mk/s	1 km/s
61	4	bunda	bunday
65	13	ning qiymatlari	$\bar{U}$ ning qiymatlari
73	17, 21	Dx	$\Delta x$
85	13	10–14 m	$10^{-14}$ m
88-90	(4.9)–(4.13) formula-larda va matnda	$\theta$ yoki q	$g$
142	(5.14) formula	$i\hbar \frac{\partial \psi}{\partial t} - \hat{H}\psi$	$i\hbar \frac{\partial \psi}{\partial t} = \hat{H}\psi$
151	(5.33) formula	$\hat{H} = \frac{\hat{p}^2}{2m} + U(r) \frac{\hbar^2}{2m} \nabla^2 + U(r)$	$\hat{H} = \frac{\hat{p}^2}{2m} + U(r) = \frac{\hbar^2}{2m} \nabla^2 + U(r)$
154	(5.46) formula	$\hat{H} = -\frac{\hbar^2}{2m} \frac{\partial^2}{\partial r^2}$	$H = -\frac{\hbar^2}{2m} \frac{\partial^2}{\partial x^2}$
319	7	bog'lanish energiyasini hisobga olmagan holda	bog'lanish energiyasining qutblanish energiyasini hisobga olmagan holda
381	5	4. Kvant mekanikasining asoslari	4. Atom tuzilishining modellari.
383	3	$i\hbar = \frac{\partial \psi}{\partial t} = E\psi$	Vodorod atomining Bor nazarasi

## BA'ZI FIZIK DOIMIYLAR

Nomi	Belgisi	Xalqaro (SI) birliklar sistemasidagi qiymatlari		Nomi	Belgisi	Xalqaro (SI) birliklar sistemasidagi qiymatlari
Yorug'likning vakuumdagи tezligи	$C$	$299792458 \text{ m}\cdot\text{s}^{-1}$		Magnit doimiysi	$\mu_0$	$1,256637061 \cdot 10^{-7} \text{ H}\cdot\text{m}^{-1}$
Plank doimiysi	$h$	$6,6260755 \cdot 10^{-34} \text{ J}\cdot\text{s}$		Gravitatsia doimiysi	$G$	$6,67259 \cdot 10^{-11} \text{ N}\cdot\text{m}^2\cdot\text{kg}^{-2}$
Elektronning zaryadi	$e$	$1,60217733 \cdot 10^{-19} \text{ C}$		Elektronning Compton to'lqin uzunligи	$\lambda_C$	$2,4263096 \cdot 10^{-12} \text{ m}$
Massaning atom birligi	$\text{m.a.b.}$	$1,6605402 \cdot 10^{-27} \text{ kg}$		Giromagnit nisbat	$e/2m_e$	$8,7940 \cdot 10^{10} \text{ C}\cdot\text{kg}^{-1}$
Elektron volt	$eV$	$1 \text{ eV} = 1,60217733 \cdot 10^{-19} \text{ J}$		Elektronning klassik radiusi	$r_e$	$2,817940 \cdot 10^{-15} \text{ m}$
Elektronning tinch holatdagи massasi	$m_e$	$9,1093897 \cdot 10^{-31} \text{ kg} = 5,4857990 \cdot 10^{-4} \text{ m.a.b.}$		Bor radiusi	$r_1$	$5,29177249 \cdot 10^{-11} \text{ m}$
Protonning tinch holatdagи massasi	$m_p$	$1,6726231 \cdot 10^{-27} \text{ kg} = 1,0072765 \text{ m.a.b.}$		Bor magnetoni	$\mu_B$	$9,274096 \cdot 10^{-24} \text{ A}\cdot\text{m}^2$
Neytronning tinch holatdagи massasi	$m_n$	$1,6749286 \cdot 10^{-27} \text{ kg} = 1,0086649 \text{ m.a.b.}$		Yadro magnetoni	$\mu_N$	$5,050951 \cdot 10^{-27} \text{ A}\cdot\text{m}^2$
Molyar gaz doimiysi	$R$	$8,314511 \text{ J}\cdot\text{mol}^{-1}\cdot\text{K}^{-1}$		Elektronning magnit momenti	$\mu_e$	$9,284851 \cdot 10^{-24} \text{ A}\cdot\text{m}^2$
Avogadro soni	$N_A$	$6,0221367 \cdot 10^{23} \text{ mol}^{-1}$		Protonning magnit momenti	$\mu_p$	$1,4106203 \cdot 10^{-26} \text{ A}\cdot\text{m}^2$
Boltsman doimiysi	$k$	$1,380658 \cdot 10^{-23} \text{ J}\cdot\text{K}^{-1}$		Neytronning Kompton to'lqin uzunligи	$\lambda_n$	$1,3196217 \cdot 10^{-15} \text{ m}$
Stefan-Boltsman doimiysi	$\sigma$	$5,67051 \cdot 10^{-8} \text{ W}\cdot\text{m}^{-2}\cdot\text{K}^{-4}$		Rudberg doimiysi	$R_\infty$	$10973731,534 \text{ m}^{-1}$
Elektr doimiysi	$\epsilon_0$	$8,854187818 \cdot 10^{-12} \text{ F}\cdot\text{m}^{-1}$		Nozik struktura doimiysi	$\alpha$	$7,297351 \cdot 10^{-3}$



ISBN 978-9943-308-84-8



9 789943 308848

*"Istiqlol"*